

HISTOIRE DE LOVYS XII. ROY DE FRANCE.


PERE DV PEUPLE, ET DES
choses memorables aduenües de son Regne,
E's années 1499, 1500, & 1501.

TANT EN FRANCE, QVE AV
RECOVVREMENT DV DVCHE' DE MILAN,
en la conqueste du Royaume de Naples, & autres lieux.

Par I E A N D' A V T O N, son Historiographe.

Tirée de la Bibliothecque du Roy, & nouuellement mise en
lumiere par THEODORE GODEFROY,
Aduocat au Parlement de Paris.

*Bibliothèque
Coll. Rom.*



*Leu.
Sci. Hist.*

*Le Roy Louis XII. Holman
Don. Bureau des Finances*



A PARIS,
Chez ABRAHAM PACARD, rue Saint Iacques,
au Sacrifice d'Abraham.

M. DC. XX.
Avec Privilège du Roy.



1871

Privilege du Roy.



O V V S par la grace de Dieu Roy de France, & de Nauarre, A nos amez & feaux Conseillers tenans nos Cours de Parlement, & à tous nos autres Iusticiers, & Officiers qu'il appartiendra, Salut. A B R A H A M P A C A R D, Marchand Libraire de Paris nous a fait humblement exposer qu'il luy a esté mis es mains deux liures intitulez l'Histoire du Roy Louys XII, és années 1499, 1500, 1501, & 1502. par I E A N D' A V T O N, son Historiographe, & l'Histoire du Marechal de Boucicaut iusques en l'an 1408, & vn autre, intitulé le Canon manüel des Sinus touchantes & coupantes, supputé par Pitiscus, traduit & corrigé par Henrion, Mathematicien, lesquels il desireroit faire imprimer, requerant sur ce nos lettres. A C E S C A V S E S voulans le dict exposant estre recompensé de ses frais, mises, peine & traux, à la charge de mettre deux Exemplaires en nostre Bibliotheque, luy auons permis, & octroyé, permettons & octroyons par ces presentes, d'imprimer, vendre, & debiter les dicts liures par tout nostre Royaume, pays, terres & Seigneuries : & ce pendant l'espace de neuf ans, à compter du iour & datte des presentes. Faisant expresse inhibitions & defences à toutes personnes de faire le semblable, sur peine de confiscation des Exemplaires, & de huit cent liures d'amende, moitié à nous applicable, & l'autre au dict exposant. Voulans en outre qu'en faisant mettre au commencement ou à la fin des dicts Liures ces presentes, & vn extraict d'icelles, qu'elles soyent tenües pour signifiées & venües à la congnissance de tous, sans souffrir ne permettre luy estre fait, mis ou donné aucun empeschement au contraire. De ce faire vous donnons pouuoir & mandement special. Car tel est nostre plaisir. D O N N É à Paris le der-



nier iour de Decembre , l'an de grace mille fix cent
dix-neuf, & de nostre Regne le dixiesme.




Par le Roy en son Con seil.

P E R O C H E L ,

& scellée du grand Sée! de cire iaune
sur simple queue.

TABLE DES CHAPITRES

CONTENVS EN CESTE HISTOIRE DV
Roy Louys XII, és années 1499, 1500, & 1501.

- I.  E LA conqueste de la Comté d'Imole. p.1.
- II.  Comment le Chasteau d'Imole feut pris.
p.4.
- III.  Du siege de Forli. p.7.
- IV. Comment Madame Catherine Sforce feut prise. p.10.
- V. Du commencement de la rebellion de Milan. p.14.
- VI. Comment le Seigneur Ludouic se meit aux champs. p.15.
- VII. Comment le Roy transmeit de là les monts le Seigneur de
la Trimouille, avec cinq cent hommes d'armes. p.17.
- VIII. Comment le Comte de Ligny feut à Come au deuant de
l'armée du Seigneur Ludouic. p.18.
- IX. De la rebellion de Milan. p.20.
- X. Comment les viures du Chasteau se cuiderent perdre.
p.24.
- XI. Comment l'armée du Seigneur Ludouic feut à Come.
p.25.
- XII. Comment Come feut rendu au Seigneur Ludouic. p.27.
- XIII. Comment le Comte de Ligny, & le Seigneur Jean Iac-
ques sortirent du Chasteau de Milan, & se meirent aux
champs. p.30.
- XIV. Comment le Capitaine Louys d'Ars, avec quarante hom-
mes d'armes, & quatre vingt Archers passatout le tra-
uers de la Lombardie. p.34.
- XV. Comment le Seigneur Ludouic feut de Come à Milan.
p.41.

TABLE

- XVI. Du retour de l'armée qui estoit allée à Forli. p.43.
- XVII. Comment Tortonne feut pillée par les François. p.47.
- XVIII. Comment les François coururent deuant Vigee, en laquelle estoit le Seigneur Ludouic avec son armée. p.49.
- XIX. Comment le Roy transmeit le Cardinal d'Amboise de là les monts. p.58.
- XX. Du Conseil qui feut tenu à Mortere entre les Lieutenans du Roy, & les Capitaines de l'armée. Et de l'opinion d'aucuns d'iceux. p.59.
- XXI. Du renfort de Nouare, & du siege d'icelle. p.64.
- XXII. De l'assault que l'armée du Seigneur Ludouic donna à Nouare, Et comment plusieurs Bourguignons & Alemans y demurerent. p.66.
- XXIII. Comment les François rendirent Nouare, au Seigneur Ludouic par composition. p.72.
- XXIV. Comment six cent Alemans de ceux du Seigneur Ludouic feurent defaictz par les François entre Mortere, & Vigee. p.74.
- XXV. Comment le Seigneur Ludouic apres que les François eurent rendu Nouare feit son entrée à Milan. p.80.
- XXVI. Comment le Sire de la Trimouille avec son armée arriva à Mortere en Lombardie. Et du renfort qu'il donna aux François qui là estoient. p.82.
- XXVII. D'une Oraison que dedans la Ville de Nouare le Seigneur Ludouic eut à ses Capitaines sur le traité de son affaire. p.86.
- XXVIII. Comme grand nombre de Gentils-hommes de la Maison du Roy partirent de Lyon en poste pour vouloir estre à la bataille. p.90.
- XXIX. Comment l'armée de France saillit de Mortere pour aller

DES CHAPITRES.

- donner la bataille à l'armée du Seigneur Ludouic. p.92.
- XXX. Comment les Seigneurs des Lignes voulurent empêcher la bataille. p.96.
- XXXI. Comment l'armée de France approcha l'armée du Seigneur Ludouic. p.98.
- XXXII. Comment les Alemans & Bourguignons vuidèrent Nouare, & de la prise du Seigneur Ludouic, avec la défaite des Lombards, & Estradiots. p.106.
- XXXIII. De la prise du Cardinal Ascaigne. p.111.
- XXXIV. Comment le Cardinal d'Amboise apres la prise du Seigneur Ludouic partit de Verceil pour aller à Milan. p.116.
- XXXV. Comment le Cardinal d'Amboise receut l'amende honorable pour le Roy, que ceux de la Ville de Milan firent pour satisfaire à leur rebellion. p.117.
- XXXVI. Comment vne grosse armée feut mise sus pour enuoyer soumettre la Cité de Pise à la Seigneurie de Florence. p.120.
- XXXVII. Comment l'armée qui estoit ordonnée pour aller à Pise se meit aux champs. p.122.
- XXXVIII. Comment le Seigneur Ludouic, & le Cardinal Ascaigne feurent amenez prisonniers en France. p.123.
- XXXIX. Comment la Royne feut en voyage à Saint Claude, & d'un Tournoy qui feut faict à Lyon à sa venue. p.124.
- XL. Comment la tempeste cheut dedans la salle du Palais du Pape. p.129.
- XLI. Comment Pise feut assiegée par les François. p.130.
- XLII. Du siege de Pise, & de l'assault que les François y donnerent. p.138.
- XLIII. Comment le Roy feut visiter ses pays de Bourgogne, &

TABLE

d'aucuns traistres qui feurent lors executez à Dijon, & à Lyon sur le Rosne. p. 148.

XLIV. Comment le Roy meit son armée sus, & du nombre de gens d'armes ordonnez pour aller au voyage de Naples. p. 151.

XLV. Comment le Roy meit sur mer gros nauigaige pour aller guerroyer les Turcs qui estoient en Grece, où la Royne desploya grand tresor, & fait singler plusieurs nauires ceste part. p. 154.

XLVI. D'une reformation faicte sur les Vauldois du Daulphiné, & comment vn nommé frere Laurent Bureau, Conseiller du Roy, accompagné de plusieurs grands Clercs fait iceulx Vauldois prescher, & reformer. p. 159.

XLVII. Comment le Roy enuoya Maistre George Cardinal d'Amboise de-là les monts pour traicter de ses affaires. p. 162.

XLVIII. De l'armée de France ordonnée pour aller à Naples, & du voyage d'icelle. p. 163.

XLIX. Comment les Lieutenans du Roy, & aucuns Capitaines de l'armée feurent veoir le Pape au Palais de Rome, & d'un banquet que le Cardinal de Saint Senerin fait aux dictz Capitaines. p. 169.

L. Comment l'armée de France partit de deuant Rome pour aller à la conqueste du Royanme de Naples, & comment elle passa par la Ville de Rome à grand triomphe, & en armes. p. 170.

LI. Comment Messire Berauld Stuart, Lieutenant du Roy, transmeit deux Heraults d'armes sommer la Ville de Capoue de faire obeissance au Roy, Et de la responce de ceux de Capoue. p. 175.

DES CHAPITRES.

- LII. Comment le Duc de Valentinois avec quatre cent hommes de pied se rendit en l'armée de France, & des approches que l'on feit à Capouë. p.177.
- LIII. Comment les François assiegerent la Ville de Capouë, & des escarmouches qui la feurent faictes, & de la batterie, & des assauts qui là feurent donnez. p.183.
- LIV. Comment la Ville de Capouë feut prise d'assault par les François, destruite, & pillée, & les soldats qui estoient dedans mis à sang avec grand nombre de peuple. p.191.
- LV. Comment les Lieutenans du Roy entrerent à Naples, où ils feurent honorablement receus. p.206.
- LVI. Comment Messire Philippes de Rauestain, Gouverneur de Gennes, & Lieutenant du Roy sur l'armée de mer feut à Naples, & ne voulut tenir l'appointement faict entre les Lieutenans du Roy, d'une part, & le Roy Dom Frederic, d'autre. Et comment feut transmis le dict Roy Frederic en France à la feureté du Roy. p.209.
- LVII. Comment Louys d'Armaignac, Duc de Nemours, feut par le vouloir du Roy enuoyé à Naples pour estre Chef & Viceroy au dict Royaume de Naples. p.215.
- LVIII. Comment les Ambassadeurs de l'Archeduc veindrent deuers le Roy à Lyon, pour traicter du mariage de Madame Claude de France, & du fils du dict Archeduc. p.217.
- LIX. D'une merueille qui adueint au pays du Liege, & d'une maladie nommée la grosse verole, autrement la maladie de Naples. p.219.
- LX. D'une descente que feirent les Suisses en Lombardie sur les pays du Roy. p.225.
- LXI. Comment Messire Charles d'Amboise, Seigneur de

TABLE

Chaumont, & Lieutenans du Roy de là les monts, feur de Milan à Marquerueil, avec quatre cent hommes d'armes, les Gentils-hommes de la Maison du Roy, quatre mille hommes de pied, & deux cent Archers de la garde, & grande force d'artillerie, pour faire la guerre aux dicts Suisses. p. 233.

LXII. *Du Comte François d'Orleans, Comte de Dunois, & de la maison ouuerte qu'il teint à tous venans au camp de Marquerueil en Lombardie quinze iours durant que les François feurent là.* p. 237.

LXIII. *Comment vn Capitaine François, nommé Bernard de Ricault, avec vingt-cinq hommes à cheual rencontra les dicts Suisses, & en deffist cent.* p. 240.

LXIV. *Comment les Suisses qui estoient à Lugan deslogerent du dict lieu, & se retirerent à Belinsone, & des escarmouches que leur donnerent les François.* p. 242.

LXV. *Comment Messire Gabriel de Montfaulcon feut d'opinion que le combat ne se debuoit donner aux dicts Suisses, pour plusieurs raisons.* p. 245.

LXVI. *De la mort du Seigneur de Montpensier, & de plusieurs autres lesquels ce temps durant moururent de là les monts.* p. 254.

LXVII. *Comment la Royne sen retourna de Lyon à Blois.* p. 257.

LXVIII. *Comment le Cardinal d'Amboise feut en Ambassade deuers Maximilian Roy des Romains.* p. 258.

LXIX. *Comment vne grosse armée de François & d'autres Chrestiens feurent par mer contre les Turcs en l'Isle de Metelin pres de Constantinople.* p. 262.

LXX. *Comment les François, Geneuois, & Venitiens approcherent l'Isle de Metelin, & de la descente qu'ils y feirent, avec*

DES CHAPITRES.

les escarmouches, sieges & assauts qui là feurent faicts.
p.275.

- LXXI. *Comment les Chrestiens derechef feirent vne descente en l'Isle de Metelin, à la suasion des Venitiens.* p.301.
- LXXII. *Du retour que feirent les François de l'Isle de Metelin, & des tourmentes & naufrages qu'ils eurent sur mer.*
p.308.
- LXXIII. *Comment Philippes, Archeduc d'Austriche, & Ieanne de Castille, Archeduchesse, sa femme, veindrent en France deuers le Roy, & feurent de là en Espagne.* p.320.
- LXXIV. *Du traicté & accomplissement du mariage de Ladislaus Roy de Hongrie, & de Madamoiselle de Foix, fille du Seigneur de Candale.* p.324.
- LXXV. *Comment le Roy feut à Paris pour ses affaires, & le Legat Cardinal d'Amboise feit là son enree comme Legat en France, & de la reformation des Estats.* p.327.
- LXXVI. *Comment les Iacobins de Paris feurent chasséz de leur College, & les Cordeliers reformez.* p.329.
- LXXVII. *D'une seconde Appellation faicte en Cour de Rome par aucuns des Religieux de Saint Germain des prez lez Paris, contre Frere Iean Rolin, & Philippes Bourgoing, Commissaire sur la reformation de l'Ordre de Saint Benoist.* p.337.



CHAPITRE I.

1499.

De la conqueste de la Comté d'Imole.

PRES que au trenchant de l'espée, par la force des François, feut soubmise & cōquestée la Duché de Milan, & le Seigneur Ludouic, vsurpateur d'icelle, chassé iusques aux Allemagnes, le Roy voulut premier que retourner de Lombardie en France, dresser vne armée de quatre cent hommes d'armes, trois mille cinq cent Allemans, douze cent Gascons, & Normans, & vingt & vne pieces d'artillerie. Et la bailla à conduire au Duc de Valentinois, pour aller conquerer la Comté d'Imole, & la soubmettre au Pape, à qui de droict elle appartenoit, à cause des clefs Apostoliques. Et tenoit icelle Comté Dame Catherine Sforce, sœur bastarde du Seigneur Ludouic, & veufue du Comte Iheronime, auquel le feu Pape Sixte dernier mort auoit donné la dicte Comté. Et estoit icelle Comtesse dedans vne moult forte place nommée Forli. Et avec elle estoient le Comte Alexandre, & le Comte de Merse, ses freres, & vn ieune Gentilhomme nommé Iean de Casal, son bien familier. Lesquels auoient si à point pourueu aux villes & places de celuy pays, de soldats, viures, & artillerie,

A

1499. que des assaults de l'armée du Pape auoient peu de crainte. Toutefois sçachans entre le Pape & le Roy estre alliance, au moyen de ce doubtoient la venue des François. Dont à l'auantage auoient reparé & fortifié tous les lieux defensables de la Comté. Pour la conduicte des gens d'armes, & adresse du charroy de l'artillerie de France, le Roy ordōna le Seigneur d'Alegre, pour estre en ceste besongne son Lieutenant, le Seigneur de Champdee, le Capitaine Seigneur de Saint Prest, Messire Antoine de Bessey, Baillif de Dijon, le Seigneur de Montoisson, le Panetier, fils du Maistre de l'artillerie, le Maistre d'hôtel Concreffault. Et avec iceulx feurent trois Gentils-hommes pensionnaires du Roy, nommez Adrien de Brimeu, Antoine de Castelferrus, & Louys de Malestroit. Lesquels auoient voüé le voyage de Rome, & se voulurent trouuer à cest affaire, avec tant d'autres assurez hommes, contre l'effort de la guerre. Que pour le destour de la froide saison, qui pour lors estoit en vigueur, ne doute des ennemis, ne retarderent leur voyage. Mais le douziesme iour de Novembre, en l'an mille quatre cent quatre vingt dixneuf, preindrent leur chemin droict à Parme, au bourg Saint Denys, à Fornoue, & à Boulogne la grassie. Et tant marcherent, que sur la fin du mois de Novembre, arriuerent deuant la ville d'Imole. Ausquels feurent sans contredit les portes de la ville ouuertes, & logis offert. Et là dedans gens d'armes, & artillerie feirent demeure. Le Chasteau estoit moult aduantageux. Car avec ce qu'il estoit

1499.
Novembre.

enceinct de fortes murailles, & larges fossez, il estoit garny de trois cent Allemans, & de deux cent Bourguignons, bons soldats, avec force viures, bonne artillerie, & canonniers, au mestier tant appris, que peu de meilleurs en estoit. Mais neantmoins pour ce ne resta que toute nuit les pionniers ne meissent les mains aux trenchées. Et que le lendemain au plus matin, deuant la place ne feust l'artillerie chargée, & affustée, & de toutes parts mis le siege. Sur les six heures au matin, commença la batterie tant desmesurée, qu'il sembloit que vents & tonnerres feussent desliez. Quatre iours sans cesser dura la tempeste tant impetueuse, que tout au tour terre trembloit. Defenses & repaires demeuroient souvent au despourueu. Car nul les habitoit qui à danger mortel ne se soubmeit. Ainsi estoient à la rigueur traictez les soldats de la place. Mais tant y a, que si rigoureusement on les assailloit, vigoureusement se defendoient. Car au dedans du fort estoient plus de vingt cinq bons canonniers, qui aux François donnoient si adroit, que nul n'osoit se decourir, qu'il ne feust attainct. Tant que plusieurs demurerent deuant la place. Le dict Gentil-homme nommé Adrian de Brimeu estant au derriere d'une Chapelle, avec grand nombre d'autres, eut tout le derriere de sa brigandine emporté d'une pierre d'artillerie. Et feut moult foulle, & estonné du coup: toutesfois ne feut gueres blessé. Mais pres de luy vn sien varlet eut du mesme coup la teste emportée. Et vn ieune paige, seruiteur du Maistre d'hostel Con-

4 HISTOIRE DE LOVYS XII,
1499. cressault feut de ce coup pareillement occis. Pour
abreger, Tel eschech feut fai&t sur les François, que
du sang d'iceulx au deuant de la place en plusieurs
lieux feut la terre teincte, & enrougie. Quoy plus?
Si n'est que tant feut mortelle la batterie du dedans,
que chascun coup d'artillerie qu'ils deschargioient
portoit la mort d'un ou de plusieurs François. Mais
pourtant ne cessoient nos canonniers de donner
coups de patacs contre murailles, & boulevarts, &
ruer tout par terre. Et apres que la batterie feut si
grande, que suffisante breche leur sembla pour don-
ner l'assault, en aduisant le moyen pour ce faire, vei-
rent que les fossez estoient moult profonds, larges,
& pleins d'eauë, & la montée si haulte, & tant malai-
sée, que impossible chose sembloit à prédre par ce-
luy costé. Dont feut aduisé entre les Capitaines, &
maistres de l'artillerie, qu'on batroit un boulevard
qui estoit à l'entrée de la place. Et que par là pour-
roit-on plus à gré donner l'assault.

CHAPITRE II.

Comment le Chasteau d'Imole feut prins.

LA nuit ensuiuant, feut la grosse artil-
lerie chargée & atiltrée deuant celuy
boulevard, & au plus matin donné au
trauers. Mais non de premiere adue-
nuë. Car tant estoit ouuré de forte matiere, & artifi-
cieuse, que trois pierres des plus grosses pièces, quād

veint au donner, demeurèrent plantées moitié dedans la muraille, & moitié dehors. Entre ce boulevard, & le chasteau, auoit vn pont leuis à mont, par où l'on entroit del'vn à l'autre. Et aduiferent les canonniers, que si celuy pont pouuoit estre mis à bas, que par là pourroient les François auoir entrée. Et grands coups d'artillerie enuoyerent celle part. Et si à droict, que tost feut vne des chaines qui tenoit le pont, froissée, & mise en pieces. Ainsi ne tenoit plus la force de la place, ne la vie des soldats qui dedans estoient, que au pouuoir d'vn seul crampon, qui de tous costez de coups d'artillerie estoit assailly. A celle heure, les laquais, & pionniers, qui estoient aux tranchées, voyans que d'approcher estoit temps, sans demander à nul congé que à leurs premiers motifs, saillirent des tranchées, & à banniere desployée donnerent sur le boulevard. Ceulx de la place voyans que defence leur estoit necessaire, nuls coups d'artillerie & de traiçt par eulx feurēt mis en espargne, mais deschargez si menu sur les assaillans, que plus de trente à l'entrée y demeurèrent. Celuy qui portoit l'enseigne approcha de tāt, que ioignant du boulevard se meit à pied ferme. Et nonobstāt coups d'artillerie, & de pierres, dont il estoit batu de toutes parts, ne voulut desmarcher ne reculer vn seul pas, par crainte de mort. Dont à la fin ne feut exempt. Car il mourut sur le champ, avec assez d'autres. Mais pour ce ne cessa l'assault. Car vn autre nommé lannot, Gascon, reprēit l'enseigne. Et là de plus en plus fort iceulx pionniers & laquais

1499. assaillirent le fort. Et si chauldement poursuivirent leur entreprise, que en moins d'une heure eurent le boulevart entre mains, & coucherent la nuit dedans. Mais leur fallut avec tables, portes, & autre couverture, le iour durant fermer le dessus de leur fort, pour eux asseurer contre le danger des pierres. Ce que ne peut estre fait, que plusieurs n'en eussent à besongner. Car nul d'eulx pouvoit sortir au descouvert, pour faire pourchas de ce qui leur faisoit mestier, que du chasteau ne feussent attainés, ou faillis de bien pres. Toutesfois le logis leur demeura. Les soldats de la place eurent à celle heure la meilleure part de leur seureté perdue. Et voyans que de ceulx que moins redoubtoient estoient le plus assaillis, eurent si grand doubte du surplus, que les plus hardis n'estoient asseurez. La nuit ils voulurent mettre la main au rampart, & eulx renforcer de plus. Mais la lune qui celle nuit avoit mis ses rais aux champs descouvrit leur embusche. Tellement que par la guide de sa lumiere les canonniers François à coups d'artillerie leur imposèrent silence. Et voyans iceux Sforcians, que plus n'en pouvoient, parlerenterent sur la minuit. Et baillerent pour hostaige le frere du Capitaine de la place. Et le lendemain au matin, leurs bagues saufes se rendirent. Les François entrez, seiournerent là depuis celuy iour, qui estoit vn Dimanche, premier iour de Decembre, iusques au Vendredy ensuiuant, que l'ost preint son chemin vers Forli, Où estoit Dame Catherine Sforce avec ses gens. Et ainsi que l'armée de

1499.
Decembre.

France marchoit, les Potestats & Seigneurs des villes & places des enuironz apportèrent les clefs, & se soubmeirent à obeissance. Ainsi marcherent gens d'armes en auant, en approchant la ville de Forli, & logerent deux iours en la terre de Sainct Marc.

CHAPITRE III.

Du siege de Forli.

LE Lundy, neufiesme iour de Decembre, sur les dix heures du matin, arriuerent les François deuant la ville de Forli. Laquelle n'eut semblant de defense: mais à portes ouuertes receut l'armée Françoisse. Apres que chascun feut au couuert, par les Capitaines de l'armée, & les Maistres de l'artillerie feut le chasteau de toutes parts mis en aduis. Et apres feut trouué que par le dehors de la ville seroit le siege plus à main, & que par là estoit le chasteau plus foible. Toutefois les ennuis du froid, & empeschemens de la pluye, qui pour l'heure auoient cours, deffendirent aux François d'affaillir par celuy costé la dicte place, mais du lez de la ville. Supposé que ce feust le plus fort. Car plus à plaisir se pourroient faire les trenchées, & plus à seureté conduire & affuster l'artillerie. Et aussi que les gens d'armes seroient tousiours à couuert eulx & leurs cheuaulx. Qui en tel affaire est vn aduantaige. Et tout ce considéré, feut

1499. l'aduis mis à effect. Et la nuit commencerent les pionniers à faire fossez, & trenchées. Et les canoniers à tauldir & charger leurs menues pieces, pour battre les creneaulx, & deffenses de la place. Afin que le charroy de la grosse artillerie ne feust empêché par ceulx de dedans. Car de l'entrée d'une plaine, qui estoit entre la ville, & le chasteau, laquelle auoit de large plus d'un iect d'arc, iusques pres des fossez de la place, falloit aller à descouuert. Et aussi que les pionniers à l'affaire des trenchées, qui plus de demy mille auoient de ceuvre, ne feussent destourbez. Ainsi batirent creneaux, & deffenses, iusques à ce que les trenchées feussent faictes, & toute l'artillerie mise à poinct. Tant de coups venoient de la place, que homme n'osoit se monstrer qu'il ne feust rencontré. Tant que moult de François y demeurèrent. Mais si tost que les plus grosses pieces furent assises, & chargées, le bruit commença tant impetueux, & espouventable, que les verrieres & tuiles des maisons prochaines alloient à bas. Et auoient les canoniers François tant approché la place, que la bouche de leur artillerie apparoissoit au dedans des fossez plus d'une brasse. Et voyans ceulx du fort qu'ils estoient ainsi mal menez, dresserent leurs canons vers l'artillerie, qui du dedans des fossez leur tiroit. Et donnerent tant pres d'icelle, que sur le bort de la bouche d'une grosse couleuvrine assennerent un tel coup, que tout le long du dos de la piece fait une passée suffisante à couvrir le bras d'un homme. Les autres pieces estans

au

au descouuerr se trouuerent à telle presse que à leur dos apparoiſſoit clairement que à rencontre de coups s'estoient trouuez. Et ne feurent rant à couuerr ceulx qui estoient enterrez aux trenchées, que plusieurs ne feussent à plus de six pieds de profond rencontrez, & atraincts par les coups de ceulx de la place. Somme la batterie des deux partis estoit si chauldement menée, que l'un coup n'attendoit l'autre. Et est à penser que où tant de gens auoir, que à feste funeraile plusieurs estoient souuent conuiez. Que diray-ie? L'oraige dura plus de dixhuit heures, que nuit, que iour. Si que par la continuation, les murailles feurent tant batuës, que l'assault se pouuoit donner. Dont chascun se meit à iecter fagots, rables, portes, charrettes, & autres aydes dedans les fossez, qui estoient plains d'eauë, & moult profonds. Et ne feurent iceulx de beaucoup pres comblez, & remplis, que on ne se meit au trauers. Vn More seruiteur du Duc de Valentinois entra le premier. Apres le Seigneur d'Alegre, Louys de Malestroict, & vn archer Gascon de ceulx du Comte de Ligny, nommé Fortune. A celle entrée se monstrent ceulx qui plus auoient leur honneur pour recommandé, que craincte de leur vie. Le Duc de Valentinois voyant les Capitaines & hommes plus estimez des premiers à la charge, ne voulut rant son honneur laisser escarter, que à l'affaire ne se trouuaſt. Tant que à la foule se meit au trauers des fossez. Mais deux pas n'eust cheminé en auant, que en l'eauë ne se trouuaſt iusques au dessus des

10 HISTOIRE DE LOVYS XII,
1499. genoüils. Ce qui moult le refroidist. Aupres de luy
estoit vn des Gêtils-hommes de la Maison du Roy
nommé Castelferrus, qui à ce besoin luy feut si pro-
pice, que tout le trauers del'eau l'emporta à son
col. Chascun faisoit tel debuoir, que nul ne pou-
uoit estre attainct de lascheté. Les canonniers de la
place voyans que necessité leur apprenoit à deffen-
dre leurs vies, nulle piece d'artillerie eurent en re-
serue: mais à tel affaire meirent tout leur pouuoir
en œuvre. Tant que pour leurs coups, plus de vingt
cinq François demeurerent à l'entrée. L'assault feut
moult dur, & la defense vigoureuse. Mais tant se
monstrerent les François gens de bien à ceste be-
songne, que pour les coups d'artillerie du dedans,
ne l'empesche des fossez, ne toute la defense des
soldats du chasteau, ne demeura que à viue force
d'assault ne feut emporté.

CHAPITRE IV.

*Comment Dame Catherine Sforce
feut prise.*



N. T. R. E les perilleux dangers de tant
durs assaults, Dame Catherine Sforce
vigoureusement se maintenoit, & d'v-
ne ioyeuse chere, couurant son ducil,
donnoit à ses gens couraige. Et voyant les Fran-
çois par force gaigner le Chasteau, de rien ne se meit

en effroy. Mais avec les siens teint illec le fort contre ses ennemis, iusques à ce que pouuoir defaillist à la volonté. Les canonniers de France en tous les lieux où gens de deffense pouuoient aduifer, adressoient là leurs coups, sans espargner le repaire où estoit icelle Dame. Deux ou trois fois donnerent encontre d'elle, au trauers des creneaulx. Dont la plus part de ses aydes comme lasches abandonnerent leurs defences. Et elle sous corps féminin monstra cœur viril & vertueulx. Car oncques pour nul danger, tant luy feust-il proche, ne recula en arriere. Mais se voyant abandonné des siens, & assaillie des ennemis, avec ses plus priuez gaigna vn ravelin, estant derriere la citadele. Vn Capitaine de laquais Gascon, nommé Bertrand, auoit esté des premiers à la prinse du Chasteau. Et voyant que au fort, où estoit la Comtesse Sforce debuoit auoir quelques gens de bonne prise, entra dedans avec douze laquais Gascons, & huit Allemans, & prit la foy de la Dame. Les Allemans eurent la foy de ses freres, & de Iean du Casal, & tuerent douze ou treize Italiens, qui là se trouuerent. Durant ce, le Duc de Valentinois, le Seigneur d'Alegre, le Seigneur de Castelferrus, & vn nommé le petit Aubigny entrerent dedans le ravelin, où estoit la Comtesse. Et la prit le Duc de Valentinois. Le Comte de Merse, le Comte Alexandre, & Iean du Casal feurent mis entre les mains du Baillif de Dijon, Capitaine des Allemans. Le Duc de Valentinois emmena la Comtesse Sforce au Chasteau, avec vne sienne Dame

d'honneur nommée Argentine, & sept ou huit autres Damoiselles. Le Capitaine Bertrand, qui premier auoit eul la foy de la Dame, feut contenté par le Duc de Valentinois. Tous les Allemans, Bourguignons, & autres soldats de la place, feurent abandonnez au tranchant du glaue. Qui tant cruel leur feut, qu'e vn tout seul d'iceulx n'eust respit de mort, si n'est autant que fuite deuant leurs ennemis leur en peut donner. Et feut le chapplis si sanglant, que plus de sept cent hommes feurent illec mis à l'espée. Tout ce faiët, le Duc de Valentinois lequel estoit las, se reüta dedans vne chambre haulte, pour se defarmer, & prendre repos. Mais bon besoin luy feut de tost desloger de ce lieu. Car au desfous de luy, dedans vne salle basse, pleine de pouldre de canon, & d'artillerie, estoient entrez vingt cinq ou trente Allemans, avec du feu, pour visiter le logis. Et ainsi qu'ils faisoient leur recherche, trouuerent du vin, & là se meirent à tringuer. Tant que la douleur du breuuage leur feit oublier le danger du feu, & de la pouldre. Vn des gens du Duc de Valentinois voyant ce peril eminet, promptement l'en aduertist, lequel n'y seiourna plus, mais tost se rerira autre part loing d'illec. Bien tost apres, les Allemans feirent si bon feu, que la pouldre qui estoit dedans la salle feut soudainement toute en flamme, & la chambre dont estoit sorty le Duc de Valentinois toute embrasée. Vne partie de ceulx qui le plus pres feurent de la porte se sauuerent, ayans les visages, & les mains tous enfumez,

teincts, & noircis de feu, & de fouldphre. Les autres feurent bruslez fans secours. Celle nuit les François coucherent dedans le chasteau. Et le lendemain, à ceulx qui voulurent sortir fallut faire ponts, & planches. Car la place estoit tant forte, que au lieu mesme où l'assault auoit esté donné, sembloit la passée tant douteuse, que nul osoit par là repasser sans ayde. Apres celle deffaiete, & prise, l'armée sejourna quinze iours dedans Forli. Et premier que partir, bonne garde feut laissée pour la seureté de la place. Et puis se meit l'ost au chemin droit à Pesaro, forte ville sur le chemin de Rome, laquelle estoit du Papat, à cause d'Imole. Et lors que les gens du pays sceurent la venue des François, bruslerent par vne nuit tous les blez des enuirs, vins, foin, bois, maisons, loges, & toutes autres choses necessaires pour soutenir ost. Et sur la croupe des montaignes, plus de quatre milles de pays autour de Pesaro, n'apparoissoit que feu, & fumée. Et tout ce auoient fait les paysans, pour mettre l'ost en disette de viures, & descouure de logis. Ainsi que l'armée marchoit pour aller assieger Pesaro, lettres veindrent du Roy au Seigneur d'Alegre. Par lesquelles luy estoit mandé faire retourner les gens d'armes à toute diligence vers la Duché de Milan. Et que besoing en estoit tel, que sans brief secours icelle Duché estoit en voye d'estre reconquestée par le Seigneur Ludouic. Et à ce mandement les François se mirent au retour, sans marcher oultre. Le Duc de Valentinois avec les trois Gentils hom-

14 HISTOIRE DE LOVYS XII,
1499. mes pensionnaires dessus dictz preint le chemin de
Rome, & avec luy emmena prisonniere Dame Ca-
therine Sforce.

CHAPITRE V.

Du commencement de la rebellion de Milan.

LE Roy estoit ja de retour en France, le-
quel n'eust si tost desemparé la Duché
de Milan, que secreete mutinerie & re-
bellion ne se forgeast de iour en autre
en Lombardie. Et tant n'auoit sceu le Roy adherer
au vouloir de tous, que plusieurs ne se cuidassent
mal partis. Et entre autres vn nommé Messire Iaco-
mo André, varlet de chambre du Seigneur Ludo-
uic, duquel le Roy auoit donné la confiscation à
Maistre Theodore son Medecin, & vn autre nom-
mé Nicolas, barbier & Chyrurgien de la ville de
Milan, allerent en Allemaigne deuers le Seigneur
Ludouic, auquel dirent & promeirent maintes cho-
ses. Et luy promet iceluy Iacomo André, que
quinze iours ne seroient reuolus, qu'il n'eust pre-
mier baigné sa main au sang du Seigneur Iean Ia-
cques, & que mort ne l'eust rendu. Nicolas le Chy-
rurgien se fait fort enuers le Seigneur Ludouic de
faire mutiner la commune de Milan cōtre les Fran-
çois, qui estoient logez dedans. Et d'aller de mai-
son en maison persuader & induire chasque Mila-

nois detuer son hoste, & d'occire tous ceulx qui se pourroient trouuer au despourueu, sans en prendre vn tout seul à mercy. Et les ayant le Seigneur Ludouic tres-amplement & affectueusement remercié, leur dit que hardiment meüssent la main à ceste besongne. Et que pour les secourir tost se meütroit sus avec grosse armée. Et que pour ce faire auoit ja toute la Lombardie, & la plus part de l'Italie. Et tout ce faict, & dict, les compaignons s'en retournerent droict à Milan. Et le vingt & deuxiesme iour de Decembre, communiquerent leur affaire dedans l'Eglise des Cordeliers de Milan à vn nommé Antoine Viscomte, compere du dict Iacomo. Pensans qu'il feust des mal^l contents, & que des coniurez voulut estre. Toutesfois il fit autrement, comme celuy qui de tâche de trahison ne vouloit noircir sa renommée. Car apres qu'ils feurent separez les vns des autres, il s'en alla secretement au Chasteau de Milan, & aduertit deuëment les Capitaines de la place de la machination susdicte. Et toute à l'heure feurent iceulx traistres enuoyez prendre, lesquels feurent mis dedans la Roquete, & bien gardez, iusques à ce que telle punition d'eulx feust faicte, que le requeroit leur demerite.

CHAPITRE VI.

*Comment le Seigneur Ludouic se meit
aux champs.*

1499.



LE Seigneur Ludouic auoit si bien ou-
 uré par-messagers secrets , & lectres
 closes, enuers le peuple de Lombar-
 die, & aucunes villes d'Italie, qu'il se
 tenoit pour asseuré de la faueur & ayde d'iceulx.
 Dont auoit faict tel amas de soldats, que assez fort
 se cuidoit pour reconquerter la Duché de Milan.
 Et voulant mestre en lumiere son dessein, & execu-
 ter son vouloir, sur la fin du mois de Ianuier, preint
 les champs avec son ost, & commença à mestre
 main à l'œuvre, & assieger aucunes villes & places
 limitrophes, & aux confins des Allemaignes. Et
 voyant les garnisons qui dedans estoient pour le
 Roy, que longuement ne pourroient tenir, & se-
 cours leur estre en arriere main, se redirent par com-
 position, leurs bagues saufues. Ainsi commençoit
 le Seigneur Ludouic de recouurer pays. Et bien cui-
 doit premier que l'hyuer feust finy, auoir reconquis
 toute la Lombardie, & les pays des enuirs. Le
 Roy estant lors à Loches, en l'entrant du mois de
 Feburier, sceut au vray que le Seigneur Ludouic se-
 stoit mis aux champs, avec grosse gend'armerie,
 plein de deliberé vouloir de reconquerter par force
 la Duché de Milan, ou demeurer à la poursuite. Et
 qu'il auoit amassé plus de vingt mille soldats Alle-
 mans, Bourguignons, Suisses, Albanois, Lombars,
 & Romains. Outre le secours des nobles, & la fa-
 ueur populaire qu'il auoit en toute la Lombardie,
 & l'appuy des principales villes d'Italie, avec les-
 quelles il auoit par subtils moyens intelligence, &
 alliance.

1499.

Ianuier.

1499.

Feburier.

C H A-

CHAPITRE VII.

*Comment le Roy transmeit de là les monts
le Seigneur de la Trimouille, avec cinq
cent hommes d'armes.*

LE Roy sçachant le besoin extreme des siens, transmeit hastiuement outre les monts le Sire de la Trimouille, avec cinq cent hommes d'armes. Et feurent sous sa charge les Capitaines qui s'ensuyuent, avec leurs compaignées. Le Seigneur de Mauleon, le Seigneur de Beaumont, le Seigneur de Xandricourt, le Seigneur de Lanque, le Baillif de la Montaigne, le Seigneur de la Fayette, Lieutenant de la compaignée de l'Admiral de France, le Seigneur de Mauuoisin, Lieutenant des gens d'armes du bastard Mathieu de Bourbon, Oliuier de Ploner, Lieutenant de ceulx du Marechal de Gié, & plusieurs autres bons conducteurs, & Chefs de guerre, lesquels tirerent vers Lyon sur le Rhosne. Et là feurent quelque peu de temps à seiour, en attendant tout le nombre de leurs gens à venir. Au Sire de la Trimouille tarδοit ia qu'il n'estoit en Lombardie, pour eschauffer la guerre contre les Lombars, & lansquenets. Et bonne enuie auoit de faire au Roy à ce besoin quelque bon seruice. Et pourtant si tost que tout feut assemblé, il se meit aux champs, pour accomplir son voyage. Et à veoir la maniere & l'or-

C

18 HISTOIRE DE LOVYS XII,
1499. dre de ses gens, bien sembloit que le tout estoit
conduict par discipline militaire.

CHAPITRE VIII.

*Comment le Comte de Ligny feut à Come
au deuant de l'armée du Seigneur
Ludouic.*



PRES que le dict Seigneur Ludouic eut abordé la Lombardie, le Comte de Ligny, Lieutenant du Roy de là les monts faillit de Milan, avec deux cent hommes d'armes. Et semeit en voye vers Come, pour aller secourir la garnison qui estoit dedans, & pour rebouter les ennemis, & aussi pour garder le passaige, qui estoit la principale entrée de la Duché deuers les Allemaignes. Tantost apres qu'il feut en la ville de Come, nouuelles feurent que Belinsone s'estoit rebellée, qui est vne ville moult forte entre les montaignes d'Allemagne, en laquelle auoit garnison de François. Et pour icelle renforcer, transmeit le Comte de Ligny vn Gentil-homme de Sauoye, avec cinquante cheualx, & cent pietons. Mais les gens de la ville sçachans la venue du Seigneur Ludouic, & son armée prochaine, fermerent les portes aux François, & commencerent à tirer grands coups d'artillerie & de traiët contre eulx. Et sçachant le Comte de Li-

gny la diuersité des querelles, transmeit là derechef 1499.
 Louys d'Ars, son Lieutenant, avec quarante hommes d'armes, & cent archers, lesquels se meirent à passer le trauers des montaignes. Où n'auoit chemins accessibles, fors petits sentiers pour le passaige d'un seul hôme à la fois. Dedans la ville de Belinzone estoit demeuré vn Gouverneur pour le Roy, lequel auoit baillé à vn sien frere en garde vn des Chasteaux de la ville, avec bonne garnison de François, & autres deffences, pour seruir à l'affaire de la place. Or aduiferent les Lombars qu'ils prendroient celuy Gouverneur. Et que tellement le traicteroient, que si son dict frere Capitaine du Chasteau, n'aimoit mieulx le veoir cruellement mourir, que rendre la place, bien tost l'auroient entre mains. Et ainsi le feirent. Car le Gouverneur qui pour quelques affaires estoit allé trois ou quatre iours deuant à Milan, feut à sa venuë pris & arresté par ceulx de la ville, Auquel dirent sans autre propos luy tenir, que s'il ne faisoit enuers son frere, qui auoit le Chasteau en garde, que tost en l'heure feust mis entre leurs mains, que premier que iour couchast abandonneroit sa vie au pouuoir de la corde. Et afin qu'il ne meit la chose en doubte, feurent plantées les enseignes des Iustices en la place de la ville. Ce que voyant iceluy Gouverneur, ne sceut que faire, sinon que mander à son frere son extreme necessité, le priant que pour le rachapt de sa vie voulut rendre icelle place. Lequel pour ce ne voulut vider ne rendre le fort, iusques à ce que par le patibulaire

20 HISTOIRE DE LOVYS XII,
1499. dressé eust claire congnoissance de la mort iugée de son frere. Qui tant luy amollist la durescé du cœur, que fraternelle pitié luy feit tourner le dos à tout droict de seuerité. Les soldats de la garnison scaichans la chose, voulurent aller recouurer iceluy Gouverneur, & donner sur les villains. Mais le Capitaine doubtant qu'ils ne faillissent à leur emprise, & que son frere ne feust secouru, ne voulut permeétre à nul d'entre eulx y aller, mais rendit la place, & retira son diét frere d'entre les griffes des Lombars. Dedans la ville auoit encores vn fort, que tenoient des laquais Gascons, desquels estoit Capitaine vn nommé le bastard de Moncassin. Le Capitaine Louys d'Ars feut aduertý à sa venuë comment la place estoit renduë aux Lombars, & de la rebellion du peuple. Et sans delay se meit à regarder tout autour de la ville, pour veoir si par quelque lieu on la pourroit assaillir. Mais ceulx de dedans tiroient sans cesser traiét, & artillerie. En sorte, que nul osoit approcher. Ainsi se retira avec ses gens dedans la place que tenoient les laquais. Et le lendemain, se meit aux champs vers le pays de Suisse. Et trouua que renfort venoit de tous costez pour le Seigneur Ludouic.

CHAPITRE IX.

De la rebellion de Milan.



ORS dedas la ville de Come estoit 1499.

encores le Comte de Ligny, avec
soixante hommes des siens, & la
compagnée des Escossois, que vn
nommé Robert Stuart, Lieutenant
du Seigneur d'Auzon, conduisoit. Et là feurent
nouuelles que l'armée du Seigneur Ludouic appro-
choit. Et de tant, que à dix milles pres de la ville
estoit embarquée sur le lac. Et voyant le Comte de
Ligny la ville mal garnie de François, manda venir
Louys d'Ars, avec ses gens, & que le plus tost qu'il
pourroit se retirast dedans Come, pour le renfort
d'icelle. Et quant à luy, il luy feut necessaire de re-
tourner en brief. Car toute la Duché de Milan
estoit couuertement coniuérée contre les François.
Et aucuns des Potestats & Seigneurs de la ville de
Milan, avec le frere du Thresorier du Seigneur Lu-
douic, lequel durant la premiere conqueste de
Milan auoit au pourchas des emprunts esté tué par
ceulx de la ville, feignans ne vouloir obeir au Sei-
gneur Iean Iacques, comme non suffisant au gou-
uernement Politique, insulterent contre luy. Et
soubz le tapis de celle diuision, peu à peu garnirent
celément toutes leurs maisons de gens armez. Et
tant couuertement feirent leur menée, que au sça-
uoir des François feut la chose incogneüe. Mais
tant alla le fait en auant, que le iour de la conuer-
sion Sainct Paul, donnerent vn alarme tumultueux
au Seigneur Iean Iacques, estant en la maison de
la ville pres le Domme. Et cuidoient les François

C iij



1499. que le debat surueint à cause de diuision ciuile : mais bien autrement alloit de la chose. Car les traistres auoient secreete intelligence & promesse iurée au Seigneur Ludouic, de mestre le iour de la purification nostre Dame tous les François qui estoient en Lombardie à sacquement. Et voyans les coniuerez approcher le terme de leur emprise, la Duché de Milan dearmée de François, & le Seigneur Ludouic marcher auant avec toute force, cuidans le pouuoir de France foible pour luy resister, se renforcerēt de plus, & le Seigneur Iean Iacques d'autre part. Tellement que apres ces efforts, les François qui estoient logez dedans la ville se doubterēt. Et pour obuier à tous dangers, trois iours ensuiuant eurent le harnois sur le dos. Et voyans les Milannois la ville mal accompagnée de François, & le Comte de Ligny avec ses gens à Come assez embelongné pour autres affaires, le iour de la feste nostre Dame de la Chandeleur, donnerent l'assault au Seigneur Iean Iacques, Lequel eut bon besoin de se bien defendre, & du secours qui luy feut proche. Car durant le debat vn Gentil-homme nommé Coursinge, Lieutenant du Duc de Sauoye, surueint avec soixante cheuaulx. Et passa tout le long de la grand'ruē, & le trauers de la place du Domme, qui toutes pleines estoient de Lombars en armes. Et au trauers de la presse des Milannois, la lance sur la cuisse, feut iusques deuant la porte de la maison de ville. Et au dedans estoit le Seigneur Iean Iacques armé de toutes pieces, lequel de sa part à tour de bras defendoit

l'entrée. Mais contre tant de peuple n'eust longuement soustenu l'escarmouche. Et si le Capitaine Courfinge ne l'eust recous, sa vie estoit en dangereux hazard. Car de haine mortelle l'assailloient iceulx Lombars. Toutesfois telle ayde luy donna le dict Courfinge, que voulussent ou non Milannois, l'émena du danger de leurs mains furieuses en la seurété du Chasteau, voire en telle heurè, que bien luy feut de saison. Car premier qu'ils entrassent en la place, commotion de commune eut par toute la Cité pour l'heure audience auctorizée contre les François. Et n'y eust ne grand, ne petit, qui parler sceust, qui à haulte voix ne criaist More, More. Plus de trois heures durerent leurs cris, & huées. Et avec ce plus de cent mille hommes armez se meirent en place. Sur l'heure du midy estoit quand le tumulte commença, & dura iusques à ce que grosses pierres d'artillerie leur feussent transmises du Chasteau. Ce que feirent le Seigneur de l'Espy, & Messire Codebecarre, Capitaines de la place. Car oyans ce bruir, feirent à coup meître hors huit des plus grosses pieces d'artillerie qui feussent au dedans, & descharger coups au trauers des maisons, & des ruës, tant horribles, qu'on eust dict que toute la Cité debuoit profonder aux abismes. Somme la batterrie & tonnerre de l'artillerie dura dés vne heure apres midy iusques au soir. Et fait sur la ville tel eschec, que plus de trente fortes maisons, & somptueux edifices feurent percez, & mis par terre. Et tant d'hommes, femmes, & petits enfans morts, & acrauantez, que

24 HISTOIRE DE LOVYS XII,
1499. l'horreur de ce me deffend n'en dire le nombre. Iusques au milieu de la place, qui est entre le Chasteau, & la ville, feurent les Lombars escarmoucher avec nos gens. Et tant approcherent, que main à main se rencontrerent. Si à poinct se monstra le Seigneur de l'Espy à cest affaire, que à la deffence de l'artillerie y parut iusques à l'effusion de son sang. Qui eust lors veu faire tauldis, & barrieres au trauers des ruës, & escarmoucher au tour de la place, eust bien peu dire à certes que guerre mortelle auoit là trouué l'huis ouuert. Car tant que le soleil donna lumiere, le tonnerre de l'artillerie, ne le bruiet de la Cité eurent silence.

CHAPITRE X.

Comment les viures du Chasteau se cuiderent perdre.



VEC les soldats de la place estoit lors vn Milannois, nommé Messire Louys de Pors, de grand aage, & bien emparlé, aux gaiges du Chasteau. Seruant de truchement, pour aduitailler la garnison, avec vn François nommé Pierre Bordier, Commissaire pour le Roy sur le faict du sel à Milan. Lequel de Pors pour descouurir son double couraige, apres que chascun feut retiré secretement abandonna le fort, & dedans la ville s'en alla. Et du pouuoir de la garde

la garde, des viures, de l'artillerie, & en somme de toutes les autres choses qu'il auoit peu veoir, & congnoistre au Chasteau, aduertist ceulx de la ville. Et feit vne autre chose qui plus cuida nuire aux François. Car luy qui tous les secrets du Chasteau auoit congneu & aduisé, luy estant dedans, par vne nuit ouurit les bondes & passées de l'eäüe, qui abreuuoit les fossez de dedans la place. Tellement que le moulin qui est contre les murs de la Roquette deuers l'entrée du parc feut inondé, & tout couuert d'eäüe. Les caues où estoient les farines, bleds, vins, lards, huiles, gressés, & autres choses necessaires pour le soustien des soldats de la place, feurent noyées & toutes remplies d'eäüe. Tant que à toute peine peurent estre sauuez les viures qui estoient dedans. Dedans la ville de Milan ne feut seulement ce iour fait le hutin: mais par toutes les autres villes, places, & bourgades de la Duché, lesquelles toutes à vne voix, & à vne heure, comme entrepris estoit, remplirent l'air de cris Moriens. Dont tuos les François qui apres ce se trouuerent desacompaigned ou escartez, se trouuerent mal traictez.

CHAPITRE XI.

*Comment l'armée du Seigneur Ludouic
feut à Come.*

D

1499.

1499.
Februar.

Le premier iour de Feburier, sur les deux heures apres midy, estât le Comte de Ligny à Come, avec ce qu'il auoit de gens, apres auoir long temps attendu l'armée du Seigneur Ludouic, peut veoir par vraye experience ce que par imagination attendoit. Car le long d'un lac qui des Allemaignes iusques atouchant la ville de Come refluë, plus de deux milles de pays par eüe, à combles barques, & pleines gabarres, luy feurent en barbe gens armez, qui ne demandoient que la guerre. Et pour leur en donner, le Comte de Ligny avec partie de ses gens leur feut au deuant, iusques sur le bort du lac, au droit de leur descente. Et là feit arranger & charger son artillerie. Et eulx conuiez à ce banquet, quatre faulcons leur meit à mont, qui pour riuere feirent tel vol, que qui toute leur prise eust voulu meëtre en carbonnade, diuers entremets sy feussent trouuez. Pour reuenir au parfaict, si rudement feurent reboutez, que plus de demy mille feurent contraincts reculer, pour gagner vne Abbaye, qui estoit au bort du lac. Et en eulx retirant, sans cesse tiroient canonniers au trauers la greigneur presse. Et ne feut coup deschargé, que quelqu'un n'en preint le bort, ou la vollée. Et de si pres feut failly le Cardinal Ascaigne, que le bort de sa barque, à deux pieds pres de luy, feut emporté d'un coup d'artillerie. Et eulx retirez à seureté, preindrent logis pour passer la nuit dedans celle Abbaye. Voyant le Comte de Ligny, qu'il ne leur pouuoit faire au-

tre ennuy, se rerira avec gens-d'armes, & artillerie, 1499.
dedans la ville. Laquelle il auoit si à poinct remparé
& fortifié de toutes choses nécessaires pour attêdre
sieges, & assauls, que tout assésuré se cuidoit de la
maistrise du passaige cōtre le pouuoir du Seigneur
Ludouic, & ses lansquenets, iusques à la venuë du
secours de France, si plus de deux mois n'eust esté en
demeure. Et bien donna le iour de deuant à con-
gnoistre à ses ennemis, que par default de soldats
estrangers peu les doubtoir. Car il auoit enuoyé
& cassé six cent Lombars, & Piemontois, estans
aux gaiges du Roy.

CHAPITRE XII.

*Comment Come feut rendu au Seigneur.
Ludovic.*

LA nuit, vigile de la purification no-
stre Dame, le Seigneur Iean Jacques
estant dedans le Chasteau de Milan ja
aduerty des approches du Seigneur
Ludouic, pensant le pouuoir des François qui e-
stoient à Come, n'auoir duré contre les assauls
d'icelle, & sçaichât que quelque peu de force qu'ils
eussent, pour doubte de mourir n'abandonne-
roient la ville, & aussi que bon besoin auoit le sur-
plus de la Duché de leur secours, trois messagers
coup sur coup transmeitau Comte de Ligny. Au-

1499. quel mandoit par l'ectres, que si pour l'honneur & profit du Roy se vouloit employer, que incontinent se retirast à Milan, & qu'il en estoit heure. Mais pourtant ne voulut desemparer. Tantost apres veint second messaige, & l'ectres contenans que si la Duché de Milan se perdoit pour le Roy, que la deffence & tenuë de Come en seroit le seul moyen. Veu qu'elle ne pouuoit selon son aduis resister au Seigneur Ludouic. Et que les gensd'armes qui estoient dedans estoient l'esper de l'appuy du fais de la guerre. Parquoy estoit mestier de laisser la place, qui tout à temps se pouuoit recourer, & subuenir à l'affaire du plus, qui du secours ne se pouuoit passer. Toutesfois ne feut celle remonstrance occasion de retour au Comte de Ligny: mais dit derechef qu'il l'essayeroit de garder la place, tant que viures, & soldats pourroient durer. Et luy sembloit bien que moult longuement pourroient attendre le siege. Car la ville estoit pour l'heure assez fortifiée. Et pensoit que si à la fin par default de viures, où force d'assaults d'ennemis estoit pressé, que sans danger se pourroit retirer à Milan, ou ailleurs, à seureté. Veu qu'il n'auoit à faire que à gens de pied, & aussi qu'il auoit l'issue du costé de Milan toute au deliure. Ainsi eut propos deliberé de demeurer, & iusques à la fin deffendre la place. Et pource meit gensd'armes & artillerie sur les murailles de tous costez, si à poinct, que aux assaults des ennemis deffence mortelle auoit préparée. Dernieres l'ectres veindrent; par lesquelles estoit dict au Comte de Ligny; que

sur toute l'obeïſſance qu'il debuoit au Roy, & toute la craincte qu'il auoit de l'offencer, il ſe retiraſt à Milan. Et pour cauſe. Ou ſinon, qu'il feroit en forte qu'il ſe pourroit mal trouuer enuers le Roy. Et en laiſſant la place, de rien ne pouuoit amoindrir le pris de ſon honneur. Car mieulx eſtoit ſe retirer d'heure, pour l'accroïſſement du commun profict, que à la longue tenuë d'honneur ſingulier ſarreſter, & hazarder le tout à perdition irrecouurable. Voyât le Comte de Ligny, que ſi plus tenoit la ville, & que par aduenture inconuenient en adueint, que par le Seigneur Iean Iacques ne ſeroit eſpargné enuers le Roy, & auſſi que mieulx ſe pouuoit trouuer aux affaires du Roy en liberté des champs, que en ſubiection de place aſſiegée, ſuppoſé que ce feuſt contre ſon vouloir de laiſſer la place, Ce neantmoins pour deſloger, feit armer ſes gens, & mettre en charroy ſon artillerie. Et ne voulut partir de la ville, que ne feuffent plus de huiët heures du matin. En attendant ſur la place la venuë du Seigneur Ludouic, & ſon armée, pour leur vouloir au departir donner vne eſcarmouche. Mais oncques vn ſeul de l'Abbaye, où ils auoient celle nuit couché ne ſortit pour l'heure. Ainſi ſe meirent François à chemin droiët à Milan. Tout ce iour cheuaucherent iuſques au ſoir, & par les chemins rencôtrèrent plus de quatre mille Lombars en armes, crians More, More, à pleine voix. Es moult ennuyèrent les gens d'armes. Car touſiours eſtoient au derriere, & aux coſtez, en aguet d'attaindre quelqu'un. Mais il en

1499. feut beaucoup estendu par les chemins. Entre les cinq & six heures du soir tant approcherent la ville de Milan, qu'ils se trouuerent à l'entrée du parc. A leur venuë feut sonné vn allarme en la ville. Et tantost feurent en place plus de quatre mille Lombars. Et au dedans du parc leuerent contre les François vne escarmouche. Voyant le Comte de Ligny, qui encores ne sçauoit de la rebellion, que sur ces Milanois failloit charger, leur enuoya au deuant deux faulcons, qui les chassierent si tost, qu'ils n'eurent ailleurs à penser que à trouuer leurs maisons pour le plus seur. Apres qu'ils eurent vuidé, le Comte de Ligny entra avec les gens dedans le Chasteau, auquel fallut pour celle nuit loger gens, & cheuaulx. Car la ville estoit pour l'heure empeschée, voire tant esmeuë, que dès le soir iusques au matin les Milanois ne cessèrent de bransler beffrois, & crier allarmes. Celle nuit là se meirent en armes plus de cent mille hommes. Car toutes les ruës & places de la ville estoient tant pleines de gens armez, que terre n'apparoissoit soubz eulx.

CHAPITRE XIII.

*Comment le Comte de Ligny, & le Seigneur
Iean Iacques sortirent du Chasteau de Mi-
lan, & se meirent aux champs.*



CONNOISSANT le Comte de Ligny la rebellion de toute la Lombardie, la venue du Seigneur Ludouic prochaine, le secours de France loingtain, soy mal accompagné de soldats,

1499.

& le Chasteau de Milan pour longuement soutenir tous les gens d'armes qui estoient dedans mal aduitaillé, feut d'aduis de prendre les champs, avec quelque nombre de gens. Doubrant que par siege ne feut illec arresté. Voyât aussi que la place se pouoit deffendre à plus peu de garde par long temps contre la puissance du Seigneur Ludouic. Et que toutes les autres places tenans pour le Roy estoient bien en voye d'auoir tost besoin de bon secours. Et tout ce mis en auant, chascun congneut que c'estoit le moyen dont mieulx se pourroient trouuer. Le troisieme iour de Feburier, sur les cinq heures du matin, sortirent de la place le Comte de Ligny, le Seigneur Iean Iacques, le Seigneur d'Auzon, & le Capitaine Coursinge, avec trois cent hommes d'armes, & deux cent Suisses. Pour la garde du Chasteau demeurerēt cinq cent soldats sous la charge du Seigneur del'Espy, & de Messire Codebecare, Capitaines de la place, avec grād' force d'artillerie, & viures, pour bien long temps. Et avec eulx demeurerent le Cardinal de Come, l'Euesque de Lussion, Chancelier de Milan, l'Euesque de Nouarre, vn Ambassadeur de Venise, Messire Claude d'Ais, & Messire Geoffroy Carles, Docteurs, la Comtesse de Mioloc, femme du Seigneur Iean Iacques, & vne sien-

1499.
Februar.

ne fille. Apres que tout feut mis en ordre, le Comte de Ligny pria au partir les Capitaines de la place, que à la garde d'icelle eussent le profit du Roy & leur honneur pour recommandez. Et que de danger n'eussent doubte. Car leur secours estoit en voye, qui assez d'heure leur viendrait à besoin. Et ce dict, les François se meirent aux champs. Et à l'entrée du parc teindrent ordre de bataille, les pictons deuant, marchans le droict chemin de Nouarre. Au desloger les allarmes feurent de toutes parts parmy la ville, & les Lombars à tourbes & à tas sur pieds. Tousiours marchoient les gens d'armes François en si bon ordre, que par default de ce rien n'alloit en arriere. Aussi n'estoit pour l'heure le desroy de saison, ne l'escart profitable. Car la nuit de deuant les gens du pays auoient fait tranchées & fosses par les chemins, & sentiers, abbatu ponts, & planches, entraverse grands arbres en la voye, & sur les passaiges fait tant d'autres empeschemens, que moult feut difficile la passée. Toutesfois chascun come il peut se meit oultre. Sur queüe estoient tousiours mille ou douze cent Lombars, avec grands picques, & partizanes, en leur effort de trouuer quelqu'un à l'escart. Mais apres tous leurs destours la plus part de la perte feut pour eulx. Car si à profit feurent chargez par les François, que plus de cent y demorerent. Moult eurent ce iour les François à besongner. Car oncques ne meirent pied à terre. Et leur feut la repüe si tarde, que à ventre vuide, passerent le iour iusques à cinq heures du soir. Et ne feut sans auoir
maint

maints ennuyeulx alarmes. Car entre Milan, & No-
uarre, failloit passer par six ou sept bourgades nom-
mées Saint Pierre, Douleme, Sedriane, Magente,
Corbete, Castan, & le port de Gaia sur le Tefin, les-
quelles n'estoient fermées, mais de barrieres, taudis,
remparts, & fossez fortifiées si à poinct, que à gent
desarmée de vertueux couraige debuoiert iceulx
passaigés sembler inaccessibles. Mais necessité meit
là en auant son pouuoir tellement, que pour l'em-
peschemēt des chemins, nel'embuche des Lôbars,
qui sans nombre estoient illec en armes, ne demeu-
ra que François ne tirassent oultre. Mais non sans
auoir escarmouches, & allarmes. Touresfois les
Lombars y eurent si peu d'auanraige, que leurs villes
feurent prises, & aucunes d'icelles données au feu.
Et mesmement Corbete, & Castan, qui empes-
choient le passaige. Dedans Corbete feut trouué
vn François prisonnier nommé Simon Noyer, Clerc
d'un des Thresoriers des guerres nommé Geoffroy
de la Croix. Et se sauua iceluy Clerc par vne fenestre
à la venuë des François, lesquels feirent là courir la
flamme, qui tantost feut si grande que tout feut es-
pris. Les François voyans que le feu ne pardonnoit
à nul sexe, & que les femmes, & petits enfans, pour
craincte du glaiue se laissoiēt embraser, meus de pi-
tié donnoient ayde à ceulx qu'ils veoyent au dan-
ger du feu. Toutesfois les maisons feurent brulées,
& tant de sang effus, que par les ruës & chemins n'y
auoit que montjoyes de morts. Tout ce iour autre
mestier ne feirēt les gens d'armes François, iusques sur

34 HISTOIRE DE LOVYS XII,
1499. le soir, qu'il feut droicte heure de loger, & question
de repaistre. Dedans vne petite ville nommée Gaia,
estât à trois milles pres de Nouarre, fallut aux Fran-
çois prendre logis, laquelle pour l'heure ne dict
mot. Mais pour ce ne feut l'armée tant asseurée, que
gens d'armes toute nuiet n'eussent l'œil au guet.
Supposé que besoin extreme eussent de repos. A-
pres la repüe, que chascun estoit en garde, sur l'heu-
re de minuiet feut crié par la ville More, More, dont
gens d'armes se teindrent serrez, sans faire bruit. Et
deffendit le Comte de Ligny que pour faire occi-
sion, ou rouverte, nul ne feust en desarray. Doub-
tant que renfort de Lombars ne feust illec survenu.

CHAPITRE XIV.

*Comment le Capitaine Louys d'Ars, avec
quarante hommes d'armes, & quatre
vingt archers, passa tout le trauers de
la Lombardie.*



BELINSONE auoit esté transmis
Louys d'Ars, pour icelle garder. Qui
apres auoir aduitaillé le Chasteau que
tenoient les laquais, & fait plusieurs
courses & escarmouches sur les Allemans, & Suif-
ses, qui venoient au secours du Seigneur Ludouic,
voyant qu'il estoit heure de se retirer, ainsi qu'il luy
estoit mandé, le iour de nostre Dame de la Chan-

de leur pteint le chemin de Come. Cuidant là trou- 1499.
uer le Comte de Ligny. Deuant auoit enuoyé vingt
archers pour cuider ptendte le logis. Mais eulx ap-
prochez à quatre milles pres de Come, sceurent que
le Comte de Ligny estoit patty pour aller à Milan,
& que le Seigneur Ludouic, & le Cardinal Ascai-
gne estoit dedans avec grosse armée. Et sans plus
marchet en auant, tournerent bride vers le cartier
où auoient l'aissé leut Capitaine. Mais pat default
de guide s'escartetent, & ne le trouuerent point, dõt
feurent moult soucieulx de son estoing. Et voyans
qu'il n'en estoit autres nouuelles, pensans qu'il auoit
sceu la venue du Seigneur Ludouic, & qu'il s'estoit
retiré vets Milan, pteindrent celle part. Tout ce iour
feurent à cheual, & de toutes parts auoient Lom-
bars en queüe, qui moult leur feient d'ahan. Plus-
sieurs en occirent, & malgré eulx passerent leur che-
min. Plus de cinquante milles de pays feirët ce iour
sans repaistte. Et tant feurent à la parfin mal menez,
que la plus part d'eulx perdirent leurs cheuaux. Car
la doubte de la fureur des villains, qui par tout es-
toient en atmes, leur auoit interdict l'entrée des
villes, & villaiges, dont n'auoient retraicte, fors les
champs, & les bois, qui trois ou quatre iours leur
feurent de saison, où là feurët repeus de peu de pro-
uision. Ils ne tenoient chemin, & voye, & n'alloiët
que de nuit. Et eulx estans en tel affaire, & voyans
le pays plain pour le Seigneur Ludouic, penserent
que Milan n'en faisoit pas moins. Dont conclu-
rent qu'ils se retireroient au mieulx qu'ils pourroiët

à Nouarre. Somme si bien aduiferent à leurs besongnes, que ceulx qui auoient peu garder leurs cheualx, se retirerent à Nouarre, & les autres en habits desguisez l'un apres l'autre, quatre ou cinq iours apres la nostre Dame, tous lassez & affamez s'y rendirent. Louys d'Ars qui auoit enuoyé ses gens vers Come, comme dict est, voyant leur longue demeure ne sceut que penser d'eulx, si n'est que par embusche de Lombars feussent deffaictz au desuoy de chemins eslongnez, dont se hastia de marcher pour en ouyr quelques nouuelles. Mais il ne sceut d'eulx autre chose pour l'heure. Et feut en tirant vers Come aduertty du partement du Comte de Ligny, & de la venue des ennemis. la estoit sur le vespre, & temps de chercher logis. Toutesfois pour l'heure ne luy feut illec leur le sejour. Dont preint son adresse vers Milan. Pres de là luy & ses gens preindrent vne legere repeüe, puis monterent à cheual. Toute celle nuit, & le lendemain, iusques sur le soir, feurent en voye, & à toutes mains, courses, & saillies que faisoient les Lombars. Mais si à droict estoient rechargez, & en tel ordre tenoit iceluy Capitaine ses gens, & si à poinct conduisoit son affaire, que à chef de besongne estoient ses ennemis tousiours reboutez, & les siens mis au deliure. En sorte, que d'un tout seul ne feut son nombre amoindry. En approchant la ville de Milan, de huit milles pres, sceut par aucuns payfans que le Comte de Ligny, & le Seigneur Iean lacquestenoient les champs, & que la ville festoit rebellée contre eulx, & que vers Nouarre se re-

1499.
Februar.
tiroient. Dont luy fallut à cartier retourner plus de quatre milles, pour gagner le droict chemin. Ce iour, troisieme Feburier, luy & ses gens sans desemparer le chemin feurent à cheual. De Lombars en armes estoit la voye toute remplie, qui à tour de bras à la passée donnoient aux François coups, & horions, & leur faisoient le comble du pis qu'ils pouuoient. Mais à la fin si mal leur seruit leur aguet apensé, que des ennuis dont ils cuidoiient fatiguer les gens d'armes, feurēt pressiez, & attaincts, & comme ceulx qui cheent en la fosse qu'ils preparēt pour la mort d'autrui, dedans leurs mesmes embulches & destroicts feurēt assommez, & deffaicts. De l'interit & nōbre d'iceulx ne feray autre cōpte, si n'est que par les chemins, hayes, & buissons, par où les François auoient passé, tant de Lombars, & autres soldats Moriens feurent applatis, & este dus, que à ces enseignes on eust peu dire que guerre affamée auoit illec faict vne repeüe. Tousiours marchoiēt François pour approcher Nouarre. Et sur l'heure de vespres descendirent pour repaistre dedans vne bourgade nommée Buffalore. Car besoin en auoient, comme ceulx qui de tout ce iour n'auoient descendu de cheual. Mais si tost n'eurent cheuaulx establé, & la premiere viande à la bouche, que les Lombars du bourg & des enuiron ne feussent sur le passaige en armes. Voire en tel nombre, que assez sembloiet estre pour tenir contre dure main longue bataille. Hastiuement remonterent les François à cheual, pour gagner pays. Avec picques & ronçōs, se trou-

1499. uerent iceulx Lombars hors du villaige, pour clorre le chemin aux François. Mais au ioindre ils congneurent que leur emprise tourneroit à leur desaduantaige. Car là n'y eust François, nonobstâr les trauaux & ennuis que deux iours & deux nuiçts auoiët ja soustenus, qui à cest affaire ne se monstraist si vigoureux, que qui les eust lors veu en besongne, n'eust pensé que de lasseré ou de famine eussent esté attrainçts. Si auoient-ils ce iour faict sans repaistre plus de quatre vingt milles de terre. Que diray-ie? Chascun faisoit ce qui est au pouuoir du grand possible humain. Car nonobstâr que à plus de quatre mille hommes armez eussent à faire, toutesfois à toutes heurres auoient ils l'auantaige, & mettoient leurs ennemis à bas. Bien ce faict à commemorer que le chef feut de telle conduicte, que entre tant de perilleux dangers, & mortelles embusches, vn seul des siens ne perdit. Car tousiours auoit l'aduis & la main à la defence de ceulx qui besoin auoient d'ayde. Somme si des thresors de loüange vouloye par mes éscripts aucuns enrichir, à cestuy en oseroye si largément departir, que iamais n'en seroit discret, voire & n'auroye pas peur que par Satyre future i'en feusse repris. Et à tant ie m'en tais, laissant le surplus au penser de ceulx qui plus à plain le labour & merite des œuures militaires peuuent sçauoir. Et pour rentrer, malgré toute la puissance des Lombars, iceluy Capitaine avec quarante hommes d'armes, & quatre vingt archers, passa tout le trauers de la Duché de Milan, & la riuere de Tefin, entre Milan, & No-

uarre. Et approcha le bort d'un des autres costez de celle riuere à deux milles pres de Gaia. Et se pouuoit icelle riuere passer à gué : mais pource qu'il estoit de nuit, & que nul ne congnoissoit le passage, & aussi que les payfans de autour auoient rompu & abbatu tous les ponts, & planches, ne sceurent les François passer outre. Car voye assurée n'apparoissoit. Toutesfois vn Albanois, qui estoit de la compaignée, se mit à trauerser le gué, & passa outre. Lequel d'aduanture se mit au chemin de Gaia, & fit tant qu'il veint à la ville. Où trouua le Comte de Ligny, & le Seigneur Ieā Iacques, ausquels conta comment Louys d'Ars, & ses gens estoient hors du destroiect des mōtaignes, & du danger des Lombars, qui deux iours & deux nuits sans cesser leur auoient donné la chasse. Et comment à deux milles pres, entre deux riuieres, les auoit tous laissé ensemble. Et que pour l'heure n'auoient defaut que de guide, avec mestier de viures, & besoin de repos. Le Côte de Ligny, & le Seigneur Iean Iacques, & tous les oyans eurent à l'imaginer merueilles, & ioye au cœur de la venue d'iceux, comme de nouveau rapport d'amis morts resuscitez. Tost feurent gens enuoyez au deuant, pour leur monstrier la passée du gué, & le chemin de la ville: mais ja estoient hors de la riuere, & auoient donné droiect à Gaia. Entre six & sept heures au matin, entra Louys d'Ars avec ses gens dedans la ville de Gaia, où trouua le Comte de Ligny, le Seigneur Iean Iacques, & plusieurs autres, tant ioyeux de leur venue, que plus ne pourroit.

1499. C E iour , qui feut vn Mardy , quatriefme de
 Feburier. les Seigneurs de la ville de Nouarre, pour
 monſtrer que viure vouloient en l'amour des Fran-
 çois , & pour leur querelle mourir , & à beſoin ex-
 treme leur donner ſeruice ſecourable , nonobſtant
 la groſſe puiſſance du Seigneur Ludouic, & la rebel-
 lion de toutes les autres Villes de Lombardie , pre-
 ſenterent aux Lieutenans du Roy leur Cité, deman-
 dans ſecours contre la force du dict Seigneur Ludo-
 uic, qui la ruine deſolable d'icelle , & occiſion du
 peuple auoit iuré, leſquels feurent amiablement re-
 ceus, & aſſeurez de leur requeſte.

C E meſme iour, tranſmeit le Comte de Ligny
 vn poſte deuers le Roy, qui lors eſtoit à Blois, pour
 l'aduertir des efforts du Seigneur Ludouic, & des
 priſes qu'il auoit faiët ſur la Duché de Milan , & des
 places qui encores eſtoiët entre les mains des Fran-
 çois , deſquelles ne failloit iuſques à long temps
 auoir nulle doubte, & que ſur ce à ſon plaifir adui-
 ſaſt. De ce auoit ja le Roy eſté aduertty, & mis ſon ar-
 mée ſus, pour aller celle part. Laquelle conduiſoit
 le Sire de la Trimouïlle, qui à toute peine meſtoit
 diligence de meſtre ſon voyage à fin.

1499. L E Mecredy, cinquieme iour de Feburier, le
 Feburier. Comte de Ligny, & le Seigneur Iean Iacques, avec
 leurs genſ d'armes, entrerent dedans la ville de No-
 uarre. Et là ſeiournerent dix ou douze iours, en at-
 tendant la venue de l'armée, qui eſtoit allée à Forli,
 laquelle approchoit, & eſtoit ſur les champs.

C H A P.

CHAPITRE XV.

*Comment le Seigneur Ludouic feut de Come
à Milan.*



LE leudy, sixiesme iour de Feburier, le
Seigneur Ludouic voulūt gagner pais
sortit avec son armée de Come, & se
meit en voye, droit à Milan, où auoit
le iour de deuant enuoyé le Cardinal Ascaigne, &
Messire Galeas, pour prendre logis, & veoir la con-
tenance du peuple, auquel bonnement ne se fioit.
Toutesfois avec partie de ses gens entra dedans la
ville. Mais tāt ne se voulut arrester à la seureté des ci-
toyens, que plus d'un iour y voulust faire demeure,
ains y laissa le Cardinal son frere. Et à tout son ost
preint le chemin de Pauie. En laquelle feut honno-
rablement receu de ceulx de la ville. Dedans le Cha-
steau auoit garnison de François, lesquels feurent as-
siegez, & batus d'artillerie longuement. Mais voyās
que assez forte n'estoit la place, & que de secours n'e-
stoit pour eulx nouuelles, parlementerent. Et apres
maintes bons partis que leur promeit le Seigneur
Ludouic, leurs bagues saufues se rendirent. Et de-
dans feut dix iours à seiour le dict Seigneur Ludo-
uic, & puis s'en alla à Vigeue. Dedās Nouarre estoit
lors le Comte de Ligny, & le Seigneur Iean Iacques,
avec les autres Capitaines, & gens d'armes, qui
sans cesser pensoient de l'affaire de la guerre. Et eulx

Februar.

F

42 HISTOIRE DE LOVVS XII,
1499. ſçaichans l'armée du Seigneur Ludouic tant prochaine d'eulx, que d'heure en autre n'en attendoiet que la veuë, tout le peuple de Lombardië branſler ſoubs la main du Seigneur Ludouic, leur ſecours eſpars, & eſcarté, leur pouuoir mal appuyé, pour longuemēt le pondereux fais de la guerre ſouſtenir, leurs viures encherir, & appetiſſer, & maintes autres menaſſes que la main tournant de fortune incertaine leur faiſoit, ſi de penſer ſoucieux feurent ſouuent aſſaillis merueille ne feut. Toutes fois pour meſtre la choſe en mieulx, ſur ce voulurent à porte cloſe conſeil celebrer, qui de diuers propos feut tenu. Dont aucuns d'eulx feurent d'aduiſ, que ſans autre renfort la venue du Seigneur Ludouic attendre c'eſtoit œuure à l'auenture. Attendu que leur pouuoir n'eſtoit ſuffiſant, pour luy reſiſter. Et mieulx eſtoit ſe retirer à Verſel en Piedmont, en attendant leur ſecours. Le Comte de Ligny qui à ce ſil voyoit l'honneur des François branſler, euſt penſée moult différente à ce propos. Et dit que deſemparer la place, eſtoit ouurir le chemin de ſeureté aux ennemis, & clorre le pas de retraicte à leur ſecours. Parquoy n'eſtoit d'opinion d'abandonner le fort, & que de ſa part pluſtoſt demeureroit ſeul aux perils de fortune, que vn ſeul pas reculer en ſeureté reprochable. Et ce dict, plus queſtion ne feut de retraicte.

APRES ce, feurent nouuelles que le Seigneur d'Alegre avec ſes genſ d'armes approchoit la Lombardie, dont feut aduiſé que le Comte de Ligny iroit au deuant. Lequel ſans auoir doubte des em-

busches de l'armée du Seigneur Ludouic, faillit a-
uec soixante cheuaults de Nouarre, & prit le che-
min de Casal, qui est vne ville du Marquisat de Mô-
ferrat, sur la voye par où debuoir passer le Seigneur
d'Alegre avec ses gens. Si tost qu'il feut en la ville,
il sceut que le Seigneur d'Alegre marchoit. Et afin
que pour l'empesche de la riuere du Pau, que passer
failloit à l'armée, elle ne feust en demeure, avec ba-
teaux attachez l'un à l'autre bien foncez & ancrez
au fond de l'eau, fait le Côte de Ligny ponter icelle
riuere, qui moult estoit large, & profonde. Et fait
le passage tant accessible, que gens d'armes à che-
ual, & le charroy de l'artillerie, y pouuoient passer
aussi seurement que par vn chemin errant.

CHAPITRE XVI.

*Du retour de l'armée qui estoit allée
à Forli.*

L A R M E E que conduisoit le Seigneur
d'Alegre estoit comme est escript mi-
se au retour, pour venir secourir la Du-
ché de Milan. Laquelle preint son adres-
se vers Boulongne la grasse, qui est vne ville moult
grande, forte, & bien peuplée. Et sçachant icelle
la venue des François, deuant le pouuoir desquels les
plus fortes places d'Italie n'auoient eu tenuë, à leur
veüe voulut mettre sa force en place. Et pour mon-

F ij

1499. ſter de quoy, plus de trente mille hommes deuant & dedans la dicte ville feurent à la venuë des dicts François mis en armes. A l'approcher, voyans les gens d'armes François ſi grande puiſſance tenir arroy, ſur ce ne ſceurent que penſer, ſi n'eſt que pour le Seigneur Ludouic contre eulx vouluſſent garder le paſſaige, ou que pour doubte de pillage, ou d'autre torce, ſe feuſſent ainſi iceulx Boulonnois armez. Toutesfois ſçaichans que par là failloit paſſer, les hommes d'armes preindrent leurs armets, & meirent la lance ſur la cuiſſe, les canonniers chargerent l'artillerie, les Allemans appreſterent leurs hacquebutes, & picques, & les Gascons banderent arbaleſtes, ſomme chaſcun ſe diſpoſa au combat, ſi beſoin en eſtoit. Et en bataille l'armée marcha auſſi fierement tout le long des murailles, & deuant les portes de la ville, que ſi de cinquante mille hommes euſt eſté renforcée. Et entre tous les gens d'armes François auoit vn edict, que ſi vne piece d'artillerie, ou vn homme ſeul par inconuenient eſtoit arreſté, que chaſcun ſ'arreſtoit, iuſques à ce que tout feuſt à point. Et ainſi rien ne ſe perdoit par deſordre. C'eſtoit choſe bien eſtrange de veoir d'une ſeule ville yſſir tant de puiſſance. Tout le deſſus des murailles eſtoit couuert de teſtes armées deuant chaſcune des portes. Et tout le long des rües, par la veüe des portes qui eſtoient à demy entreouuertes, n'apparoifſoit que gens d'armes, qui à la paſſée, ſans faire nul ſemblant d'empêcher l'armée, cryoient France, France. Autre ennuy ne donnerent aux Fran-

çois. Mais voyans le peu de nombre d'iceulx, au regard de leur pouuoir, disoient l'un à l'autre que à celuy iour l'Italie acqueroit le plus grád reproche de lascheté que feit oncques Region. Et que c'estoit grand honte à tout le pays d'Italie, laisser si peu de François passer. Et se meit l'armée en voye vers la Duché de Ferrare, où bien pensoit trouuer l'ost du Seigneur Ludouic, qui auoit espousé la sœur du Duc de Ferrare. Toutesfois autre récontre n'y trouua, fors de deux cent estradiots, & quelque nombre de gens de pied, qui luy voulurent empescher la voye, & charger sur l'arrieregarde. Mais rât à profit feurent rechargés, que plus de vingt Albanois demurerent sur le champ, & à coup de traitt plusieurs de leurs cheualx feurent tuez. Les autres gaignerēt à fuir. Sur l'Infanterie feut faict tel chappis, que plus de deux cent passerent par la pointe de l'espée. Et pensoit-on que le Duc de Ferrare eust faict faire l'escarmouche. Toutesfois il desaduouia le faict. Dont les François n'eurent occasion luy courir: mais preindrent le chemin de Parme, & de Plaisance, lesquelles receurent l'armée sans contredict. Apres feut faict le logis à vne petite ville nommée Stadelle. Et au desloger eurent les François sur les champs quatre cent estradiots en barbe, qui de la longueur d'une picque souuent approchoient l'arrieregarde, & les ailles de la bataille. Mais aux lances baïsser tournoient le dos. Et dès ce qu'on marchoit reuenoient derechef. Et ainsi conduisrent l'armée de là iusques à vn pont, vn mille pres d'une ville

46 HISTOIRE DE LOVYS XII,
[1499. nommée Voguere, en la Duché de Milan. Et pour
le danger des embusches, les Capitaines auoient
defendu aux gens d'armes, que pour suiure iceulx
estradiots homme ne preint l'escart. Et ainsi que les
François passoient celuy pont à la file, les estradiots
voulurent charger sur les derniers, & empescher le
pas. Là feut vn ieune gend'arme nommé Chauanes,
guidon de la compaignée du Seigneur de Champ-
dée, qui voyant l'ennuyeulx passetemps de ces cou-
reurs, avec vingt hommes d'armes se veint mesler
avec eulx si rudement, que dix de ces Albanois
feurent en l'heure emportez par terre, si que iamais
plus n'en releuerent. Les autres voyans que pour
eulx peu de gaing auoit là se meirent au retour. Lar-
mée preint son chemin droict à Voguaire, & ne
voulurent là gens d'armes arrester: mais à trois mil-
les outre feurent loger. Le lendemain, deuant Tor-
tonne entre six & sept heures du matin feut l'armée
en arrest. Car les gens de la ville auoient fermé les
portes, & ne vouloient à nuls dōner entrée. Le Sei-
gneur de Champdée, qui lors estoit de l'auâtgarde,
voyant qu'il n'estoit heure d'attente, commanda
apres plusieurs refus que chascun feit effort de gai-
gner le logis. Et tost en l'heure hallebardes, haches,
picques, & coingnées feurent mises en besongne.
Tellement que chaines feurent couppées, ponts ab-
batus, portes & murailles rompuës, & faicte ouuer-
ture si ample, que à tous venans feut commun le
passaige.

CHAPITRE XVII.

*Comment Tortonne feut pillée par les
François.*



Es pauvres gens d'armes qui moult long temps parmy les dangers de la guerre sans rien prendre auoiēt esté à la chasse, voyans leur gibier pour l'heure en main, comme ceulx qui d'appetit delibéré vouloient repaistre, donnerent viuement sur la proye. Et là preindrent vne fi chaulde curée, que c'estoit assez pour remectre sus les plus rebutez. Que feut ce, à l'entrée de la Cité, les Lombards qui premiers feurent là trouuez en armes, feurent entourez par les pietons. En maniere, que telle frayeur donnerent au surplus, que hommes, & femmes, & petits enfans, cuidans que tout feust abandonné au pouuoir du glaive, laisserent maisons & biens à la mercy de leurs ennemis. Et pour la seureté de leurs vies preindrent les Eglises. Toutesfois par les Capitaines de l'armée feurent le feu & le sang deffendus: mais la voye du pillage aux pelerins de Mars amplifiée. Quoy plus? Les portes closes des maisons feurent froissées, coffres brisez, boutiques ouuertes, armoires & escrins encherchez, caues & posternes visitées, & en somme tous les lieux secrets, où chose de valüe se pouuoit mustier, desnuez, & descouverts. Et là les

1499. Allemands, & Gascons, & autres gens de pied, qui des premiers estoient entrez fourrerent leurs mains. Chascun y feit tel debuoir, que dedans la ville chose de prise qui trouuer se peust ne demeura, si n'est ce qui ne se peut emporter. Apres que le butin feut mis en place, nouuelles feurent que le Seigneur Ludouic debuoir la nuit ensuiuant entrer dedans Alexandrie. Dont conueint aux François desloger, & tirer celle part. Le Seigneur d'Alegré avec bonne garde transmeit en Ale le butin de Tortonne, pour le faire vendre, & à temps le departir en commun. Plusieurs de ceulx qui auoient faict leur paquet au pillage, voyans qu'ils auoient leur charge, comme ceulx qui au profit plus entendoient, que au deu acquiët de loyal seruice, laisserent l'armée, & secretement se retirerent. De Tortonne preint l'armée son chemin vers Alexandrie, où trois milles pres de là feut loger celle nuit. Et le lendemain, gens d'armes tant matin deslogerent, que à l'aube du iour feurent deuant les portes de la ville, lesquelles feurent ouuertes. Et sans autre contraire entrerent dedans. Et voyans que là n'estoit de la venue du Seigneur Ludouic nouuelles, apres auoir faict vne repuë deslogerent, & tirerent droit à Casal, où estoit le Comte de Ligny, lequel auoit faict ponter la riuere du Pau, pour passer l'armée. Lors que les gens d'armes & artillerie feurent arriuez à Casal chascun preint logis. Et là grand chere se feirent le Comte de Ligny, & le Seigneur d'Alegré, & tous les autres Capitaines, & gens d'armes, qui

qui deux iours durant là tous ensemble seiournerent, parlans de l'affaire de la guerre, & du Seigneur Ludouic, qui estoit à Vigene avec grosse armée. 1499.

Le treiziesme iour du mois de Feburier, le Comte de Ligny, & le Seigneur d'Alegre sortirent avec leurs gens d'armes de Casal, & s'acheminèrent droict à Morterre. Le Seigneur Iean Iacques qui estoit demeuré à Nouarre, avec trois cent hommes d'armes, apres que le Comte de Ligny feut party pour aller à Casal, laissa dedans Nouarre garnison. Et avec le surplus de ses gens s'en alla dedans vne autre ville de la Duché de Milan nommée Palestre, en laquelle demeura, iusques à ce que de la venue du Seigneur d'Alegre & de son armée sceust nouvelles. Entre Casal & Morterre estoient le Comte de Ligny, & le Seigneur d'Alegre, à tout leurs gens. Et si tost que le Seigneur Iean Iacques sceut leur approche, avec ce qu'il auoit de gens marcha au deuant. Et à dix milles pres de Morterre s'assemblerent, dont à ceste venue entre les vns & les autres eust ioyeuse feste. Ensemble marcherent vers le logis sept cent hommes d'armes, & trois mille pictons, sans auoir doubte de l'effort du Seigneur Ludouic. Et de tel arroy, que bien leur sembloit sans arrest debuoir passer par toute l'Italie. Feburier.

C H A P I T R E X V I I I .

*Comment les François coururent deuant Vigene,
en laquelle estoit le Seigneur Ludouic
avec son armée.*

G

1499.

Februar.



PRES que l'armée des François feut à Mortterre, celle nuit les Capitaines conclurent que le lendemain au matin, quatorziesme iour de Feburier, pour veoir la contenance des gens d'armes du Seigneur Ludouic qui estoient à Vigeue, coureurs seroient deuuant enuoyez pour y donner quelque allarme. Dont au poinct du iour furent quatre cent hommes d'armes à cheual, & mis en voye. Pour iceulx conduire furent ordonnez le Comte de Misoc, le Seigneur d'Alegre, Louys d'Ars, Aubert du Roussel, Chastelart, & le Capitaine Fontrailles. Et eulx estans aux champs, aduiserent que pour la descouure du pays seroit bon mettre en chemin quelques auatcoureurs. Et eurent la charge de ce deux Gentils-hommes, nommez le petit Seigneur, guidon de la compaignée du Duc de Valéti-nois, & Antoine de Chauanes, guidon de la compaignée du Seigneur de Champdée, lesquels avec soixante cheualx s'adresserent vers Vigeue. Et tant s'auancerent, que en moins d'une heure, de plus de trois milles de pays eslongnerent leur bataille. Entre laquelle, & eulx, estoit le Capitaine Fontrailles, avec quarante hommes d'armes, qui à demy mille pres d'iceulx le grand trot marchoit sur queue. Afin que si d'auenture estoient reboutez, au besoing leur seruiſt de réfort. Tant se hasterent iceulx auantcoureurs, que hors de la veüe de leur suite, à deux milles pres de Vigeue setrouuerent. Et là eurent en barbe le Comte Mainfroy, qui du guet de l'armée du

Seigneur Ludouic auoit ce iour la charge, & estoit 1499.

accompagné de six vingt cheuaulx. Et voyant ice-
luy Mainfroy le peu de nombre de François qui
marchoient contre luy, n'en eust estime de tant que
ses gens daignast meſtre en ordre. Disant que pour
iceulx n'estoit mestier tenir autre arroy. Et voyans
les auantcoureurs François le desordre de leurs en-
nemis, & qu'il estoit heure d'assembler, coucherent
lances, & donnerent des esperons si viuement, que
tous à la fois chargerent sur le guet. Au rencontrer
feut le Comte Mainfroy mis par terre, avec plu-
sieurs des siens. Ainsi feut pris, & quelques autres
bons prisonniers. Du surplus les vns feurent tuez, &
les autres chassez, iusques deuant les portes de Vi-
geue. Ainsi que ce hutin duroit, le Capitaine Fon-
trailles avec ses quarante hommes d'armes s'en vint
assembler aux auantcoureurs, & derechef recom-
mencer la meſlée. Voyans les Capitaines de l'armée
du Seigneur Ludouic que les François venoient à
renfort, meirent aux champs trois mille cheuaulx,
qui tost s'adresserent aux nostres. Et ainsi que l'escar-
mouche se leuoit de tous costez, les quatre cent
hommes d'armes qui au derriere tenoient bataille
surueindrér, & passerent vn petit pont, à demy mille
pres de la ville, marchans vers où estoit le bruit. Le
Seigneur Ludouic voyant genſ d'armes François à
grand nombre tant approcher, pensant qu'ils vou-
lussent assieger la ville, se retira iusques à vne des
portes de l'autre lez de la ville. Disant qu'il valloit
mieulx retourner à Pauie, iusques à ce que tout son

1499. secours feust venu. Messire Galeas, & les autres Capitaines voyans que le Seigneur Ludouic n'estoit asseuré, & que d'abandonner la ville tenoit propos, luy remonstrerent que les François n'estoient là venus qu'par vne maniere de course. Et que pour estre siege n'auoient artillerie, ne gens de pied, dont n'estoit besoin de se retirer. Ainsi feut le propos de son esloing remis en demeure. Deuant la ville de Vigee entre les François & estradiots de plus en plus fort se recommençoit l'escarmouche. Car dix à dix, vingt à vingt, par escoadres d'un costé & d'autre sortoient en place. Parmy les compaignées de France auoit aucuns estradiots, lesquels avec grand nombre de François armez à l'aise, souuent assemblerent les Albanois du Seigneur Ludouic. A la fois estoient les François reboutez, & puis les estradiots Moriés si tost rechassez, que pour leur mieulx estoit heure de monstrier la vistesse de leurs cheuaulx. Entre les deux partis estoit vn assez large fossé, mais si peu profond, que sans autre empeschement de leger se pouuoit passer sur le bort. Duquel tour ce iour main à main feut combatu, & plus de quatre fois gaigné par les Albanois du Seigneur Ludouic, & par les François regaigné. Et ne feut sans que d'un costé & d'autre aux seures enseignes de la guerre plusieurs ne feussent congneus. La plus part des hommes d'armes François tenoient batailles, sans marcher pour quelque affaire que leurs gens eussent. Pensans que si les Allemans qui estoient dedans la ville faisoient faillie, que tout à temps pourroient

estre au combat, & aussi que au besoin l'espargne. 1499.
 est de saison. Toutesfois de la ville ne saillirent aucunes gens de pied. Tousiours duroit l'escarmouche deuant Vigee, & souuent alloiét les estradiots du Seigneur Ludouic iusques pres de ceulx qui ensemble tenoient bataille. Mais aux lances baïsser à coup soudain tournoient bride iceulx estradiots, & si vïstement se retiroient, que de les attendre n'estoit nouuelles. Parquoy peu d'ennuy leur pouuoit on faire. Toutesfois ceulx qui tant pres approchoient, que on les pouuoit chocquer, estoient asscurez d'aller par terre, au danger de plus ne releuer. Maintes lances rompuës, courses, faillies, & combats dignes de los feurent illec. Car sans autre œuvre mettre à effect, tout ce iour dura l'escarmouche. Sur le vespre, les estradiots se retirerent à Vigee, desaccompaignez du Comte Mainfroy, & de plusieurs leurs conforts. Les François avec peu de perte, & grand butin, tout le pas preindrent le retour de Morterre.

En celuy mesme iour, au Baillif de Dijon feurent nouuelles du Roy, pour aller en Suisse faire amas de quatorze ou quinze mille soldats, pour renforcer son armée. Lequel sans autre demeure se meir à chemin. Et tant meir la chose en auant, que bien tost apres le mandement Royal executa la tenneur d'iceluy, & eut le nombre accomply prest de partir, si tost que premier payement auroient receu.

Les François qui estoient à Nouarre, en attendant le Sire de la Trimouille, & son armée, & le

1499. Baillif de Dijon, qui au pays des ligues estoit allé querir renfort, huiet ou dix iours durant ne feirent que faillies, & courfes. Et à toutes fois Albanois, Lombars, & Romains se trouuoient aux champs. Tant que les fourrageurs de Morterre n'osoient sans bonne garde sortir vn mille de la garnison. Car ja plusieurs y estoient demeurez. Ainsi failloit que gens d'armes François à toute heure feussent à cheual.

DURANT ce veindrent au secours du Seigneur Ludouic quatre cent hommes d'armes Bourguignons, que conduisoient Louys de Vauldray, Aluarade, l'annot des prez, & vn nommé le Cousturier, avec plus de dix mille Allemans, & lansquenets, lesquels sans seiour estoient par pays.

Februar. LE quinziesme iour de Feburier, le Lieutenant du Seigneur de Champdée nommé Chastelart, avec cinquante hommes d'armes, feut aux champs cōduire les fourrageurs de Morterre, iusques à cinq milles loing sur le chemin de Vigeue. Dont estoient ce iour sortis Messire Bernardin Cazache, Capitaine des Albanois du Seigneur Ludouic, Messire Cyerue Romain Coulonnois, & le frere du Marquis de Mantoüe, accompagnez de quatre cent cheualx, lesquels rencontra en plaine campagne, en bon ordre, & fiere marche. Mais pource ne resta que à iceulx n'en voulust. Et si tost que d'assez pres les approcha, luy & les siens à course de cheual, & poincte de lance, tant rudement leur coururent, que au rencontrer des lances plusieurs d'iceulx allerent par terre. Le Capitaine Bernardin, & ses estra-

diots, voyans leurs iacques embourrez en danger d'estre percez n'attendirent le choc, mais tout à temps se retirèrent. Le frere du Marquis de Mantouë doubtant que de plus luy mesadueint, ne feist illec long seiour. Et voyant Messire Bernardin Cazache à la retraicte se teint à son opinion. Et sans plus se meit à chemin vers Vigeue, laissant le debat aux François, & aux Romains, qui moult long tēps se combattirent. Et feirent les vns contre les autres tels efforts d'armes, que pouuoir sçauoit porter. Et voulut là bien monstrier Messire Cyerue, que de la valeureuse gent Romaine estoit issu. Car tāt vigoureusement le deffendit, que plus d'une heure, sans rien perdre du sien, sousteint le heurt du combat. Et voyant à la fois par la force des François ses gens espartis & desroyez, à poinct les meit en ordre, & rallia, & de luy faisoit d'armes ce que preux Cheualier pouuoit faire. Apres que d'une part, & d'autre, sans sçauoir qui auoit du mieulx, longuement eust duré l'escarmouche, doubtant le Seigneur de Chastelart que de réfort de Bourguignons, ou Allemás, luy & les siens ne feussent ennuyez, & voyant que sans donner à droict, n'auroient part à ce butin, dit à ses gens d'armes. Donnons compaignons au trauers, & à droict, que homme à la peine de honteux vitupere encourir ne se faigne. A chef de ces paroles, les François comme lyons affamez derechef tous ensemble se meslerent avec leurs ennemis. Et à celle fois feut Messire Cyerue mis par terre, & la plus part de ses gens deffaicts. Ainsi feut pris, & em-

1499. mené avec quarante hommes des siens. Les autres se sauuerent à fuir, ou demeurerent sur le champ. Apres celle deffaicte, les François avec leur prise se retirerent à Morterre.

Le Roy qui lors estoit à Blois, de iour en iour auoit la poste, & à toutes heures nouuelles de tout ce que de là les monts se faisoit. Et là feut aduertuy comment les gens d'armes qui estoient allez à Forli pour le Duc de Valentinois, & ceulx qui en la Duché de Milan estoient demeurez, s'estoient rassemblez, & des courses & faillies qu'ils faisoient tous les iours sur l'armée du Seigneur Ludouic. Et pour faire payer trois mille cinq cent Suisses de ceulx qui de Forli estoient retournez à Morterre, transmeit en poste vn nommé François Doulcet, Contrerolleur extraordinaire des guerres.

Februarier.

Le seiziesme iour de Feburier, feut à Morterre faicte la mostre d'iceulx Suisses. Et leur voulut on faire payemēt du seruice d'vn mois qui leur estoit deu, lesquels feirent refus de leur argēt. Disans que paye de six sepmaines leur estoit deüe. Et tout ce faisoiet, pensans quel'affaire de gens, en quoy le Roy pour l'heure se trouuoit, parfourniroit leur intention. Toutesfois par vn nommé Courcou, Commissaire de gens d'armes, & le Contrerolleur Doulcet, leur feut dict, qu'ils ne seroient payez que pour vn mois, & que plus n'auoient seruy. Sur ce dirent les Suisses, que sans ce qu'ils demandoient estoient deliberez de prendre parry. Les dicts Commissaires & Contrerolleur voyans le defraisonnable propos de ces Suisses,

ses, estans sur terme de eulx en aller, l'affaire que le Roy auoit de soldats, le renfort qu'ils pourroient donner au Seigneur Ludouic, fils prenoient son party, & l'appetissement du nombre de gens dont ils affoibliront l'armée de France, ne sceurent à quel remede attacher leur pensée, si n'est de trouuer moyen pour adoucir la chose. Et pource deuers les Capitaines de ces Suisses se retirerent, & avec douces paroles, & quelques dons, & promesses qu'ils leur feirent, de parler à iceulx, & les arrester, si possible estoit, eurent des Capitaines promesse. A la monstre feut à tous faicte offre de payement pour vn mois. Et à ceulx qui s'en voudroient aller donné faufconduict. Et sur ce eurent conseil tous ensemble. Les Capitaines qui auoient promis de bien faire la besongne, en acquictant leurs promesses, apres diuerſes opinions dirent à leurs gens. Compaignōs, on peut à temps faire des choses tant mal ordōnées, que iamais plus ne se peuuent ramender. Vous pou- tiez veoir que ce que nous debatons cheoit en des- raison. Car par autant n'auons seruy que deman- dons de salaire. Pource premier que desemparer pensons quel meilleur party pourrons choisir que celui du Roy, qui par nos Regions ſeme l'argent en abondance, qui la gent de nos pays tient tant en eſtime, que à la deſſence de ſes terres, & garde de ſon corps, ſur toutes autres l'a eſleu. Conſiderons auſſi que ſans autre achoiſon & à beſoin faire vn tant deſloyal tour au Roy, que à touſiours enuers luy, & les ſiens, pourrions non ſeulement nous,

H



SCAICHANT le Roy que l'armée que le Sire de la Trimouille conduisoit approchoit la Lombardie, & la venue des Suisses que le Baillif de Dijon amenoit des Ligues pensant que eulx assemblez

avec les François qui estoient en la Duché de Milan, auroient tost faict, ou failly. Afin que entre ses Lieutenans & Chefs de son armée, pour le gouvernement d'icelle vouloir auoir, n'y eust debat. Pour obuier à ce, & aussi pour traicter deuëment la reconciliation des villes rebelles de Lombardie, transmeit de là les monts le Cardinal d'Amboise, lequel auctorisa de pouuoir Royal sur ce, & toutes ses autres affaires, pour y besongner, comme luy mesme en propre personne. Avec le dict Cardinal feurent le Seigneur de Grandmont, le Seigneur de Neufchastel, Maistre Jacques Hurault, Thresorier, & plusieurs autres.

CHAPITRE XX.

Du Conseil qui feut tenu à Mortierre, entre les Lieutenans du Roy, & les Capitaines de l'armée. Et de l'opinion d'aucuns d'iceulx.



AVIGEVE estoit lors le Seigneur Ludouic, avec son armée, auquel de iour en iour venoit renfort. Et tant, que de plus de trente mille soldats se veid illec accôpagné. Et voyant que le plus tost que pour son

H ij

1499. affaire pourroit les gens embesongner, seroit son mieulx, eut propos d'aller meestre le siege à Morterre, où estoient les François, ou à Nouarre, qui estoit leur retraicte, & passaige de leur secours. Les François qui là estoient aduertis de ce meirent la chose en conseil. Et feut par le Seigneur Iean Iacques aux Capitaines de l'armée sur ce demandé leur opinion. Et premier à Messire Antioine de Bessé, Baillif de Dijon, auquel dict le Seigneur Iean Iacques. Le loüable rapport de vostre sçauoir & renommée, Seigneur Baillif de Dijon, me faict adresser à vous, pour auoir conseil sur le salut de nostre affaire, Lequel touche l'augmentatiō de la Seigneurie du Roy, le prix de nostre honneur, & le danger de vos vies. Et pource que en maintes batailles, iournées, rencontres, courtes, faillies, & assauts auez exploicté les armes, les Seigneurs presens, & moy avec eulx, vous requerons nous en tenir afferent propos.

Et ce dict, telle Responce feit le Baillif de Dijon. Seigneurs, Pour auoir deüe raison de telle demande mal adressé vous estes à moy. Toutesfois puis que excuse n'a lieu, où auctorité commande, & que par le pouuoir de ce besoin m'est dire mon aduis de la chose que chascun de vous Messeigneurs plus à clair entendez, deux mots de ce que i'en peulx entendre presenrement vous en diray. A nostre sçauoir n'est chose incongneüe que le Seigneur Ludoic avec son armée ne soit en brâsle de cy venir meestre le siege, ou bien à Nouarre. Or auōs nous à sçauoir le lieu des deux ou mieulx pourrons seruir le

Roy, aſſeurer noſtre armée, & reſiſter aux ennemis. 1499.

Nous voyons à l'œuil que ceſte ville de Morterre eſt moult foible, & deſpourueü de viures, & que à moult grande puiſſance auons à faire. Pourquoi demeurer, & attendre le ſiege, & les aſſaults des ennemis, eſt ce me ſemble hazarder par trop tous ceulx qui ſont dedans, avec l'artillerie, qui eſt vne des meilleures pieces de noſtre harnois. Et ſi ſommes mal accompaignez, pour contre nos aduerſaires tenir le combat. Noſtre ſecours tant proche ne nous eſt, que ſoubs l'eſperâce de ſa venuë plus forts pour ceſte heure tenir nous debuions. Penſer icy longuement arreſter, ſans eſtre aſſiegez de nos ennemis, eſt ſabuſer. Et ſi fortune mobile vouloit que nous euſſions deſſaiçts, toute l'Italie ſe pourroit mutiner contre le Roy. Avec ce en laiſſant ceſte ville n'eſt choſe perdre, que nous raiſſemblez en trois heures n'ayons reconqueſté. Nouarre eſt vne bonne ville, forte, & bien auitaillée, pres de nos marches, dont nous pourront venir viures, & ſecours d'heure en moment. Et avec ce y a Chasteau moult aduantageux, & fort, pour au beſoin retirer noſtre artillerie. Ainſi ſauf meilleur aduiſ, bon ſeroit ce me ſemble nous meſtre dedans, en attendant noſtre ſecours. Les paroles du Baillif de Dijon finies, aux autres Capitaines ſur ce qu'il auoit opiné feut demandé aduiſ, Leſquels feurent tous de ſon party, reſeruez le Comte de Ligny, & le Seigneur de Champdée.

APRES que chaſcun eult aduiſé, le Seigneur Jean Iacques dict au Comte de Ligny. Ainſi que à

H iij

1499. bonne bouche se doibuent garder friands mor-
 ceaulx, à vous est reseruée la conclusion de ceste ma-
 tiere doubteuse, Seigneur Comte de Ligny, qui
 iouxte la raison en sçavez plainement decider, &
 au droict poinct de son arrest deüemēt la ramener.
 Ouy auez par cy deuant l'opinion de chascun, reste
 de nous dire la vostre. Et sur ce diēt le Comte de Li-
 gny, adressant sa parole au Seigneur Iean Iacques.
 Seigneur, i'ay bien peu veu du faict de la guerre. Et
 ne m'a l'experience tant instruiēt aux armes, que à
 l'opinion de tant de Cheualerie sur la chose militai-
 re deusse contrarier. Toutesfois sans vouloir em-
 pescher l'arrest de la plus saine part: mais seulement
 afin que derechef chascun puisse à clair debatre &
 sainement esclaircir nostre affaire. Tant que la veri-
 té mieulx se puisse attaindre, & nous trouuer che-
 min qui seurement nous puisse adresser. S'il est ainsi
 que la disette de viures, & foiblesse de ceste ville de
 Morterre, & le destroit d'icelle, nous deffende le
 demeurer. Au regard des viures, tant que le Mar-
 quifat de Montferrat sera pour nous, qui jame nous
 fauldra, default n'en aurons. Car nos ennemis qui
 au regard de nous sont peu à cheual, tant enfermer ne
 nous sçauront, que malgré leur pouuoir ne sortiōs
 aux champs, & que ne soyons souuent aduitaillez.
 Si la ville pour attendre la puissance, & longuement
 soustenir les assauls de nos ennemis n'est deüemēt
 fortifiée, il n'est muraille seure que d'homme ver-
 tueulx, qui par nuls efforts d'aduersité ne peuuent
 estre surmontez. Si en ce lieu nos corps sont à de-

estroict, en ampliatiō de vigueur nous fault les cœurs 1499.
 ellargir, & auoir esperance de bonne fortune, qui
 tousiours a la main preste pour les audacieux ay-
 der. Couurons nous hardiment des asseurez escus
 de constance immobile. Car au pis aller, si pour l'en-
 nuyeux fais de la guerre longuement supporter, ou
 par trop dur siege, ou maigre famine endurer, à l'ex-
 treme refuge de retraicte nous fault auoir recours,
 quand ores sur nostre ost eschech pourroit aduenir,
 rien ou bien peu de perte y pourroit auoir le Roy.
 Au regard de l'artillerie, tant à main luy est le char-
 roy, que de leger sauuer se pourra. Et quand elle se-
 ra mise deuant, assez bons gens d'armes François a-
 uons pour la garder, & conduire iusques à Nouarre,
 ou ailleurs, malgré le pouuoir de nos ennemis. S'il
 aduenoit que affaire nous surueint, ce ne pourroit
 estre que sur vne partie de nostre gent de pied, dont
 le Roy peu seroit endommaigé, & du sien gueres
 n'auroit à dire. Car autres pietons n'auons que Suif-
 ses, & Piemontois, & peu de nombre de Gascons,
 Ainsi grāde perte ne s'en pourroit ensuiure. Si nous
 dessemparons la place, elle est pour nous perduë, &
 les viures du Marquisat de Montferrat arrestez. Et
 dirōt nos ennemis que sommes chasséz, & en fuite.
 Parquoy prendront cœur asseuré, & audacieux vou-
 loir contre nous. Milan qui attend la venuë de no-
 stre infortune, se mettra toute en armes pour le Sei-
 gneur Ludouic. Nous perdrons la reputation. Ce
 qui esleuera le couraige à nos ennemis, & rabaissera
 nostre bruit, dont sur nous crierā toute l'Italie. Les

1499. Venitiés qui autre chose n'attendent, que veoir qui aura du mieulx, se pourront declarer contre nous. Si l'armée du Seigneur Ludouic marche vers Nouarre, nous y enuoyerons partie de nos gésd'armes, avec bon nombre de gens de pied, lesquels pourront à l'ayde de la ville tenir moult longuement, & nous à besoin les secourir. Pour ce seront tousiours nos ennemis en doubteuse pensée, & nos gens en propos assuré. Ainsi me semble que pied coy deuous tenir icy pour le mieulx.

L'OPINION du Côte de Ligny ouye, sans autre replique à ce contraire, feut par le Seigneur Iean Iacques, & autres Capitaines approuuée. Et sur l'heure ordonné pour meestre barrières au deuant de l'armée du Seigneur Ludouic, que dedans Nouarre garnison de François seroit enuoyée. Et là feut transmis le Seigneur d'Alegre, avec cent hommes d'armes, mille Piemontois, & cinq cent Gascons.

Mars.

LE cinquiesme iour de Mars, le Seigneur Ludouic partit avec son Ost de Vigueue. Et pour la garde d'icelle laissa huiet cent Allemans, & quatre cent cheuaulx legers, sous la charge d'un Gentil-homme Lombard, nommé Iean du Casal, qui à la prise d'Imole auoit esté prisonnier du Baillif de Dijon. Et s'en alla le dict Seigneur Ludouic loger dedans vne petite ville nommée Trecas, à six milles pres de Nouarre.

CHAPITRE XXI.

Du renfort de Nouarre, & du siege d'icelle.

LE



Le Seigneur d'Alegre estant dedans Nouarre, sçachant la venue du Seigneur Ludouic, & son armée, & luy pour ionguement garder la ville cōtre telle puissance mal accompagnée, manda au Comte de Ligny que secours luy enuoyast. Dont feut aduisé que Aubert du Rouffet, Robert Stuart, & le Seigneur de Courfinge, avec deux cent hommes d'armes, seroient là transmis. Le septiesme jour de Mars feut le dict renfort transmis à Nouarre. Et pour doubte que des embusches del'armée du Seigneur Ludouic par les chemins ne feussent rencontrez ceulx qui au dict renfort de Nouarre alloient, le Côte de Ligny, & le Seigneur Jean Iacques, avec trois cent hommes d'armes les conduisirent. Lesquels ne feurent si tost entrez par vne des portes de la ville, que le Seigneur Ludouic n'eust mis le siege avec son armée deuant l'autre. Et tout en l'heure fait faire trenchées, tauldis, & charger son artillerie, & commencer la batterie tant aigre, & depiteuse, que sur la muraille homme ne osoit descourir, qui tost ne se trouuast par terre. Et tant continuèrent coups, que en cinq heures telle passée au trauers des murs feut faicte, qu'elle suffisoit aux assaillans pour leur debuoir donner entrée. Au desaduentaige des François sembloit bien estre la chose. Car avec peu de gés contre grosse armée grande place & foible leur failloit garder. Et autour de la muraille n'auoit nuls fosses qui empeschement feissent aux ennemis.

1499.

Mars.

CHAPITRE XXII.

*De l'assault que l'armée du Seigneur Ludouic
donna à Nouarre. Et comment plusieurs
Bourguignons & Allemans y de-
meurerent.*



VOYANT le Seigneur Ludouic, & les Capitaines de son armée, que par force entrer leur failloit, & que pour ce faire assez leur sembloit auoir ouuerture, & pouuoir, commanderent que chascun approchast la breche. Laquelle feut en vn moment soubdain enuironnée de plus de dix mille Allemans, & douze cent Bourguignons. Au dedans de la ville tous en armes estoient les François en tel arroy, que l'vn n'empeschoit l'autre. Et tel ordre estoit gardé entre eulx, que pour coup d'artillerie, ou autre danger, nul desbranloit de son lieu. Les Capitaines François voyans l'assault tant appresté, qu'il ne restoit que l'assembler, enhorterent leurs gens de monstrer aux ennemis que la durescé du fer failloit amortir par fer. Chascun des Capitaines remonstroit aux siens par paroles ce que par la main debuoit estre executé. Et entre autres le Seigneur d'Alegre. Dont ils eurent les cœurs endurcis de tant furieux vouloir, que plustost eust esté le harnois amolly, que le couraige vaincu. Et n'y eust celuy à qui ne tardast la venue de l'assault. Lequel feut si soubdain, que on ne se donna

garde que l'enseigne des Bourguignons feut planté
ioignant la breche. Car pour vouloir auoir l'hon-
neur del'assault, & profict de la prise, iceulx Bour-
guignons s'estoient mis des premiers. Et à celuy af-
faire les hommes plus estimez & la fleur de toute
leur bande estoit en place. Quoy plus? L'assault feut
donné moult rudement. Et tant, que pour le bruit
des coups d'artillerie, & de main, qui d'une part &
d'autre le faisoit, vn mille autour de la place le ton-
nerre n'eust esté ouy. Main à main commença le
combat si dur, que à la fois les François estoient re-
culez par force, & puis les Bourguignons & Alle-
mans vigoureusement rechassez. Moult hardiment
assailloient. Car pour poux de lances, ne coups de
traict, & d'artillerie, qu'on leur donnast, n'esloi-
gnoiet la passée. Et tant approcha celuy qui portoit
l'enseigne d. s Bourguignons, que vn pied au dedàs
de la breche meit à ferme. Et là y eut merueilleuse
foule. Car les assaillans de plus en plus fort se réfor-
moiēt. Et supposé que plusieurs d'iceulx feussēt mor-
tellement menez, pourtant ne laissoient l'ombre de
leur enseigne. Les François voyans que pour les
coups mortels de leurs ennemis rabbatre, le tout de
leur deffence failloit aduancer, chascun d'eulx tant
aigrement meit le fer en besongne, que de sang hu-
main tout autour d'eulx estoit la terre teincte &
enrougie. Et comme ceulx que necessité esuertuoit
faisoient merueilles d'armes. Vn ieune Gêtil-ho-
me François nommé le bastart d'Amenzay, tant
aduancea la marche, que avec celuy qui portoit

l'enseigne des Bourguignons main à main eust la meslée telle, que apres que le combat singulier des deux champions feut encommencé, à grands coups d'espée feut l'enseigne mise par terre par les François. Le Bourguignon la tenoit d'un costé, & le François de l'autre. Et ainsi que eulx se combattoient à qui elle demeureroit, les Bourguignons & Allemans voyans leur affaire tant rabaisser, à tous efforts veindrent secourir leur enseigne. Oncques tant de dards ne feurent tirez pour vne heure, que à celle fois contre celuy François de coups de traits & hacquebutes feurent deschargez. Et tant mortellement, qu'à tout au trauers du corps par le degoust du sang en apparoissoit en plusieurs lieux la vraye enseigne. Mais pour ce ne lascha sa prise, ains du poing du Bourguignon l'arracha à viue force, & tout au tour de son bras malgré ses ennemis la plia. N'estoit-ce bien legitimer degenerée nature? Si estoit, Car non-obstât les extremes sanglots dont estoit celuy François attainct, iusques à son logis emporta l'enseigne, sans monstrier visaiage triste, par proximité de fin. L'assault duroit sans cesse moult aspre & cruel. Et n'y auoit François qui ne deust estre las. Car le combat auoit ja bien duré quatre heures. Et auoient à tous coups ennemis rafraischis, & à relais. Mais chascun faisoit ce que pouuoit sçauoit. Les Capitaines estoient tousiours deuant. Les hommes d'armes & archers par craincte de mort ne reculoient vn seul pas. Les gens de pied se monstroient moult fierement, & mesmement les Gascons. Car de leur part

si à poinct deffendoient l'assault, que homme n'approchoit la breche, pour cuider entrer, qu'il ne feust empenné. Au derriere d'un creneau demy abbatu estoient soixante hommes d'armes Bourguignons, pour au besoin réforer l'assault, sans faire bruit. Vn François aduisa leur embusche, lequel monta secrettement sur la muraille, au droict d'iceluy creneau, & l'esbranla. En sorte que sur iceulx Bourguignons le veint adresser, dont les vns feurent assommez, & les autres affolez. Tellement que de tant pres plus n'approcherét. Autour de la muraille où l'assault se donnoit auoit tant de morts, que aux autres empeschoient le chemin. Car plus de cent Bourguignons des plus gens de bien y demeurèrent, & plus de six vingt Allemans, avec deux de leurs enseignes. Des François y moururent le dict bastard d'Amazay, vn homme d'armes de la compaignée d'Aubert du Rouffet, nommé Cyprien d'Auton, deux archers, & quatre laquais. Mais à la parfin l'assault feut cessé, au dommage des Bourguignons, & Allemans, & au desaduentaige du Seigneur Ludouic. Ainsi loing de leur propos, & frustrez de leur atente feurent enuoyez. Si tost que chascun feust retiré, les Bourguignons, qui plusieurs gens de bonne estime à l'assault auoient perdu, à la ville transmeirent vn de leurs trompettes, ayant charge de prier les Capitaines François permettre enterrer les morts. Les François oyans la demande d'iceulx Bourguignons, feurent contents que l'un apres l'autre avec peu de gens on les emportast sans danger. Et affin que sous om-

1499. bre de ce n'y eust machination oculte, feut dict que à la peine d'un coup d'artillerie, ou de traiçt, plus de deux ou trois à la fois n'approchassent la muraille. Apres que les morts feurent mis hors de la place, & chascun retiré à son logis, au rempart de la rouverte feut mise la main en maniere, que tout autour de la ville n'auoit de plus seur endroiçt. Les François voyans que au long aller seroient de secours besongneux, au Comte de Ligny, & au Seigneur Iean Iacques manderent leur affaire. Lesquels derechef leur enuoyerent deux cent hommes d'armes. Et menerent iceulx le Comte de Misoc, fils du Seigneur Iean Iacques, Messire Aymar de Prye, Louys d'Ars, le Capitaine Sainct Prest, & le Seigneur de Chastelart. Lesquels renforcerent la place de tant, que leurs ennemis n'en approcherent fois, que la retraiçte ne feust à leur desaduentaige. Et ne feut iour, durant ce temps, que par les François faillies & escarmouches ne feussent faictes. Louys d'Ars, Robert Stuart, le Seigneur de Chastelart, & les autres Capitaines François reueillerent souuent l'ost du Seigneur Ludouic. Et tant y feirent de cris, & allarmes y donnerent, que si ceulx de la place estoient bien lassez, à repos n'estoient ceulx du dehors. L'artillerie du Seigneur Ludouic estoit sans seiour mise à l'exploict, tel que murailles, bouleuarts, deffences, repaires & creneaulx, deuant ces coups n'auoiét durée. Tant feut la batterie continuée, que en cinq iours la passée feut si grande, & la rouverte tant pres de terre, que en tous endroiçts genit d'armes Fran-

gois estoient en veüe & au descouvert dedans la place; où iour, & nuit, le harnois sur le dos, aux breches, & passées de la muraille, plus de quinze iours durant, leur fallut tenir pied ferme, sans que nul osast abandonner sa place. La nuit remparoiër, & faisoient fossez, & tauldis, pour le iour eulx garantir. Et n'y auoit ne grand ne petit qui à l'œuure ne meit la main. Entre eulx estoient les ceremonies de guerre si bië gardées, que pour doubte de coups d'artillerie, d'assault, ou d'autre danger, nul desmarchoit de son ordre. Voire à la peine d'aussi grand reproche encourir, comme si d'une bataille honteusement s'en feust fuy. A ce besoin seruirent les hommes vertueux de mur inexpugnable. De iour en iour donnoient Bourguignons & Allemans assauts moult furieux aux François, non seulement en vn lieu, mais souuëtesfois en trois, ou en quatre. Et plusieurs fois feurët cinq bouleuarts à vn coup tous assaillis: mais par les François tousiours deffendus tât vigoureusement, que leurs ennemis ne gagnerent sur eulx par force pied de terre. Le Seigneur Ludo- uic feut moult esmerueillé de la longue tenuë, & ferme resistance des François, lesquels au regard de la multitude des siens n'estoient que vne poignée de gës. Pensant que si leur secours qui venoit de France estoit du vouloir d'iceulx, & que ensemble se peussent ioindre, moult loing se trouueroit de la fin de son emprise. Mais tout ce dissimulé, il feit continuer la batterie, & les assauts, de plus en plus fort. Et eust deliberé propos de tost prendre la ville de

1499. Nouarre d'assault, ou que à la poursuite seroit def-
faicte son armée. Bien estoit aduertie par ses espies
que le Sire de la Trimouille avec grande puissance
estoit sur les champs, & qu'il approchoit à toute di-
ligence pour secourir les François. Et entendoit bien
que si la place n'estoit prise premier que eulx feus-
sent assemblez, que tout son affaire estoit en demeure.
Dont à tous efforts mettoit peine à gagner le
logis, & deffaite les hostes qui estoient dedans. Les-
quels auoient ja tant enduré d'ennuis, soustenu d'as-
saults, eu nuict & iour cris, & allarmes, trauaulx
sans repos, disette de viures, & tant au froid & à la
pluye de harnois esté endossez, que plus ne pou-
uoient. Leurs murailles & remparts ne leur seruoient
plus. Car tout estoit par terre.

CHAPITRE XXIII.

*Comment les François rendirent Nouarre au Sei-
gneur Ludouic par composition.*

Mars.



Le Samedy, vingt & vniesme iour de
Mars, aduiferēt les Capitaines & gen-
d'armes François, que plus longuemēt
soustenir le siege, veu leur ennuyeux
fatigue, & aduantageux arroy de leur ennemy, c'e-
stoit mettre en douteuse aduenture tant de gens
de bien. Que si fortune qui tourne à tous vents vou-
loit permettre leur deffaicte, que trop grand de-
fault en pourroit auoir le surplus de l'armée de Fran-
ce.

ce, & que mieulx estoit avec honorable composition rendre la place, qui à temps se pouuoit recouurer, que pour la vouloir garder eulx vouloir aduançurer à perte trop dommageable. Et aussi que cinq cent hommes d'armes bien montez estoient là dedans, qui par default de viures si plus duroit le siege pourroyent s'affoiblir & perdre leurs cheuaux, lesquels apres ce ne sçauroient à quelque bataille ou autre grande affaire tenir lieu que de varlets. Et sur ce parlerenterent, & au Seigneur Ludouic telle composition demanderent, Que tous à cheual en armes, la lance sur la cuisse, sortiroient, & tous leurs pïetons deuant eulx, la picque au poing, ou arballestes bandées, & que leur artillerie seroit retirée dedans le chasteau, lequel de trois iours apres leur parlement n'assauldroient. Ce qui leur feut accordé, & tenu.

LE Dimanche, vingt-deuxiesme iour de Mars, Mars: de Nouare sortirent les François tous en armes, avec leurs gens de pied, & tous ceulx de la ville qui suiure les voulurent eurent de ce liberté. Toute l'armée du Seigneur Ludouic deuant la ville se meit en ordre pour les veoir passer. Plus de deux milles de pays avec les François cheuaucherent deux cent hommes d'armes Bourguignons, lesquels eurent avec les François sur le faict de la guerre plusieurs paroles, puis le retirerent chascun à son quartier. Les Bourguignons retournerent à Nouare, & droict à Mortere prirent les François leur adresse.

K

CHAPITRE XXIV.

*Comment six cent Alemans de ceulx du
Seigneur Ludouic feurent defaiçts par
les François entre Mortere
& Vigue.*



LE MESME iour, le Comte de Ligny & le Seigneur Iean Iacques estoient fortis de Mortere, cuidans aller renforcer la garnison de Nouare, & marcherent iusques à vn bourg nommé Robu, à quatre milles pres. Mais ja se retiroient ceulx de la garnison par vn autre chemin, dont ne se rencontrerent. Au partir de Mortere auoit le Comte de Ligny enuoyé vn Capitaine Gascon, nommé Perot de Payennes, à tout cent hommes d'armes, pour garder vne ville pres de là nommée Vessepola. Mais tantost qu'ils feurent à chemin remanda iceulx par vn trompette hastiuement retourner à Mortere, doubtant que les Alemans, & autres gens d'armes, qui pour le Seigneur Ludouic gardoyent Vigue ne allassent prendre le logis, qui pour l'heure de François estoit despourueu, & aussi renuoya celle part vn Gentilhomme nommé Rocquebertin avec vingt cheuaux pour estre des premiers à l'entrée. Droiçt à Mortere se meirent les vns & les autres au retour, & tant picquerent que sur les dix heures du matin tous

ensemble deuant les portes de la dicte ville de Mortere se trouuerent. La garnison de Vigueue auoit bien sceu comment les François, pour aller secourir Nouare, auoyent laissé Mortere : dont s'estoyent mis aux champs six cent Alemans, & deux cent cheuaux legers, que conduisoit vn Lombard nommé Iean du Casal, dont i'ay parlé cy dessus, avec quelques autres Capitaines pour le Seigneur Ludouic. Et cuidoyent iceulx sans faillir gaigner la ville de Mortere, mais à eulx & aux François feurent les portes fermées. Toutesfois par douces paroles eurent les François ouuerture, & entrèrent. Si tost que les cheuaux feurent establez & que les gens d'armes commencerent à repaistre, nouuelles feurent que sur les fossez & deuant les portes de la ville estoient les Alemans du Seigneur Ludouic à grand nombre. Et tout à l'heure les François, qui n'estoient encores desarmez remonterent à cheual, & marcherent tout à la file vers la porte où estoient iceulx Alemans. Et là eurent entre eulx quelques paroles de rigueur. Mais tost apres injurieux l'agaiges & deffis haineux, effect de main mise veint en ieu. Car les François firent ouurir les portes, & sur leurs ennemis faillirent moult rudement. Le Capitaine Perot de Payennes, soy doubtant de quelque embusche, & voyant sans ordre ses gens à la faillie, voulut iceulx arrester, & fait fermer les portes. Toutesfois plus de soixante cheuaux se meirent hors, & commencerent à charger si rudement, que au rencontrer dedans de petits guez & ruisseaux qui là couroient, plus de quarante

1499. d'iceulx lansquenets & Alemans feurent plongez & noyez, & les autres chassez plus d'un trait de d'arc. Voyant le Capitaine Perot la charge que faisoient ses gens du dehors, & que ja fort esloignoient la ville, doubtant que affaire leur surueint, ne les voulut sans luy plus laisser escarter. Mais avec le surplus de ses gens, & enseigne desployée, se mit apres si viste, que tost les eut atteints. A l'assembler feurent les Alemans à leur perte emmenez iusques à vne chapelle à demy mille loing de la ville. En laquelle & tout autour d'icelle estoit vne embusche de deux cent chevaux, & de cinq cent soixante Alemans. Lesquels tous ensemble & en desmarche ordonnée faillirent sur les François. Et là d'un & d'autre costé commença l'escarmouche telle que besoing estoit à chascun d'auoir l'œil à son affaire. Les gens d'armes François se tenoient ensemble, & quand aux ennemis assembler leur failloit, tous à la fois donnoient la charge, sans ce que nul en queue demeurast, ou se mit à l'escart. Afin que entre les gens de pied & les chevaux ne feust enclos. Souuent feurent les estradiots assaillis: mais à nuls coups attendoient le heurt, & quand ils estoient pressez à leurs pietons, se retiroient, qui tant ferrez & en si bon ordre se tenoient que on ne les pouuoit rompre ne desassembler. Mais les escartez estoient à coup rembarrez, & mis à la raison. Voyans iceulx Alemans, & autres soldats Moriens, que à leur trop dommageuse perte tournoit leur entreprise, & que pour le mieulx retraicte leur estoit profitable, en eulx defendans à

tour de bras preinrent le chemin de Vigueue, & plus 1499.
 de deux milles de pays en eulx retirant ainsi recule-
 rent. Tousiours en demeueroit quelqu'un en reste,
 & aussi à coups de picques & hacquebutes blef-
 soyent gens & cheuaux. Les François qui ce iour
 estoient faillis de Nouare, en approchant la ville de
 Mortere sceurent par aduanture la mellée, & là le
 plus tost qu'ils peurent se trouuerent. A leur venue
 feut derechef l'escarmouche recommencée d'un
 costé & d'autre moult dure. Car les Alemans &
 gens de cheual du Seigneur Ludouic, voyans leurs
 ennemis de nombre renforcez, de vertueux courai-
 ges feirent leurs escus: & si à droict se defendirent
 pour autant qu'ils estoient, que nul d'eulx faisoit
 à reprendre. Messire Aymar de Prye sceut bien à
 quoy s'en tenir. Car cuidant avec eulx auoir mellée,
 tant empesché entre eulx se trouua, que nonobstant
 que à toutes mains deffence luy feust secourable,
 chargé feut de toutes parts, & luy promptement re-
 bouté avec vn coup de hacquebute que au trauers
 de la cuisse en emporta. Le Capitaine Seigneur de
 Saint Prest les approcha de tant, que au trauers du
 gantelet d'un coup de picque eut la main percée.
 Somme nul les approchoit de longueur de picque
 qu'il ne feust atteint. Et de quelque part que on les
 assailloit sur leurs seures gardes & rusées defences
 tenoient l'œil, le pied, & la main, en maniere qu'on
 ne les pouuoit deffaire. Quand on chargeoit leurs
 gens de cheual, ils s'ouuroient par le deuant, & entre
 eulx les recueilloient, & en reculât ceulx de derriere

1499. se retournoient contre les François, & nulle fois failloient d'attaindre quelqu'un. De leur rim sortoient huit à huit, dix à dix, si tres-hardiment qu'on ne sçauoit plus, & à grands coups de picques & halebardes faisoient d'eulx telles merueilles, que homme ne les voyoit qu'il n'en eust frayeur. Vn entre les autres feut qui pour mieulx donner coups à l'aïse du corps, en plain champ & hors la bataille, comme s'il eust voulu ioïer des souplesses, lascha son pourpoint, & en donnant le branle aux espaules, à deux mains preint la halebarde pour ruer patacs. Et comme celuy qui pour le prix de la mort d'aultruy voulut sa vie mettre en vente, contre tous ceulx qui à ce marché se vouloyent trouuer tenoit pied ferme: toutesfois à la fin du jeu luy mesadueint. Car luy & tous ceulx qui preinrent ce party s'escarterent de tant, que plus ne trouuerent le chemin du retour. Les autres se retirerent vers Vigee, faisans fuite de loup. Mais nonobstant leur defence on les chargeoit de si pres, qu'ils ne sçauoient tour donner qui de mort les sceut garantir. En eulx retirans trouuerent sur le chemin vn petit bois assez fort, & eulx cuidans illec mieulx sauuer se desordonnerent, & pour gaigner le fort leuerent leurs picques. Voyans les François le desordre d'iceulx Alemans, avec quelque gent de pied qu'ils auoient se meirēt apres, & de toutes parts les enuahirent. Lesquels voyans sur eulx tomber le fais de la defortune, voulurent aux ennemis laisser sanglante & luctueuse victoire. Car à tous efforts leurs vies defendirent. A l'entrée

de ce bois dont i'ay parlé, vn nommé George Rudich, Capitaine d'une bande de Suisses du party du Roy se meit apres en l'heure qu'onques puis ne reuint. Car tant se hastia que premier qu'il peust estre rescous les Alemans l'occirent. Vn archer de la compaignée du Seigneur de Saint Prest, à tout vne arbaleste bandée, pour plus droict assenner quelqu'un de iceulx Alemans, lascha la resne de la bride de son cheual, & là tant hafarda sa vie sous la feureté de la conduite d'iceluy, que entre ses ennemis soubdainement l'emmena, lequel à coups de halebardes feut illec assommé. Assez d'autres François blesserent iceulx Alemans; & eussent plus, mais l'empeschement des branches & des arbres du bois où ils estoient leur nuisoit de tant, que leurs picques & halebardes ne peurent plus embesongner, ne eulx ralier. Parquoy feurent tous en ce lieu tuez, & deffaits, & en mourut par compte cinq cent, & cinquante feurent pris. Lesquels feurent par les Suisses, qui à celle deffaicte auoient perdu leur Capitaine entre les mains des François tous occis. Les gens de cheual se defendirent longuement. Leur Capitaine nommé Jean du Casal eut vn coup de lance en la cuisse, & feut au bras blessé en deux lieux. Lequel pourtant ne voulut onc abandonner ses gens, supposé que à l'aduantage feust monté pour soy retirer d'heure'il eust voulu. Ainsi feut pris avec la plus part des siens. Les autres se sauuerent comme ils sceurent, & apres ce droict à Mortere se retirerent les François, sans auoir perdu que deux hommes.

1499.

Mars.

Le lendemain, vingt & troisieme iour de Mars, le Comte de Ligny, & le Seigneur Iean Iacques, avec leurs gens d'armes retournerent à Mortere, & fait le Comte de Ligny ensevelir les morts, qui encores estoient estendus sur terre. Lesquels selon le rapport de ceulx qui les veirent feurēt bien des plus beaux hommes que nature puisse ouurer, & tous remplis de cœurs virils. Dont apres la mort louer le deusse, si presomptif outrecuider n'eust voulu le terme de leur vie anticiper. Car le Capitaine de leurs gens de cheual disoit, Que tant estoient au partir de Vigeeu enflēz de fierté, que toute l'armée de France selon leur dire n'eust eu pouuoir pour les deffaire. Toutesfois trop presumer, qui les fols hardis souuent deçoit, les meit en voye prochaine de mauuaise fin. Ainsi qu'on les mettoit en terre, vn trompette du Seigneur Ludouic veint sur le lieu pour demander vn Gentil-homme Lombard, qui avec les Alemans auoit esté tué: mais on ne le peut connoistre entre les morts, tant auoient les visaiges destranchez. Les corps feurent mis en terre, & pour les pechez d'iceulx le Comte de Ligny feit à Mortere faire obsequē solempnel.

CHAPITRE XXV.

Comment le Seigneur Ludouic apres que les François eurent rendu Nouare feit son entrée à Milan.

DEDANS

DEDANS la ville de Nouare estoit le 1499. Seigneur Ludouic avec son armée, moult ioyeux de la reduction d'icelle, pensant que les François apres auoir faict celle perte se trouueroient hors du chemin de seure retraicte, & que par les autres villes de la Duché de Milan seroyent tant mal receus qu'ils n'auroient cause de y faire long sejour, & que aussi toute la Lombardie crierait sur eulx ville gagnée. Ce qui pourroit leur fureur adoucir, & amollir leur couraige. Et apres ce, cuidant de ses ennemis estre le vainqueur, comme celuy qui de victoires heureuses & glorieux labeurs vouloit la palme de triomphe receuoir, avec ses plus solempnels complices, & quelque nombre de gens d'armes dedans la ville de Milan s'en alla, & là feit son entrée pompeuse. La reception que les Seigneurs & peuple de la ville luy feirent feut tant magnifique, que à ceulx qui estoient au spectacle pouuoit sembler que Dieu feust illec descendu. Tant feut en honneur aduancé, & haultement receu, que de tous saluts amiables & humbles reuerences de grands & de petits de toutes parts feut seigneurialement accueilly, & pour plus le monter en gloire caduque, à peu pres le voulurent iceulx Lombars diuinement adorer. Quoy plus? Eulx cuidans le pouuoir des François du tout abatu, comme ceulx qui tousiours aux plus forts tendent la main, apres ce recueil tant somptueux les tresors de la ville luy ouurirent, pour en prendre à son vouloir, le prians que le plus tost qu'il

L

1499. pourroit eust à chasser de Lombardie tous les François qui là estoient si loing que jamais vn tout seul n'en peussent veoir. Lequel leur promet que sans faillir leur requeste seroit en brief executée, si fortune ne luy tournoit le dos. Et pour à ce de plus se vouloir à eulx obliger, de leurs deniers si à plain garnir ses coffres, que de plus de deux cent mille ducats empira leurs boutiques. Et comme non assouuy de l'auoir de tant de bourses desliées, au Sanctuaire de Dieu osa mettre la main, & aproprier à son mondain vsaige ce qui au seruice diuin estoit ordonné, sans auoir doubte de la punition amere encourir, dont jadis la diuine vengeance voulut les sacrilegues & expoliateurs des temples cruellement châtier. Mais tost apres ce grief forfait, comme la roüe qui deuant vn bouffement venteux tourne du hault en bas, ainsi du plus sublime degré de sa gloire instable applaty & assoupy, dedans la fange de misere se trouua. Gueres ne sejourna dedans Milan apres qu'il eut ainsi exploicté, ains s'en retourna à Nouare où estoit son armée.

CHAPITRE XXVI.

*Comment le Sire de la Trimoüille avec son
armée arriua à Mortere en Lombardie.
Et du renfort qu'il donna aux
François qui là estoient.*



Le vingt-quatriesme iour de Mars, le Sire de la Trimouille avec son armée partit de Vercel, non sçachant la ville de

Mars.

Nouare estre renduë au Seigneur Ludouic, & cuidant trouuer le siege deuant, pour secourir les assiegez marchoit le plus tost qu'il pouuoit celle part. Pensant que si d'heure s'assembloit avec eulx, que à quelque prix que ce feust à ses ennemis feroit vn alarme, voire si bon luy sembloit le combat, sans autre renfort attendre, & chauldement leur donneroit la bataille. Ainsi qu'il approchoit Nouare, par les gens du pays feut aduertie que les François auoyent rendu la ville au Seigneur Ludouic, & que à Mortere s'estoyent retirez, dont preint le chemin de Mortere, & là sur les six heures du soir arriua avec ses gens d'armes. A celle venue feut l'armée de France contre le pouuoir du Seigneur Ludouic moult renforcée. Et de tant que assez puissans se cuidoient les François pour l'attendre en plaine avec son ost. Le Sire de la Trimouille feut maintes fois d'aduis que si la demeure de leurs Suisses estoit plus gueres retardée, que la bataille feust donnée promptement aux ennemis, afin que de plus ne se renforçassent. Et que les François, qui ensemble estoyent douze cent hommes d'armes, avec quatre mille pietons, & bonne artillerie, estoyent assez forts pour le combatre & deffaire. Et que sur ce ne restoit que vigoureusement besongner & donner à droict. Toutesfois pour ce que les Suisses qu'on attendoit estoyent à chemin, & de

1499. iour en iour arriuoient par compaignées, feut dict qu'on ne combatroit iulques à leur venuë. Ils receurent à Verceil leur payement, & estans tous prests à mettre en besongne, feurent à Mortere le troisieme d'Auil. Durant le temps qu'ils feurent attendus, à l'affaire de la guerre eut tousiours l'œuïl le Sire de la Trimouïlle, comme celuy qui sur tous autres l'auoit en memoire pour recommandée. A toutes heures visitoit les gens d'armes, ayant aduis à la maniere d'iceulx, pouruoyance de cheuaux, & accoustremens de harnois. En maniere que si quelque pauvre soldat estoit par inconuenient desmonté, ou par default d'argent d'armeures desnüé, pour le secourir & remettre sus son escuyrie estoit ouuerte, & sa bourse desliée. Rien n'auoit en espargne pour sçauoir par seures & diligentes espies les affaires & entreprises des ennemis. Sur les chemins & passaiges par où pouuoient venir secourables aydes & renfort d'armes au Seigneur Ludouic auoit grosses embusches, & descouureurs de pays. En ordonnée police tenoit tous les gens d'armes François, & avec propos deliberé de loyaument seruir le Roy, & vigoureusement combattre leurs ennemis. Et avec assésuré maintien & chere ioyeuse à chascun donnoit fermeté de couraige, & esperance de victoire. Avec le Comte de Ligny, le Seigneur Iean Iacques, & autres Capitaines de l'armée, consultoit souuent sur ce qui au mieulx de la guerre pouuoit seruir, remonstrant à iceulx que tant vertueusement par cy deuant la besongne encommencée & pour-

suiuie auoyent, que à fin honorable ne pouuoient 1499.
faillir. Quoy plus? Tant monstroit son vouloir au
seruice du Roy plein d'affection, que le tout de son
pouuoir y estoit au large employé. Et plus n'en di-
ray, si n'est que à ceste conclusion veux adjouster,
que à sa venuë désirée moult ioyeux feurent les
François, & sous l'ombre de l'estendart de son
heureux renom plus asseurez. A Verceil lors estoit le
Cardinal d'Amboise, qui d'heure en autre auoit la
poste, & nouuelles du Roy, pour entendre aux affai-
res d'iceluy, & l'aduertir du demené de ces choses.
Du renfort & secours de France par toute l'Italie
feurent tost nouuelles semées, dont auant la main
tels y auoit qui pour la perte des François parier
auoient hazardé leur argent, & leur foy engaigée,
qui apres ce du marché se repentirent. Et tels qui à
bride abatuë couroient à la perte d'iceulx, qui tout
court feurent arrestez. Et voyant le Seigneur Ludo-
uic les François rassemblez & vnis, & de iour en
iour de plus en plus fort leur puissance agrandir, ne
feut pas certain de mettre à fin son entreprise iouxte
le vouloir de son desir. Dont au leuer & au coucher
de diuers propos & pensées estranges eut continuel-
le compaignée. Et pour descharger la hôte de son
cœur de faistant pesant, à ses priuez Capitaines, &
amis familiers voulut publier le secret de son affaire,
auxquels voulut tenir propos.

CHAPITRE XXVII.

*D'une Oraison que dedans la Ville de Nouare
le Seigneur Ludonic eut à ses Capitaines
sur le traicté de son affaire.*



I A V temps d'heureuse prosperité la congnoissance des amis par fortune conciliez m'a esté difficile, au besoing extrefme d'aduersité amere pourront estre facilement mis à la preuue, Seigneurs, Pour ce le dis, que aux ans florissans de ma felicité d'aucuns de ceulx qui plus beau visaige m'ont monstré, à mon plus grand affaire moins de secours en eulx ay trouué. Mais au fort ce n'est qu'un des moindres tours de luiète, dont fortune abat les plus roides, & ceulx qui plus à elle se cuident attacher. Car ceulx qu'elle faict amis infelicité les rend ennemis. Et pource que vous mes bons & fideles amis, au plus hault degré de mon Seigneurial estat, & au plus bas estaige de la fosse de ma dolente extermination en tout temps m'avez accompagné & suiuy, & aussi que l'experience m'a descouuert vostre loyal vouloir, à vous comme aux seures gardes & iurez concierges de la porte de mon cœur, & fermes appuis de toutes mes charges l'intention de mon couraige veulx donner à congnoistre, & en mes choses aduerses prouision de conseil & remede de secours de-

mander. Sçachant que en la loyauté des Conseil-1599.
 lers gist la seureté des Princes & le salut de la chose
 publique. Vous sçauéz comment par plusieurs ans
 du tiltre Seigneurial de la Duché de Milan i'ay paci-
 fiquement ioüy, & à la Principauté Ducale d'icelle
 directement succédé. Et comment par l'Empereur
 Maximilian moderne, de la Seigneurie duquel de-
 pend la diète Duché, à la succession hereditaire
 comme vray Seigneur i'ay esté receu, & au droict
 qui à la famille des Sforces peut appartenir substi-
 tué. Et que aux iours luifsans de ma puissante domi-
 nation i'ay tant magnifié mon estat, que entre tous
 les Princes du monde, i'ay esté l'un des plus redoub-
 tez. Tellement que toute l'Italie & autres circon-
 uoïfines regions plioyent sous le pouuoir de ma
 main. Et que tant me suis trouué par la vertu de for-
 ce haultement authorisé, que oncques ne me veis
 en bransle d'estre submarché, iusques à ce que par
 la menée d'aucuns mes haineux subjects, & consen-
 tement du vouloir populaire, qui ne demande que
 nouuelletez & mutations de Princes; depuis vn an
 en ça les François par armes sont venus courir mes
 pays, desoler mes citez, deualter mes places, & me
 debouter & chasser iusques aux Alemaignes: sans
 auoir sur moy droict, si n'est aultant que force leur
 en donne. Dont vne chose sur ce amerement me
 cuit. Car en toute l'aduersité de ma fortune le com-
 ble de mon malheur gist en l'infelicité future de
 mon heur preterit. Or ay-ie tant faict, à l'ayde de
 mes alliez & amis, & par subtils moyens, que pour

1499. chasser mes ennemis, & recouurer mes terres, grosse armée ay mise sus, & regaigné le cry du peuple de Lombardie, avec la faueur couuerte & secrette intelligence des plus renommées villes d'Italie. Et de tant mon entreprise ay aduancée, que reserué le chasteau de Milan, toute la Duché en mon obeissance ay reduite, & de tant mes ennemis pressé, que de toutes les villes de Lombardie que encores n'a deux mois passez paisiblement occupoient, ne leur reste que Mortere pour leur extrefme refuge. Puisque ainsi donques tourne leur chance, & que fortune nous rit, prestement les nous fault poursuiure, & à mort persecuter. Reste au surplus aduiser la maniere comment à leur totale deffaiète plus aduantageusement pourrons proceder. Grand renfort leur est venu ces iours de France, & à toute heure leur viennent Suisses à legions. Sçauoir pouuez quels ils sont aux armes. Car souuent les auez veus aux coups de-partir, & le plus de fois à nostre perte & desaduantage. Ia ont-ils deffaiète la garnison de Vigee, où auons perdu beaucoup de bons soldats, & de iour en iour nous endommaigent. Perte qu'ils facent ne les appauurit. Car tant plus sont assaillis, de plus euertuent leur couraige. Toutesfois à ce ne nous fault plus arrester, mais vigoureusement les assaillir, & leur donner sanglante bataille. Ainsi pourront selon mon aduis estre domptez. Pour nous auons le plus seur party. Car si aux armes sont aduantageux, de double nombre contre eulx sommes renforcez. Grande puissance d'Alemans forts & batailleux

leux auons, grosse compaignée d'hommes d'armes 1499.
 Bourguignons, qui sçauent leur mode de combattre, Albanois, & Estradiots à grand multitude, pour les rassembler s'ils prennent l'escart, force escadres de Lombards, qui haine mortelle leur veulent, & toute la commune du pays en armes & en aguet sur les passaiges, pour leur trancher le chemin, s'il aduiént qu'ils soyent deffaicts, ou mis à la chasse: affin que d'eulx vn seul ne reschappe. Parquoy si par lascheté de cœurs effeminez debilitées ne sont nos dextres, loüable victoire contre nos ennemis obtiendrons. Nous sommes dedans nos terres, & Regions, que toute Loy nous commande de deffendre iusques à la mort. Dont nous doibuent les cœurs euerter, & la force accroistre; comme à ceulx qui leur pays, parens & libertez d'armes doibuent deffendre. Pour ce veulx-ie bien à la discretion de vos esprits ouurir mes secrets, & prier vos Seigneuries sur ce me donner tel ayde & aduis que à ma necessité pourrez reconnoistre plus secourable, sçachant que en ce hazard gist le recouurement de ma soubdaine ressource, ou le moyen de mon perpetuel exil. Les Capitaines de l'armée du Seigneur Ludouic, apres auoir ouï ses remonstrances, & propos, & autres ouuertures, & moyens sur le faict de leur entreprise debatus, & mis auant, eurent tous vn vouloir vnanime de donner aux François la bataille, & à pied ferme aux champs les attendre, ou assaillir. Et à ce ne pouuoient faillir. Car autant en pensoient les François, qui n'attendoient que la venue de leurs

1499. Suisses, pour assaillir leurs ennemis, & la guerre leur donner. Le Roy, qui lors estoit à Lyon sur le Rhodane, aduertý de ces nouuelles, plusieurs iours ensuiuant pour la conseruation de son bon droit, prosperité de son armée & octroy d'une paix heureuse, fait continuellement faire processions generales & presenter humbles prieres au deffenseur des iustes querelles, & luy mesme avec offrandes & voyages meritoires voulut sur ce la grace du donneur des victoires deuotement implorer.

CHAPITRE XXVIII.

Comme grand nombre de Gentils hommes de la Maison du Roy partirent de Lyon en poste, pour vouloir estre à la bataille.

PLVSIEURS ieunes Gentils-hommes, & autres de la Maison du Roy, oyans nouuelles de la bataille, & sçachans que à plus honorable affaire ne pourroient mettre leur valeur en veüe, ne leur force employer, pour auoir part à l'honneur du triomphe, ou à la perte de la defortune, eurent deliberation de eulx trouuer à celle besongne. Et feurent entre iceulx le Marquis de Bade, le Comte de Roussillon, Jacques Monseigneur de Rohan, Louys de Bourbon, bastard du Liege, le bastard de Vendosme, Jacques de Chabannes, Seigneur de la Pa-

lisse, Jean de Chabannes, Seigneur de Vandenesse, 1499.
 Germain de Bonneual, Gouverneur de Limosin,
 Louys des Barres, Pannetier du Roy, le Seigneur de
 Beaudifner, le Seigneur d'Arpaion, le Baron de
 Bearn, le Seigneur de Listenay, le Seigneur de Fre-
 mente, & le fils du bastard de Cardonne, lesquels
 partirent de Lyon en poste le penultiesme iour de
 Mars. Et tant aduancerent que en trois iours & de-
 my passerent tous les monts de Sauoye, & les terres
 de Piedmont, qui pres de cent lieües de pays con-
 tiennent, & à chef de temps arriuerent à Mortere
 en Lombardie. Et là trouuerent le Comte de Ligny,
 le Sire de la Trimouille, le Seigneur Jean Iacques,
 le Bailly de Dijon, & toute l'armée de France en
 bransle de marcher en auant & prendre les champs;
 Trois Gentils-hommes pensionnaires du Roy des-
 sus nómez qui avec le Duc de Valentinois estoient
 allez au Iubilé, oyans à Rome paroles de la bataille,
 pour ne faillir à tel affaire se voulurent mettre au re-
 tour. Et pour aduancer leur voyage s'embarquerent
 à Ostie, port de mer pres de Rome. Mais pour l'en-
 nuy de la tourmente ne peurent à la voile donner
 vent à gré, dont preindrent terre, & de là coururent
 l'Italie iusques à Gennes. Et tant hastèrent leur cours,
 que de Rome en quatre iours feurent à Mortere en
 Lombardie assemblez avec l'armée de France.

Mars;

CHAPITRE XXIX.

*Comment l'armée de France saillit de Mortere
pour aller donner la bataille à l'armée du
Seigneur Ludouic.*

Auril.



VN DIMANCHE, cinquiesme Auril,
en l'an mille cinq cent, les François tous
en armes saillirent de Mortere, avec tous
leurs Suisses en point, & apprestez pour
le combat. Le Sire de la Trimouille avec cinq cent
hommes d'armes faisoit l'auantgarde, lequel estoit
monté sur vn coursier moult aduataigeux, prompt
à l'esperon, & leger à la main; & armé de toutes
pieces cheuauchoit de rang à rang, pour aduiser à
la maniere & police de ses gens d'armes; lesquels
conduisoit si à droict que nul desmarchoit de son
ordre. Le Comte de Ligny auoit la bataille, où y
auoit quatorze mille Suisses, & toute l'artillerie. Et
pour miculx ses gens acheminer, avec eulx se meit à
pied, la halebarde au poing, vestu d'un pourpoint
de drap d'or, my party de damas blanc, bandé au
trauers de violet, le halecret dessus, vn chapeau
iaulne sur sa teste, garny de plumes blanches. La
plus part des Gentils-hommes de la Maison du Roy,
qui là estoient allez en poste & plusieurs autres luy
feirent là compaignée. Lesquels meit avec luy au
front de la bataille. Entre deux Suisses vn François,

tous vestus de sa liurée, & armez à la mode d'Ale- 1500.
magne. Le Seigneur Iean Iacques à tout cinq cent
hommes d'armes conduisoit l'arriergarde, lequel ne
tenoit brin de desordre. Ainsi commença l'armée
de France à marcher, & prendre l'adresse vers la
ville de Nouare, deuant laquelle estoit le Seigneur
Ludouic avec ses soldats: dont il auoit plus de trente
mille. De toutes parts auoyent les Lieutenans du
Roy mis sur les champs guets & coureurs, pour des-
couvrir le pays, affin que l'armée ne feust surprise
au despourueu, & auoyent enuoyé espions pour
sçauoir la maniere des ennemis, qui ja tenoient les
champs, lesquels on attendoit de moment en autre
auoir en barbe, dont chascun se tenoit sur garde. Les
hommes d'armes auoyent leurs armets en teste, &
la lance sur la cuisse, & les archers & arbalestriers les
arcs tendus. Les Suisses picques, halebardes & hac-
quebures prestes à mettre en œuvre, & les canon-
niers toute leur artillerie chargée & atiltrée, & tout
estoit si à poinct dressé selon l'ordre de la guerre,
qu'il n'y auoit que redire. Chose bien merueilleuse à
imaginer, & plus espouventable à regarder estoit la
rencontre de main armée tant furieuse, où force
tant immodérée sembloit auoir, que au pouuoir de
toutel'Italie n'estoit de la sçauoir dompter. Ce iour
sur l'heure de vespres feut l'armée deuant vne petite
ville nommée Vessépola, à trois milles pres de Mor-
tere, à costé de Nouare, & là pour passer la nuit
feirent les gens d'armes leur logis.

Le lendemain, sixiesme iour d'Auril, au plus Auril.

1500. matin se meit l'armée aux champs, tout le pas marchant le droict chemin de Nouare. Et pour descouurir le pays avec les coureurs feurent enuoyez le Seigneur de Beaumôt, & le Seigneur de Xandricourt. Le Comte de Ligny marchoit pied à pied avec les Suisses, lesquels tenoient tel ordre que l'un ne passoit l'autre. Le Sire de la Trimouille, qui la nuit deuant auoit eu nouuelles du Roy pour aduancer l'œuvre, ne regardoit qui le suiuoit. Mais comme celuy qui sans differer, à l'execution de la guerre entendoit, hastoit son train, & moult luy ennuyoit que ja aux ennemis n'auoit mellee. Tant marcha ce iour l'armée de France, que sur le poinct du midy à vn mille pres de Nouare preit logis. De tous costez feut mis le guet aux champs, & pour iceluy de plus fortifier & supporter l'armée, le Seigneur de Xandricourt, qui ce iour n'estoit de guet, avec partie de ses gens d'armes feut à cheual à la venuë des François. Les gens du Seigneur Ludouic par compaignées feurent à l'estrade, & les François d'autre part. Et là se commencerent les vns les autres mettre à l'essay, tant que des deux partis plusieurs fois y eut ce iour rencontre iusques à la mort de maints soldats. Les estradiots du Seigneur Ludouic n'estoyent par les François mis à l'espargne, aussi n'estoyent les François par les Moriens laissez à repos. Là feut tué vn ieune gend'arme Gascon, de la compaignée du Seigneur de Chastillon nommé François de Odaulx, lequel ce iour feit assez pour y auoir icy memoire de luy. Car à tous heurts auoit sceu par experience.

comment les premiers coups s'estoyent donnez, & 1500.
à la retraicte des derniers sousteint la meslée : tant
que pour monstrier de quoy la mortelle enseigne en
apporta. Iusques au soir dura l'escarmouche. Et si
tost que lumiere feit place aux tenebres chascun se
retira à son quartier.

LE lendemain, vn Mardy, septiesme iour d'A- Auril.
uril, les Bourguignons & Albanois, & autres soldats
du Seigneur Ludouic au plus matin feurent à gros-
ses bandes à la course. Lesquels ne sejournerent gue-
res sur le champ sans auoir les François aux coups
departir, qui de leurs compaignées estoyent sortis
six à six, dix à dix, pour eulx essayer, & meestre leurs
cheuaux à l'espreuue. Tant approcherent que entre
eulx se commença chaulde meslée. Vn homme
d'armes de ceulx du Seigneur de Lanque, nommé
Bernard de Scenon, voyant les escarmoucheurs
François par les Bourguignons & estradiots oul-
trez, à force de cheual, & pointe de lance pour sup-
porter les foulez se meit au trauers des ennemis, tant
que souuent rompit la presse, & long temps sou-
steint le fais. Mais à la parfin tant se trouua pressé,
que entre les iambes luy feut tué son cheual. Et luy
auec l'ayde qu'il se feit, & le secours de ses compai-
gnons se remeit sus. Vn autre François, nommé
Yues de Malherbe, Capitaine d'aduanturiers, se
trouua à cest affaire, lequel eut avec les estradiots
telle meslée, que deux de leurs cheuaux emmena.
A tous efforts venoient soldats Moriens à l'escar-
mouche, & voyans les François que là trouuer se

1500. failloit, trente hommes de renfort se meirent en auant. Et des premiers feut vn nommé Himbercourt, des pensionnaires du Roy, lequel sans aduifer qui le suiuiot, donna des esperons, & tout seul avec trois cent Alemans se veint meller tant rudement, qu'il percea la presse, & tant hardiment le fait que ce feut par trop. Car à grands coups de picques & halebardes feut son cheual tué, & luy blessé & mis par terre. Et si de ses compaignons n'eust eu bref secours, illec eust esté assommé & occis. Durant la dicté escarmouche la nuit surueint, & chascun se retira.

CHAPITRE XXX.

*Comment les Seigneurs des Liges voulurent
empescher la bataille.*

DURANT ce temps, les Seigneurs & Gouverneurs des Liges, comme ceulx qui pour vouloir auoir part à la prise en caüe trouble iectent leurs rets, pensans que au moyen de celle diuision sur la Duché de Milan quelques pays ou places pourroient conquer, voulurent empescher la bataille, & la guerre prolonger. Et pour ce transmeirent leurs postes deuers les Suisses, souldoyers du Roy, leur mandans expressement que à combattre n'eussent, iusques à ce que par autres Ambassadeurs eussent d'eulx plus amples nouuelles. Les François, qui de toutes parts auoyent

auoyent guets & espies, sceurent la chose, de laquelle 1500.
 le feut premier aduertiy le Cardinal d'Amboise, par
 vn nommé François Doulcet ; lequel apres auoir
 sceu le cas, partit d'une ville nommée Yurée, & de
 là feut en poste iusques à Verceil, où estoit le dict
 Cardinal, pour l'aduertir du faict. Et tout à l'heure
 qu'il eut faict son rapport, le dict Cardinal le ren-
 uoya à l'ost, pour asçauanter les Lieutenans du Roy,
 & le Bailly de Dijon, Capitaine des Suisses, de l'in-
 tention d'iceulx, pour obuier à ce destour, & sur ce
 trouuer moyen de remede, & que le vouloir du
 Roy estoit que le plus tost que possible seroit on les
 meist en belongne. Et tout ce mis en aduis, feut or-
 donné par les Lieutenans du Roy, & les Capitaines
 de l'armée, que le iour ensuiuant seroit donnée la
 bataille aux ennemis.

LE iour d'apres, qui feut vn Mercredy, huicties- Auril
 me d'Auril, au plus matin l'armée prit les champs
 droict à Nouare, dont estoit failly le Seigneur Lu-
 douic avec toute sa gent. Au partir du logis com-
 mencea l'armée de France à tenir bataille ordon-
 née, & à marcher moult tost. Et tant, que entre le
 Comte de Ligny, qui estoit chef des gens de pied,
 & le Sire de la Trimouille, qui les gens d'armes de
 cheual conduisoit, y eut estrif à qui marcheroit de-
 uant. Toutesfois chascun teint si bon ordre, que
 desfroy n'y eut lieu. Tous les pietons & le charroy de
 l'artillerie bransloient sous la main du Comte de
 Ligny. Et afin que chascun marchast droict, touf-
 iours comme guide & à pied des premiers estoit à

1500. chemin. Et en marchant dit aux siens, Seigneurs, l'heure est venuë que chascun doit penser à son affaire. Car nos ennemis aubns en veüe, qui nous presentent bataille. Ne refusons ce party, sçaichans le prix de la valeur des hommes estre du tout aux faicets des armes mis à l'estime. Hastons nous, pour donner des premiers. Et que nul de nous ait le cœur amolly de crainte reprochable. Car en bataille tousiours est le plus de peril à ceulx qui plus craignent. Audace est vn escu de seureté, dont fortune couure les aduantureux. Mettons doncques en la sauuegarde de la main armée le prix de l'honneur, & la teneur de la vie. Le Sire de la Trimouille marchoit en manieretant assurée, & en tel ordre conduisoit ses gens d'armes, que bien sembloit d'acteur d'armée belliqueuse. Et tant se hastoit, que à ceulx qui le suiuoient donnoit bien à entendre que aux ennemis ne vouloit marchander. Le Seigneur Iean Iacques, auquel la chose touchoit de si pres, que à la peine de sa vie branloit ce hazard, si à point conduisoit sa charge, que bien sembloit auoir la chose pour recommandée.

CHAPITRE XXXI.

*Comment l'armée de France approcha l'armée
du Seigneur Ludouic.*



DORS que les François approcherent 1500.
 Nouare, de tant que les deux armées se
 peurent veoir, chascun se hastia pour
 donner dedans. Les gens de cheual ne
 se pouuoient aduancer, pour l'empeschement des
 clostures & fossez qui là estoient. Toutesfois cela
 ne les retarda, que tost ne feussent prests de choquer
 leurs ennemis. En approchant Nouare, l'armée de
 France sceut que dedans vne Abbaye assez forte,
 estant à demy mille de la ville, y auoit embusche
 d'Alemans & de Lombards, & là s'adressa. Les sol-
 dats du Seigneur Ludouic, qui là estoient, voyans
 les François & Suisses contre-eulx venir à bataille
 rangée, n'attendirent plus, mais se retirerent à leur
 armée, qui estoit entre la ville & ceste Abbaye, en
 bel arroy, & nombre moult grand. A l'un des co-
 stez de leur bataille estoient quatre cent hommes
 d'armes Bourguignons, & huiet cent Lombards.
 A l'autre quatre mille cheuaux legers. Au milieu
 tous leurs Alemans & lansquenets, dont il y en auoit
 de dixhuiet à vingt mille, & estoit toute l'artillerie
 chargée & atiltrée à la venuë des François. Et en ou-
 tre estoient les estradiots & escarmoucheurs à gros-
 ses bandes & compaignées sur les champs, pour
 commencer le hutin. Voyant le Sire de la Tri-
 mouille que temps estoit d'exploicter les armes,
 pour auoir paroles à ses gens, vn peu se meit à quar-
 tier, & en veüe de tous, ausquels dit, Seigneurs, tant
 auons cherché nos ennemis que les auons trouué,
 voire en telle puissance, que le nombre d'iceulx

1500. excede le nostre de moiectié pres. Mais sçauoir nous fault que tout l'aduantaige de la guerre ne gist en multitude de legions d'hommes armez, ne en tourbe innombrable de gens, mais seulement en la seure conduicte des saiges Capitaines, droicte execution des preux soldats, & vigoureuse deffence de iuste querelle, dont à suffire sommes pourueus. Donnons doncques au trauers hardiment, & tost. Car par le vray corps de Dieu, si nous les assenons à droict, à l'ayde de Dieu, & de la force de nos bras, sans faillir sur eulx obtiendrons loüable victoire. Car ie congnois le pouuoir d'iceulx estre du tout à nostre mercy. Apres ces paroles, le Sire de la Trimouille meit cent hommes d'armes des plus adroicts au front de la bataille, pour donner le premier choc, & faire ouuerture. Et à leur queüe meit quatre cent autres hommes d'armes, pour supporter les premiers, & entrer dedans les ennemis. Et ce faict, demanda si là estoyent nuls Gentils-hommes qui l'Ordre de Cheualerie voulussent prendre, dont grand nombre de gens d'armes François, qui ce iour à l'exercice des armes vouloient la force de leurs bras desployer, & perpetuer leurs noms, pour ouurir au couraige le chemin de prouësse, se voulurent enrichir du tiltre de Cheualerie. Les François qui estoyent à la veüe de leurs ennemis, hastèrent leur train, aduancerent leur artillerie, & meirent leurs coureurs en place, lesquels commencerent la charge sur les elearmoucheurs du Seigneur Ludouic. L'artillerie des deux partis feut deschargée, & ruez coups. Les Capitaines

François commencerent de plus de meſtre leurs 1500. gens en ordonnée marche, & les ſemondre de monſtrer à ce iour aux ennemis à force de bras le vouloir que aux armes hommes cheualeux doibuent auoir, & faire œures tant vertueuſes, que à l'honneur des acteurs, au plaifir du Prince, & à l'exemple des futurs peuſſe ſeruir à tousiours mais. Ainſi que l'armée de France approchoit ſes ennemis, & que gens d'armes & pietons voulurent branſler pour donner le combat, les Alemans du Seigneur Ludouic voyans les François en barbe & propos deliberé de donner la bataille, penſerent que pour celle fois le combat ne leur eſtoit de faiſon, & tout ſoudain eurent opinion arreſtée de non attendre la meſlée, & ſe retirerent tous enſemble à Nouare. Deux enſeignes blanches de gens de cheual du Seigneur Ludouic tournerent le dos, & amoindrirent le nombre de ſon armée de deux cent cheuaux. Le Seigneur de Beaumont, le Seigneur de Xandricourt, & vn Capitaine François nommé Perot de Payennes, avec ſoixante hommes d'armes pourſuiuirent iceulx fuitifs iuſques ſur le bord de la riuiera du Teſin, leſquels ne feurent attaincts. Car tant ſe haſterent que d'heure gaignerent le paſſaige. Les Bourguignons, Albanois, & Lombars, apres ce ne feirent ſur le champ long ſejour, mais le plus toſt qu'ils peurent ſe retirerent. Les François voyans celle retraicte ſ'arreſterent, & tout autour de la ville meirent le ſiege. Le Comte de Ligny ſe meit dedans l'Abbaye dont j'ay parlé par cy deuant, & coucha

1500. celle nuit dedans, sans guerres dormir. Le Sire de la Trimouille avec ses gens d'armes prit le quartier en approchant la ville, lequel de sa part faisoit si bon guet, que homme par là ne se pouuoit sauuer sans sa mercy. Le Seigneur Iean Iacques estoit de l'autre part de la ville avec ses gens. Les Suisses & l'artillerie estoient autour de l'Abbaye. Somme chascun feit celle nuit deuant la place & aux passaiges prochains de là guets & gardes, affin que nul d'emblée se retirast. Le Seigneur d'Alegre avec deux cent hommes d'armes feut transmis sur la riuere du Tefin, pour garder le passaige. Celle nuit commencerent les François & Bourguignons à parlementer. Les Alemans du Seigneur Ludouic & les Suisses du party du Roy alloient & venoient ensemble, comme si entre eulx feust trefue. Vn nommé le Capitaine des Pierres, du party du Seigneur Ludouic, se rendit celle nuit au Comte de Ligny, dont feurent les Bourguignons mal contents. Car ils cuidoient celuy Capitaine l'un de tous ceulx de leur party plus asseuré pour le Seigneur Ludouic. Toutesfois en ce feurent deceus. Ainsi peu à peu chascun venoit à la raison.

Auril. Le lendemain, Ieudy, neufiesme iour d'Auril, les Alemans du Seigneur Ludouic avec les François eurent sur leur affaire parlement, disans que si bagues sauues on les vouloit laisser aller, & donner passaige, que volontiers en leur pays s'en iroient. Les Bourguignons pareillement demãderent aux Lieutenans du Roy saufconduit, pour eulx retirer avec

leurs bagues , & demandoient que les Lombards 1590. feussent compris au saufconduit. Ce que permettre ne voulurent les Lieutenans du Roy, dilans que le desmerite de leur trahison & foy faulcée de ce & de toute autre grace les debuoit frustrer. Leur saufconduit feût à tous efforts de langaige debatù, mais à la fin en demeurerent priuez. Les Albanois aussi requirent auoir saufconduit, pour eulx retirer : toutesfois comme à ceulx qui de gayeté de cœur pour picquer les François de pays loingtain s'estoyent par trop de fois efforez, leur demande feut esconduite. Les Alemans & Bourguignons, qui estoyent tout l'appuy du pouuoir du Seigneur Ludouic, demanderent, comme i'ay dit, leur saufconduit, promettans aux François en ce faisant que le lendemain au matin tous desarmez vuideroient la place, & le pays, sans donner au Seigneur Ludouic autre confort ne ayde, ou si ce party leur estoit refusé, que sans faillir donneroient la bataille. Les Lieutenans du Roy & les Capitaines de l'armée considerans l'offre pour eulx aduantageuse, & du tout à l'honneur & profit du Roy, penserent que pour auoir refusé humains partis, plusieurs soute-nans iustes querelles ont encouru le fieu diuin, & perdu maintes batailles & iournées, à la requeste susdicte presterent l'oreille, & difererent le conflict. Toutesfois les Lieutenans du Roy premier que liurer le saufconduit demandoient que le Seigneur Ludouic en ce faisant feut mis entre leurs mains. Sur ce firent les Bourguignons & Alemans respon-

1500. se, que ja par eulx ñe seroit liuré: mais que si entre eulx se pouuoit trouuer, sans empeschement se pourroit prendre. Dont feut appointé que le lendemain au matin tous les Alemans desarmez deux à deux passeroient entre l'armée de France: affin que si le dict Seigneur Ludouic en estat dissimulé entre eulx se cuidoit sauuer, tout à clair peust estre aduisé. Et que les Bourguignons desarmez aussi seroient mis en veüe, & tous les autres visitez. Ainsi feut la bataille arrestée. Le Seigneur Ludouic congnoissant par ce traicté son entreprise demeurée en arriere, & du tout aneantie, de passion d'esprit feut tout espris, sçaichant que apres ceste descheüe espoir de relource ne pouuoit plus auoir. Et pour cuider rompre le coup, avec requestes, dons & promesses, pria les Capitaines des Alemans, & tous les autres soldats donner aux François la bataille, disant que facilement pourroient estre defaiçts, comme ceulx qui avec leurs cheuaux estoient à demy combatus de trauail continuel & de famine, & que de leur part ils estoient frais, & accommodez de viures, outre la place qu'ils auoyent à l'aduantaige, & des soldats deux contre vn. Plusieurs autres remonstrances leur feit, mais pour ce autre chose ne voulurent faire. Ainsi ne sceut le Seigneur Ludouic à quel remede auoir recours, si n'est abandonner son malheureux affaire au vouloir de dure destinée. De François & de Suisses feut la ville de Nouare ceste nuict de toutes parts enuironnée, si que nuls de ceulx qui estoient dedans eussent peu sortir sans estre

estre clairement aduisez. Souuent parloient ensemble les François & Bourguignons. Les Suisses & Alemans à toutes heures sonnoient. Les Albanois, pour miculx desloger, auoient l'œil aux pieds, à la bouche & aux dos de leurs cheuaux. Et les Lombards plus de menües conclusions imaginoient qu'il n'y a d'atomes en l'air. Somme chascun pensoit à son affaire. Car temps en estoit. Durant ce le Comte de Ligny doubtant que par chemins escartez ou autres moyens le Seigneur Ludouic ne s'esloignast, & pource que le dire d'aucuns estoit qu'il auoit pris pays, voulant en sçauoir le vray, & le mettre entre les mains du Roy, deuers luy transmit le Capitaine Louys d'Ars, & vn autre Gentil-homme nommé Rocquebertin, luy dire que si volontiers se vouloit rendre au Roy, & soubmettre à la raison, que de tout son pouuoir s'efforceroit enuers le Roy le faire si bien traicter en France, que cause n'auroit de se douloir. Lequel apres auoir ouy la parole des dicts messaigers, voyant la raisonnable semonce, & l'appareil de son exil eminent, à ce propos voulut entendre, & conclud prendre ce party, & sous faufconduict avec les dicts messaigers se mit à la voye. Voyans les Alemans que ainsi s'en alloit le Seigneur Ludouic, l'arrestèrent, & le meirent hors de la veüe des dicts messaigers.

CHAPITRE XXXII.

Comment les Alemans & Bourguignons vuidrent Nouare, & de la prise du Seigneur Ludouic, avec la defaïcte des Lombards & estradiots.

Auril.



LENDemain, Vendredy, dixiesme iour d'Auril, deux heures auant le iour, tous les Alemans du Seigneur Ludouic saillirent de Nouare en armes. Le Sire de la Trimoüille, qui avec ses gens estoit à cheual, se trouua à la saillie des dicts Alemans deuant les portes de Nouare. Et voyant iceulx Alemans sortir en armes, se teint avec ses gens d'armes pres de la porte de leur yssüe, pour regarder leur maniere, & leur donner sur queüe si besoing en estoit. Iceulx Alemans se meirent en bataille dedans vne prairie deuant la Ville. Le Capitaine Louys d'Ars, qui encores estoit dedans la ville, dont auoit veu sortir les Alemans en point & en propos de combattre, manda au Comte de Ligny que à ce matin les François auroient la bataille. Car ja estoient iceulx Alemans aux champs, & les Bourguignons avec, & les estradiots & Lombards prests de saillir, & tous en armes. Sçaichant le Comte de Ligny ces nouuelles, pour monstrier que l'armée de France estoit sur pieds, il feit descharger deux pieces d'artillerie par dessus la

ville, qui feirent tel tonnerre qu'il sembloit que la 1500. region de l'air esclatast. De l'autre part estoit le Seigneur de la Trimouille tout prest de faire meslée avec ses ennemis. Le Seigneur Jean Iacques estoit sur pieds aussi avec ses gens. Sur l'aube du iour feut en l'ost des François faict vn alarme, pour esmouuoir le camp, & mettre chascun en point. Et tout à l'heure feut deuant la ville de Nouare l'armée de France en arroy, pour attendre la faillie des gens de cheual du Seigneur Ludouic. Entre les cinq & six heures du matin, les Lombards, qui n'auoient faufconduict, se meirent hors la ville en armes. Lesquels feurent par les François choquez moult rudement, & poursuiuis, & chassez plus de quatre milles de pays, & tant mal menez, que plusieurs y demeurèrent. Les vns feurent pris, & les autres tuez, & les autres le fer au dos conuoyez longue traicte. Tant en feut rué par terre, que le chemin de leur retraicte estoit tout semé de morts, de lances, & de bourdons, & de harnois, que pour mieulx au deliure fuir iectoient de tous costez. A l'issüe de la ville fut le Seigneur Fracasse pris par ceulx de la garnison du chasteau, & à la chasse feurent pris plusieurs autres bons prisonniers. Apres la defaicte des Lombards les Bourguignons vuiderent la place, tous en armes, avec enseignes desployées. Le Sire de la Trimouille voyant iceulx Bourguignons en armes, leur transmeit au deuant vn Capitaine François, nommé Hector de Salazar, & le bastard de Cardonne, pour leur dire qu'ils se desarmaissent, & leur remonstrer

1500. que en l'estat qu'ils sortoyent que de bonne guerre estoient de prise, & que leur saufconduit estoit enfrainct. Iceux Bourguignons sans plus attendre plierent leurs enseignes, ieçterent leurs lances, & osterent leurs armets, & plusieurs d'iceulx feurent chocquez à la faillie par les François, & rembarrez iusques dedans la ville. Les estradiots, lesquels aussi n'auoient saufconduit, feirent là le moins de sejour qu'ils peurent, & ceulx qui eurent les champs au deliure adresserent leurs cours vers la riuere du Tefin, pour cuider gagner le passaige, lequel estoit clos. Car le Seigneur d'Alegre avec deux cent hommes d'armes y estoit. Et voyans iceulx Albanois que autre part pour à seureté passer leur failloit chercher issue, esloignerent le passaige, & se meirent à guêr la riuere. Les vns allerent outre, les autres demurerent à my gué, & les autres feurent faicts par les François noyer à la riue. Ceulx qui garderent terre, au danger des laquais & varlets se trouuerent, & tous ceulx qui peurent estre attaincts & arrestez feurent sans mercy occis & assommez. Les Alemans voyans leurs gens de cheual defaictz, ieçterent leurs picques & halebardes. Et tous defarmez, deux à deux, trois à trois, sous les picques des Suiſſes, & entre l'armée de France passerent. Et estoient iceulx Aleman tant mis au descouuert, que sous ombre d'eulx nul sans estre congneu eust sceu passer. Apres que sept ou huit mille d'iceulx feurent passez, & que nouuelles n'estoit du Seigneur Ludouic, le Sire de la Trimouille manda à ceulx qui estoient enco-

res à passer qu'ils le rendissent, ou sinon que avec 1500. eulx auroit mellee. Et tel aduantaige auoit sur eulx, que entre les deux batailles auoit faict meestre & charger l'artillerie de France. Dedans la bataille des Alemans estoient plusieurs gens d'armes François, pour cuider sçauoir nouuelles du Seigneur Ludouic. Et doubtons les Alemans que les François les voulessent desordonner, & courir sus, se serrent, & dirent aux François qu'ils se retirassent. Alors feit le Seigneur de la Trimouille sonner à l'estandart, pour rassembler les gens, & ce faict, voulut donner au trauers de la bataille des Alemans. Et pour ce faire auoyent ja les gens d'armes la lance sur la cuisse, & la teste en l'armet, & estoient les enseignes en branle de marcher. Les Suisses du party du Roy, qui tenoient bataille, sçachans que le Sire de la Trimouille vouloit charger sur les Alemans du Seigneur Ludouic, tout soubdain luy manderent qu'il ne se hastast de ce faire, & que s'il marchoit en auant pour executer son entreprise, que avec eulx auroit à besongner, & que ils luy donneroient sur queue. Ainsi feut ce propos differé & remis, qui moult despleut aux François. Mais autre chose n'en sceurent faire, si n'est penser que en peu de seureté est celuy qui d'armes tant pesantes se faist, que au besoing ne s'en peult ayder. Pour au propos reuenir, apres la sommation du Sire de la Trimouille, les Alemans du Seigneur Ludouic promeirent de rendre le dict Ludouic. Et pour ce vers iceulx Alemans feurent transmis le Seigneur de Mauleon, & le Bailly de

1500. Dijon, qui bonne diligence meirent pour le trouver. Et telle poursuite en feite le Bailly de Dijon, que par aucuns des Alemans, auxquels il donna deux cent escus, sceut où il estoit. Et là preit son adresse, où preit le Seigneur Galeas. Il voulut prendre le Seigneur Ludouic, lequel ne luy vouloit bailler la foy. Et ainsi qu'ils estriuoient, arriua le Comte de Ligny parmy la presse, & là le veint trouuer à tout ses cheueux troussés sous vne coüeffe, vne gorgerete autour du col, vn pourpoint de satin cramoisy, & des chaufses d'escarlata, la halebarde au poing. Et en ce poinct le prit le Comte de Ligny, & le feit monter sur vn courtault que luy bailla le Seigneur de la Pallisse. Apres ce qu'il feut ainsi monté, le Comte de Ligny luy demanda s'il vouloit veoir le Seigneur Iean Iacques, lequel dit, que non. Car de la veüe de celuy qui tant de dommaige luy auoit pourchassé ne pourroit que augmenter le grief accez de sa douleur amere. Et de vray assez en auoit faiçt pour n'auoir cause de le vouloir rencontrer. Somme si le pauvre Seigneur captif de deüil inconsolable auoit le cœur ferré, à nul debuoit sembler merueilles. Car luy qui auoit les ans florissans de sa vie passés en felicité, le reste des iours ennuyeux de sa chenuë vieillesse voyoit aller en exil, pour douloureux passe-temps luy preparer en fin desesperée. Ainsi est l'heur des plus haults peignez au berlant de Fortune souuent mis en hazard. Pour retourner, affin que la prise du Seigneur Ludouic à la veüe commune feust descouuerte, le Comte de Ligny avec luy le feit

marcher tout le long de la bataille des Suiffes. Les-1500
 quels feurent en propos de le vouloir auoir, difans
 entre eulx qu'ils estoient caufe de fa prise: toutesfois
 fans autre effroy feut passé outre iusques au quartier
 du Sire de la Trimouille, qui luy feit bonne chere,
 en luy disant Seigneur foyez le bien venu. Puisque
 en cest estat nous venez veoir, de grandes mises
 auez exempté le Roy, & nous gardez de longues
 peines. Apres ce le Comte de Ligny l'emmena de-
 dans le Chasteau de Nouare, & le meit en la garde
 du Cheualier de Louvain.

CHAPITRE XXXIII.

De la prise du Cardinal Ascaigne.



LE CARDINAL Ascaigne, qui
 lors estoit à Milan, sçaichant la pri-
 se du Seigneur Ludouic son frere,
 avec quatre cent cheuaux se meit
 aux champs, & preit le chemin de
 Boulongne la grasse. Et passant pres de Plaisance
 feut assailly par vne bande de François, & quelque
 nombre de Venitiens qui là estoient, & tant rude-
 ment mené, que ses gens feurent defaiçts, & luy
 chassé iusques dedans vn chasteau nommé Riuele
 pres de là, où feut assiégué & pris. Apres la prise du
 Seigneur Ludouic, les Suiffes du Roy voulurent
 eulx en aller, & auoir leur payement, lesquels feurent
 transmis à Verceil, pour illec recepuoir leur

1500. argent. Et pour iceulx faire payer estoient là logez à l'enseigne de l'estoile le Bailly de Dijon, vn nommé Fougely, Capitaine de la garde des cent Suisses du Roy, avec les Commissaires & Controolleurs de la guerre, lesquels eurent moult à faire à contenter iceulx Suisses. Car ils vouloient estre tous payez en escus au Soleil, auoir des sommiers pour emporter leurs bagues, & pour la prise du Seigneur Ludouic paye pour vn mois d'aduantage. Ausquels feut sur ce faicte responce par vn Controolleur nommé François Doulcet que ce qu'ils demandoient ne leur estoit deu, ne en la charge des Tresoriers & Clercs des finances, & que le Roy ne l'entendoit, mais les payer comme de raison, & que leur argent estoit prest sans rien vouloir retenir des gaiges qui leur estoient deus, & que autre chose n'en auroient. Lesquels dirēt que par amour ou par force auroient ce qu'ils demandoient, & que bien scauoient à qui ils s'en debuoiēt prendre. Et sur ce chascun alla repaistre. Apres que les Suisses eurent bien trinqué, entre eulx feut question de leur litigieux propos. Et tout chauldement, à l'appetit d'vn Capitaine nommé Heuryfer, & d'vn nommé Chuentz, l'vn des Capitaines de la Ligue grise, cent Suisses en armes s'en allerent au logis où estoit le Bailly de Dijon, & les autres François, deliberez de les tuer. Mais iceulx Suisses feurent arrestez par vn Capitaine de Schuuitz, qui avec ses gens estoit au plus hault des degrez à l'attente de recepuoir son argent. Derechef feurent enuoyez quatre cent Suisses pour assaillir le logis,

logis, & tuer ceulx qui au deuant se mettroient. Plus 1500.
ne leur feut l'entrée defenduë. Car le dict de Schu-
uitz & ses gens se retirerent dedans vne salle qui là
estoit. A grands coups de pied & de halebardes
donnerent iceulx Suiffes contre la porte de la cham-
bre en laquelle estoient les François, & commen-
cerent à faire rouverte. Le Bailly de Dijon, & ceulx
qui estoient au dedans de la chambre auoyent telle
frayeur, que le plus asseuré trembloit. Les vns se
meirent contre la porte pour la fermer, les autres se
ietterent par les fenestres, & les autres tous transis
pied coy tenoient silence en la place. Le Controol-
leur qui à la demande des dicts Suiffes auoit contra-
rié, voyant le bruiet, tout assommé de peur, cui-
dant l'heure de sa mort tant prochaine que la poin-
te du glaïue dont il cuidoit mourir luy estoit par les
fentes de la porte brisée en veüe, eut aduis de pren-
dre la robe d'un varlet, & sous vn bonnet deguisé
trousser ses cheueux, & tant estrangement dissimu-
ler son estat, que ceulx mesmes qui par continuelle
habitude le hantoient, de prime face ne l'aduiferent.
Et tant subtilisa son cas, que apres que les Suiffes,
qui de tous costez le cerchoient, eurent mis la porte
en pieces, & feurent entrez au dedans de la cham-
bre, entre eulx se sauua, & gaigna le logis où estoit
le Capitaine de Schuuitz. Les Suiffes qui estoient
entrez dedans la chambre où estoit le Bailly de Di-
jon, sur luy commencerent à charger, tant que par
plusieurs fois faillirent à le tuer à coups de partisan-
nes, mais sous les autres se garantit. A la parfin le

1500. preindrent par les cheueux, & luy donnerent tant de coups de poing par le nez, & sur le visaiqe, qu'ils le meirent par terre. Somme tant mal feut mené, & mis en tel estat, que à peine luy demeura poil en teste. Puis l'emmenerent à leur rim, disans qu'il respondroit de ce qu'ils demandoient. Toutesfois par belles paroles & subtils moyens eschappa d'entre leurs mains, bien despit de l'outraige que ils luy auoyent faict, & ioyeux d'estre hors de leurs dangers, disant en luy mesme que celuy qui tels pensionnaires prend en charge, de commission ruineuse s'entremect, & que vne autre fois de legerse deporteroit de telle charge vouloir auoir. A prestouttes ces choses eurent iceulx Suisses leur argent; & pour les contenter feurent presques tous payez en escus au Soleil. Partie de leurs Capitaines eurent des sommiers pour emporter leurs bagues iusques en leur pays. Ainsi s'en allerent bien payez, & mal contents. Et en eulx retirans preindrent vne ville de la Duché de Milan sur leurs marches nommée Belinsone. Le iour que le Seigneur Ludouic feut pris, le Roy estant à la tour du Pin au Daulphiné, sur les six heures du vespre eut la poste du Comte de Ligny, disant que le Seigneur Ludouic estoit assiegé à Nouare par les François, & qu'il ne pouuoit eschapper que tost ne feust entre leurs mains. Le lendemain, onzième Auri, vigile de Pasques fleuries, ainsi que le Roy estoit aux champs entre Lyon & vn vilaiqe nommé Sainct Laurens, à trois lieues pres du dict lieu de Lyon, sur les trois heures apres

Auri.

midy arriua deuers le Roy la poste, & lectres du Cardinal d'Amboise, par lesquelles eut le Roy certaines nouuelles de la prise du Seigneur Ludouic, desquelles feut le Roy moult ioyeux. Et pour icelles notifier par tout le Royaume de France feit faire feux de ioye, avec deuotes processions, & suffrages d'Eglise. Et luy mesme en personne en feit plusieurs voyages & oraisons à nostre Dame de confort, & autres Eglises de Lyon en toute humilité, remerciant le Prince des Princes de la victoire heureuse que moyennant son ayde diuine auoit obtenuë contre ses ennemis. De la prise du Seigneur Ludouic par toute la Duché de Milan feurent soubdainement nouuelles semées, dont feurent les Lombards moult estonnez. Mais ceulx plus esbahis qui auoyent esté moyenneurs de la rebellion. Vn Lombard nommé Messire Louys de Pors, dont i'ay parlé cy dessus, lequel auoit le iour de la Purification de nostre Dame abandonné le chasteau de Milan, & sa foy faulcée, & cuidé noyer les caues & le moulin de la dicte place, pour cuider satisfaire à ce forfait, vn Dimanche de Pasques fleuries, douzieme iour d'Auril, se transporta deuant la porte du chasteau, & avec vn grand brochet & vne grosse truite, voulut au dedans aller faire son banquet. La porte luy feut ouuerte, & luy mis au dedans, & de son poisson deschargé, & apres enfermë dedans la prison de la Rocquete avec plusieurs.

Auril

CHAPITRE XXXIV.

*Comment le Cardinal d'Amboise apres la prise
du Seigneur Ludouic partis de Verceil
pour aller à Milan.*



N IOUR apres la prise du Seigneur Ludouic, le Cardinal d'Amboise partit de Verceil, & ce iour feut à Nouarre. Le lendemain preint son chemin droict à Gayace, vne petite ville fermée, dont estoit deux iours deuant deslogée vne garnison d'estradiots que le Seigneur Ludouic auoit là laissée pour la garde de la ville, lesquels auoient sur la muraille de la ville & aux defenses du chasteau laissé l'artillerie toute chargée. Apres que le Cardinal d'Amboise & ses gens feurent illec logez, les paiges & laquais toute nuit feirent bruire & tonner canons, & hacquebutes, comme si le siege eust esté deuant la ville. Sur le soir que chascun feut retiré pour vouloir reposer, vn laquais & vn paige seruiteurs du Seigneur de Neufchastel, entrerent dedans vne des chambres haultes du chasteau, en laquelle auoit deux barils de poudre à canon tous plains, & de celle poudre feirent sur vne table vne trainée; puis meirent le feu dedans, qui soudainement se preit aux barils, & tout à coup meit en flamme tout le dessus du chasteau: & là feurent par leur default

le paige & le laquais auffi follement bruslez que parpillons à la chandele. En grand danger feut le Cardinal d'Amboise avec tous ceulx qui estoient logez au chasteau, si n'est qu'ils estoient au deffous du feu, & que d'heure se retirèrent. Car le feu feut si grand, que par sa chaleur, & force de la flamme, vne partie de la muraille, & la couuerture du chasteau, tomba dedans les fossez.

LE quatorziesme iour d'Auril, les Seigneurs, & Potestats de Milan, se rendirent à Vigeue au deuant du Cardinal d'Amboise, pour le supplier tres-humblement que son plaisir feust aller prendre logis dedans la ville de Milan, & regarder le peuple d'icelle en pitié, sans le vouloir du tout punir selon le desmerite de son forfait. Ausquels feut response le dict Cardinal, que pour l'heure en la ville souillée de vice tant prodigieux n'entreroit, mais au chasteau, qui tousiours auoit tenu bon pour le Roy, s'en alloit loger. Ce qu'il feut.

CHAPITRE XXXV.

Comment le Cardinal d'Amboise receut l'amende honorable pour le Roy, que ceulx de la ville de Milan feirent pour satisfaire à leur rebellion.

1500.

Auril.



E IOVR du Vendredy Sainct, dix-septiesme d'Auril, à la priere & supplication des Seigneurs, & du peuple de Milan, lesquels se soubmettoient à la misericorde du Roy, & au plaisir & vouloir du Cardinal d'Amboise, comme Lieutenant general du dict Seigneur, promettans de corps & de biens à leurs mesfaits & defaults du tout satisfaire, pour recepuoir l'amende honorable d'iceulx, & aussi pour traicter de la profitable deüe au Roy, à cause des frais & mises que au moyen de leur rebellion auoit aduancez, en la Maison de la ville se transporta le dict Cardinal d'Amboise, accompagné de l'Euesque de Luçon, Chancelier de Milan, du Marechal de Treuolce, du Seigneur de Grammont, du Seigneur de Neufchastel, & de plusieurs grands personnaiges. Les plus solempnels Misseres & autre menu peuple de la ville, avec quatre mille petits enfans, à chefs descouverts, & vestus de robes d'humilité, en procession generale, avec l'imaige de nostre Seigneur Iesus Christ en croix, illec à la venuë du dict Cardinal d'Amboise s'assemblerent. Et par vn Docteur feirent proposer maintes belles choses; promettans de non iamais commettre rebellion contre la sacrée Majesté de France, ne faire chose contre leur honneur; dont ils peussent de nul reproche ou diffame estre notez, ou attaincts. Et que de là en auant ressembleroient à Sainct Pierre, lequel pour auoir renié son Seigneur Iesus Christ eut de ce mesfait tant amere douleur, qui tout son temps apres

ce delict plus feruent en feut en son seruice. Et sur 1500.
ce feit le dict Cardinal responce que Sainct Pierre
auoit trois fois renié son maistre, & que culx d'ainſi
le faire ſe donnaſſent bien garde. Apres ce deman-
derent humblement pardon de leur deſloyauté &
rebellion. En obligeant eulx & leurs biens, pour les
miſes & deſpenſes que le Roy auoit à ce moyen fai-
ctes pour mectre ſus ſon armée, à la ſomme de trois
cent mille eſcus. Requerans au dict Cardinal, que
l'armée de France, qui encores eſtoit en Lombar-
die, feust le plus toſt que faire ſe pourroit renuoyée
en France, pour allegger le pays, qui plus ſans eſtre
deſert ne la pouuoit ſouſtenir. Et puis que chaſcun
feust reintegré en ſon Office. Pluſieurs autres reques-
tes feirent qui trop longues ſeroient à deſcrire.
Leur propos mis à fin, le dict Cardinal d'Amboiſe
voulut conſulter la reſponſe avec l'Eueſque de Lu-
çon, le Mareſchal de Treuolce, le Seigneur de
Grammont, & autres Chambelans, & Conſeillers
du Roy, qui là eſtoient. Et feut aduiſé que vn nom-
mé Michel Riſ, Docteur en chaſcun droit, feroit
la reſponſe, par laquelle monſtra clairement aux
Milanois leur deſloyauté damnable, & inexcusable
trahiſon. Et ce neantmoins pour demonſtrer à
iceulx iniques que le pouuoir de douce miſericorde
amollit le glaiue de rigoureuse iuſtice, ſuppoſé que
par leur deſmerite euſſent deſſeruy mortelle puni-
tion, ce nonobſtant leur donna de par le Roy le dict
Cardinal leurs vies & biens ſauues, les exhortant vne
fois pour toutes de non jamais commettre crime de

1500. rebellion, à peine de punition à tousiours mais encourir. Et au regard de leurs requestes feut dict qu'ils les bailleroient par escript, & que responce telle leur seroit faicte que contenter se deburoient. En exceptant toutesfois de la remission les auteurs principaux de la rebellion. Et ce faict, tous les petits enfans passerent en procession deuant le Cardinal d'Amboise, en criant à haulte voix France, France, misericorde.

Auil. LE vingt-troisiesme iour d'Auil, vn Gentilhomme nommé Carbon de Luppe, Maistre d'hostel ordinaire du Roy, feut enuoyé avec cinquante archers au chasteau de Tretz sur les frontieres de Sainct Marc, pour prendre vn nommé Alain, Gascon, Capitaine de la dicte place, laquelle le dict Capitaine auoit venduë aux Venitiens quinze cent ducats. Et pour ce feut mené au chasteau de Milan, & là dedans enclos avec plusieurs autres prisonniers.

CHAPITRE XXXVI.

*Comment vne grosse armée feut mise sus pour
enuoyer soubmettre la Cité de Pise à la
Seigneurie de Florence.*

APRES



A PRES ces choses, le Cardinal d'Amboise par le vouloir du Roy meit sus vne grosse armée, pour enuoyer soubmettre la Cité de Pise à la Seigneurie de Florence. Et feut baillée la charge de celle armée au Seigneur de Beaumont, Lieutenant pour le Roy sur cinq cent hommes d'armes, trois mille cinq cent Gascons, & autant d'Alemans. Et là feurent transmis les Capitaines qui s'ensuiuent, Hector de Montenart, Gouverneur d'Ast, le Seigneur de Courfinge, Lieutenant du Duc de Sauoye, le Seigneur Dauzon, Escossois, le Seigneur de Saint Prest, Aubert du Rouffet, Iannet d'Arbouuille, Messire Galeas Paluesin, & Messire Anthoine de Treuolce, Lombards, avec dixneuf pieces d'artillerie.

LE dixneuuesme iour du mois de May, le Cardinal d'Amboise transmeit Carbon de Luppe, & vn nommé Pierre Bordier, avec bon nombre de gens d'armes, soubmettre à l'obeissance du Roy la Seigneurie de Tourcelles pres Cremone, que tenoit vne Damē nommée Camille d'Arragon, sœur du feu Roy Ferrand, Roy de Naples. Et apres la reduction d'icelle feurent laissez par prouision à Dame Camille quatre mille ducats sur la dicte Seigneurie.

CHAPITRE XXXVII.

*Comment l'armée qui estoit ordonnée pour aller
à Pise se meit aux champs.*

May.



LE QVINZIESME iour du mois de May, l'armée dessus dicté partit de Parme pour aller commencer le voyage de Pise. Et si tost que les gens d'armes marcherent, toutes les villes d'Italie qui contre le Roy auoyent fauorisé le Seigneur Ludouic, transmèrent leurs Ambassadeurs deuers le Cardinal d'Amboise, pour faire composition avec luy, & bailler argent, pour le deffray de l'armée de France. Et pour ce que vn nommé Bentiuole, Gouverneur de Boulongne, auoit baillé quelque ayde au Seigneur Ludouic, les Boulonnois composèrent à cinquante mille ducats. Siene, Lucques, & plusieurs autres villes hors le Duché de Milan se soubmèrent aussi à la raison, & pour satisfaire à leur default si auant bouterent la main aux ducats, que grace leur en feut eslargie. Tous les conjurez & autheurs de la rebellion qui peurent estre pris, & mis sous la main de Iustice, encoururent Sentence capitale, & dans la place du chasteau de Milan feurent publiquement executez. Desquels feurent Messire Iacome André, Nicolas le Chyrurgien, Messire Louys de Pors, & le Capitaine de Tretz. Leur procès feut fait par Messire Michel de Ris, Docteur, & par le Capitaine de

la Iustice de la ville. Et feit iceulx executer le Sire de 1500.
la Trimouille, Lieutenant du Roy.

CHAPITRE XXXVIII.

*Comment le Seigneur Ludouic & le Cardinal
Ascaigne feurent amenez prisonniers
en France.*

TOVTES ces choses executées, le Seigneur Ludouic feut amené en France, & feut iceluy conduict par le Seigneur de Ligny iusques à Suse en Sauoye, & de là s'en retourna à Paue, où feut quelque temps. Puis s'en reuint à Lyon sur le Rhosne, où estoit le Roy, lequel luy feit si bonne chere que assez estoit pour se debvoir contenter. De Suse iusques à Lyon feut le Seigneur Ludouic conduit par le Seigneur de Crussol, accompagné de deux cent archers de la garde, & de plusieurs autres Gentils-hommes. A l'entrée de Lyon grād nombre de Gentils-hommes de chez le Roy luy feurent au deuant. Le Preuost de l'hostel le conduit tout le long de la grand ruē iusques au chasteau de Pierre encise. Et là feut logé, & mis en garde seure. A sejour feut illec quinze iours, durant lequel temps feut interrogé de plusieurs choses par les Seigneurs du grand Conseil du Roy. Et supposé qu'il n'eust faict que fol, toutesfois moult saigement parloit. Apres ce feut transmis au


Q ij

1500. chasteau du lys Sainct George en Berry , & à vn Gentil-homme nommé Gilbert Bertrand baillé en garde. Le Cardinal Ascaigne feut pareillement amené à Lyon par le Seigneur de Xandricourt, & de là enuoyé en la grosse tour de Bourges. Et ainsi feut le Duché de Milan en sept mois & demy deux fois conquesté par les François, & pour celle fois finie la guerre de Lombardie, & les auteurs d'icelle captifs & exilez.

May. A PRES doncques que le Seigneur Ludouic, & le Cardinal Ascaigne, feurent logez comme ouy auez, tous les iours du mois de May & de Iuin dedans la ville de Lyon sur le Rhosne, & deuant l'Abbaye d'Esnay se feirent combats & Tournois, & tant d'autres bonnes cheres, que les plus petits en eurent souuent bonne part.

CHAPITRE XXXIX.

Comment la Royne feut en voyage à Sainct Claude, & d'un Tournoy qui feut fait à Lyon à sa venue.

May.  N L'ENTRANT du mois de May, la Royne feut en voyage à Sainct Claude, & de là à Lyon le Saulnier en Bourgogne tenir vn fils du Prince d'Orange. Auec elle feurent les Seigneurs de la Roche de Bretaigne, de Tournon, de Chastillon, & plusieurs

Gentils-hommes de la Maison du Roy, les cent Suif-1500.
fes de la garde, & trois cent hommes d'armes. Des
danfes, banquets, esbats, & ioyeux passetemps qui
à ce voyage feurent faiçts ne feray autre compte, si
n'est que peu durerent les iours à ceulx qui là se trou-
uerent. Car oncques ne feut veüe meilleure Dame,
tant honorable, ne si deliberée, que pour lors
estoit la Royne. A son retour de Bourgongne vou-
lut que dedans Lyon à Elnay feust faiçt vn Tour-
noy de sept Gentils-hommes de sa part contre sept
autres de ceulx du Roy, & feut le vingt-deuxiesme
iour de May au dict lieu d'Elnay ordonné le Tour-
noy. Du party du Roy feurent le Seigneur Infant
de Nauarre, frere du Comte de Foix, le Seigneur
d'Auenes, le Seigneur de Bonneual, le Seigneur de
la Rochepot, le Seigneur des Barres, le Seigneur de
Verdusant, & le Seigneur de Rael, nommé Poc-
quedenare. Du costé de la Royne le Seigneur de la
Roche de Bretagne, le Seigneur de Chastillon, le
Seigneur de Fremente, le Seigneur de Saint Ama-
dour, François Cours, Maugeron, & vn nommé le
ieune Camicant, lesquels se trouuerent sur les rancs
au iour entrepris, tous en armes, & bien montez.
Ceulx qui estoient du party du Roy entrerent les
premiers aux lices, l'armet en teste, & la lance sur la
cuisse, vestus sur le harnois d'un blanc saye, & bar-
des de pareille couleur. De l'autre costé des lices en-
trerent ceulx de la Royne, chascun avec son serui-
teur, & sa Dame, en habillemens de bleu, borde-
de iaune, & semez de petites patenostres de bois.

May.

Q iij

1500. Et eulx ainfi entrez en la lice, leurs Dames meirent pied à terre, & s'en allerent à l'eschafault de la Royne. De l'autre part estoit le Roy en son eschafault, accompagné du Comte de Foix, du Prince d'Orange, du Comte de Dunois, du Duc d'Albanie, du Marechal de Rieux, & du Marechal de Gyé, & plusieurs autres grands Seigneurs. Avec la Royne estoient la Princesse de Tarente, la Comtesse de Gayace, Madamoiselle de Candale, & grand nombre d'autres Dames, & Damoiselles. Lors que chascun feut prest, trompetes & tabourins sonnerent pour faire commencer le Tournoy. Le Seigneur Infant, & le Seigneur de Fremente feirent la premiere course, lesquels marcherent si rudement le long des lices, que sous les pieds de leurs cheuaux sembloit que terre deust profiler. Au ioindre l'Infant de Nauarre feut de la lance atteint par la veüe de son armet si rudement, que sur les arçons feut renuersé, & blessé au visaige, & tant feut estonné du coup, que de long temps apres ne peut redresser la teste. Les Seigneurs d'Auenes & de la Roche de Bretagne iousterent apres, & ne se rencontrerent des lances, mais se combattirent à l'espée. Aux premiers coups perdit le Seigneur d'Auenes son espée, puis la reprit. Et tres-bien à celle fois se trouua au combat. Apres ce laisserent courir le Seigneur de Chastillon, & Pocquedenare, si rudement, que au chocquer les lances allerent par esclats. Et feut Pocquedenare assenné si à droict, que pour la force du harnois ne demeura que au trauers du bras dextre

neluy demeuraſt le tronçon de la lance. Toutesfois 1500. pour ce ne ſarreſta, mais de ſon bras arracha le tronçon, & tant ayda d'une main à l'autre, qu'il teint l'eſpée en ferre, & dix ou douze coups en donna ſi rudement, que tout au deliure ſembloit auoir le bras bleſſé, dont à chaſcun coup qu'il ruoit failloit le ſang iuſques à terre. Le Seigneur de la Rochepot, Bonneual, Sainct Amadour, & les autres feirent ſi bien, qu'il n'y eut à redire. Le Sieur des Barres, du party du Roy, & François de Cours, de celuy de la Royné, finirent le Tournoy, leſquels ſe rencontrèrent à la courſe ſi à droict, que à l'aſſembler les lances feurent brifées par pieces. Au combat de l'eſpée François de Cours feut deſarmé de la ſienne par le Seigneur des Barres. Le Seigneur de Fremente, qui au premier coup de lance auoit tant foulé ſon homme, que à l'eſpée n'auoit ſceu combattre, contre le Seigneur des Barres feut mis en place. Iceluy Fremente feut pareillement deſſaiſy de ſon eſpée. Ainſi feut le Tournoy mis à fin. Quoy plus? Ce iour pluſieurs lances feurent rompües, & maines coups d'eſpées donnez. Et apres que le Tournoy feut finy, le Roy & la Royné ſ'en retournerent au logis. Plus de quinze iours apres enſuiuans ſe continuerent Iouſtes & combats, où maintes bonnes courſes & faiçts cheualeureux feurent mis en auant.

EN ce temps feurent deuers le Roy à Lyon les Ambaſſadeurs du Pape, des Roys d'Eſpaigne, & d'Angleterre, de la Seigneurie de Veniſe, & de l'Archiduc. Le grand Maïſtre de Rhodes tranſmeit au

X

1500. Roy lectres qu'il auoit receües du grand Turc, par lesquelles estoit contenu le saufconduit d'un nommé Monjoye Sainct Denys, Roy d'armes, & autres Ambassades, que le Roy enuoyoit en Turquie.

LE Cardinal d'Amboise, apres auoir receu les deniers que les villes de Lombardie & d'Italie auoient promis par composition de bailler au Roy, mis en ordonnée police l'affaire politique, estably Iuges & Gouverneurs suffisans pour l'entretènement du pays, laissé garnisons & mortespays dedans les villes, & chasteaux, & deüement pourueu au bien de la chose publique du Duché de Milan, s'en voulut retourner en France, & droit à Lyon sur le Rhosne preit son chemin le trauers des montaignes. Avec luy retournerent le Sire de la Trimouille, le Seigneur Jean Iacques, le Seigneur de Mauleon, & plusieurs autres Capitaines & Gentils-hommes, lesquels feurent à
 Juin. Lyon le vingt-troisiesme iour de Iuin, & arriuerent ainsi que le Roy oyoit la Messe à l'Eglise de nostre Dame de confort. Au Cardinal d'Amboise feit illec tant amiable chere que de toute familiarité priuée le voulut festoyer, & pour ses agreables seruices luy donna le Comté de Sartirane en Lombardie. Et encores au Sire de la Trimouille & à tous les autres sus dictz eslargit de tant sa munificence, & tant ioyeux recueil leur feit, que tout à clair peurent congnostre que tres-content se tenoit de leur seruice.

CHAPITRE XL.

*Comment la tempeste cheut dedans la salle
du Palais du Pape.*



LE vingt-huictiesme iour de Iuin, Iuin? le Pape Alexandre sixiesme estant en l'Eglise de Sainct Pierre de Rome se pourmenât avec le Cardinal Coppoue, vn des chandeliers de l'Eglise pesant cent liures ou plus cheut entre eulx deux, & tant pres du Pape, que son habillement depuis le chef iusques aux pieds feut rompu & deschiré.

LE lendemain, iour de la feste solemnele de Sainct Pierre & Sainct Paul, Patrons & Chefs de l'Eglise militante, sur les deux heures apres midy, estant le Pape en son Palais assis en vne chaire esleuée sur douze degrez, au deuant de luy contre vne fenestre vn tourbillon de vent veint tant impetueusement heurter, que par le croulis de l'oraige feut la fenestre entreouuerte, & le voire brisé. Et voyant le Sainct Pere que le pouuoir du vent forçoit la fenestre, pour icelle appuyer transmeit le Cardinal Coppoue, lequel n'eut pouuoir de resister au bouffement du vent: mais malgré luy alla la verriere par terre. Et voyant celuy Cardinal que à la rencontre de ce vent n'y auoit seureté, laissa le Pape en sa chaire, & droict se meit à la porte à la fuite, & n'eut le

R

1500. pied si tost hors la salle, que la tempeste tomba dedans, & à la cheute brisa cinq voutes, & là tua cinq hommes. Le Pape eut telle peur de ce cas, qu'il cheut de sa chaire le long des degrez, & se blessa en la teste & aux mains en six lieux. Toutesfois au derriere d'une tapisserie dedans vn arceau de muraille qui là estoit tout fonné & blessé au mieulx qu'il peut se retira & garentit. Et là demeura iusques à ce que ses gens & le peuple de Rome, qui tost y accoururent, eussent d'autour de luy la place desempeschée des bois & pierres, qui là estoient tombez. Tout sanglant & poudreux feut leué de ce lieu, & emporté en sa chambre, & visité par les Medecins. Lesquels pour le netoyer & purger de son corps tirerent treize onces de sang; & tellement le secoururent que peu à peu se reueint, moyennant l'ayde du Medecin souuerain, qui pour magnifier sa puissance, ceulx qu'il prend en main guairit de maux incurables, & les autres soudainement accouche au grabat de percussion, pour leur donner purgation de vie presente, ou commencement de peine future. Ainsi feut attainct le souuerain Pasteur, qui peult estre indice de la dispersion de ses brebis, ou persecution d'icelles.

CHAPITRE XLI.

Comment Pise feut assiegée par les François.



I'AY dict par cy deuant, que l'armée 1500.
 que conduisoit le Seigneur de Beau-
 mont estoit partie de Parme, pour
 aller à Pise. Mais pour la description
 abreger, i'oublie les quantiesmes iours,
 les repeües, le combien de sejour, & la cause de la
 demeure que l'armée eust entre Parme & la Cité de
 Pise: pour ce que ie n'ay sceu que durant ce temps
 chose qui à commémorer se face ait esté faicte par
 les François. Toutesfois pour meestre brisées au che-
 min de ceulx qui vne aultre fois voudroient faire le
 voyage, ay-ie bien voulu nommer les logis où l'ar-
 mée voulut se reposer. Et premierement de Parme
 au bourg Sainct Denys. Du bourg Sainct Denys à
 Fornoue. De Fornoue à Therencie. De Therencie
 à Bercie. De Bercie à Pontremole. De Pontremole
 à la Gulle. A Sainct Estienne. A la Masse de la Mar-
 cheze. A Pont. A Chappezano. A pont Asserchio,
 où fallut faire vn pont neuf, pour passer l'artillerie.
 De là à Sainct Iean de la vene. A Campo, qui est
 vne petite villette du Comté de Pise, à quatre milles
 pres. Et là feut l'armée le vingt-quatriesme iour de Iuin.
 Iuin. Le Seigneur de Beaumont, Lieutenant du
 Roy, premier que approcher de plus, voulut en-
 uoyer sommer les Seigneurs & le peuple de la ville
 de Pise. Et pour ce là transmeit deux Capitaines de
 l'armée, nommez Iannet d'Arbouuille, & Hector
 de Montenart, lesquels se meirent à chemin tirant
 vers Pise. Et à l'heure de vespres feurent à la veüe de
 la ville, dont issirent deux Pisains, nommez Messire

1500. Francisque Piccia, Docteur, & François de Viuarrio, hommes bien enseignez. Lesquels feirent demeurer leurs gens à la garde des portes, & au deuant des François feurent avec toute reuerence. Apres le salut faict, Iannet d'Arbouuille, qui auoit la charge de porter la parole, feit ce qui luy estoit commandé, en sommant iceulx Pisains de rendre la ville, & la mettre entre les mains du Roy, pour en faire à son plaisir, autrement que feussent asseurez d'auoir siege & guerre mortelle dedans deux iours. A la sommation des François les Pisains ne voulurent auoir pour l'heure paroles contraires, mais asseurerent estre tous bons & loyaux François, & que tels vouloient viure & mourir, sans jamais eslongner leur vouloir de ce propos. Et que toutes les fois que l'armée de France voudroit entrer dedans la ville, toutes les portes luy seroient ouuertes, & les biens d'icelle abandonnez : pourueu que le Seigneur de Beaumont, Lieutenant du Roy leur promet de ne les mettre entre les mains des Florentins. Sur ce feirent responce les messaigers François qu'ils n'auoient pouuoir de rien arrester avec eulx, mais de les sommer comme ils auoyent, & faire responce de ce que de eulx auroient ouy, requerans sur ce auoir briefue depesche. Autre responce ne voulurent faire pour l'heure les Pisains. Mais prierent les François de vouloir le lendemain retourner à Pise, pour parler aux Seigneurs, & peuple de la ville, & ouïr d'eulx telle responce que cepédant tous ensemble aduiferoient. Sur ces paroles se meirent les François au retour, &

du dire des Pisains aduertirent le Seigneur de Beaumont, lequel permet que iceulx François retournassent derechef à la Ville. 1500.

Le iour ensuiuant, vingt-cinquiésme de Iuin, retournerent à Pise les messaigers sus dictz, avec quatre archers seulement. A l'approcher de la ville & à l'entrée trouuerent les Gascons, & autres François dix à dix, vingt à vingt, qui entroient, & sailloient, & apportoit viures à l'ost, & toutes autres choses dont les gens d'armes auoient mestier, comme si paix finale eust entre eulx esté criée. Si tost que les messaigers François feurent entrez en la ville, dedans le Palais d'icelle, qui tout estoit plain de peuple, feurent honorablement conuoyez, & par les citoyens & commune de la ville là ioyeusement receus, & humainement traictez. Et pour monstrier que en singuliere reuerence & souuenance recommandée auoient eu de nouueau le sceptre François, au plus hault lieu de leur Palais estoit l'imaige du Roy Charles huictiesme, dernier mort, pourtraicte & figurée tant au vif, que à l'imaginer de ceulx qui autresfois l'auoient veu en apparoissoit l'humaine forme. Les François pour accomplir leur messaige deuant tous les Seigneurs, & le peuple de la ville, qui là estoient, executerent leur charge, sommans derechef iceulx de faire la volonté du Roy, & se soubmettre à son vouloir. En leur disant que si volontiers ne le vouloient, que la main armée de France, contre laquelle leur force ne pourroit durer, en feroit tost la raison. Leur remonstrant aussi que les

1500. approches de la ruineuse desolation de leur Cité estoient faictes, & de leur mort inhumaine & effusion de sang la conclusion arrestée. Et que la maniere des François estoit telle, que toutes les villes & places par eulx prises d'assault estoient abandonnées au feu & au glaiue. Toutesfois pour les aduiser de preuoir à leur danger futur, & les sommer de penser à leur affaire present, de ce les vouloient bien les François aduertir, & les requerir que de eulx mesmes voulussent auoir pitié, sans estre cause de la ruine de leur ville. Oyans les Pisains la sommation, & les remonstrances que les François leur faisoient, voulurent sur ce rendre responce. Laquelle feit pour tous Messire Francisque Pieta, dessus nommé, lequel eut les paroles qui s'ensuiuent, ou semblables. Puis que peruerse Fortune nous chasse de si pres, que de ceulx qui à nostre defense & garde comme à leur chose propre deburoient employer leurs dextres, nous fault estre mortellement assaillis, à nul autre humain espoir auons recours fors à trois petites requestes que voulons auant que donner responce faire à vous Seigneurs François.

LA premiere est qu'il plaise à la sacrée Majesté du Roy, nostre souuerain Seigneur, nous mettre & reduire en sa Seigneurie & Duché de Milan, ainsi que jadis ont esté nos deuanciers, comme est notoire par les Cronicques des Ducs de Milan, desquels feut le tres-hardy & preux Iean Galeas, en son temps Duc de Milan, pere du Duc Philippes Marie, & de Dame Valentine, grande mere du Roy nostre

Seigneur souuerain. Iceluy Duc Galeas laissa apres 1500. sa mort à ses successeurs vingt-neuf Citez, dont luy & les predecesseurs auoyent pacifiquement iouy, desquelles Pise en estoit vne des mieulx estimées, laquelle depuis la mort du Duc Philippes Marie, par le pouuoir des plus forts, de son propre corps a esté desmembrée. Toutesfois oncques par long traict de temps, ne continuel ennui, ne feut tant degenerée, que iusques à ores dedans tous les anglets de son iardin naist la fleur du lys semée, & respanduë, esperant que tant vne fois y florira, que à temps perpetuel les branches ou rameaux garderont le pourpris.

L'AUTRE est, qu'il plaise au Roy, nostre Prince souuerain, ne nous mettre entre les mains des Florentins nos ennemis mortels, qui nostre entiere destruction ont iurée, & la defloration des vierges & pucelles de la tant desolée Cité. Ce que vous, nobles François, entre autres bonnes graces & loüables vertus auez en singuliere recommandation.

LA derniere requeste que nous faisons est, que si le Roy, à qui nous sommes corps & biens, auoit aux Florentins faict promesse de nous subjuguer à leur Seigneurie en gardant sa promesse, que premier luy plaise nous donner lieu & place en son Duché de Milan, ou ailleurs, pour prendre & faire nouuelle habitation, & nous donner terme de retirer nos biens. Voulans mieulx en pauureté honteuse tenir les champs, que à la mercy de ceulx qui cer-

1500. chent nous tyranniser, passer nos ans en closture de Cité captiue.

LE propos des Pisains finy, les François, comme ceulx qui n'auoient congnoissance de cause, dirent que en leur charge n'estoit de leur promettre ne accorder aucune chose: mais de les sommer, comme dict est, de rendre la ville & la soubmettre au vouloir du Roy. Dont ne sceurent plus les Pisains de quelle replicque debuoir vser, si n'est dire que puisque de toutes leurs requestes estoient frustrez, que à l'ayde de Dieu, & de nostre Dame, dont ils portent l'enseigne, iusques à la mort contre les Florentins defendroient leur franchise. Toutesfois aduertirent les François que les eaües des puis & des fontaines d'autour de Pise estoient toutes empoisonnées & corrompues, & qu'ils se gardassent d'en boire, mais seurement beussent de l'eaüe du fleueue. Et aussi requierent aux François que il leur pleust ne se trouuer contre eulx à l'assault, mais à eulx, aux Alemans, & aux Florentins, fil y en auoit, laissassent la mellee. Apres que les Pisains eurent faict leurs requestes, & dict tout ce qu'ils voulurent, ils se meirent à part. Et ce faict, dedans le Palais entrerent cinq ou six cent ieunes filles, toutes vestües de robes blanches, & avec elles estoient deux femmes vieilles qui les conduisoient. Lesquelles feirent aux François telles harangues, & pareilles requestes que les hommes leur auoient deuant faictes. Et sur toutes prieres, aux François comme tuteurs des orphelins, defenseurs des veufues, & champions des Dames, baillerent en

garde la pudicité recommandable de tant de pauvres pucelles. Les prians humblement que si rigueur à tous œuvres de merite leur faisoit tourner le dos, que comme meus de pitié en ceste occasion daignassent prester l'oreille. Assez d'autres piteuses paroles & lacrimables termes touchant leur affaire eurent aux François. Lesquels tant ne s'arrestèrent à feminines persuasions que au vouloir du Roy ne voulussent sur toutes choses obeir. Voyans les dictes pucelles que responce comme elles desiroient n'auroyent des François, toutes explorées les supplient, que au moins puisque toutes prieres humaines auoient en desdaing, que en recongnoissant la diuinité leur pleust ouïr vnes laudes faictes à l'honneur de nostre Dame, que par chascun soir chantoient deuant son image. Les François à ce n'enclinerent seulement le chef, mais iusques en terre ployerent les genoüils. Deuant l'image de nostre Dame commencerent les pucelles à chanter tant piteusement, & de voix si tres-lamentable, que là n'y eut François, ne autre, à qui du plus profond endroict du cœur iusques aux yeux ne montassent les chaudes larmes. De ce ne diray plus, doubtant à deüil prouoquer les oyans. Toutesfois le Salut finy, les François prirent congé des Pisains, & s'en retournerent à l'ost, qui encores estoit à Campo. Et là racomptèrent au Seigneur de Beaumont, & aux autres Capitaines de l'armée de France ce qu'ils auoient faict, veu, & ouy. Aulcuns eurent pitié de l'affaire des Pisains, & les autres feurent endurcis contre eulx.

1500. Somme appointé feut que le lendemain l'armée marcheroit pour les aller assieger. Et au plus matin se meirent les gens d'armes François à la voye, tirans au quartier de Pise le long de la coste des montaignes de Lucques. Et auoit l'armée pris l'escart pour mettre le siege mieulx à plaisir. Car par le droit chemin approcher la ville, estoit chose malaisée, & de forte aduenüë. Ce iour feut le camp logé à vne autre bourgade nommée Androne, à cartier de Pise, deux milles pres. Le iour ensuiuant, vingt-
 Iuin. septiesme de Iuin, feut l'armée à vn lieu nommé Campo, prochain de Pise de demy mille. Et là demeura le surplus de ce iour, & tout le lendemain. Durant lequel temps les Pisains parlerenteret avec le Seigneur de Beaumont, Lieutenant du Roy, auquel remonstrerent plusieurs belles choses qui longues seroient à racompter. Toutesfois la fin de leur propos tendoit tousiours à ne vouloir pour mourir estre soubmis aux Florentins. Et pour ce que c'estoit la seule cause qui là menoit les François, feurent appointez contraires, tant que guerre ouuerte feut declarée entre eulx. Ainsi s'en retournerent les Pisains à la garde de leur ville bien esbahis & estonnez.

CHAPITRE XLII.

Du siege de Pise, & de l'assault que les François y donnerent.



E vingt-neufiesme iour de Iuin, feurent 1500.
les François deuant la ville de Pise, & Iuin,
tout autour d'icelle meirent le siege.
L'artillerie feut assise en plain champ,
sans aucunes tranchées, & toute l'armée logée au
descouuert en la veüe de la ville.

LE lendemain, trentiesme iour de Iuin, com- Iuin,
mencea l'artillerie de France à tirer coups contre la
ville, & ruer par terre defences, & creneaux, & au
trauers des murailles faire ouuerture. Les Pisains
pour l'heure n'eurent grande maniere de defence,
& peu de coups d'artillerie & de traict tirerent contre
les François, mais durant la batterie inuoquerent
Dieu, & nostre Dame, & crioient misericorde à
haulte voix. Je ne veulx meestre en silence vn cas
bien estrange à racompter, & plus merueilleux à
ouïr, quilà adueint tel, que ainsi que les canonniers
François contre les murs de la ville par la bouche de
leurs plus aduantageuses pieces d'artillerie deschar-
geoient grosses boules de fonte, le fer à l'assembler
des pierres contre l'ordre de nature en plusieurs pie-
ces escarteloit. Et plus. Car apres que les murs feurent
abatus, voulans les canonniers faire l'entrée vnie, &
du tout applanir le passaige, ruerent coups, qui fei-
rent chose non ouye. Car les pierres de fer pouffées
par vent tempestueux à l'attaindre ressortissoient
en arriere de la breche de la muraille, iusques oultre
l'artillerie, & par dessus plus de quatre toises de
loing, dont il y auoit de l'vn à l'autre plus de quatre
cent pas. Toutesfois tant feut la batterie continuée,

S ij

1500. que tout feut mis à bas, & faicte voye si ample, que l'assault feut commandé à donner. Autour de la breche voulurent les Pisains desployer quatre enseignes, & sous l'ombre d'icelles iusques à la mort defendre leur querelle. Dedans vne de leurs enseignes estoit pourtraicte l'imaige de nostre Seigneur Iesus Christ en croix, & en l'autre l'imaige de nostre Dame, lesquelles meirent vis à vis de la rupture, & à l'un des costez les armes du Roy, & à l'autre les armes de la Royne. Et premier que desployer leurs enseignes, ne que la batterie se commenceast, les Pisains monterent sur les murailles de la ville, & là si hault que les François le peurent entendre feirent protestation. Disans que contre le Roy & son armée n'entendoient eulx defendre, ny auoir quelque querelle: mais seulement contre les Florentins, qui sans iuste cause ne droict qu'ils eussent sur eulx, les vouloient subjuguer & dompter à nouuelle seruitude, & que pour ceste querelle seule mettoient la main aux armes. Les François n'entendoient à autre chose qu'à executer le vouloir du Roy, & tant auoient approché la ville, que encontre la breche auoient planté leurs enseignes, & tel aduantaige auoient sur les Pisains, que entre eulx & la muraille nuls fossez y auoit qui ennuy leur feissent. L'assault commencerent à donner les François si rudement, que oncques en telle presse ne se trouuerent les Pisains, que tout autour de l'ouuerture estoient hommes & femmes, les vns en armes, & les autres vestus de robes de toile blanche, crians tous d'une voix

France, France. Mais toutesfois si à point defen- 1500.
doient la muraille, que François n'en approchoit
qu'il ne feust repoussé bien rudement. A coups de
picques, de ronçons, & de traict gardoient le pas-
saige, en criant Pise, France. Et auoient iceulx Pi-
sains des pommes de chaulx ensulphurées, lesquel-
les iettoient contre le visaige des François, qui les
empouldroit, & brusloit, en maniere que celuy qui
en estoit attainct n'auoit plus pouuoir de faire ar-
mes. Toutesfois tant fierement combatoient les
François, qu'il n'y auoit coup tant mortel, qui vn
seul pas les feit demarcher. Main à main auoient les
vns & les autres à besongner, & tant feurent les Pi-
sains cerchez de pres, que au dedans de la breche
entre les mains leur feurent par les François à grands
coups d'espées coupez deux ronçons, & deux d'i-
ceulx Pisains tuez, & vne femme blessée qui portoit
des pierres pour defendre l'entrée, dont ils battoient
les François, tant qu'ils estoient tous estonnez de
porter les coups. Toutesfois force de harnois contre
ce de moult les seruoit. Mais ils ne pouuoient sup-
porter la chaleur. Moult feut dut l'assault. Car les
Capitaines François, pour soustenir la charge, &
recréer les lassez, long temps à la breche teindrent le
pied ferme, & tant que à ceste charge feurent là
blesséz Aubert du Rouffet, le Seigneur de Saint
Prest, & Iannot d'Arbouuille, Capitaines. Et est à
penfer que avec eulx plusieurs autres se trouuerent
aux coups rencontrer. Que diray-ie? Plus de trois
heures dura l'assault moult rudement donné par les

1500. François, mais tant vigoureusement defendu par les Pisains, que aux François donnerent à congnoistre que pour ce iour ne vouloient que les Florentins criassent sur iceulx ville gaignée. Et voyans les François que le desaduentaige leur tournoit sur le dos cesserent l'assault. La nuit ensuiuant au rempart meirent les Pisains la main tant à profit, que premier que iour esclarcist autour de la ville n'y auoit de plus seur endroi. Le lendemain commencerent les canonniers François derechef à faire vne autre batterie plus grande que la premiere, & de plus en plus fort assaillir la ville, delibérans de jamais de là ne desemparer, que entre leurs mains ne l'eussent mise. Mais autrement en feut. Car les Suisses, qui là estoient pour le Roy, voulurent soudainement auoir argent, (Ce que pour l'heure ne feut prest,) comme ceulx qui à leur vouloir sont subiects, sans vouloir auoir vn seul iour d'attente tous ensemble prirent pays, & s'en allerent, & au desloger les François que par les chemins trouuoient à l'escart tuoient & assommoient, comme si guerre ouuerte leur eust donné pouuoir de ce faire. Ce qui estoit bien à eulx faict vn si mauuais tour, que c'estoit assez pour debuoir degouster le Roy de leur seruice. Les Gascons pareillement se mutinerent, & la pluspart d'iceulx abandonnerent le siege. Les Florentins, qui auoient promis d'aitailler l'armée, & fournir l'artillerie d'affustaige, & autres necessitez de tout, n'en feirent rien. Si n'est que au siege enuoyerent des vins poussez, tant aigres & reboüillis,

que nul n'en pouuoit boire. Et si de Lucques ou de 1500.
Pise mesmes les François n'eussent eu viures, au
danger de mortelle famine estoient abandonnez.
Le Seigneur de Beaumont, Lieutenant du Roy,
considerant tous ces destours, & soy doubtant de
l'artillerie, avec les Capitaines de l'armée voulut
consulter l'affaire, lesquels feurent tous d'aduis de
leuer le siege. Veu que l'armée estoit amoindrie de
plus de la tierce partie de soldats, & que les Floren-
tins, pour lesquels ils estoient là allez, leur failloient
à toutes promesses. Et aussi que les Pisains qui de
tout ce estoient aduertis s'euertoient de plus en
plus. Et pour ce feut aduisé que l'armée se mettroit
au retour. Et le iour ensuiuant, sixiesme de Iuillet, Iuillet.
les François leuerent leur siege, & se meirent à che-
min pour retourner droict à Milan. Plusieurs la-
quais las & alterez, pour la grande chaleur qu'il fai-
soit lors, & autres qui à l'assault de Pise auoient esté
blessez, ne peurent suiure le train de l'armée, mais
demeurerent là couchez & estendus, à la mercy de
leurs ennemis, lesquels ils attendoient d'heure en
autre pour les venir assommer, & leur couper les
gorges. Mais mieulx leur feut. Car apres que l'armée
feut esloignée, sur le soir faillirent de Pise avec tor-
ches & fallots les femmes de la ville, faisans la recher-
che par les hayes & buissons, pour trouuer les mala-
des & blessez. Et tous ceulx qu'elles peurent veoir,
& rencontrer, amiablement preindrent par les
mains, & doucement les leuerent. Puis par soubz les
bras les emmenerent peu à peu iusques à la ville; &

1500. dedans leurs hostels les logerent, où feurent tant traictez à souhait, & soigneusement pensez, que oncques ne feurent mieulx venus. Et tels y auoit qui dedans leurs maisons ne se feussent si bien trouuez de moictié pres. Car de toutes viandes & medecines qui leur estoient saines & necessaires leur faisoient pourchas, & administroient, voire continuellement, iusques à ce que en santé feussent du tout reuenus. Et apres ce qu'ils feurent en bon point, & qu'ils s'en voulurent retourner, pour assouuir leur appetit, de plus de l'argent leur donnerent assez, pour faire plus de chemin que à eulx pour l'heure ne restoit. Ce qui feut bien œuvre humain. L'armée feit par les chemins peu de sejour. Et si tost qu'elle feut au Duché de Milan de retour, par les villes & chasteaux feurent les gens d'armes mis en garnison. Apres toutes ces choses le Roy voulut retourner au pays de France. Mais auant ce, voulant tousiours de plus renforcer son Duché de Milan, & pourueoir au Gouuernement d'icelle, il transmeit celle part Charles d'Amboise, Seigneur de Chaumont, & grand Maistre de France, & Messire Berault Stuard, Seigneur d'Aubigny, lesquels en cest affaire ordonna les Lieutenans.

Iuillet. . LE vingt-vniesme iour de Iuillet, le Roy & la Royne partirent de Lyon, & se meirent à chemin vers Roüanc. De Roüane à Marcillé les nonains, à Pierrefite, à Cosne sur Loire. Et là se meit la Royne sur la riuiera de Loire, & par eaüe descendit iusques à Blois. Le Roy tira outre droict à Chastillon, à Montargis,

Montargis, à Courtempierre, & là sejourna par 1500. l'espace de quinze iours, passant le temps à la chasse des cerfs.

Le douziesme iour du mois d'Aoust, le Roy Aoust;
feut aux champs chasser vn grand cerf, lequel courut moult tost, & en le chassant à bride abatuë, tomba son cheual sous luy si rudement, que par la roideur du cours, & force du dict cheual, à la cheute se rompit vne espaule, dont feut griefuement malade, & feut pensé par vn nommé Louys Saint Pic. Apres qu'il feut reuenue en santé, vers le Puisseau se meit à la voye à Milly & à Melun, où sejourna iusques à la fin du mois d'Aoust. Et en l'entrant de Septembre s'en reueint à Blois, où estoit la Roynie. ^{Septem;}
Et là tout le mois de Septembre feut à sejour. Et à la ^{bre.}
fin du dict mois eut vouloir de visiter son Duché de Bretagne. Et pour y aller mieulx à l'aïse, luy & la Roynie se meirent sur la riuere de Loire dedans vne galiote, & ainsi feurent iusques à Nantes, où sejournerent quinze iours. Et apres ce deslogerent, & preindrent le chemin de Montagu, & par le bas Poictou tirerent à Toüars, à l'Isle Bouchart, & à Chinon.

Le vingt-quatriesme iour de Nouembre feut le Nouem;
Roy dedans la ville de Tours son entrée tant ^{bre.}
magnifique, que long papier fauldroit pour en faire entiere description. Le vingt-sixiesme iour du dict mois de Nouembre, la Roynie entra dedans la dicte ^{Nouem-}
ville de Tours, qui tant honorable reception luy ^{bre.}
feut, que bien luy monstra le peuple d'icelle que

1500. cœur, corps & biens vouloient du tout meſtre ſous la ſauuegarde de ſa main. Les Ambaſſadeurs d'Alemaigne feurent là receus, oüis, & depeſchez. L'affaire des Ambaſſadeurs d'Eſpaigne, de Veniſe, de Florence, & de Piſe, feut pareillement là mis en conſeil. Tous les Roys Chreſtiens feurent en ce temps en reſolution de meſtre gens d'armes ſus, & faire groſſes armées, pour enuoyer contre les infideles Turcs, qui pour vſurper la terre Chreſtienne, la loy diuine aneantir, & les ſuppoſts d'icelle tyrannifer, eſtoient ſaillis de leur pays à multitude ſi grande, que le nombre d'iceulx ne pouuoit eſtre de nul eſtimé. Et ja auoient couru la terre de Saint Marc, & priſe vne ville nommée Modon, laquelle auoiet miſe à feu & à ſang, & faiſt maintes inhumanitez ſur le peuple Chreſtien. Parquoy le Pape, chef de l'Egliſe, voyant que le bras ſeculier à ſouſtenir ſi peſant faiſ pourroit par trop eſtre foulé, & que l'affaire touchoit generally toute la Chreſtienté, voulut que les membres de l'Egliſe ſupportaſſent vne partie du poids de ceſte charge. Parquoy feut la Decime miſe ſus, & payée. Et avec ce, à la requête du Roy pour ſubuenir à la croiſade le Pape tranſmeit en France le Iubilé, voulant que l'argent qui là ſeroit donné feust employé pour la ſolde des gens d'armes qui ſeroient ordonnez pour aller ſur les dictſ infideles. Le Roy y eſlargit tant ſon pouuoir, que les canaulx de la mer remplit de neſs & nauires de guerre. Et par la terre d'Italie & de Saint Marc feut marcher ſi groſſe armée, que ce feut iuſques à la

merueille des Chrestiens, & espouuementement des 1500. infideles. Plusieurs Gentils-hommes de la Maison du Roy & autres se conuièrent, & voïerent à faire le voyage, sçaichans que en plus iuste guerre ne pourroient exploicter les armes, ne pour autre querelle defendre viure plus honorablement, ne tant glorieusement mourir. Apres que le Roy eut sejourné à Tours dix iours, luy & la Royne deslogerent, & de là s'en allerent à Amboise, où ne feurent que deux iours, puis tirerent droict à Blois, & là sejournerent les mois de Ianuier & de Feburier. Durant lequel temps les Estats feurent tenus, & les Ambassadeurs ouïs.

LE troisieme iour du mois de Feburier, vn Cheuaucheur d'Escuyrie, nommé Patris Kalenda, Escossois, dedans la ville de Blois feut deposé de son Office, & sur vn eschafault par vn des autres Cheuaucheurs luy feut arraché l'esmail Royal, & luy banny du Royaume de France, pour auoir falsifié les lectres du Roy.

SUR la fin du mois de Feburier le Roy partit de Blois, & de là feut à Loches, où peu de temps sejourna. De Loches prit son chemin droict à Moulins en Bourbonnois, & la Royne quand & luy, où iusques à la feste de nostre Dame de Mars demurerent. Et durant ce feurent faictes les nopces du Duc d'Alençon, & de Madamoiselle Susanne de Bourbon, les Ambassadeurs qui là estoient depechez, tenu parlement sur l'affaire del'armée que le Roy mectoït sus pour enuoyer sur les Turcs, qui à

148 HISTOIRE DE LOVYS XII,
1500. tous efforts assailloient la gent Chrestienne, & au
parfus deuïement aduisé sur les vrgens affaires du
Royaume.

1501. CHAPITRE XLIII.

*Comment le Roy feut visiter ses pays de Bour-
gongne, & d'aucuns traistres qui feurent
lors executez à Dijon & à Lyon
sur le Rhosne.*

LA Y laissé le Roy à Moulins en Bour-
bonnois, où auoit ordonné de ses af-
faires, & mis sus grosse armée par ter-
re, pour aller à Naples, & avec ce ap-
prelté grand nauigaige en mer, pour
aller guerroyer les Turcs, qui lors estoient descen-
dus en Grece, & couroient la Chrestienté, comme
plus au long cy apres sera dict. Pour continuer pro-
pos doncques est à sçauoir que le vingt-cinquième
iour du mois de Mars, en l'an mille cinq cent vn, le
Roy voulant visiter ses pays, partit de Moulins en
Bourbonnois, & prit le chemin de la Bourgongne,
en laquelle sejourna les mois d'Auril, & de May,
dedans ses Villes de Dijon, de Beaune, d'Autun,
d'Auffonne, de Tournus, & de Mafcon. Durant
lequel temps il meit ordre & police au faict politi-
que de son dict pays, & à la garde d'iceluy proui-
sion de seureté. Vn Gentil-homme feut lors de la

franche Comté, nommé Iacques de Lay, lequel 1501.
 sen alla secretement deuers Maistre George Cardinal d'Amboise, & Messire Guy de Rochefort, Chancelier de France, & iceulx aduertit que deux marchans de Beaune, nommez Iean Peluchot, & Iean Courtois, auoyent voulu vendre & liurer la dicté ville de Beaune à Maximilian Roy des Romains. Et ce auoit sceu au vray cestuy Gêtil-homme par vn homme de la franche Comté, nommé petit Iean Toetors, dict d'Aspremont, messaiger d'un Capitaine de gens de guerre pour le Roy des Romains, nommé le dict Capitaine Chantrans. Lequel par plusieurs fois auoit enuoyé son dict messaiger à Beaune, pour parler aux dicts Peluchot, & Courtois, touchant le traicté de la dicté trahison. Et ce propos mis en auant, pour auerer le faict plus à clair, le Roy transmeit secretement le Gentil-homme qui la chose auoit descouuerte, en la franche Comté, pour prendre le messaiger, qui la machination auoit pourchassée. Et pour conduire l'œuure plus seurement, adressa le dict Gentil-homme au Prince d'Orange, qui lors estoit à Lyon le Saulnier és marches de la franche Comté, auquel manda par lettres que en cest affaire le voulust seruir. Ce qu'il feiz. Car au moyen de son secours, & pourchas du Gentil-homme, feut le dict messaiger Bourguignon pris, & mené à Dijon prisonnier, & là feut par les Seigneurs du grand Conseil du Roy sur ce cas interrogé. Lequel apres plusieurs negations & excuses confessa la chose estre vraye, & comment les dicts Peluchot

1501. & Courtois luy auoient promis par plusieurs fois que à leur pouuoir mettroiēt peine & trouueroient moyen de mettre la dictē ville de Beaune entre les mains du Roy des Romains, & que pour ce faire employeroient auoir, & amis, sans faillir à leur promesse, que par serment solemnel auoient ensemble conjurée. La confession de celuy messaiger ouye, le Roy transmeit hastiuelement le Preuost de son hostel à Beaune, pour prendre iceulx traistres, & manda au Chastellain de la dictē Ville que en ce luy feist ayde & seruice. En quoy volontiers s'employa. Toutesfois vn d'iceulx traistres nommé Peluchot se doubta de l'aduanture, ou feut par aucuns de ses amis aduerty du cas, dont hastiuelement prit de ses bagues les meilleures, & plus portatiues, & apres auoir desemparé la Ville, s'enfuit en la franche Comté pour le plus seur. Apres ce que il eut vuidé, de la cause de la fuite feut doubté & accusé enuers le Roy le dict Chastellain de Beaune, & de ce luy feut faicte question : lequel si à point s'en excusa, que il feut trouué sans coulpe quitte & deschargé. Jean Courtois feut par le Preuost de l'Hostel pris, & mené à Dijon, & là avec le dict d'Aspremont messaiger, confronté & enquis sur le faict de la dictē trahison. Lesquels d'Aspremont, & Courtois, ainsi confrontez, recongneurent le traicté plain de trahison par leur confession propre. Et eulx ainsi attraits du cas, feurent par sentence de Iustice condempnez d'encourir peine capitale. Si feut le dict d'Aspremont enuoyé executer à Lyon sur le Rhod-

ne, & Iean Courtois escartelé à Dijon, dont les 1501. membres feurent mis deuant les portes de quatre Villes de Bourgongne. C'est à sçauoir à Aussonne vn des bras, à la porte dont l'on va droict à Dole, à Dijon l'autre des bras, & le corps, à Beaune la teste, & le demeurant aux faulxbourgs de Chalon dedans la franche Comté. Ainsi feurent les traistres payez selon la desserte de leurs demerites. A la fin de ce propos me fault commencer à dire del'armée que le Roy auoit ordonnée pour aller conquerir le Royaume de Naples qui luy appartenoit.

CHAPITRE XLIV.

Comment le Roy meit son armée sus, & du nombre de gens d'armes ordonnez, pour aller au voyage de Naples.

LE ROY estant lors en son pays de Bourgongne, comme i'ay dit, en l'entrant du mois de May, transmeit la poste delà les monts deuers Messire Charles d'Amboise, Seigneur de Chaumont, & son Lieutenant en Lombardie, pour mettre ordre en l'affaire de la guerre. Et aussi enuoya vers Messire Berault Stuart, Escossois, Capitaine des cent archers Escossois de sa garde, & aux autres Capitaines de ses gens de delà les monts, pour iceulx aduancer de faire leur monstre, & eulx acheminer au voyage de Naples. Les-

1501. quels apres auoir eu le mandement du Roy , tant exploicterent , que le vingt-cinquiésme iour du mois de May chascun à leur garnison feirent leur monstre. Et feurent payez pour trois mois le nombre de gens d'armes qui s'ensuiuent. Les cent hommes d'armes du Duc Philibert de Sauoye, soubz la charge de Aimer de Coursinge. Cent hommes d'armes, dont estoit chef Cesar Borgia, Duc de Valentinois, & nepueu de frere du Pape Alexandre sixiesme. Cent hommes d'armes soubz Messire Iean Francisque de Sainct Seuerin, Italien, Comte de Gayace. Cent hommes d'armes de Messire Berault Stuart, Cheualier Escossois, Seigneur d'Aubigny. Cinquante hommes d'armes soubz Messire François de la Trimouille, Seigneur de Mauleon. Cinquante hommes d'armes soubz Messire Pierre d'Urfe, grand Escuyer de France. Cinquante hommes d'armes de Messire Iacques de Chabannes, Seigneur de la Palisse. Cinquante de ceulx de Messire Yues d'Alegre. Cinquante de ceulx de Messire Aimar de Prie. Cinquante soubz le Seigneur de Chandée. Cinquante soubz la charge de Iacques de Silly, Bailly de Caen. Cinquante soubz la charge du Seigneur de Sainct Prest. Cinquante à Messire Antoine Paluesin, en la conduite de Aimer de Villars, dict Poquedenare. Et cinquante de ceulx de Iean de la Lande. Lesquels estoient de nombre neuf cent hommes d'armes François. Et pour iceulx de plus renforcer, le Roy me~~x~~ sus sept mille hommes de pied Normans, Picards, Gascons, & Alemans, lesquels

lesquels auoit faict payer, & enuoyer de là les monts, 1501.
 pour seruir à la dicte conqueſte, & conduire le char-
 roy de ſon artillerie : dont il y auoit vingt-quatre
 faulcons, & douze gros canons, ſoubs la charge de
 Iacques de Silly, Bailly de Caen. Pour le gouuernement
 & conduite de tout l'oſt & ordonnance de la
 guerre de Naples, le Roy feit ſon Lieutenant general
 & grand Capitaine Meſſire Berault Stuart, Eſcof-
 fois, avec luy le Duc de Valentinois, & le Comte de
 Gayace. Leſquels ſçauoient les pays, Villes & cha-
 ſteaux du Royaume de Naples, où premier failloit
 beſongner, & les plus ſeures entrées du dict pays. Et
 ainſi feurent les François appreſtez pour prendre
 les champs. Le vingt-fixieſme iour du dict mois de
 May, gens d'armes ſortirent de leurs garniſons, pie-
 tons ſ'acheminèrent, & artillerie feut miſe au char-
 roy, pour tirer droict à Parme, au Duché de Milan,
 où le penultieſme iour du dict mois de May tous
 enſemble ſe trouuerent preſts de commencer leur
 voyage. Juſques à temps ie laiſſeray ce propos, &
 diray du Roy, qui lors eſtoit party de Bourgongne,
 pour tirer à Lyon ſur le Rhodane, où feut le deuxieſ-
 me iour du mois de Iuin.

CHAPITRE XLV.

*Comment le Roy meit sur mer gros nauigaige
pour aller guerroyer les Turcs qui estoient
en Grece, où la Royne desploya grand
tresor, & feit plusieurs nauires
singler celle part.*



IL TOST que le Roy feut à Lyon, comme i'ay dit, sans autre sejour faire, voulant donner secours à la Chrestienté contre les infideles, transmeit postes à ses ports de mer, pour haster son nauigaige, dont la plus part tira vers le port de Toulon en Prouence, attendans illec nouuelles du bon vouloir du Roy, pour mettre sur ce mains en besongne, & tendre celle part où son bon plaisir seroit de les enuoyer. La Royne aussi Madame Anne de Bretaigne, comme tres-catholique, à l'affaire de ce voyage n'eut le vouloir amolly, ne la main close: mais voulant employer le possible de sa force, pour exaucer la foy Chrestienne, desploya ses tresors, & iceulx eslargit, pour souldoyer grand nombre de gens d'armes, & equipper force nauires. Et entre autres voulut que sa grosse caraque nommée la Cordeliere, & plusieurs autres feissent le voyage. Et lors que l'heure feut de tirer au vent, grande flote de nauires de Normandie feu-

rent au port de Brest en Bretagne querir icelle Cor-
deliere, & les autres de sa suite qui là estoient. De-
dans les dicts nauires estoient grand nombre de
Gentils-hommes, & entre autres Messire Jacques
Guibbé, Messire Guillaume Cadore, Messire Guil-
laume de Boisboissel, Guyon Bertrand, François
de l'Espinay, Herué de Mallestrois, Jean Grimault,
Seigneur de Procex, François du Quellenec, Gilles
Melchinot, le Vicomte de Rhodéz, Pierre Choque
dict Bretagne, premier Herault de la Roïne, la-
quelle l'y auoit enuoyé pour luy en faire le rapport.
Aussi y feurent Jean Bigot, Seigneur de Burgueil,
Pierre de Quosquier, & plusieurs autres. Ainsi par-
tirent du port de Brest, & feurent passer le long de
la coste d'Espagne, & de Portugal, & par les des-
troits de Gibraltar, où preindrent deux brigantins
de Iuifs & Sarrafins venans de Lisbonne en Portu-
gal, lesquels feurent laissez aller. Toutesfois leurs
biens feurent saisis, & leurs liures bruslez. En ensui-
uant rangerent les Chrestiens la coste de Grenade,
& entre le Royaume de Tunis, & la dicte coste de
Grenade, empres d'un haure nommé Cartagene,
trouuerent force nauires du Roy Frederic, chargées
de salpestres & poudres à canon, lesquelles feurent
prises, & par iceulx Bretons deschargées, & les corps
seulement rendus. Et ce faict, singlerent vers le port
de Toulon, où les autres estoient. D'icelle armée &
nauigaige feit le Roy Conducteur & son Lieute-
nant general Messire Philippe de Rauestain, qui
lors estoit à Genes Gouverneur pour le Roy, au-

1501. quel bailla en gouuernement & soubz sa charge les nefs & galées cy deffoubs nommées. C'est à sçauoir la grand nef ou carraque nommée la Charante, l'une des plus aduantaigeuses pour la guerre de toute la mer. Pour descrire la grandeur, la largeur, la force, & equippage d'icelle, ce seroit pour trop alonger le compte, & donner merueille aux oyans. Quoy que ce soit, elle estoit armée de douze cent hommes de guerre, sans les aydes, de deux cent piéces d'artillerie, desquelles y en auoit quatorze à roües, tirans grosses pierres de fonte, & boulets serpensins, auitaillée pour neuf mois, & auoit voisle tant à gré, que en mer n'estoyent pyrates ny escumeurs qui deuant elle teinsent vent. Dedans estoit vn Gentil-homme de Bretagne Capitaine d'icelle nommé Messire Iean de Porcon, Seigneur de Beaumont, & Lieutenant du Roy en la mer de Normandie. Aussi feurent ordonnez pour le Roy Messire Iacques Guibbé, Chef de la grand nef de la Royne, nommée Marie la Cordeliere, & de six autres grosses nefs de Bretagne. Le Marquis de Bade estoit Capitaine de la nef nommée le Marais. Le petit Porcon auoit la charge de six nauires de Normandie. Iean Dauzis feut Capitaine d'une nef nommée la Marquise. Emar de Vescq, Seigneur de Monjou, feut chef de la nef appelée le Lyon, Et vn Gentil-homme Gascon, nommé Messire Iean le Bidoulx, feut Capitaine de quatre galeres moult vistes, bien équipées, & fort redoubtées en mer. Et estoient les dictes nefs & galeres de soldats & de viures gar-

nies à suffire, & armées & artillées de gros canons, couleurines, & faulcons, pouldre à canon, boulets, serpentins, pierres de grais, plombs, fers, barres, picques, pelles, tranches, pinces, testes de cheuretes, traicts, arbalestes, halebardes, lances, picques, & pauois à main, & en somme de toutes autres choses requises & necessaires pour la garde & deffense desdites nefz, & galeres, & conduite d'icelles. Icelles apres auoir receu le mandement du Roy, feirent voile & trancherent les ondes du Leuant droict au port de Genes: lequel aborderent sur la fin du mois de Iuin, & là s'assemblerent avec les grosses carraques & nauires Geneuoises, qui pareillemēt estoient armées, & équipées, & toutes prestes pour commencer le dict voyage. Les Roys d'Espaigne, d'Angleterre & de Portugal, & le grand Maistre de Rhodes, nommé Frere Pierre d'Aubusson, long temps deuant ce auoyent iuré & promis de leur part chacun à son pouuoir, pour secourir la Chrestienté, mettre en mer leur nauigaige, & à la Saint Barthelemy ensuiuant ou entour ce temps faire assembler leurs gens au port de Corso, terre de Saint Marc, és parties de Grece: lesquels s'en acquitterent, comme vous orrez, quand l'heure d'en parler en sera. Quoy que ce soit, par toute la Chrestienté de ce feurent amplex nouuelles. Dont plusieurs vertueux Gentils-hommes François & autres entrepreindrēt ce loingtain voyage, & voulurent à tant iuste querelle les armes exploicter. Desquels feurent Iean Stuart, Duc d'Albanie, nepueu du Roy d'Ecosse,

1501. qui lors estoit en France de la Maison du Roy, le Seigneur Infant de Foix, oncle de la Royne, Louys de Bourbon, Comte de Roussillon, Jacques de Coligny, Seigneur de Chastillon, René d'Anjou, Seigneur de Maifieres, Jacques Galiot, Seneschal d'Armaignac, Messire Jean de Tinteuille, Messire Jean de Lauedan, Jean de Saints, Eschanfon du Roy, Jean Chapperon, Aimon de Viuonne, Seigneur de la Chaltaigneraye, Jean de Mouy, Gilbert des Serpens, Seigneur de Cytain, Philebert de Damas, Seigneur de Saint Amour au Duché de Bourgogne, Gilbert de Chasteauuert, Seigneur du dict lieu, le Sieur de Cerance, Louys de Chastelbayart, & grande compaignée d'autres Gentils-hômes François, lesquels par le congé du Roy s'en allerent delà les monts par terre, & se rendirent à Sauonne, terre des Geneuois, assise entre Ast, & la dicté Ville de Gennes, pres des montaignes, & de la mer de Levant. Aussi feurent ordonnez à faire iceluy voyage trente hommes d'armes de ceulx de la compaignée du Seigneur de Chastillon, & vingt-cinq de ceulx du Seneschal d'Armaignac, lesquels estoient lors en garnison au Duché de Milan. Et si tost qu'ils sceurent la venuë de leurs Capitaines, & que auec eulx leur faillloit voyager, vendirent tous leurs cheuaux, reserué à chascun vn courtault, pour les porter iusques à Sauonne, où là estoient leurs Capitaines, & les autres François dessus nommez. Lesquels tous assemblez monterent sur mer, & voyagerent droit au port de Gennes, où trouuerent l'armée de France & de Gennes preste de tendre voilles.

CHAPITRE XLVI.

*D'une reformation faicte sur les Vauldois du
Daulphiné, & comment un nommé Frere
Laurent Bureau, Confesseur du Roy,
accompagné de plusieurs grands
Clercs, fent iceulx Vauldois
prescher & reformer.*



N CEL VY temps le Roy feut par
aucuns aduertys que en son pays du
Daulphiné estoient grand nombre
d'heretiques, & meismement en la
Vauloysé, dicté la Vaupute, en la Vau
de la Fraisinierre, à Pragela, & en l'Argentiere. Par
quoy enuoya deuers le Sainct Pere, le Pape Ale
xandre sixiesme, duquel obtint Bulles Apostoli
ques pour iceulx Vauldois visiter, & reformer. Les
quels Vauldois, au moyen du bruit de leur erreur,
par aucuns Seigneurs du pays de Daulphiné auoyét
esté parauant occis à martyre, & cruellement tyran
nisez, & les vouloient iceulx Seigneurs deposseder
de leurs terres, & chasser du pays. Donc voulant le
Roy pourueoir à ce, transmeit sur les lieux Frere
Laurent Bureau, son Confesseur, Euesque de Ciste
ron, & Docteur en Theologie, & Messire Thomas
Pascal, Docteur Regent en l'Vniuersité d'Orleans,
& Official du dict lieu, pour eulx enquerir, & be-

1501. songner sur ce. Et iceulx ayans Bulles expressees du Pape, & mandement du Roy, partirent de Lyon sur le Rhosne, le cinquiesme iour de Iuillet, l'an sus dict, & avec eulx par l'ordonnance du Roy feut vn Cheuaucheur d'Elcuyrie, nommé Guy de Villars, pour presenter à Grenoble, à Gap & à Ambrun certaines lettres missiues du Roy. Si s'en allerent iceulx à Grenoble, où là aux Seigneurs de la Cour de Parlement du dict lieu presenta le dict Cheuaucheur les lettres du Roy. Et apres la presentation & reception d'icelles lettres, les deleguez susdicts feurent en la Cour, & là monstrerent leurs Bulles, & mandement, pour auoir, veoir & visiter certains procès faicts des dicts Vauldois pendans en la dicte Cour de Grenoble. Ce qui leur feut octroyé, & feurent portez iceulx procès aux logis des dicts deleguez, à l'enseigne du bœuf, où feurent mis en vn coffre, & bien sceillez, pour là demeurer pendant le temps que les dicts deleguez iroient à Gap, à Ambrun, & sur les lieux sus dicts, pour iceulx procès au retour visiter tout à loisir. Et ce faict, partirent iceulx de Grenoble, & s'en allerent à Gap, où le Cheuaucheur presenta les lettres du Roy à l'Euesque du dict lieu, pour monstrier les procès qui là estoient des dicts Vauldois. Lesquels procès feurent veus & visitez par les sus dicts deleguez. De là s'en allerent à Ambrun, & presenterent leurs lettres à l'Archeuesque. Lequel apres auoir veües les dictes lettres, s'en alla à tout son Clergé au logis d'iceulx deleguez, & là tous ensemble confererent de leur affaire, & ordonne-
rent

rent que le lendemain seroyent visitez les lieux, & 1591.
les Vauldois preschez, & sur leur cas information
faicte par les dictz deleguez. Lesquels s'en allerent
comme auoit esté dict à la Vau de la Fraisinier, &
à la Vau pute, où feurent par eulx examinez & ouïs
plusieurs tesmoings Prebîtres, laboureurs, & mar-
chans, sur la vie d'iceulx Vauldois. Et là apres ce,
Frere Laurent Bureau, principal delegué, lequel
estoit grand Clerc, & bon Prescheur, feit deuant
iceulx Vauldois plusieurs beaux Sermons, & en
leur presence declara tous les articles de la foy Ca-
tholique par ordre. Lesquels Vauldois, hommes &
femmes, & petits enfans, qui pouuoient parler sur
chascun des articles de nostre Foy, dirent plusieurs
fois tous à haulte voix, *Credo, Credo, Credo. Quoy*
plus? En commun & particulier s'enquist iceluy
Prescheur à ceulx Vauldois de leur foy, & creance,
lesquels il trouua fermes en la loy diuine, & croyans
en la foy Catholique. De quoy loüa Dieu deuote-
ment, & s'en retourna avec le dict Official d'Or-
leans, & ses gens à Grenoble, où par subtils moyens
retira les procès des Vauldois du coffre, où auoyent
esté mis, & par le Cheuaucheur les enuoya à Lyon
deuers Messire Guy de Rochefort, Chancelier de
France. Et ce faict, luy, & le dict Official, faignans
aller à l'esbat hors la Ville, veoir la Chartroufe, vui-
derent par le quartier de la Sauoye, & s'en retour-
nerent à Lyon, où par le Chancelier feurent veus les
dictz procès & informations, & les bons rapports
des dictz deleguez ouïs. En maniere que les pauvres

CHAPITRE XLVII.

*Comment le Roy enuoya Maistre George
Cardinal d'Amboise delà les monts,
pour traicter de ses affaires.*



LE ROY voulant de plus pourueoir à
ses affaires, apres auoir par mer & par
terre ses armées acheminées, & le peu-
ple des Vauldois, comme auez oüy, sa-
lutairement faiët visiter, transmeit de là les monts
Maistre George, Cardinal d'Amboise, en qui auoit
parfaiët amour, & singuliere fiance, comme en
celuy qui tous temps à son seruice auoit deüement
plié le dos, & au profit de la chose publique loyale-
ment employé son pouuoir. Auquel delà les monts
donna charge de tous ses affaires, & pouuoir autho-
risé sur iceulx, pour en faire & ordonner comme si
par luy mesme en estoit disposé. Et pour iceluy
Cardinal conduire luy bailla le Roy les deux cent
Gentils-hommes de sa Maison, pour l'accompai-
gner & suiure quelque part qu'il iroit, & faire ce que
par luy leur seroit commandé. Ainsi se meit le dict
Cardinal en voye pour tirer en Lombardie, & tant
aduancea, que en moins de douze iours trauerça
les haults monts de Sauoye, & la terre de Piedmont,
sans vn tout seuliour vouloir sejourner, que premie

ne feust en la Ville de Milan. En laquelle à sa venuë par le Sieur de Chaumont, son nepueu, nommé Messire Charles d'Amboise, Lieutenant du Roy delà les monts, feut avec toute reuerence, & ioyeuse chere, amiablement receüilly, & des Seigneurs & peuple de la dicté Ville tant honorablement receu, que ce feut iusques à y efforcer tout l'exploict de leur grand possible. Pour suiure le propos des choses selon le cours du temps, icy me fault retourner à parler de la gendarmerie ordonnée pour aller au voyage de Naples, laquelle i'ay cy dessus laissée à Parme, à la fin du dict mois de May.

CHAPITRE XLVIII.

De l'armée de France ordonnée pour aller à Naples, & du voyage d'icelle.

DE LA Ville de Parme en Lombardie estoit l'armée de France deslogée dès le premier iour du mois de Iuin, laquelle marchoit en ordre tant asseuré, que bien sembloit estre conduite par chefs experimentez aux armes. Le charroy de l'artillerie & la gent de pied feurent mis deuant. Le Comte de Gayace, avec quatre cent hommes d'armes François faisoit l'auantgarde des gens de cheual. Le Seigneur d'Aubigny, Lieutenant du Roy, avec trois cent hommes d'armes conduisoit la bataille. Et le Duc de Valéinois faisoit l'arriregarde, où estoient

1501. trois cent hommes d'armes. Auec cela estoient en voye grand nombre d'auantcoureurs & descou-
 ureurs de pays. Lors que l'armée marchoit, aux co-
 stez & au derriere de la dicte armée à deux milles
 loing, y auoit deux ou trois cent cheuaulx legers par
 pays, pour rapporter au besoing ce qui pourroit par
 embusches d'ennemis suruenir à la dicte armée. Et
 ainsi se meirent les François à chemin par la Lom-
 bardie. Des repeües & logis qu'ils feirent de Parme
 iusques à Rome feray peu de compte, pource que
 ie n'ay point sceu que ce temps durant aucune cho-
 se de grand effect feust par iceulx François execu-
 tée, si n'est que nonobstant l'empeschement des
 Alpes, & destroiets des chemins de Rome, l'armée
 Françoisise avec soigneuse diligence feut si bien or-
 donnée, & tant à droict mise en marche, que la
 conduite d'icelle donna tiltre d'honneur aux Capi-
 taines, seureté de couraige aux soldats, facilité de
 chemin au charroy, merueilles d'armes aux voyans,
 & crainte de mort aux ennemis. Quoy plus? L'ar-
 mée Françoisise feut de Parme à Pise. Et ainsi que
 l'armée approchoit de Pise à cinq milles pres, grand
 route de Pisains & Lucquois là se trouuerent, les-
 quels moult honnorablement receurent les Fran-
 çois, & iceulx conduirent iusques à deux milles pres
 de Pise, entre Lucques & la dicte Ville de Pise. Là
 sejourna l'armée par deux iours entiers, aux despens
 & frais des Pisains & Lucquois, lesquels de toute
 leur puissance traicterent les dictz François, & sans
 rien y espargner, & iceulx fournirent de viures &

toutes autres choses à eulx nécessaires. Plusieurs Capitaines & Gens d'armes François feurent dedans Pise, & Lucques, & là tant doucement acceüillis, que chascun au departir feit bon rapport du traitement. Aussi debuoiert-ils. Car iceulx Pisains & Lucquois s'efforçoient à l'enuy à qui mieulx festoyerot les dicts François, comme ceulx qui long temps auoit desiroient auoir confederée alliance, pour leur pays tenir en franchise, & qui auoyent contre leurs ennemis en eulx attente de secours. Toutes ces choses acheuées, l'armée de France preint pays, en adressant ses erres vers la Cité de Rome, & tant halsta son train, que de Pise à Rome ne feit de demeure que cinq iournées, sans ce que le charroy de l'artillerie feist destour ou empeschement au demurant de la dicte armée. Et feut faicte celle diligence tant extreme, pour approcher les pays contraires premier que de soldats & viures feussent pourueus, & aussi pour preuenir les ennemis. Qui est vn stratageme de guerre tant aduantageux, que souuent à petite main armée donne pouuoir sur grandes legions, & tant seurement conduit ceulx qui son droict chemin ensuiuent, que de loüable victoire les faict possesseurs. Tout à clair est la chose prouuée par les Romains contre ceulx de Carthage, & Leonidas Duc de Lacedemone contre les Spartains, & par plusieurs autres, dont n'est requis pour le present faire autre mention: mais suiure mon propos, & dire que les François, dont i'ay ores escript, en allant leur voyagé droict à

1501. Rome, passerent par la terre des Vrsins Romains, estans lors du party du Roy, & bons François. Au pays desquels trouuerent le Seigneur Iean Iourdain Vrsin, ayant pour le Roy charge de gens d'armes delà les monts, lequel receut à grand honneur l'armée de France, & moult de seruice feit, & de secours donna aux dicts François, tant de prouisions de viures, que de renfort de gens, & ouuertes de passaiges, & de toutes autres aydes, dont en cestuy pays auoit grand pouuoir, comme celuy qui entre tous ceulx du party des Vrsins auoit puissance autorisée. Et par luy feurent les François aduertis que Messire Fabrice Colonne, avec sept mille Colonnais estoient partis de Rome, pour aller au secours de Dom Frederic contre le Roy, parquoy n'estoit heure de retarder l'entreprise : mais sur ce mettre promptement prouision de remede. De iour en autre auoient les Lieutenans du Roy courriers & nouuelles du vouloir du Roy, qui estoit sur tout de hastier l'armée, & le plus tost que possible seroit. Parquoy ne feirent les François par chemin autre demeure, ains à toute diligence tirerent vers Rome, & tant errerent que vn Vendredy vingt-cinquieme iour du mois de Iuin arriuerent deuant Rome deux milles pres de la ville. Et pour eulx vn peu refraischir, & aduiser sur l'affaire de leur conqueste, & mieulx ordonner de leurs besongnes, voulurent illec arrester le camp, & prendre logis. Plusieurs grands Seigneurs & Citoyens de Rome se trouuerent au deuant de l'armée de France, pour icelle

doulcement receüillir, & amiablement traicter, en 1501.
 offrant au Roy seruice de corps, secours de biens,
 passaige ouuert par leur Cité de Rome, & par leur
 pays adresse de chemin de seureté. Et pour com-
 mencer à monstrier de quoy, grand force de pain,
 vin, chairs fresches, & sallées, foing, paille, & toutes
 autres choses necessaires pour soustenir ost, auoyent
 iceulx Romains, pour la venuë des François faict
 illec charroyer. Ainsi feut deuant Rome l'ost de
 France à sejour par l'espace de trois iours seulement,
 C'est à sçauoir le Vendredy, le Sabmedy, & le Di-
 manche. Ces iours durant, plusieurs gens d'armes
 François & Alemans feurent veoir Rome, visiter
 les saincts lieux, & là chercher ce que besoing leur
 faisoit. Le Duc de Valentinois, avec grosse garnison
 de gens d'armes s'en alla dedans le chasteau Sainct
 Ange; lequel il gardoit pour le Pape. Ce Diman-
 che, entour les deux heures apres midy, grand nom-
 bre de François & Alemans se trouuerent en la pla-
 ce du Camp de Flour, aussi feirent plusieurs Espai-
 gnols, dont à Rome auoit grand nombre. Car le
 Pape Alexandre sixiesme, qui en ce temps posse-
 doit le Sainct siege Apostolique, estoit de la nation
 d'Espagne; lequel en auoit grosse garde, & faict
 grand amas, pour estre le plus fort dedans Rome.
 Sur la dicté place du Camp de Flour commence-
 rent iceulx Espaignols à gronder & murmurer con-
 tre les François, de ce que ils vouloient conquerir
 le Royaume de Naples, disans que au Roy d'Espai-
 gne appartenoit mieulx que au Roy de France. Les

1501. François & Alemans qui estoient fiers comme lyons, dirent que non, & qu'au Roy seul appartenoit le dict Royaume de Naples. Et ainsi s'enaigrist la querelle de plus en plus fort, laquelle les François & Alemans la main sur l'espée souteindrent contre les Espaignols. De cest affaire eurent entre eulx contentieux propos, rudes paroles, & grosses menasses, & tant que de mots de langues à coups de main vint la chose. Et ainsi commença la meslée bien à poinct. Plusieurs mechaniques & ruffiens de Rome se rallierent avec les Espaignols, & sortirent en armes sur les François & Alemans, qui bien les receüillirent à grands coups d'espées & de halebardes. Tous les François qui là estoient par les rues, & en la Ville de Rome, accoururent à ce bruit. Et quand tous feurent assemblez douze cent se trouverent du party de France, & là d'un costé & d'autre feurent plusieurs morts & estendus sur le paué. Vn Espaignol illec se trouua, qui feit merueilles à tout vne raspiere en main, dont il assena tel coup sur le col d'un Aleman du party des François, que la teste luy feit voler par terre. Mais de ce feut payé sur le champ. Car vn autre Aleman luy rua vne halebarde sur la teste de telle force, que iusques à la croisée de l'eschine le fouldroya. Assez d'autres eurent là sanglante iournée, dont autre mention ne feray, pour passer outre. Mais quoy que ce soit, le bruit feut si grand par tout Rome, que iusques aux oreilles du Pape en feurent les nouuelles; lequel pour rappaiser la noise, là transmeit aucuns de ses gens, & le Comte Gayace,

de Gayace, qui lors estoit avec luy, lesquels à toute peine adoulcirent le tumulte, & feirent cesser le debat.

CHAPITRE XLIX.

Comment les Lieutenans du Roy & aucuns Capitaines de l'armée feurent veoir le Pape au Palais de Rome, & d'un banquet que le Cardinal de Saint Seuerin . fait aux dicts Capitaines.



LE PROPRE iour, les Lieutenans du Roy, & plusieurs des Capitaines de l'armée de France feurent veoir le Pape dedans le Palais de Rome; où trouuerent grand nombre de Cardinaulx, & Seigneurs de la Ville. Et là estoit lors le Seigneur de Grandmont, Ambassadeur pour le Roy. Le Pape nonobstant qu'il feust Espagnol, & mauuais François, toutes-fois dissimula son vouloir, & avec ioyeuse chere receut les Capitaines François de l'armée de France, & de plusieurs choses ioyeuses leur teint propos. A Messire Berauld Stuart, Lieutenât general du Roy, donna vn coursier gris, bien puissant, moult viste, & tres-leger à la main, avec les bardes tant riches & belles que chascun en feit merueilles. En diuers pafsetemps illec finit ce iour iusques au soir que le Cardinal de Saint Seuerin, Euesque de Maillelais, & frere du Comte de Gayace, feit aux dicts Capitaines

1501. François vn banquet tant solemnel, que de toutes viandes exquisés & plaisans deduiçts feurent repeus & festoyez. Dedans vn iardin qui estoit au Cardinal Ascaigne feut faict celuy banquet, auquel estoient orangers, citronniers, & grenadiers, & autres arbres fruiçtiers de singuliere estime, & fleurs odorantes de diuerses especes. Et les Chantres, Menestriers, Tragediens, & Comediens, tous par ordre, y exercerent leur mestier. Celuy banquet finy, les François allerent prendre congé du Saint Pere, & dirent adieu à leur hoste. Et ce faict, retournerent au camp, qui encores estoit deuant Rome à sejour. Dés le Vendredy deuant celle nuit conclurent & ordonnerent que le lendemain au matin l'armée deslogeroit pour aller en auant droit à Naples, & que sans autre sejour faire iouxte leur possible continueroient l'œuvre encommencé selon l'entreprise & vouloir du Roy, qui estoit sur tout de hastier la chose à toute diligence.

CHAPITRE L.

Comment l'armée de France partit de deuant Rome pour aller à la conqueste du Royaume de Naples, & comment elle passa par la Ville de Rome, à grand triomphe, & en armes.



E vingt-huictiesme iour du mois de 1501.
Iuin, l'an susdict, & vigile de Saint
Pierre, & Saint Paul, Apostres, de
deuant Rome deslogerent les François,
& au partir meirent pietons & artillerie deuant,
auec le train des sommiers, & charroy du bagaige
de l'armée. Ce qui tenoit de long plus de deux mil-
les de pays. Les gens d'armes en bon ordre & bel
arroy marcherent apres, montez & armez la lance
sur la cuisse, & la teste en l'armet, tous en poinct,
comme pour debuoir combattre. Ainsi passerent
par la Ville de Rome, sonnans trompetes, & clai-
rons, & gros tabours de Suisses, si que tonnerre
n'eust là esté ouï. Dont aucuns Romains, & autres
tenans le party contraire aux François, comme en-
uieux de la gloire d'iceulx, disoient l'un à l'autre, O
que grand honte, vergongne & deshonneur est à
tous les Italiens de laisser ainsi passer à main armée
les François, lesquels pillent nos biens, desfirent nos
femmes, occupent nos Seigneuries, & à toute heure
courent nos pays, & à la fin tendent de tous poincts
nous soubmarcher ! Autres alarmes n'eurent d'i-
ceulx les François, fors regards haineux, enuieuses
paroles, & menasses secretes. Les autres Romains
monstroient chere ioyeuse pour leur venue, loüans
l'heureuse prosperité des François, & leurs recom-
mandables gestes. Deuant le Chasteau de Saint
Ange, aux creneaux d'une basse galerie estoit le
Pape, accompagné de grand nombre de Cardi-
naux, d'Archeuesques, & Euesques, & aussi avec


1501. luy estoit le Duc de Valentinois, & plusieurs Seigneurs de Rome. Et au passaige de l'armée le dict Sainct Pere donna benediction Apostolique & le Iubilé à tous les François & Alemans qui là estoient. Et apres ce l'armée issit de Rome, & adressa vers le Royaume de Naples, en cheminant tousiours le grand pas, sans desordre, & de si bon branle, que par default de conduicte nulle chose demouroit en arriere. Celuy iour les François feurent au logis à quatre milles de Rome, en vne ville nommée Marin, terre des Colonna, lesquels estoient dedans Capoue à grand effort au secours du Roy Don Frederic. Les François au moyen de ce preindrent la dicte ville de Marin sans empeschement. Car dedans n'estoit demeuré homme, ne femme, ne enfant, que tous ne feussent fuyz, reserué vn vieil homme de l'aage de cent ans, qui par default de ne pouoir aller estoit là demeuré. Les François y sejournerent trois iours, & pillerent tout, puis feirent porter ce bon vieillard hors la ville, & meirent le feu dedans. De là tirerent à Bellettri, Ville qui est au Pape, où demurerent deux iours. Et au partir de là preindrent la voye de Rocquesecque, & là feirent les Capitaines ferrer l'armée, & chascun se tenir sur sa garde, & marcher en ordre asseuré. Aussi temps & heure en estoit. Car de là au pas de Sainct Germain, qui est l'entrée du Royaume de Naples, n'auoit que huit milles de pays, qui est vne place forte, & malaisée, & deuant passe vn fleuve nommé le Garillan. Et au dict pas de Sainct Germain pen-

soient les François auoir le combat, & là rencontrer 1501.
leurs ennemis, veu que c'estoit lieu aduantageux,
& la premiere entrée du passaige du pays contraire
là où failloit passer. Pensans aussi que les Neapoli-
tains debuoiert par raison defendre l'entrée de leurs
terres, si gens de cœur & vertueux estoient. Toutes-
fois le firent autrement, comme pourrez ouïr cy
apres. A Rocquesecque feut assis le camp des Fran-
çois, & là demeura iusques au lendemain. La nuit
feut fait bon guet, & escoutes mises sus. Il n'y auoit
nul qui ne pensast à son affaire, & chascun se dispo-
soit pour combattre, comme ceulx qui pensoient le
lendemain rencontrer leurs ennemis aux champs.
Ainsi estoient cheuaulx lors de saison, & harnois
en requeste, dont chascun selon son pouuoir en fai-
soit pourchas aduantageux. A ce logis veindrent
de renfort & en poste le Seigneur de Montpensier,
le Seigneur de Mauleon, le Capitaine Maunourry,
le Prince de Salerne, & grand nombre de Gentils-
hommes de la Maison du Roy, lesquels se voulurent
exploicter à l'exercice de la guerre. De Rocque-
secque prit l'armée de France le chemin droict au
pas de Saint Germain. Et au partir du logis furent
mis auantcoureurs sur les champs pour descouurir
le pays, & obuier aux embusches, lesquels ne trou-
uerent en voye empeschement, ne destour, qui
ennuyer sceut l'armée: laquelle se tenoit tousiours
ferrée, & marchoit moult hierement, & tost. Si que
au dict pas de Saint Germain sans trouuer aucune
resistance feut celuy iour au giste, & à sejour, & là

1501. dedans demeurèrent vn iour les gens d'armes François. De celuy pas de Sainct Germain adressa l'ost de France vers la Ville de Capouë, pour y mettre le siege, laquelle estoit moult forte, & bien aitaillée. Dedans estoient sept mille Colonnais, Romains, & bien six mille autres hommes de guerre, pour icelle deffendre & garder, lesquels à toute heure exploictoient leur pouuoir pour icelle remparer & fortifier. Grand force de bonne artillerie y auoit, & mesmement de celle que le Roy Charles huitiesme auoit laissée à Naples, laquelle feut gaignée par le Roy Frederic sur les François, apres que le dict Roy Charles feut retourné de Naples en France. le mettray ce propos en arriere, pour parler des François, qui estoient ja partis du pas de Sainct Germain pour approcher la Ville de Capouë. Au partir du logis le Sire d'Aubigny, Lieutenant general du Roy, enuoya vn Capitaine, nommé Aubert du Rouffet, avec quatre vingt cheuaux legers, pour descourir & aduiser le pays, lequel ne trouua sur les chemins nulles embusches, ne autre empeschement d'ennemis, qui l'arrestast que le logis ne feist pour l'armée de France dedans vne villette estant à six milles pres de Capouë, où feurent pour ce iour logez les François.

CHAPITRE LI.

Comment Messire Berauld Stuart, Lieutenant du Roy, transmeit deux Heraults d'armes sommer la ville de Capoue de faire obeissance au Roy. Et de la responce de ceulx de Capoue.

ANTOST que les François furent logez, l'heure veint que pour vouloir traiter de la paix avec les Neapolitains & soldats de la ville de Capoue, ou en cas de refus leur annoncer le deffy de la guerre, le Sire d'Aubigny Lieutenant du Roy transmeit deux Heraults d'armes au dict lieu de Capoue, pour sommer les Gouverneurs de la dicte Ville de rendre icelle, & la mettre entre les mains & à l'obeissance du Roy; autrement les aduertir d'auoir en brief le siege deuant leur ville, & entre eulx & les François la guerre ouuerte. Iceulx Heraults tout ainsi que enchargé leur estoit accomplirent leur messaige, & feirent leur sommation comme debuoiert. En remonstrant à ceulx de Capoue le droict que le Roy auoit au Royaume de Naples, le pouuoir des François, les cruels excès qui suruiennent de la guerre, & le danger où ils estoient, si fortune vouloit que par force d'assault feussent pris, & conquestez, & comment si d'aduanture venoit à tant, le glaiue ne par-

1501. donneroit à nul sexe. Plusieurs autres remonstres leur feirent les dicts Heraults, à la sommation & remonstration desquels les Gouverneurs & Potestats avec les soldats & le peuple de la Ville feirent responce que au regard de la ville de Capouë elle estoit au Roy Dom Frederic, & que eulx comme ses subjects, vassaulx, & soldats, contre la puissance de France se mettroient tous en armes, & deffence, pour icelle querelle maintenir, & que à la poursuite de ce ne gaigneroient les François autre chose que la mort. Et aussi que du siege, des assaults, & de tous efforts d'iceulx François n'auoient aucune crainte, ne nulle doubte, & que si bien à point à coups de main & d'artillerie les recueilleroient, qu'ils n'auroient cause d'en faire bon rapport. Et sur ce feirent conclusion de toute responce, disans que autre chose n'auroient pour l'heure presente, si n'est que les dicts Heraults eussent à l'heure à vuidier la place, à peine d'estre mis à mort sur le champ. A celle responce ne repliquerent rien iceulx Heraults, mais s'en retournerent à l'armée de France, & là feirent aux Lieutenans du Roy le rapport de la responce de ceulx de Capouë, & du vouloir qu'ils auoient de la defendre & garder, laquelle estoit forte à l'aduantage, & bien garnie de toutes pieces requises pour attendre long siege, & soustenir diuers assaults. Le rapport d'iceulx Heraults ouy par les Lieutenans du Roy, & Capitaines de l'armée, feut dict & arresté que on iroit mettre le siege deuant Capouë, & que le lendemain septiesme iour du mois de Iuillet, se mettroient

mettroient les François à chemin, & en armes, pour 1501.
mettre sur ce les mains en besongne.

CHAPITRE LII.

*Comment le Duc de Valentinois, avec quatre
cent hommes de pied se rendit en l'armée de
France, & des approches que l'on
feist à Capoue.*

E MESME iour, sixiesme de Iuillet, Iuillet.
le Duc de Valentinois surueint à l'ost
du Roy, & auoit avec luy quatre cent
pietons, tous accoustrez de damas iaul-
ne, & de cramoisy. Et luy estoit vestu
d'un saye myparty de drap d'or, & de veloux cra-
moisy, & aussi auoit autour de luy quatre laquais,
& plusieurs Gentils-hommes, tous vestus & habil-
lez de foye, mypartys de drap d'or, & de veloux
cramoisy, lesquels portoient tous la liurée du Roy.

Le septiesme iour du mois de Iuillet, du dict
lieu deslogerent les François, lesquels ne preindrent
le droict chemin de Capoue, pour ce que deuant la
ville, & entrel'armée du Roy passoit vn gros fleuve,
qui trop eust empesché le train du charroy del'ar-
tillerie, & arresté le passaige des gens de cheual.
Dont tirerent à quartier vers vne Ville nommée
Matalon, qui est du Royaume de Naples à l'un des
Seigneurs Caraphes du dict lieu de Naples, Comte

1501. du dict Matalon. Et là feut deuuant enuoyé vn Capitaine nommé Iacques de Silly, Bailly de Caen, & Maistre de l'Artillerie de France, avec quatre mille Alemans, & quarente hommes d'armes des siens, & vn homme d'armes de la compaignée du Comte de Gayace, nommé Bernard de Mons, lesquels se meirent à chemin, & tant que la dicte Ville approcherent d'vn mille pres. Et de là le Bailly de Caen transmeit celuy Bernard de Mons avec deux archers seulement parler à ceulx qui tenoient le Chasteau de Matalon, & iceulx semondre de le rendre, & bailler les clefs aux gens du Roy. Ainsi s'en alla le dict Bernard de Mons celle part, & feittant que à sa semonce les gardes de la dicte place la rendirent, & icelle meirent entre ses mains. La ville pareillement se rendit au Bailly de Caen, sans coup ferir, & luy avec ses gens se meit dedans. L'armée de France arriua là sur le vespre, où demeura iusques au lendemain au matin, qui feut le huiëtiefme iour du mois de Iuillet, que l'armée deslogea, & preit les champs, pour de plus approcher Capouë. Et tant alla en auant, que dedans le parc de Nole, où est vn beau bois de haulte fustaye, avec grandes prairies, & belles fontaines, à huiët milles de la dicte ville de Capouë feut mettre le camp; lequel feut illec assis huiët iours durant. Et cependant les gens d'armes & cheuaux se rafreschirent, les viures furent charroyez au camp, le conseil tenu sur le mieulx de cest affaire, & pris places, & chasteaux, qui autour de Capouë estoient, pour oster l'ennuy & le

danger des alarmes, qui durant le siege eussent peu 1501.
 estre données aux François. Et entre aultres feut
 renduë par composition la ville d'Auerse, & les
 clefs mises entre les mains des Lieutenans du Roy.
 Du camp feurent apres enuoyez Messire Jacques
 de Silly, Messire François de la Trimouille, Messire
 Jacques de Chabannes, avec trois mille Alemans,
 & quatre cent hommes d'armes, & quelques pieces
 d'artillerie, assieger vne Ville nommée Merillane,
 à quatre milles du camp, laquelle se rendit volon-
 tiers. Mais le chasteau ne se voulut de premiere ve-
 nue rendre, ains attendit à mettre le siege, & asseoir
 l'artillerie. Et voyans que c'estoit à tour parlemen-
 terent, & se rendirent à la volonté des Capitaines
 François, dont leur en mesadueint. Car pour eulx
 estre rebellez, tous les soldats, dont y en auoit deux
 cent, feurent pendus aux creneaux de la place avec
 leurs Capitaines. Et n'en demeura de tous que le
 Capitaine de la diète place, lequel auoit là dedans
 sa femme, belle à merueilles, & elle voyant son
 mary près de l'attache, toute escheuelée, & plaine
 de larmes, se meit aux pieds du Seigneur de Mau-
 leon, qui luy sembloit des plus apparens, & iceluy
 requist tant doucement, que gracieux luy feut ius-
 ques à respiter de mort son mary, qui auoit la hart
 au col, lequel se pouuoit lors vanter de ce que plu-
 sieurs taissent. Là feut entre les autres vn des soldats
 de la placé mis au vent, lequel en le jettant bas ap-
 pella doucement nostre Dame, & de bon cœur à

1501. elle se voüa: Ce nonobstant feut guindé, tellement que vne grosse heure feut branslant à vn creneau, comme s'il feust mort. Si adueint que par miracle la corde dont il estoit attaché s'ellargit au droict du nœud de la gorge, en sorte que la teste passa parmy, & cheut à bas dedans les fossez, & la corde amont demeura attachée, lequel à la cheute se froissa vne cuisse, & se prit à plaindre, pour l'angoisse de son mal. Tant que vn varlet nommé Louys Froisseau, seruiteur d'un Gentil-homme de chez le Roy, nommé Henry de Maunorrey, en pensant ses cheuaux pres d'illec, ouït celuy pauvre soldat là plaindre & crier, dont s'en alla aux dictz fossez, & le trouua gisant à terre tout affollé, lequel le leua à quelque peine, & l'amena à son logis, où feut pensé, & enuoyé à sa maison sain & guairy. Sur ce se peult dire que la corde soubmist l'execution de la rigueur de Iustice à l'obeissance de la pitié, mere de misericorde, qui jamais au besoing n'oublie ceulx qui deuotement la seruent, & iustement la prient.

Le dixseptiesme iour de Iuillet, sur l'aube du iour, deslogerent les François de celuy bois, où auoit esté leur camp, & tirerent droict à Capouie tout le plain pas, & sans desfroy, si que nul d'eulx sortoit de son ordre: mais alloit chascun en marche bien arragée, sans que vn tout seul se meist à l'escart, reseruez les auâtcoureurs, & ceux qui estoient ordonnez pour descouvrir le pays. Tât marcherēt les François, que sur le point de dix heures au matin, à quatre

milles pres de Capouë feurent à la repeüe , & là feut aduisé que le camp sejourneroit pour le iour au dict lieu , & que cependant coureurs seroyent enuoyez deuant Capouë , pour veoir la maniere & congnoistre la puissance des soldats qui dedans estoient , & aussi pour aduiser les seures entrées , & lieux plus aduantaigeux & propices pour y mettre le siege. Et pource faire feurent ordonnez le Duc de Valentinois , le Seigneur d'Alegre , & quelques autres Capitaines , bons Canonniers , & vicux routiers de guerre , lesquels avec quatre cent hommes d'armes , & trois mille pietons partirent du camp , & deuant Capouë adresserent leur cours. Tantost qu'ils feurent aux champs , & que deux milles de pays eurent marché , six cent Colonneis , qui ce iour en armes estoient saillis de Capouë , leur feurent en barbe , tous en bon ordre , bien armez , & montez à l'aduantaige , tenans assureé maintien , & hardie contenance. Mais pour ce ne demeura que les François ne les approchassent de tant que ce feut aux lances baïsser , & à donner dedans. Le Duc de Valentinois se trouua des premiers à la charge , qui moult enhardit ses gens , en leur disant Seigneurs François le dire est commun que à vostre premiere pointe nulle puissance resiste. Monstrez donc à ceste premiere rencontre la vertu de vos cœurs , & la force de vos bras , tant que la loüable reputation de vos efforts donne à vous augmentation d'honneur , & à vos ennemis craintif esbahissement. A chef de ces paroles , les François se meslerent avec les Colonneis , lesquels

1501. vigoureusement se defendirent, & tant que pour attendre le choc teindrent pied ferme, dont plusieurs allerent par terre, qui depuis sains ne se releuerent. Apres assez long combat iceulx Colonnois doubterent de recharge, & des gens de pied, parquoy reculerent, & se meirent à la fuite. Les François leur donnerent la chasse, & les menerent batrans iusques dedans leurs barrieres, où feurent receuillis par ceulx de la ville, qui là se trouuerent en grand nombre : Apres la retraicte d'iceulx Colonnois le Duc de Valentinois voulut sommer les Capitaines, & soldats de la ville de Capouë de la rendre, & icelle mettre en l'obeissance du Roy : lesquels ne voulurent escouter, ne ouïr sa sémence : mais l'outraigerent de paroles injurieuses, & de langaige haineux, en l'appellant fils de putain, & marrane, en luy faisant de grosses menasses. Lequel de tout ce ne feit semblant. Mais quand il veid que pour l'heure autre chose ne leur pouuoit faire, luy & le Seigneur d'Alegre, & aucuns bons Canonniers & sages Capitaines de guerre, se preindrent à regarder la ville, & icelle tournoyer & environner, pour aduiser les lieux propices pour asseoir le siege, faire les tranchées, atiltrer l'artillerie, battre les murailles, & donner l'assault, si à tant venoit. Et tout ce mis en aduis, le Duc de Valentinois, & le Seigneur d'Alegre, avec leurs gens se retirerent au camp. Et là rapporterent tout ce que ils auoyent peu veoir, aduiser, & congnoistre deuant la ville de Capouë, tant de la force d'icelle, que de l'aduantaige du siege. Parquoy

feut appointé, & dict que le lendemain bien matin 1501.
l'armée marcheroit, pour aller assieger la dicté ville
de Capouë. La nuit tira oultre, & le iour esclaireist,
les trompettes & tabours sonnerent, & l'artillerie &
les gens d'armes feurent mis à voye. Et ainsi s'en alla
l'armée de France droict à Capouë, pour y mettre
le siege. Celuy iour dix-huictiesme de Iuillet, ainsi
que l'armée marchoit, pour approcher la dicté vil-
le, à vn mille pres d'icelle, feurent aux champs qua-
tre cent coureurs Neapolitains, lesquels estoient al-
lez brusler tous les logis des enuirs, & ja auoient
mise à feu vne Abbaye, & vn Hermitaige assez
pres de la ville, avec toutes les loges, & maisons, à
deux milles pres. Et ce auoyent faict, afin que les
François ne trouuassent là logis à couuert, ne de
quoy en sçauoir faire.

CHAPITRE LIII.

*Comment les François assiegerent la ville de
Capouë, & des escarmouches qui là
feurent faictes, & de la batterie &
des assauts qui là feurent
donnez.*

1501.



PRES que les gens d'armes François feurent acheminez, comme j'ay dict, le Comte de Gayace, qui estoit chef de l'auantgarde, où estoient quatre cent hommes d'armes, à deux milles pres de Capouë rencontra les coureurs, dont j'ay parlé cy dessus. Et voyant iceulx faire empeschement sur le chemin, pour adresser à eulx sortit de la bataille avec trente hommes d'armes, qui de plusieurs compaignées estoient issus pour escarmoucher, & aussi avec douze hommes d'armes des siens, desquels estoit le Seigneur de Grigny, son Lieutenant, Pierre de la Riuiere, dict Puyberland, Jean du Courret, Colin de Bourdelays, Philippes Pouureau, le Monteil, Raquebidal, & cinq autres des siens, lesquels chargerent sur les dictz coureurs Neapolitains, desquels la pluspart estoit infanterie, & commune de pays. Quoy que ce soit, tant rudement feurent pourmenez, que plus de la moiectié d'iceulx feurent jonchez par les chemins, morts, & affollez. Ainsi commençoit Mars le cruel à ouurir sa sanglante boucherie. Quoy plus? Qui feut mort si feut mort, & qui peut fuir meit jambes à exploict droict à Capouë. Mais par les François feurent suivis le glaiue au dos iusques dedans les barrieres de la ville, où feurent receuillis des soldats Neapolitains, qui là estoient en armes à grand puissance. Les coureurs François estoient entrez dedans les barrieres avec ceulx auxquels ils donnoient la chasse, & ja auoient commencé bonne escarmouche avec les Neapolitains, lesquels

lesquels à tour de bras donnoient sur eux. Le Comte de Gayace entre autres se monstra bien à cest affaire. Car à tous heurts se trouuoit aux coups departir, & à tout besoing mettoit droictement les gens en besongne, & bien à poinct les rallioit. Durant ce bruit grand foule de François surueint au renfort du Comte de Gayace, & des siens, & besoing en estoit. Car contre vn François estoient plusieurs Neapolitains. Entre les bouleuarts de la ville & les barrieres feut l'escarmouche dure & sanglante, & à la fois les Neapolitains estoient chassez par les François iusques en contre leurs bouleuarts, & puis les François estoient reboutez à puissance de gens, & coups d'artillerie, iusques aux barrieres. D'un & d'autre party feurent blesez & occis plusieurs. Entre autres vn homme d'armes François de ceulx du Seigneur de Saint Prest, lequel à ceste charge feut tué d'un coup d'artillerie encontre les barrieres. Grande feut la noise. Car de plus en plus fort se renforçoit le bruit. Les François de l'auantgarde à grosses bandes se meirent dedans les barrieres pour soustenir le faix des lassez. Les garnisons de la ville pareillement sortoient à la file pour secourir leurs compaignons. Là veissiez rüer gés & cheuaulx par terre, esclater bourdons & lances, rebondir espées, & pertuisanes sur le harnois, peter artillerie de la ville, faire courses, charger & recharger, bref à la rigueur executer la guerre. Et dura la dicté escarmouche bien trois heures, & ce pendant les gens d'armes François s'assemblerent. Le camp se logeoit, & l'artillerie feut approchée, &

A a

1501. à sa venue pour departir les escarmoucheurs quatre gros faulcons feurent mis en place, & deschargez sur les Neapolitains, qui estoient entre les barrieres, & la ville, & si à droict donné dedans, que sur la place feurent plusieurs estendus, & à grand haste les autres se retirerent dedans la place. Du nombre de ceulx qui là feurent morts n'ay sçeu autre chose, si n'est que d'un costé & d'autre y eut grand perte de gens, & plusieurs bons cheuaux feurent tuez & blesez. Apres celle escarmouche, & la retraicte faicte, les soldats du Roy Frederic ne sortirent plus pour ce iour, mais se teindrent tout cois dedans la ville, dont chascun des François, ainsi que ordonné feut, preit son logis. L'artillerie & les gens de pied eurent lieux assignez encontre les barrieres, & tant pres de la ville, que vn archer eut peu tirer vne fleche de trouffe iusques au dedans des murailles. Les hommes d'armes & archers feurent logez pres de l'artillerie & des pietons à vn icst d'arc, ou enuiron? l'auantgarde d'un costé de la ville, la bataille de l'autre, & l'arrieregarde de l'autre: en maniere comme pour vouloir enuironner la dicte ville. D'un costé & d'autre estoit vn fleuve nommé le Vulture entre la ville, & le siege, par où se pouuoient retirer ceulx de Capoue, ou faire saillies & courses à la campagne, sans sçauoir toutesfois faire ennuy au siege des François. Ce costé feut assiegé à temps, & d'heure, comme ie diray cy apres. Le Duc de Valentinois, & le Comte de Gayace trouuerent là pres deux petites maison-

nettes eschappées à la flamme des boute-feux de 1501. Capoue, & là dedans se meirent iceulx à couuert. Celle nuit les pionniers meirent la main à l'œuure tant à point, que deuant le iour les tranchées feurent faictes, & l'artillerie assise, chargée, & toute preste à ruer coups.

Le lendemain, dix-neufiesme iour du mois de Iuillet. Iuillet, entre les quatre à cinq heures du matin, commença l'artillerie à tonner & bruire deuant & dedans la ville de Capoue, tant horriblement, qu'il s'ébloit à ceulx qui là estoient que tout autour d'eulx terre tremblast. Ceulx de dedans tiroient coups sans cesser, & si à droict, que homme François n'osoit l'œil descourir, sans estre tout assuré d'estre atteinct ou de bond ou de volée. Car tant estoient iceulx Canoniers iustes, & si bone artillerie auoient, que nuls de leurs coups alloiét en vain: mais rencontroiét tousiours gés, ou cheuaulx. Et ainsi ennuyoiét par trop l'ost des François à coups d'artillerie, & de traiçt, que le plus souuent tiroient de deux bouleuarts, lesquels estoient vis à vis du siege, & percez d'un & d'autre costé, pour tirer à toutes mains. Les Canonniers François voyans le dommaige & ennuy que par iceulx bouleuarts se faisoit à nos gens, adresserēt là coups forcenez tant & si menu que à l'attaindre tout alloit par terre. Si que nul des ennemis oloit garder son repaire, ne soy móstrer aux creneaux, ne les Canonniers Neapolitains tirer deux coups ensuiuant par vne mesme passée, que tout à l'heure ne feussent fouldroyez. Car tant iustement tiroient nos

1501. Canonniers, que bien souuent & le plus de fois par le passaige où tiroient ceulx du dedās, par le mesme donnoient sans faillir à rencontrer la bouche de leur artillerie, tant que plusieurs de leurs pieces feurent rompues, & brisées, & eulx morts & ruez par terre. Quoy plus? Ce bruiēt diabolique dura quatre iours sans cesser, tel que oncques mais n'auoient les Neapolitains veu batterie pareille. Et de vray, d'autant que cestuy siege eut de durée, la guerre y feut des deux partis chauldement & à tous efforts demenée. Car pendāt six iours entiers que le siege feut là, toute l'artillerie feut mise à exploiēt, & ne feut iour ce nonobstant que saillies, courses, & escarmouches ne se feissent deuant la place. Bonne gent de guerre, & exercitée aux armes se monstrerent lors ceulx de dedans. Car si dix vingt trente cent ou mille François à pied ou à cheual entroient dedans les barrieres pour escarmoucher, en pareil nombre & mesme arroy se trouuoient en place les soldats de la ville, & les vns contre les autres faisoient merueilles d'armes. Et tant, que premier que depart se feist le lieu où le combat se faisoit estoit tout semé de morts. Bref nul mettoit en espargne ce que le pouuoir sçauoit faire: Car chascun à cest affaire enuioit le bon bruit, & s'efforçoit de l'acquérir. Le Seigneur de Montpensier, lequel estoit ieune, hardy, & bien adroiēt, là se trouuoit à tous heurts, à la fois à cheual, à la fois à pied, & là feut dure guerre aux Neapolitains, comme à ceulx sur lesquels il vouloit par armes venger la mort de son pere, que par poison auoient traistreu-

fement faißt mourir: dont plusieurs d'iceulx sous 1501.
 le bransle de sa main passerent par la pointe du
 glaive. Vn Capitaine de gens de pied nommé Mal-
 herbe, avec grand nombre d'adventuriers se trouva
 souventes fois sur les rangs entre les dictes barrieres:
 aussi feirent plusieurs autres. Et tant que mortel
 chappis se faisoit deuant la ville de Capouë, laquel-
 le feut battüe, & guerroyée par les François sans se-
 jour, dés le Lundy dix-neufiesme jour du mois de
 Iuillet iusques au Vendredy ensuiuant sur les trois
 heures apres midy, que les deux bouleuarts dont
 i'ay cy dessus escript, feurent abatus & aterrez. Et à
 celle heure Messire Berault Stuart, qui estoit de-
 meuré malade à Auerse, vint au siege, & feut veoir
 les Canonniers, & la batterie, & donna cent escus
 aux dicts Canonniers, pour leur donner vouloir
 de bien faire, lesquels feirent grande rupture au
 milieu au trauers des dicts bouleuarts, & tant qu'il
 feut dict & arresté que l'assault se donneroit. Et
 pour ce faire feurent ordonnez le Seigneur de
 Mauleon, Iacques de Silly, Bailly de Caen, &
 plusieurs autres Capitaines, avec cent hommes
 d'armes à pied, & trois mille pietons. Ainsi feu-
 rent les gens d'armes apprestez pour donner de-
 dans l'assault sonna, & chascun approcha la breche
 des bouleuarts, & là commencerent à donner l'as-
 fault moult aigre & dur. Car de premiere aduenüe
 les hommes d'armes dresserent leurs eschelles, &
 monterent sus, & par force. Le Seigneur de Mont-
 pensier monta si hardiment, que avec les mains

1501. s'attacha à vn endroiect du rempart, & l'espée au poing combatit main à main avec ses ennemis, & receut plusieurs coups de picques, & de hallebardes, sans jamais lascher la prise: & tant que des premiers feut au dedans du dict bouleuart. Le Capitaine Malherbe feut là blessé d'un coup de traict en la cuisse, tellement que l'os luy feut mis en pieces, dont feut emporté malade en sa tente. Les autres pietons renforcerent l'assault, & entrerent par les breches & passaiges que auoient faicts les coups de l'artillerie de France. Mais en ce faisant les gardes des bouleuarts voyans que à ceste desfortune bransloit leur mortel danger, pour obuier à ce iouxte leur possible meirent au deuant tous efforts à coups d'artillerie, & de traict, avec grands poux de lances, & coups de haches, & jects de grosses pierres, de quoy tüerent prou de gens, & entre autres vn Cheualier Escossois nommé Messire Bides Afflich. Toutesfois à la parfin feurent emportez d'assault iceulx bouleuarts, & deux cent hommes de guerre trouuez dedans, lesquels feurent tous mis à l'espée, sans ce que vn tout seul de eulx feust respité de mort. A l'heure que l'assault se donnoit, le Duc de Valentinois & le Comte de Gayace voyans que ceulx de la Ville entendoient à ceste besongne, & pour ce estoient bien empeschez, preindrent quatre cent hommes d'armes, & grand nombre d'aduenturiers François, qui là estoient, & se meirent à passer la riuere, qui estoit entre l'armée & la Ville, & icelle riuere passerent en bateaux. Et trauer sans la dicte

riuiere, force coups d'artillerie leur feurent enuoyez 1501.
de la Ville, dont plusieurs feurent bleffez & tuez,
routesfois passerent outre, & là preindrent logis.
Tantost qu'ils eurent gaigné place, à leur renfort
veindrent quatre cent hommes Vrsins Romains,
lesquels conduisoit le Seigneur Iean Iourdain. Et au
deuant de eulx feurent le Duc de Valentinois, & le
Comte de Gayace, pour les receuillir & conduire
où mestier estoit. Lors qu'ils feurent arriuez, l'un
des costez de la Ville delà la riuiere eurent à garder,
& leur feurent baillez deux mille François aduentu-
riers pour les secourir à ce besoing. Et les dictz qua-
tre cent hommes d'armes François qui estoient
passez outre la dicté riuiere, assiegerent la Ville
d'une autre part. Et alors feurent les Neapolitains.
enclos de tous costez, & la Ville tout autour enui-
ronnée de François & de Romains. Ce propre iour
aussi, sur l'heure de vespres, le Seigneur de la Palisse
feut au siege, lequel y alla en poste, avec plusieurs
autres Gentils-hommes de France.

CHAPITRE LIV.

*Comment la ville de Capoue feut prise d'as-
sault par les François, destruite & pillée,
& les soldats qui estoient dedans
mis à sang, avec grand nom-
bre de peuple.*



PRES la prise des bouleuarts, dont i'ay faiët mention cy dessus, grande compaignée de François se logerent dedans. Et celle nuiët, sur le poinët de l'heure de minuiët, toute l'artillerie du Roy qui là estoit feut chariée, atiltrée & assise sur le bord des fossez de la Ville, & là chargée, tauldissée, & mise à point pour besongner, laquelle si tost que iour esclaircist commença à tonner & tempester par tel effort que tout autour sembloit que fouldre & oraige deussent fendre les elemens, & subuertir la terre. Tant de traiët & de pierres d'artillerie venoient de la Ville contre les François, que nuls d'iceulx osoient desemparer les tranchées, & si tost qu'ils se descouuroient sans faillir estoient rencontrez. Car les Canonniers de la Ville estoient tant experts à leur mestier, que rien que veoir eussent peu n'eschappoit à leurs coups. Et ainsi donnoient merueilleux ennuy & dommaige irreparable à l'ost François: & eussent de plus si les Canonniers du Roy qui là estoient n'eussent rabatu leurs coups. Ce qu'ils feirent. Car en moins de six heures tant menu & si à droiët deschargerent contre la muraille de la Ville, que plus de demy ject d'arc de long n'y eust tour, repaire, deffense, ne creneau qui ne feussent mis à bas, Canonniers & artillerie ruez jus, & plus de vingt toises de muraille aterrée tout à ras. A la cheute des murs, qui estoient haults & espais, les fossez feurent comblez & emplis. Tellement que tant que la breche contenoit de long, gens

gens à pied & à cheual au besoing & sans autre destour y eussent peu passer. Les soldats & le peuple de la Ville veirent que c'estoit à tout, & que les François auoient entrée sur eulx, & vouloir delibéré de y exploicter leur pouuoir, dont amollirent leur fureur, & eurent doubte sur leur affaire. Car ja deuant par effect aux courses & assaults auoient congneu la force & volonté d'iceulx, qui contre eulx estoient mortellement animez, & aduantageux aux armes. Toutesfois pour vouloir monstrier que à grand besoing cœur viril doit deslier vertu, & en necessité vrgente fortifier son pouuoir, au danger de fortune soubmeirent leur affaire, & tous ensemble l'arrangerent en armes & bel arroy deuant la breche de la muraille par le dedans. Et là teindrent pied ferme. Les Seigneurs & Marchans de la Ville, qui plus auoient à perdre doubterent du malheur, & voyans leur muraille rompüe, leurs soldats affoiblis, leurs ennemis bransler pour leur donner l'assault, & leur vie en dangereux hazard, voulurent parlementer, & demander d'estre oüis. Audience leur feut donnée par les Lieutenans du Roy, & leur parlement oüy, par lequel vouloient rendre la Ville au Roy. Et pour les frais & mises de l'armée, & la despenſe de la poudre de l'artillerie, qui là auoit esté gastée durant le ſiege, trente mille ducats vouloient iceulx donner, requerans en ce faisant que leur ville avec leurs corps & biens feussent saufs & garantis. Ainsi demanderent les Capouïans composition. Mais pour garder que durant le dict parlement les

1501. gens de pied François ne feissent effort pour entrer tousiours tiroit leur artillerie cōtre l'armée de France. Dedans la composition n'estoient compris les Colunnois, qui de ce ne feurent pas bien contents, & si de la Ville eussent peu lors saillir leurs vies sauues, volontiers eussent pris ce party : mais loisir n'eurent de ce faire. Car nonobstant le dict parlement, & aussi que durant iceluy l'artillerie de la Ville tiroit sur les François, l'assault comme ie diray cy dessous feut donné, voire sanglant, & luctueux. Car à grand nombre, & bien deliberez estoient là les François, enuieux de combatre, & soigneux de gaigner sçachans que la dicte Ville de Capoue estoit garnie de bons soldats, & remplie de richesses. Car de tout le Royaume de Naples & de Rome estoient là venus gens d'armes à puissance, pour defendre la Ville, & aussi tous les nobles & riches marchans des villes & villaiges des enuirs se-
 estoient là dedans retirez ; & avec eulx apporté leurs thresors, & cheuances, croyans estre en celieu asseurez contre le pouuoir de tout le monde, dont leur en adueint ce que oüir pourrez cy dessous. Apres que la muraille feut rasée, & breschée suffisamment pour donner l'assault, les Lieutenāns du Roy firent sonner force trompetes, clairons & gros tabours de Suisses, pour resueiller l'armée : & aussi firent mettre pipes & tonneaulx de vin sur le cul, & là boire gens d'armes à desfroy. Et ce faict, pour donner cœur à chascun, les Lieutenans du Roy, & Capitaines de son armée enhorterēt leurs gēs de bien faire,

& de monſtrer à celuy grand beſoing aux ennemis 1501.
que la force de France peut dompter l'orgueil d'Italie. Ainſi chaſcun chef de guerre donnoit aux ſiens ſemonce de vertueuſe mēt ouurer, & vouloir d'honneur acquerir. Meſſire Beraud Stuart, Lieutenant general du Roy, voyant que en ceſt affaire branſloit l'augmentation du pris des François, ou le rabais de leur bonne reputation, pour euertuer leurs cœurs, & affermir le vouloir des oyans, dit ce qui ſ'enſuit. L'heure eſt venüe que au ſeruice du Roy, à l'accroissement de noſtre gloire, & pour la ſeureté de nos vies nous fault eſprouuer la force de nos corps, & la valeur de nos couraiges. Meſſeigneurs, & Amys, Ayons memoire que le nom redoubté des François a iadis faiët trembler toutes les nations du monde. En enſuiuant doncques leurs faiëts cheualeux, & en adjouſtant aux noſtres nouueaux tiltres de florissante renommée, monſtrons nous par effect vrais imitateurs de leurs biensfaïës. Et pour commencer mettons à ceſte beſongne le tout de noſtre pouuoir en auant, & ſoyons aſſeurez que ſi à ceſte fois nous ſommes vainqueurs, nos ennemis au demeurant de noſtre guerre n'auront vouloir de nous plus combatre, ne pouuoir de nous reſiſter. Sus doncques que chaſcun de nous mette la main à l'œuure, par telle condition que le peril où nous ſommes, ne la gloire que nous eſperons à ce ſeulement ne nous excitent, mais la ſeule vertu, qui par nuls aſſaults d'aduerſité ne peult eſtre affoiblie, ne pour aucuns efforts de fortune vaincüe. A ſin de

1501. ces paroles feurent les François engrossis de courage vertueux, & rasfermis en propos constant, pour à temps marcher, & demeurer pied ferme au milieu des terribles aduantures de la guerre, & là viure & mourir, pour soustenir le droict de la querelle du Roy. Que diray-je plus? si c'est que les François estoient prests de donner l'assault, & les Neapolitains deliberez de le defendre, & tous arrangez autour du passaige en armes, & à grand nombre, voire tel que assez puissans sembloient estre pour faillir aux champs, & donner la bataille aux François. Car autant ou plus d'hommes armez estoient dedans que dehors. Et ainsi attendirent l'assault, lequel fut donné sur les onze heures du matin, le vingt-cin-

Tuillet. quiesme iour du mois de Iuillet, & commencé par les gens de pied, qui de premiere venue planterent leurs estendarts joignant la breche. Et là main à main commença le combat des deux partis, tel que c'estoit chose estrange à regarder, & dangereuse à assister. Car autour où estoit ce bruit en l'air n'apparoissoient que traicts, & dards, coups, feu & fumée d'artillerie, par terre trancher testes, & mains: dedans la ville trebucher gens morts, & affollez, ruer coups de lances, picques, & hallebardes, & faire tout le sanglant pis que guerre pourroit. Moulr rudement feut donné cest assault, mais tant vigoureulement defendu, que en moins de demie heure plus de deux cent Alemans & François feurent estendus deuant le passaige. Et est à penser que en ce faisant, ceulx de Dom Frederic eurent portion des coups

& partie au dommaige. Car deçà & delà sonnoit le 1501.

Dieu des batailles, tellement que nul repos feut là donné aux hommes, mais continuel eltrif, lequel n'eust esté aduantageux pour les François, si les hommes d'armes de leur party ne leur feussent venus à renfort, lesquels tous à pied & legerement armez, se meirent au trauers de la presse pour supporter les lassez. A leur venüe recommencea le chaplis plus aigre que deuant, & tel que deux heures durant n'y eut autre mestier que espandre sang humain au tranchant de l'espée, & à la pointe de la lance. Et à ce monstrent les Capitaines & Lieutenans & autres François plus estimez la valeur de leurs personnes, sans rien y espargner. Les Neapolitains & Colonnois sousteindrent leur querelle iusques à y respandre maintes gouttes de sueur, & grande effusion de sang. Et tant feurent à la parfin oultrez par la force des François, que ils ne sceurent à quel remede auoir recours sinon à la fuite. Ainsi commencerent à reculer, & les François à gagner la breche, & les vngs & les autres à escheller la muraille. Les Colonnois Romains, lesquels auoient leurs cheuaux en la ville, se retirerent de là pour eulx cuider sauuer, & sortir par les faulses poternes de la ville: lesquels à l'issuë feurent prins & tuez par les Vrsins, & les François, qui gardoient ce quartier. Les aucuns d'eulx gaagnerent la campagne, & se meirent sur le chemin de Naples, desquels estoit Messire Fabrice Colonne, Capitaine des Colonnois, lequel avec tous ses gens feut pris sur les chemins par

1501. les gésd'armes du Seigneur de Mauleon, qui estoïent
 duguet, & en embusche sur le passaige de la voye
 de Naples. Et iceluy prirent troishommes d'armes
 nommez le Cheualier de la Mondie, Louisset, & vn
 autre appelé Chardonnet, ausquels il promeit sept
 cent ducats, & apres la prise de Capouë amenerent
 le'diët Messire Fabrice avec grande compaignée
 d'autres prisonniers dedans la diët ville de Ca-
 pouë. Pour reuenir à l'assault, ie dis que deuant la
 fuite & prise des Colonois que ceulx de Capouë
 sousteindrent le fais del'assault tant qu'ils le peurent
 supporter : mais quand plus ne peurent, aucuns
 d'eux abandonnerent la place où il y auoit bresche,
 & les autres teindrent pied ferme. Toutesfois les
 François emporterent la ville d'assault, & entrèrent
 dedans, avec bruit tumultueux, occision de peuple,
 & effusion de sang. Les gens de pied, qui des pre-
 miers entrèrent comme les plus legerement armez,
 meirent à sac tous ceulx que deuant eulx trouuerent
 par les rües en armes, & mussiez par les maisons, sans
 pardonner à nul de quelque estat qu'il feust, & tant
 que le long des rües à grands ruisseaux couroit le
 sâg des morts. Je ne veulx declarer les piteux plaints
 & cris lamentables des femmes desolées, & des pe-
 tits enfans, qui deuant eulx voyoient meurtrir leurs
 maris & leurs peres, & occire leurs parens, & amis,
 piller leurs biens, & destruire leur Cité; mais diray
 que avec la tuerie des hommes feurent maintes fil-
 les & femmes violées, & forcées: ce qui est le comble
 du pis de tous les excez de la guerre. Les gens de pied

de la bande du Duc de Valentinois s'en acquiterent tellement, que trente des plus belles de la ville emmenerent prisonnières à Rome. Durant ce conflict, vne Dame de la ville, se voyant pourfuiue & pressée des laquais qui par force la vouloient prendre, s'enfuit dedans vne haulte chambre de sa maison, & là du hault en bas d'une fenestre se jetta dans la rue: mieulx voulant mourir de telle mort, que de ses ennemis estre mise à honte. Je n'en diray plus, sinon que les maisons feurent brisées, les portes rompües de toutes parts, & tous les trefors pris, & butinez, à qui en peut auoir. Si que plusieurs François & Alemans qui là estoient en feurent enrichis à iamais. Car tant de biens y auoit que chascun en peut auoir bonne part. Ce qui de là en auant les meit en appetit de combattre. La boucherie des morts feut là si sanglante, que il y en eut d'assommez de sept à huit mille. Le rémanant des hommes, & des femmes, & les gens d'Eglise s'en fuirent les vns sur les voultres des monstiers, & par les clochers & tours des Eglises, les autres se mussèrent dans les caues, roches, & cisternes, & par les lieux où ils se pensoient mieulx garantir, lesquels feurent le lendemain cherchez, & trouuez, & tous mis à rançon. Dedans la dicte ville feurent aussi trouuées dix-huit pieces de bonne artillerie, que le Roy Charles huitiesme auoit laissées à Naples, comme j'ay dict cy dessus. Tout ce fait, comme ouïy auez, chascun des François prist logis pour se reposer: car temps en estoit. Les vns serrent leur butin, les autres composerent avec leurs

1501. prisonniers, les autres feirent enterrer leurs amis, & les autres penserent leurs playes. Somme qu'il n'y eust nul qui n'eust l'œuil à ses besongnes, selon ce que mieux luy sembloit. Messire Fabrice Colonne, qui lors estoit prisonnier entre les mains de ses ennemis, estoit espris de courroux, & à bonne cause, veu la domination & l'estat Seigneurial auquel peu de iours deuant s'estoit trouué, congnoissant lors son honneur abaissé, & son pouuoir aneanty. Toutesfois tellement en adueint, que le Seigneur de Mautleón le retira des mains de ceulx qui prisonnier le tenoient, moyennant douze cent ducats qu'il leur bailla, & si n'y perdit rien au marché. Car pour la rançon dudit Fabrice en eut quatorze mille ducats, dont cestuy Fabrice Romain se trouua moult empesché, & necessiteux, pource que deuant & durant le siege de Capoue il auoit faict grande aduance pour le Roy Dom Frederic au payement de ses soldats. Ce qui luy est ores & tousiours sera de reste, & à bon droit. Car à ses despens de gayeté de cœur, sans propos raisonnable, iuste querelle, ne à ce faire estre obligé, se voulut entremectre de l'affaire d'autrui. Le Seigneur Iean Iourdain, Capitaine des Vrsins, qui lors estoit ennemy de ce dict Fabrice, voyant que pour sa deliurance argent ne pouuoit finer, & que en arriere de payement du tout se trouuoit, luy dit Seigneur Fabrice, pour ce que aux vaincus pitié se doit offrir, & aux affligez donner rafraichissement, je toutesfois ton ennemy, te voyant estre captif entre les mains de tes aduersaires, & des-
nué

nué d'argent, pour moyéner ta deliurance, affin que tu prennes congnoissance que je veulx vsfer enuers toy plus d'humanité que de vengeance, je supplie-
 ray ceulx qui te detiennent prisonnier qu'ils te
 veuillent doucement traicter, & feray pour toy
 l'aduanee de ce qui reste pour le payement de ta
 rançon. Or aduises donc si tu veux accepter l'offre
 qui par moy t'est présentée. A ces paroles feit re-
 sponse Messire Fabrice Colonne, disant tels mots
 au Seigneur Iean Iourdain, Du moyen de la priere
 de tes paroles pour mon bon traictement ne de
 l'ayde du prest de ton argent pour ma deliurance
 n'ay que besongner, Seigneur Iean Iourdain. Car
 quant au premier point, les François qui prisonnier
 me tiennent ne sont coustumiers de mal traicter
 ceulx qui sous leur main tiennent prison. Au sur-
 plus j'ay encores à Rome vaisselle d'argent, & meu-
 bles assez pour suffire au payement de ma rançon.
 Pour ce je m'essayeray pour ceste fois de non estre
 tenu à toy en rien, & sçaches en outre que pour le
 malheur de ceste mienne defortune, ja pourtant ne
 fera mon vouloir rabaissé, mon couraige amolly,
 ny mon esperance perdue. Ainsi parla en homme
 de grand cœur le dict Messire Fabrice Colonne. Et
 transmeit à Rome vendre & engager de sa vaisselle
 d'argent & ce qu'il auoit iusques à la somme de ce
 que montoit le taux de sa rançon; laquelle paya au
 Seigneur de Mauleon, qui l'auoit entre ses mains.
 Le Roy, qui estoit à Lyon sur le Rhosne, eut la poste
 le penultiesme jour du mois de Iuillet, & lettres du

Cc

1501. Seigneur d'Aubigny, & de ses autres Lieutenans en la guerre de Naples, dont feut acertené du vray de la prise de Capoue, & de la deffaicte des Colonnais. Desquelles nouuelles feut moult joyculx, & feit icelles publier par tout: & au moyen de cefcit dedans la dicte ville de Lyon faire les feux de joye, & le lendemain feut'oïr la Messe en grande deuotion, & feut en voyage à nostre Dame de Confort, dedans la dicte ville de Lyon, & là tres-humblement regracier Dieu, & nostre Dame de la bonne victoire que contre ses ennemis auoit obtenüe. Dedans la ville de Capoue, apres la prise d'icelle, reposerent les François deux iours seulement. Et ce pendant entre les Capitaines feut tenu conseil sur le surplus de leur affaire, & propos debatufur ce que aucuns feurent d'aduis que la ville de Capoue debuioit estre brulée, & du tout estre mise en ruine, comme celle qui de tout temps estoit ennemie des François, & qui maintesfois auoit iceulx destrouffez, & à eulx empesché le passaige de Naples, & que par ses embulches & efforts & aussi pour icelle reduire estoiet morts plusieurs François, & que tant que elle seroit en estre & en puissance que iamais en feureté par là ne passeroient. Dont pour obuier à ce faillloit qu'elle feust brulée, & destruiete. Les autres feurent d'aduis different, disans que du tout ne debuioit estre deuastée, & que si elle l'estoit dommaige s'en ensuiuroit pour le Roy. Car elle pouuoit de là en auant donner seureté aux François, qui maistres en estoient, & seruice au soustien de bonnes & grosses

garnifons pour le Roy, qui sans bonnes places, & 1501.
 bien fortifiées ne pouuoient seulement posseder ne
 garder le Royaume de Naples, dont Capouë estoit
 l'une des plus propices & secourables pour ce faire.
 Parquoy feut conclud que elle ne seroit bruslée ne
 destruiète : mais seroit mis dedans grosse garnison
 de François pour la garder. Et pour ce faire feurent
 ordonnez soixante hommes d'armes de ceulx de
 Iacques de Silly, & de Messire Aymar de Prie, avec
 quelque nombre de gens de pied. Et pour le gou-
 uernement d'icelle, le Seigneur d'Aubigny y meit
 vn Gentil-homme des siens, nommé Mauleurier,
 du pays d'Anjou, auquel la bailla en garde sur sa
 vie. La ville de Capouë mise en seure main, & les
 François vn peu rafraischis, se meirent aux champs,
 & tirerent vers Naples. Et tant marcherent ce jour,
 que à huiët milles de pays loing de leur logis s'ar-
 rēterent, qui est à my voye de Capouë, & de Naples,
 & là feurent à sejour l'espace de huiët jours. Le diët
 temps durant l'artillerie feust enuoyée au Chasteau
 d'Auerse, & par Ambassades parlement tenu entre
 le Roy Dom Frederic, & les Lieutenans du Roy. Le
 diët Frederic transmeit ses Ambassades vers iceulx
 Lieutenans pour le Roy, pour les aduertir de son
 vouloir, & demander à eulx composition telle, que
 le diët Frederic dedans huiët jours apres ce promet-
 toit vuidier la ville de Naples, & luy, & sa femme, &
 ses enfans, avec toutes ses bagues se retireroient de-
 dans l'Isle d'Isque qui est moult forte, & garnie de
 bonnes places, & enuironnée de mer de tous co-

1501. stez, bien auant en mer; & est du Royaume de Naples. Et oultre demandoit Frederic auoir six mois de terme pour enuoyer Ambassades en France deuers le Roy, & demander appointement tel que par son Conseil seroit sur ce aduisé, & couché par articles. Et les six mois passez, si l'offre que le Roy luy auroit faicte n'estoit à son plaisir, ou qu'assez raisonnable ne luy semblast, vouloit apres ce qu'il peust se mettre en effort de defendre sa querelle, comme il pourroit. Et pour celuy appointement mieulx asseurer bailleroit bons ostaiges & suffisans. Les Lieutenans du Roy voyans le traicté du parlement, & le proposé de Dom Frederic, qui vouloit vuidier Naples, & icelle mettre entre les mains des François, & en l'obeissance du Roy, & que en ce faisant se soubmettoit à deüe raison, feurent d'aduis que la composition estoit à l'aduantage du Roy, & au proffit de son armée. Veu que si Naples estoit rendüe, que le surplus du Royaume ne feroit resistance contre les François. Et que durant les six mois qu'il demandoit pour enuoyer deuers le Roy, les François se fortifieroient, & tiendroient villes, & chasteaux, par si bonnes & grosses garnisons, que sil aduenoit que appoinctement ne se feist, & que derechef guerre s'esmeust, que ce seroit pour soustenir le fais de la charge, & rabatre les coups de tous les efforts de la puissance du Roy Dom Frederic. Et tout ce considéré, le Sire d'Aubigny, le Duc de Valentinois, & le Comte de Gayace, Lieutenans du Roy signerent le dict appoinctement. Et eurent

pour oſtaiges le frere baſtard du Roy Frederic, & 1501.
deux des Seigneurs principaulx de la ville de Na-
ples, leſquels feurent enuoyez au Chasteau d'Auer-
ſe, & mis en garde entre les mains d'un Capitaine
François, nommé la Lande, & d'un autre nommé
Bernard de Mons, Gouverneur de la dicte ville
d'Auerſe pour le Roy. Et ce faiſt, le Roy Frederic
plia ſes bagues, & ſe voulut retirer dedans l'Isle d'Iſ-
que, comme auoit promis aux Lieutenans du Roy.
Et à ſon depart prit congé de ſes familiers, & amis,
& du peuple de Naples, les larmes aux yeux : en leur
diſant telles paroles. Ores ay-je aſſez veu pour bien
connoiſtre que en ce monde muable y a peu de
ſeureté, & moult de variation, mes Amis. O que mal
heureux ſont ceux qui apres la haute montée de bon
heur chéent dedans la baſſe vallée de miſere ! Helas
fortune enuieuſe de mon bien, & ennemie de ma
proſperité me pouſſe, & eſbranle & me meſt iuſ-
ques ſur le bort de ce chemin tres-ennuyeux, ſans
me laiſſer autre conduite que ſoucieuſe penſée, qui
continuelle compaignée me faiſt, tant que ſoubs le
poids de ceſte grietue charge mon pouuoir eſt re-
creu, & arreſté. Et ne ſçay à quoy plus me tenir, ou
aſſermir, ſi ce n'eſt au freſle baſton d'Eſperance
incertaine, ſur lequel mal aſſeuré ie m'appuye &
ſouſtiens comme ſur la glace d'une nuit, ainſi que
me pourmene ma dure deſtinée. Par les efforts des
François mes ennemis me conuient abandonner
mes terres, & Seigneuries, & perdre le tiltre & prof-
ſict du Royaume de Naples, dont je deuiſſe eſtre, ce

1501. me semble, propriétaire, & fault que par l'autorité de la force j'en soy deschassé. Toutesfois seul ne participeray à ceste perte. Car ma femme desolée, & mes petits enfans desheritez en auront esgale portion. Quoy plus? Pour le long plaindre de ma perte, je n'en abrege le terme de mon malheur. Ores ne puis-je plus icy demeurer. Car la composition par moy faicte avec les François me le deffend. Donc vuider me fault la terre tres-douce, & fertile, & l'excellente & gentile ville de Naples, pour monter sur mer amere, & chercher Isles odieuses. Au bout de ces complaints ses priuez & amis se monstrerent auoir compassion de son ennuy, & au mieulx que peurent faire le repeurent de paroles plaines de consolation, tant que ils luy resueillerent les esprits. Et ce faict, avec tout son charroy, son train, & ses bagues se meit en voye vers l'Isle d'Isque, dedans laquelle s'en alla pour là attendre la fin de sa fortune.

CHAPITRE LV.

Comment les Lieutenans du Roy entrèrent à Naples, où furent honorablement receus.



Or v s les faicts sus dictz resolus, les Lieutenans du Roy eurent obeissance de ceulx de Naples, & de toute la terre de Labour, tant que les clefs des villes du dict pays leur furent apportées iusques à vne ville

nommée Marignis, huit milles pres de Naples, où 1501.
là le Sire d'Aubigny, Lieutenant general du Roy,
receut la foy, les fiefs, & hommaiges des Seigneurs
du dict pays. Et là feirent composition de rendre les
chasteaux de Naples, Caiete, & les autres places for-
tes, lesquelles soubmeirent au Roy. Dont iceulx
Lieutenans, bien accompaignez de gens d'armes,
& autres s'en allerent dedans Naples, & là entrèrent
à grand honneur, & triomphe magnifique, & leur
feurent les chasteaux baillez & mis entre les mains.
Ce faict, les garnisons feurent dispersées autour de
Naples. Et le Seigneur de la Palisse enuoyé Viceroy
en Labruzzo, avec deux cent hommes d'armes, &
deux mille hommes de pied; lequel pays estoit bon
Arragonois, & meesmement vne Ville nommée
Laigle, qui est Communaulté subiecte à la souue-
raineté de Naples, laquelle, & toutes les autres feur-
rent par le dict Sieur de la Palisse conquestées, &
soubmises en l'obeissance du Roy, & luy bien obey,
& moult aimé du peuple de celuy pays.

LOYS de Bourbon, Comte de Montpensier
apres ce s'en alla en vne petite Vilette pres d'illec
nommée Pozzol, où apres la conqueste que le Roy
Charles huitiesme feit à Naples auoit esté enterré
le pere du dict Comte de Montpensier. Et là an-
ciennement souloit auoir vne belle Cité nommée
Baye, qui pour l'abominable peché Sodomitique
autresfois perit & abisma, reserué le dict lieu de
Pozzol, qui à la requeste d'une deuote femme du
dict lieu feut preserué de submersion. Et là le dict

1501. Comte de Montpensier feit ouvrir le tombeau où estoit enseuely le corps de son pere. Et si tost que ce tombeau feult ouuert, & que le fils vif veid le pere mort, il transfit tout de frayeur, tellement que la fiebure le prit, dont peu de iours apres mourut sans remede.

Les choses exploictées par le Sire d'Aubigny comme dict est, quelque peu de temps'apres le Roy enuoya à Naples Messire Estienne de Vese, Seneschal de Beaucaire, & Messire Raoul de Lannoy, Bailly d'Amiens, pour donner & pourueoir des Offices, & ordonner des finances. Et supposé que le dict Sire d'Aubigny en eust faict la conqueste, & suffire deust au surplus, toutesfois pour obeir au Roy receut iceulx tres-amiablement, & dedans le chasteau de Capouane de Naples, les traicta honnorablement, & leur fait joyeuse chere. Et là estoit le Comte de Gayace malade, qui s'efforcea de bien traicter les sus dictz. Aussi estoit là le Duc de Valentinois, & grande Noblesse du dict pays. Bien tost apres ce, vne fiebure preint au dict Sire d'Aubigny, lequel pour changer d'air avec les gens de sa maison s'en alla à la tour du Grec, sept milles pres de Naples, & ayant pris au dict lieu huit iours de sejour, s'en alla à Nocere, ville de Labour, subiecte au Comte de Montorio, où demeura trois sepmaines à repos. Durant lequel temps il reuint en santé, parquoy il s'en voulut retourner à Naples, pour subuenir aux affaires du Roy. Et le Seneschal de Beaucaire, qui là estoit enuoyé de par le Roy feut attainct de maladie:

die : tellement que gueres n'exploicta son office que la mort ne le faist. Le Roy Frederic transmeit lors deuers le Roy le double de la composition & appointement qu'il auoit faict avec le Sire d'Aubigny, & ses autres Lieutenans, avec les articles faicts sur ce qu'il demandoit au Roy premier que se vouloir desister du droict qu'il disoit auoir au Royaume de Naples. Desquelles choses le Roy feut moult joyeux. Et pour solemniser les bonnes nouvelles commanda icelles publier par tout le Royaume de France, & pour cela, faire en tous ses pays les feux de joye. Ce qui fut faict. Les articles de la demande de Dom Frederic feurent mis en conseil, pour y aduiser iouxte la raison, & en ordonner selon equité.

CHAPITRE LVI.

*Comment Messire Philippes de Rauestain,
Gouverneur de Gennes, & Lieutenant du
Roy sur l'armée de mer, feut à Naples,
& ne voulut tenir l'appointement
faict entre les Lieutenans du Roy,
d'une part, & le Roy Dom
Frederic; d'autre. Et com-
ment feut transmis le
dict Roy Frederic en
France à la seureté
du Roy.*

¶ d

1501.



MESSIRE Philippes de Rauestain, Lieutenant du Roy en l'armée de mer estoit lors party de Gennes, avec vingt voilles tant seulement, & tant auoit singlé par mer, que sans destour auoit approché le port de Naples de deux milles pres. A sa venue les autres Lieutenans du Roy, qui lors estoient à Naples, transmeirent au deuant de luy messagers, pour luy dire & signifier l'appointement qu'ils auoient faict avec le Roy Dom Frederic, qui estoit tel, que apres que la Ville de Naples auroit vuidée, & icelle laissée entre les mains des François, que il se retireroient en l'Isle d'Isque. Ce que des-jà auoit faict. Et que en oultre auroit six mois de terme pour enuoyer deuers le Roy, & traicter de son affaire. Et les six mois passez, si l'appointement que le Roy luy voudroit faire ne luy sembloit bon, pourroit le dict Frederic defendre sa querelle comme il scauroit. Ainsi fut aduertty le dict Sieur de Rauestain du traicté & conclusion del'appointement susdict, & requis par les autres Lieutenans du Roy de donner à ce consentement, & iceluy auoir agreable. Ce qu'il ne voulut, disant que celuy appointement luy sembloit du tout au desaduantage du Roy, & au profit de Dom Frederic. Et aussi que sans luy l'auoient faict, ce qu'ils ne pouuoient, ny ne debuoient. Veu qu'il estoit Lieutenant du Roy comme eulx, & en oultre Admiral. Parquoy ne consentiroit au dict traicté: mais sur ce feroit ce qu'il deburoit: aussi que de ce debuoit auoir la congnoissance, veu que

Dom Frederic estoit lors en l'Isle d'Isque sur mer, & 1501.
 en ses dangers. Et ce dict marcha oultre iusques à
 Naples. Et là de ceste matiere entre eulx feut grande
 question, & le propos debatue selon l'opinion de
 chascun. Et pour conclusion, Messire Philippes de
 Rauestain dict que la composition estoit à la foule
 du Roy, & selon l'intention de Frederic. Et la raison:
 Car durant le terme de six mois que pour penser à
 ses besongnes il auoit, l'armée de France ce pendant
 pourroit despendre grand argent, & perdre prou de
 gens, & le Roy Frederic se pourueoir d'auoir acquerir
 amis, & faire alliances. Et aussi que cependant le
 Roy d'Espaigne, duquel il se disoit parent, & autres
 luy pourroient donner tel secours, que en fin de
 cause les François n'auroient pas du meilleur: dont
 l'entreprise du Roy se pourroit par ce moyen de
 moult retarder, & par aduature du tout empescher.
 Plusieurs autres remonstrances feit Messire Pierre
 de Rauestain sur le default de ce; tant que le Duc de
 Valentinois dit que ses autres compaignons auoient
 faict la chose outre son vouloir, & que s'il l'auoit si-
 gnée ce auoit faict à leur appetit seulement. Mais
 quoy que ce soit, en ce faisant & en ce cas mal au-
 ctorisé & bien inconstant il se monstra. Je mets ce
 compte à part, pour dire que Messire Philippes de
 Rauestain mal content de ce que sans luy sur l'affai-
 re de Frederic composition auoit esté faicte, dit à
 Messire Beraud Stuart, & à ses autres compaignons
 que plus ne demeureroit avec eulx à Naples: mais
 s'en vouloit aller sur mer, pour faire ce qu'il deb-

1501. uroit, & accomplir son voyage de Turquie, comme par le Roy luy auoit esté commandé. Toutes-fois feut arresté par prieres pour huiét jours seulement. Et en ce terme les nauires & galeres du Roy qui estoient parties du port de Toulon en Prouence, avec les carraques de Gennes arriuerent à Naples, armées & équipées deüement. Le Roy Frederic, qui lors estoit en l'Isle d'Isque, sceut la venüe de Messire Philippes de Rauestain, Lieutenant du Roy en son armée de mer, & que grand nauigaige auoit avec luy. Et aussi feut aduertý de ce que l'ap-
pointement faict par luy avec les autres Lieutenans du Roy ne vouloit tenir: mais luy vouloit courir sus, & faire guerre par mer. Parquoy luy enuoya vn Cheualier, nommé Messire Antoine Grison, pour luy dire & le prier que de sa part voulust auoir agreable & signer le dict appointment, comme auoient faict les autres Lieutenans du Roy. Ce que ne voulut faire le dict Seigneur de Rauestain, mais luy manda par son dict Messaiger, que s'il ne vuidoit le lieu où il estoit, ou qu'il ne se rendist, que il l'iroit assieger & prendre quelque part qu'il le trou-
ueroit. Dont derechef reueint icy Messire Antoine Grison deuers Messire Philippes de Rauestain, pour le prier amiablement de par le Roy Dom Frederic que le plus loyalement que faire se pourroit luy voulust sur son malheureux affaire donner prouision de Conseil, & que à iceluy du tout se tien-
droit. Oyant la priere du Roy Frederic Messire Philippes de Rauestain, & voyant que par icelle faisoit

offre de raison, & presentoit humain party, luy presta l'oreille, & pour plus en sçauoir luy transmeit vn sien Maistre d'hostel nommé Antoine de Crequy, pour luy dire & respondre sur ce qu'il demandoit, Que si en vie prospere le sçauoit que de luy aucun conseil n'auroit, mais pour ce que en miserable aduersité le voyoit, & que en ce destroiët les ennemis qui ont l'aduentaige se doibuent monstrer humains aux affligez, sur son affaire volontiers le conseileroit. Et pour le mieulx selon son aduis luy manda que sans autre question le plus proffirable de son cas estoit de soy mettre & rendre entre les bras du Roy, & se soubmettre à son vouloir. Et en ce tant saige & debonnaire le trouueroit, & tel appointement auroit de luy, que ce seroit iusques à deuoir estre content. Et que meilleur ne plus seur conseil pour luy ne sçauoit. Veu aussi que Naples, & la plus grande partie du Royaume estoit entre les mains des François, & que contre eulx ne pourroit auoir durée, ne à leur pouuoir resister. Le Roy Dom Frederic oyant la dicte remonstrance de Messire Philippes de Rauestain, pensa sur ce au plus proffitable de son mieulx. Et la chose en conseil & en soy mesme debatit en disant Ores est-il l'heure que de deux mauuais partis je choisisse l'vn. Toutesfois le pire me conuient delaisser, & iusques à temps à l'autre me tenir. Je veois ma seurété mal appuyée par le debat des Lieutenans du Roy de France, sur la composition faicte par moy & par eulx, & m'est trop peu secourable, & n'est en rien comptée. Donc

Dd.iiij

1501. fault icy que pour honte escheuer, je me defende, ce que longuement ne puis, ou que au Roy de France merende, ce que par honneur promptement ne doibs. Que ferai-je doncques? Sur l'appuy de la ferme bonté du Roy Tres-Chrestien fonderai le sort de mon aduanture. Veu aussi que à Prince tres-humain, pitieux, faige, & debonnaire ay à besongner. Doncques si je fais ce que je doibs en aduienne ce qui pourra. Ainsi se consentit le Roy Dom Frederic de s'en aller rendre au Roy. Et pour ce faire preint faufconduict de Messire Philippes de Rauestain, & de Messire Beraud Stuart, Lieutenant du Roy, pour s'en aller en France. Toutesfois dedans la dicte Isle d'Isque laissa le Marquis de Pescare, sien seruiteur, auquel bailla seures enseignes pour rendre la dicte Isle, à qui bon luy sembleroit, en luy enuoyant sur ce lectres contresignées. Aussi laissa au dict lieu Dame Ysabelle sa femme, laquelle estoit fille du Prince de Altamore, & avec elle demeurerent deux petits enfans, & deux filles, & aussi laissa dedans Tarente vn sien fils aîné, nommé Dom Ferrand, avec deux cent hommes d'armes, pour garder la dicte Ville. Ores se deubst bien plaindre le pauure Prince des dons de fortune. Mais tant feut enrichy des biens de nature, que la perte de ses pays luy feut recompensée en lignée. Car luy seul auoit lors trois enfans males. Or le pauure Prince apres les dicts faufconduicts pris demanda au dict Sieur de Rauestain vn jeune Gentil-homme François, nommé Antoine de Castelferrus, des pensionnaires du Roy, pour le con-

duire & mener iusques en France. Lequel le luy bailla. Et tout ce faict, feit equipper huit galeres, vne fuste, & vn brigantin : & se meit en mer avec cinq cent Gentils-hommes des siens, pour tirer vers Marseille en Prouence.

CHAPITRE LVII.

Comment Louys d'Armaignac, Duc de Nemours, feut par le vouloir du Roy enuoyé à Naples, pour estre chef, & Viceroy au dict Royaume de Naples.

LE ROY, qui lors estoit à Lyon sur le Rhosne, feut par ses postes asseuré de tout ce qui de là les monts auoit par ses gens esté faict : tant de la conqueste de Naples, que de la venüe de Frederic. Donc comme celuy qui tousiours auoit l'œil l'aduis & la main en besogne, pour secourir à ses affaires, voyât aussi que au dict Royaume failloit chef sur tous authorisé, là transmit Louys d'Armaignac, Duc de Nemours, jeune Prince, bien grand en sçauoir, tres-magnanime en vouloir, & plus excessif en vertus. Lequel ordonna estre seul Viceroy, & general Gouverneur, en toutes choses au dict Royaume de Naples. Ainsi preint congé du Roy, de la Royne, & des Seigneurs de France, & se meit en bateaux sur le Rhosne, accompagné de grand nombre de Seigneurs, &

1501. Gentils-hommes de la Maison du Roy qui par eau le conduisrent iusques à Vienne au Dauphiné, cinq lieues delà Lyon. Et delà se mit en voye par eau, & tira iusques à Marseille en Prouence, où monta sur mer, & fit singler vers Genes, & delà à Naples. Le Sire d'Aubigny, qui lors estoit à Naples, sceut la venue du Duc de Nemours, & comment le Roy l'enuoyoit Viceroy de par delà, dont enuoya au deuant de luy grand nombre de gens iusques à Pozzol, à sept milles de Naples. Et luy feut pour le recueillir, iusques à nostre Dame de Pye de Crote, à deux milles pres de la ville. Et là est la montagne percée que Virgile par art diabolique ou autrement, perça tout au trauers, laquelle dure vn mille de pays, ou enuiron. Et est le trou si grand que vn homme à cheual y peult aisément passer. Par là passa le Viceroy avec toute sa route. Et ainsi le conduisit le Seigneur d'Aubigny, avec les Seigneurs de la ville iusques dedans, Où feurent tendues les rues, & par tout garnies de tables rondes couuertes de vins, & viandes, à qui en vouloit. Dedans le Chasteau de Capouane s'en alla loger le Viceroy, avec le Sire d'Aubigny. Obeissance feut faicte totalement au dict Viceroy, sans que autre s'entremist des affaires de Naples. Dont le Sire d'Aubigny, voyant la peine qu'il auoit eüe, & la diligence qu'il auoit mise à conquister le dict pays, ne se peut bonnement contenter, qui fut ja vn commencement de diuision entre les chefs de l'armée. Ce qui est vne chose si dange-reuse à soustenir, que à ce moyen toutes entreprises de

de guerre viennent à malheureux effect. Or s'en alla le dict Sire d'Aubigny en la Comté de Venafro pres de Capoue, laquelle le Roy luy auoit donnée, & là feut par l'espace de six sepmaines. Et ce pendant transmit deuers le Roy, pour auoir congé de s'en retourner en France. Ce que le Roy ne permit ains luy manda le Roy retourner à Naples vers le Viceroy, pour consulter sur leurs affaires, où feut aduisé que le dict Viceroy s'en iroit en Poüille, où lors estoit Gonsalles Ferrande, pour departir le Capitanaat, & le Principat, terres de Naples indiuisées entre le Roy de France, & le Roy d'Espagne, & que là deuiferoient le dict pays: *citra & ultra*, & que le Sire d'Aubigny demeureroit à Naples, pour ce que bien voulu estoit des Seigneurs, & du peuple, ce qui feut faict.

CHAPITRE LVIII.

Comment les Ambassadeurs de l'Archiduc vindrent deuers le Roy à Lyon, pour traiter du mariage de Madame Claude de France, & du fils du dict Archiduc.

Ec

1501.



Aoust.

N celuy temps le Roy estoit à Lyon sur le Rhosne, & la Royne quand & luy, & plusieurs grands Seigneurs de France. Et là arriuerent les Ambassadeurs de Philippes d'Austriche, Archiduc, & Comte de Flandres, lesquels Ambassadeurs veinsrent pour traicter du mariage de Madame Claude de France, fille du Roy, laquelle estoit lors en l'aage de trois ans, ou enuiron, & du fils de l'Archiduc, petit enfant aussi. Lequel mariage feut traicté par le Digne de Bezançon, & autres Ambassadeurs du dict Archiduc. Et tellement que le dixiesme iour du mois d'Aoust, en l'an mil cinq cent vn, feut celuy mariage accordé par le vouloir du Roy, luy present, & la Royne, & tout le Conseil. Le Roy, & la Royne feurent moult esioiis de ce mariage, pensans par ce moyen auoir paix durable avec le Roy des Romains, pere de l'Archiduc, & au Roy d'Espaigne pere de l'Archiduchesse. Parquoy la feste feut grande du Roy, & de la Royne. Et tant que chascun d'eulx feut conuis, & banquets aux Ambassadeurs, Où fut faict vne danse, en laquelle feut dansé à la mode de France, d'Alemaigne, d'Espaigne, & de Lombardie, & à la fin en la maniere de Poictou. Le Comte de Neuers, & Mademoiselle de Chasteaubriât danserent à la mode d'Alemaigne; Le Seigneur d'Auennes & vne Damoiselle, nommée Anne de Foix, autrement Candale, feirent à l'Espaignolle. Le Prince de Tallemôt, & vne autre les Damoiselles de la Royne nommée la Grange, danserent à la Françoisse; Le bastard de

Vendosme, & vne Damoiselle nommée Belle-joye, danserēt la Lombarde; Artus Gouffier, Sire de Boisy, & vne autre Damoiselle, nommée la Tour, danserent la Poicteuine. Lesquels estoient tous habillez à la sorte du pays dont ils danserent à la mode. Grande foison de draps d'or & de soye fut là dechiquetée, dont la Royne feit l'aduanee. Et feut vne chose bien nouuelle & plus estrange. Car chascun des danseurs endroiēt soy le feist si à point qu'on eust dit à les veoir branler, que c'estoient gens nais au pays dont ils contrefaisoient la maniere. Apres que chascun eust fait son tour, vn nommé François de Neri, fut en la salle, lequel estoit habillé à la Turquie, & auoit regardé chascun des autres par ordre faire leurs dances, lequel voulut pareillement soy mettre en danse, & avec toutes les dictes Dames, l'une apres l'autre, & par ordre, se voulut joindre pour danser. Lesquelles le refuserent toutes, & ne teindrent compte de luy, ne semblant n'en feirent; mais le repousserent le plus rudement qu'elles peurent. Et ce fait, comme triste, & despitueux, vn arc Turquois qu'il tenoit au poing jetta contre la terre, & vuida la salle, tout esbahy & mal content des dictes alliances qu'il voyoit estre toutes bandées contre luy.

CHAPITRE LIX.

*D'une merueille qui adueint au pays du Liege;
& d'une maladie nommée la grosse verole
autrement la maladie de Naples.*

E c ij



V TEMPS que le Roy estoit à Lyô,
du pays du Liege luy fut transmise la
semblance d'une croix tombée des
cieux toute teinte de sang, & enrou-
gie, & environnée d'un cercle res-
semblant à l'arc federal, d'un lez au bas semé de pe-
tites croix rouges, & de l'autre avoit une espée flam-
boyante, & au dessus estoit la forme de la couron-
ne d'espines, & des cloux de nostre Seigneur.

EN ces mesmes iours couroit par tout le monde
une maladie, nommée la grosse verole, autrement ap-
pелlée la maladie de Naples. Et ce pource que durant
le voyage du Roy Charles huitiesme qu'il feist au
dict lieu de Naples, ceste maladie eut premiermet
cours, & estoit telle que à gros boutons, & larges roi-
gnes sortoit au front, autour la bouche, aux iambes,
& aux pieds, & en tous les endroicts du corps à ceulx
qui l'auoiēt, aux vns plus, & aux autres moins, & sur-
uenoit le plus souuēt de cohabiter avec femmes dis-
solües: Toutesfois j'en ay veu de petites filles & jeu-
nes enfans entachez, qui la prenoient de boire &
manger, ou dormir avec ceulx qui l'auoient. Et à ce
ne pouuoient nuls Medecins dōner remede si bon,
que plusieurs grāds persōnaiges & autres n'en mou-
russent. Toutesfois à force de suer, & prēdre estuues
chaudes, plusieurs guaroissoient. Et les autres, qui
pour cuider plustost guarir, ou de hōte qu'ils auoiēt
de leur mal la faisoient par Medecine retourner au
corps, en mouroiēt presques to⁹ etiques de là guiso.

Aoust.

LE seiziesme iour du mois d'Aoust, Messire Phi-
lippines

lippes de Rauestain partit de Naples avec tout son nauigaige, & se meit en mer pour aller à son voyage de Turquie, lequel je laisseray pour ceste heure, pour à temps y reuenir, & diray d'une course que feirent lors les Suisses en Lombardie. 1501.

CHAPITRE LX.

D'une descente que feirent lors les Suisses en Lombardie sur les pays du Roy.



N icelle année mil cinq cent vn, 1501. le Roy eut moult d'affaires à mener, & plusieurs griefs faix à supporter, & tant que au Royaume de Naples, en la Duché de Milan, & en la mer de Grece luy conueint auoir grosses armées, & en son Royaume de France & plusieurs lieux bonnes garnisons, & grand nombre de gens d'armes. Ce qui sans ordonnée police & frais excessifs ne se pouuoit entretenir. Toutesfois sur ce meit telle prouision de conseil, & preuoyance de finances, que tous ses entreprises feurent par voye de seureté conduictes, & son argent exploicté à profit si à poinct, que la pluspart de son intention feut executée au plus pres de son vouloir, à l'honneur des acteurs, & au profit de la chose publicque. Quoy plus? Pour ensuiure le propos de ma matiere j'ay icy à dire que enuiron la my Aoust, du pays des Aoust.

Ff

1501. Liges descendirent en armes dedans la Duché de Milan sept mille Suiffes, lesquels selon le rapport de plusieurs veinrent illecques à l'appetit & iuation de sept à huiét cent Lombards, qui auoient esté bannis dela Duché de Milan, pource qu'ils s'estoyét rebellez contre le Roy apres la conqueste de la Lombardie, & auoyent tenu le party du Seigneur Ludouic. Et ainsi eulx voyans exilez, & chassez de leur pays, & voulans ioüer à quitte, ou à double, & faire du pis que ils pourroient, feurent querir iceulx Suiffes iusques en leur pays, en leur promettant de les mettre dedans plusieurs Villes & places de la Duché: & de les guider iusques à leur donner moyen de seurement paracheuer leur emprise, & sur ce de leur pouuoir les ayder. Parquoy se meirent les dicts Suiffes tout secretement en voye, côme ceulx qui d'emblée leur vouloir vouloient executer. Et s'assemblerent dedans vne Ville du Duché de Milan, nommée Belinsone, sur l'entrée du Lac major, laquelle auoient iceulx Suiffes surprise le dict Duché de Milan, apres la prise du dict Ludouic. Quoy que ce soit là teindrent leur Conseil sur leur affaire, & conclurent de marcher outre. Ce qu'ils feirent. Et tant cheminerent que d'une traicte feurent de Belinsone iusques au bourg de Lugan, distant de l'un à l'autre de seize à dix-huiét milles de pays. Et festoyent les dicts Suiffes ainsi aduancez, pour au despourueu prendre le Chasteau de Lugan, dedans lequel estoit Messire Antoine de Bessay Bailly de Dijon, avec quelque nombre de gens d'armes François. Et ja auoit oüy quelque rapport de ceste venüe: d'ôt

il auoit mis sur les chāps droict à leur chemin douze 1501.
hommes coureurs à cheual; pour sçauoir nouuelles,
& descouurir le pays : Lesquels coureurs François
cheuaucherent tant, que entre deux bourgs, nom-
mez les Chappelles, & Sonuic, rencontrèrent iceulx
Suiſſes cheminans à la file le long d'un chemin
creux, & bien fort estroict, & au rencontrer com-
mencerent les François à charger sur les premiers:
lesquels repouſſerent les François, & se meſlerent
auec eulx, tellement que sept des dicts François feu-
rent enclos entre eulx, & là aſſommez, & occis; Les
autres gaignerent la fuite, & à bride abatüe retour-
nerent au bourg de Lugan, où estoient lors plu-
sieurs François de la garnison, qui de nul danger se
doubtoient. Toutesſois par ceulx qui se retiroient
d'effroy ſçeurent la venüe des dicts Suiſſes, qui ja
estoient ſi pres que auant que les François euſſent
hors du bourg pour eulx retirer au chasteau, qui à vn
jeſt d'arc de là estoit, iceulx Suiſſes à coups de hac-
quebutes leur donnerent la chasſe iuſques à l'entrée
du chasteau, & là ſe teindrent longuement en ba-
taille. Les François retirez là dedans voyans iceulx
Suiſſes en arreſt deuant la place, leur voulurent
dreſſer vne eſcarmouche. Et pour ce meirent la
main aux armes, & monterent à cheual iuſques au
nombre de quarante hommes de guerre, la plus
part deſquels prirent groſſes arbaleſtes bandées, &
le traiſt deſſus. Et ce faiſt, feirent ouurir les portes
pour ſortir. Et eulx hors, feurent veoir les dicts Suiſ-
ſes de ſi pres, que de la longueur des picques les ap-

1501. procherent le traict en visée. Les dicts Suisses deslacherent plusieurs hacquebutes sur les François, qui de rien ne les endommagerent. Car leurs coups passerent par dessus, mais eulx à coups de traict feurent chargez de tant, que six d'iceulx feurent mortellement empennez & arrestez en la place. Les autres n'attendirent plus, mais se retirerent au bourg de Lugan, sans ~~plus~~ retourner deuant le dict chasteau. La venue des dicts Suisses feuttant soudaine, que par les garnisons des François n'estoit d'eux ailleurs aucunes nouuelles. Car encores n'auoient ceulx de Lugan fait rapport commun de ce, pensans que chascun en feult aduerty, & que par toute la Lombardie en feussent nouuelles, dont ne pèserent à autre chose que à seurement garder leur place. Toutesfois ja auoyent esté iceulx Suisses descouuerts par vn Apothiquaire de Vaire en Lombardie, lequel estoit à Belinsone pour ses affaires alors que les dicts Suisses y arriuerent. Et là voyant leur assemblée s'en reueint à Varais à toute diligence, & là de ce aduertit vn Archer de la compaignée de l'Admiral de France, nommé le dict Archer Iean de Saint-Iean, lequel pareillement le dict à vn Chef de bande de la dicté compaignée, nommée Baudichon du Cuuillier. Lequel enuoya en poste vn autre Archer nommé Mathieu Meuze, deuers Antoine de la Fayette, Lieutenant de la compaignée de l'Admiral de France, pour aduertir de ce Messire Charles d'Amboise, Seigneur de Chaumont, Lieutenant du Roy en Lombardie, qui lors estoit à Milan pour le gou-

uernement du pays, & le Cardinal d'Amboise aussi, 1501.
 qui des affaires du Roy auoit tout le maniement.
 Tant feurent les nouuelles esuentées, que le dict
 Cardinal d'Amboise, & le Seigneur de Chaumont
 en feurent acertenez, dont par la poste en aduertir-
 rent le Roy. Et à toute diligence feirent retourner le
 dict Antoine de la Fayette, & le Sieur de Lanques,
 Ausquels baillerent dix hommes d'armes pour aller
 au dict lieu de Varais, & là sçauoir le tout de ce cas,
 & le nombre d'iceulx Suisses. Ainsi se meirent
 iceulx à chemin, pour faire ce qui leur estoit enchar-
 gé. Le Roy, qui lors estoit à Lyon, si tost que de ce
 feust aduerty, nonobstant les grosses armées qu'il
 auoit sur mer, & à Naples, pour au plus de ses affai-
 res de plus fort euertuer son pouuoir transmeit là
 grosse gendarmerie. Le Comte de Dunois enuoya
 là pour estre Conducateur & Chef de ses Gentils-
 hommes qui là estoient Messire Iacques de Crus-
 sol, avec deux cent Archers de la garde. Aussi feut
 là enuoyé Messire Louys de Hedouuille, Seigneur
 de Xandricourt, lesquels arriuerent à Milan à heure
 de seruir le Roy en cest affaire. Le Cardinal d'Am-
 boise, qui en la Duché de Milan auoit generale au-
 torité pour le Roy, & qui les choses auoit en re-
 commendation affectueuse, voulut là employer
 ce qu'il pouuoit, & en ce seruir de ce qu'il debuoit,
 sans toutesfois se mesler de l'executif effect de la
 guerre, si n'est par aultant que mestier estoit pour
 paix acquerir. Et pour celsçaichant l'intention ho-
 stile des dicts Suisses, & leurs conducteurs, lesquels,

1501. couruoient ja les pays du Roy, & faisoient du mal tout ce qu'ils pouuoient, pour iceulx rebouter, & obuier à leur entreprife, feit soudainement mettre sus quatre mille hommes de pied Lombards, & Piedmontois, & assembler les gens d'armes des garnisons du Duché de Milan, pour seruir le Roy en ceste besongne. Lesquels feurent à coup tous prests, & appareillez, pour mettre la main à l'œuure, & en ce ne restoit que l'aduanee d'argent, pour la solde des pietons, qui pour ce nouuellement auoient esté mis sus. Le Roy qui bien se doubtoit de ce, & ja scauoit la descente d'iceulx Suisses, auoit enuoyé Treforiers, & Clercs des finances celle part, pour subuenir à ce besoing: toutesfois pour l'empelchement de longue traicte & destour d'ennuyeulx chemin, & pour la subuenüe hastiue des ennemis, l'argent ne feust prest à l'heure deüe. Parquoy le Cardinal d'Amboise voulut mettre sur ce à l'essay aucuns riches Lombards de la Ville de Milan; lesquels auoiēt faiēt plusieurs fois offres de bouche pour le Roy de faire aduanee de cinquante mille ducats, ou de plus si mestier estoit. Toutesfois au parfournissement de ce, haulserent les espauls, & baissèrent le nez. Mais pour ce deffault l'affaire ne retarda. Car le dict Cardinal d'Amboise y meist du sien ce qu'il auoit, & aussi feirent les autres François qui là estoient: tant que ce feut iusques au suffire du payement des dicts soldats. Et ce faiēt, le Cardinal, avec deux cent Archers de la garde du Roy, & cinquante hommes d'armes de ceulx d'un nommé Hector de Monte-

nart, Gouverneur d'Ast, partir de Milan, & s'en alla à Come, pour illecques estre plus pres des ennemis, & mieux à main, pour aduifer les Capitaines de l'armée de Frâce du vouloir du Roy dont d'heure à autre estoit par postes asçauanté. Et là se teint tout le temps que les dicts Suisses feurent en Lombardie, où là ordonna des affaires du Roy, & meit moyen de conseil & ordonnée police en toutes choses de ce besoingneuses. Et en ce feut obey de tous les Capitaines, & autres François qui là estoient, comme la personne du Roy laquelle il representoit. Tantost qu'il feut arriué à Come, ceulx qui pour le Roy tenoyent Sonuic se tirerent par deuers luy, pour auoir secours contre les efforts des dicts Suisses, qui estoient enuieux de leur dicte place, & puissans pour la prendre, si de secours n'estoyent pourueus. Dont le dict Cardinal leur feit bailler vn nommé Marolles avec dix hommes d'armes François, lesquels s'en allerent renforcer la garnison du chasteau de Sonuic, & là feirent plusieurs faillies & escarmouches sur les dicts Suisses. Le Seigneur Antoine de la Fayette, & le Seigneur de Lanques qui auoient parauant esté enuoyez à Varais, estoient au pourchas de sçauoir nouuelles des ennemis, & pour mieux au leur exploicter leur commission, preinsrent six vingt hommes d'armes, & tirerent iusques à vn bourg nommé Marquerueil, à trois milles pres de Lugan, où les Suisses s'estoiét fortifiez. Alors que les François approcherent de Marquerueil transmeirent à Lugan vn nommé Bernard de Scenô, Gas-

1501. con, avec douze archers coureurs, pour aller sçavoir la maniere & fortification d'iceulx Suisses. Et ainsi se meirent les coureurs François à marcher vers Lugan, & les autres se logerent au dict lieu de Marquerueil. Tantoist feurent les coureurs François pres de Lugan de deux jects d'arc, ou enuiron, & de plus eussent approché, n'eust esté l'empeschement des chemins de tranchées, larges fossez, de gros arbres entrauersez, & de barrieres closes fortifiées. Dont leur conueint là demeurer, sans pouuoir passer outre, ne faire autre chose; si ce n'est illec long temps arrester, pour veoir si aucun des Suisses failliroient aux champs, & aduiser leur maniere, & quel ordre ils tiendroient: affin que vne autre fois, pour la congnoissance de leur arroy on peust trouuer sur eulx moyen aduantageux. Toutesfois pour l'heure pourueurent à ce tellement que hors de leur place François n'eust veüe de leur effort. Ce qui les feit retourner à Marquerueil, où estoit la grand bande, & là rapporterent ce qu'ils auoient veu, & trouué. Cefaiët, le Sieur de la Fayette, Lieutenant de l'Admiral de France, transmeit messaigers vers le Seigneur de Chaumont, Lieutenant du Roy, pour luy signifier & dire au vray que les dicts Suisses estoient à Lugan tres-bien fortifiez, & à grand nombre. Et que pour leur tenir frontiere estoit mestier que les François qui estoient à Marquerueil demeurassent là, en attendant renfort. Ce qu'ils feirent où huiët iours durant teinsrent pied ferme contre la puissance des dicts Suisses, qui souuent feurent courir

rir deuant leur place. Et là feurent faictes durant ce 1501. temps courfes, faillies, efcarmouches & exploict de guerre, & avec ce les dicts Suiffes coururent le pays des enuirs. Et pource que les François n'estoyent encores aux champs à nombre fuffifant pour les combatre, alloient tous enſemble, parquoy preinſrent par les montaignes & ailleurs beſtial, & priſonniers, qu'ils en menerent à Lugan, & à Belinſone, & feurent courir iufques deuant Sonuic, où là autour preindrent pillerent & bruſlerent bourgs, villaiges & maiſons, en faiſant des mauſx autant que leur force pouuoit exploicter. Et apres ce que ils eurent faict leurs courſes, & priſes dedans le bourg de Lugan qu'ils auoient fortifié, ſe retirerent.

CHAPITRE LXI.

Comment Meſſire Charles d'Amboiſe, Seigneur de Chaumont, & Lieutenant du Roy de là les monts, ſeut de Milan à Marquerueil, avec quatre cent hommes d'armes, les Gentils-hommes de la Maiſon du Roy, quatre mille hommes de pied, deux cent Archers de la garde, & grande force d'artillerie, pour faire la guerre aux dicts Suiffes.

Gg

1501.



POUR abreger le compte, les gens d'armes François des garnisons de Lombardie feurēt assemblez, quatre mille Lombards, & pietons payez, & prests de cheminer, & Messire Charles d'Amboise, Lieutenant du Roy deliberē d'approcher les ennemis. Dont ainsi accompagné, avec les deux cent Gentils-hommes de la Maison du Roy, sous la charge du Comte de Dunois, & deux cent Archers de la garde, sous la charge de Messire Jacques de Crussol, se meit aux champs, & fait mettre au charroy quatre pieces d'artillerie, prises au Chasteau de Milan. Et en cest arroy le vingt sixiesme iour d'Aoust, s'en alla droict à Marquerueil, où trouua le Sieur de la Fayette, & le Seigneur de Lanques à tout six vingt hommes d'armes François. Et tout autour du dict lieu de Marquerueil fait asseoir le camp des François, où se teint par aucuns iours, & de là enuoya viures & gens d'armes dedans les Chasteaux plus prochains du fort des ennemis. C'est à sçauoir au Chasteau de Lugan, Sonuic, à Margou, à Locarne, & au pont de la Tresse, où feut enuoyé le Seigneur Iean Jacques avec cent hommes d'armes, & quatre mille hommes de pied Lombards, & Piedmontois, sous la conduite d'un Espagnol, nommé Rocque-Martin, Gouverneur de Plaisance pour le Roy. Et auoit aussi le dict Seigneur Iean Jacques vne partie de l'artillerie; laquelle fait asseoir sur le passaige des ennemis, & tout autour de là faire bon

guet, & feure garde. De tous lez feurent les dictz 1501.
 Suiffes enuironnez, & enclos des François: & sou-
 uent buffetez, & escarmouchez, & tenus de si court,
 que de long temps n'oserent faillir de leur fort que
 tost à leur dommaige ou defaduantage, ne feussent
 reboutez. Entre le bourg de Lugan, & le camp des
 François, sur vn lac qui là estoit, auoit des moulins
 garnis de chaussées, ponts, & planches, par où pou-
 uoient passer les dictz Suiffes, & donner quelques
 allarmes aux François: & là prendre bleds, & fari-
 nes, & eulx auitailler, dont feut aduisé que iceulx
 moulins seroient rompus. Et pour ce faict executer
 feurent là enuoyez vn nommé Iean de Fontenay,
 Lieutenant de la compaignée de Messire Louys de
 Hedouuille, Seigneur de Xandricourt, & vn autre
 appellé Greffin, Lieutenant du Seigneur de Mio-
 lant, accompagnez de quarante Archers, lesquels
 se meifrent à chemin, & tirerent tant qu'ils feurent
 au bord du lac de Lugan, & là passerent à vn passai-
 ge nommé le Pas de la Treille. Et de là transmeirent
 leur guet vers Lugan pour descouurir & veoir si au-
 cuns d'iceulx Suiffes sortiroient. Et ce faict, laisse-
 rent au Pas de la Treille vne partie de leurs gens,
 pour iceluy garder, & les recepuoir à la retraicte, si
 mestier en estoit. Et ainsi s'en allerent droict aux
 moulins que rompre debuoient. Tantost que là
 feurent arriuez meirent pied à terre, & main en be-
 soingne; & tant que iceulx moulins ponts planches
 & chaussées feurent en peu d'heures desmolis &
 rompus. Les Suiffes, qui estoient à Lugan feurent

1501. par aucuns passans aduertis de l'exploict, dont se meirent aux champs quatre cent en armes, & par vn chemin hors de la veüe du guet des François tirerent vers le Pas de la Treille, entre lequel & les moulins coupperent chemin au guet, & à ceulx qui les dicts moulins estoient allez rompre, & gaagnerent le passaige sur ceulx qui le gardoient: lesquels se retirerent à Marquereuil, où estoit le camp des François. Et là rapporterent au Seigneur de Chaumont, Lieutenant du Roy, comment les ponts estoient rompus, & comment les Suisses auoient gaigné sur eulx le Pas de la Treille, & là couppé le chemin à ceulx qui estoient allez rompre les dicts ponts, & à leur guet. Lesquels asçauantez de leur empeschement se retirerent par vne autre voye au Chasteau de Sonuic, & là demurerent huit iours. Messire Louys de Hedouuille, Seigneur de Xandricourt, sçaichant son Lieutenant & celuy du Seigneur de Miolant, avec plusieurs de leurs gens dedans le dict Chasteau de Sonuic arrestez par les ennemis, prit deux cent hommes d'armes & s'en alla querir ses gens, & les autres qui estoient là en arrest. Et sans trouuer par les chemins ne aux passaiges rencontre, ou embusches d'ennemis, s'en retourna avec tous les siens au camp des François.

CHAPITRE LXII.

Du Comte François d'Orleans, Comte de Dunois, & de la Maison ouuerte qu'il teint à tous venans au camp de Marquereuil en Lombardie quinze iours durant queles François feurent là.



LE Comte François d'Orleans, Comte de Dunois, Chef des deux cent Gentilshommes de la Maison du Roy estoit lors au camp, lequel feit là attacher & tendre ses tentes, où quinze iours durant que le camp feut assis au dict lieu de Marquereuil, teint Maison ouuerte à tous venans tant excessiue, que dedans ses tentes à toutes les heures du iour à tables couuertes de viandes exquis es estoient allans & venans receus, & repeus. Les Gentilshommes de chez le Roy & la plus part des Capitaines de l'armée tenoient là leur ordinaire despence. Et pource quela spaciosité & grandeur du logis ne pouuoit suffire à tous recepuoir, au dehors & pres de ses tentes auoit faict asseoir sur pippes debout & autres appuis de bois vne table longue de plus de cent pas, sur laquelle iamais viures ne failloient, & là auoient loy de repaistre tous ceulx qui la main iusques au plat pouuoient estendre. Maistres d'hostel, bouteillers, cuisiniers, & seruiteurs propices estoient illec ordon-

Gg iij

1501. nez, pour conuier recepuoir festoyer & seruir tous ceux qui là se vouloient trouuer. Et si la table estoit de trop de gens empeschée, à plaine terre, & sur le cul des charrettes estoient nappes & manteaux estendus, & là traictez & repeus les suruenans, & tous de viandes chaudes. Ce qui donna grand secours à plusieurs pauvres mordans, qui bon mestier en auoient. Ce feut bien chose merueilleuse à imaginer, mais plus estrange à regarder, veula sterilité du lieu, qui estoit maigre & affamé, pour le fournissement des victuailles, & la difficulté du pourchas que au plus pres de l'impossible failloit executer. Toutesfois à tout cetel supplément feut donné, que moyen d'abondance de viures, maniere de les plus apprestier, & temps de les vser feurent là trouuez. Quoy plus? Si n'est que le tres-noble & gentil Comte de Dunois, entre ses autres bonnes graces feut pour sa recommandée liberalité loüé de chascun, & aymé de tous. Pour rentrer en propos, je vois dire que dedans le bourg de Lugan estoient lors les Suisses tous ensemble & ne sortoient de leur fort: mais demeuroient là tout cois, sans faire bruit. Lescquels teinsrent là conseil, & parlerent de leurs besongnes, tellement que par conclusion arresterent que ils prendroient les champs, & que dedans leurs pays s'en iroient avec leur butin: si par l'effort des François le chemin ne leur estoit deffendu. Veu aussi que de tous costez estoient au danger des dictz François, & que sur eulx ne pouuoient plus rien conquerir pour l'heure. Et ainsi proposerent

de desloger vn Samedy onzième iour du mois de 1501.
 Septembre. Et premier que vouloir desemparer, Septem-
 bre.
 meirent leur guet sur le hault d'une montaigne qui
 pres de là estoit, de laquelle on pouuoit veoir tout à
 clair sortir les François vn à vn de leur camp. Ainsi
 assieient leur guet. Et ce faict pillerent le bourg de
 Lugan, & preindrent hommes, & femmes, & en-
 fans, & à tout leur butin se meirent à la file hors le
 bourg, cuidans prendre le chemin de Belinsone. Ce
 mesme iour s'estoit mis aux champs le Seigneur de
 Chaumont, Lieutenant du Roy, avec six cent hom-
 mes d'armes, & estoit ja au chemin pour s'en aller
 vers le dict bourg de Lugan, pour aller iceluy visi-
 ter, & assieger les dicts Suisses. Et si tost que le guet
 d'iceulx Suisses feut sur la montaigne, aduisa les
 François, lesquels marchaient tous en armes vers
 Lugan. Parquoy descendit de la montaigne, &
 iceulx aduertit de la dicte venue de l'armée Fran-
 çoise, qui ja estoit aux champs, & que vers Lugan
 adressoient en tres bon ordre, & moult grand nom-
 bre, & que tant tost marchaient que sans nulle faul-
 te vne heure ne demeureroit qu'ils ne les eussent en
 barbe. Dont s'arrestèrent iceulx Suisses tout court.
 Et sur ce firent à briebs mots conclusion de propos:
 disans que le mieulx de leur affaire estoit retourner
 dedans Lugan. Ce qu'ils feirent, cent d'iceulx ex-
 ceptez, qui ne voulurent retourner, mais avec leur
 part de butin hors la veüe & rencontre des François
 qui alloient à Lugan preinsrent vn chemin à quar-
 tier, & tant chercherent voye celée, que de l'armée
 de France ne feurent apperceus.

CHAPITRE LXIII.

*Comment vn Capitaine François , nommé
Bernard de Ricault , avec vingt cinq hom-
mes à cheual rencontra les dictz cent
Suiſſes , & les deſſeit tous.*

E propre iour que les Suiſſes eſtoient
faillis aux champs , & comme j'ay dit
auoyét exploicté vng Capitaine Fran-
çois , nommé Bernard de Ricault ,
eſtoit party de Sonuic , & eſtoit allé
courir ſur le chemin de Belinſone , avec vingt cinq
cheuaux ſeulement. Et en faiſant chemin aupres
d'vn villaige nommé les Tauernettes , rencontra les
cent Suiſſes , qui de ceulx de Lugan ſ'eſtoient de-
partis , comme j'ay dit , leſquels marchoi-
ent fierement , & tenoient bonne ordonnance , comme
ceulx qui n'eſtoient bien aſſeurez de leurs ennemis.
Et tantost que le Capitaine Ricault les aduiſa , meit
ſes gens en ordre , & leur dit Meſſeigneurs , à ceſte
rencontre nul de nous meſte en eſpargne par laſ-
cheté de cœur ce que pour honneur acquerir ſe
doibt exploicter , mais chaſcun de nous ſe monſtre
tel par effect comme loüable renommée le re-
quiert. Si nos ennemis ſont quatre contre vn de
nous , euertuons ſur eulx nos couraiges , renforçons
nos vouldoirs , & exploictons nos bras , & leur don-
non s

nous à droict, & que chascun aye bon pied, bonne main, & bon œil en ceste affaire, & sans faillir en ce faisant victoire nous est preparée. Sur quoy chascun des François se meit à charger son ennemy, & si à point, que au premier choq plus de vingt d'iceulx Suisses allerent par terre, morts ou affolez, & les autres se desfarroyerēt, pour cuider gaigner place aduantageuse, lesquels feurent derechef par les François rechargez, & rompus, & tant rudement pourmenez que par trois ou quatre telles recharges feurent tous aterrez, douze reseruez, lesquels feurent enmenez par le dict Ricault tous prisonniers au Chasteau de Sonuic. Messire Charles d'Amboise, Lieutenant du Roy, avec six cent hommes d'armes estoit lors deuant le bourg de Lugan, où s'estoient retirez les Suisses, lesquels ne feirent semblant de faillir de leur fort, ne maniere de vouloir faire guerre. Dont se meit le dict Lieutenant du Roy à regarder le fort des ennemis, & par les Capitaines des gens d'armes & Maistres de l'artillerie feit aduiser & visiter les lieux plus propices pour assieger & assaillir iceulx Suisses; lesquels ne sonnoient mot, mais se tenoient sur leurs gardes. Parquoy le Seigneur de Chaumont apres auoir aduisé & visité les passaiges, pour entrer sur les ennemis avec ses gens d'armes s'en retourna au camp, deliberé de delloger le lendemain avec toute l'armée, & l'artillerie, pour aller assieger les dictz Suisses.

Hh

1501.

CHAPITRE LXIV.

*Comment les Suisses, qui estoient à Lugan
deslogerent du dict lieu, & se retirerent à
Belinsone, & des escarmouches que
leur donnerent les François.*

Septem-
bre. 1



N Dimanche douzième iour du
mois de Septembre, vne bonne
heure deuant le iour, les Suisses
qui estoient à Lugan eulx doub-
tans d'estre assiegez par les Fran-
çois, pour obuier à ce deslogerét,
& emmenerent hommes, femmes, & enfans, com-
me deuant auoient voulu faire, avec tout leur pillage.
Et ainsi tous à la file se meirent à chemin, pour
eulx retirer à Belinsone. Et entour l'heure que iceulx
estoyent issus de leur fort, le Seigneur de Chaumont
fait desloger son camp, pour les aller assieger. Et
meit pietons, & artillerie deuant, & les gens d'armes
apres. Et ainsi premier que desloger auoit transmis
coureurs sur les champs; que conduisoit vn hom-
me d'armes Gascon, nommé Bernard de Scenon,
lequel avec ses gens marcha hastiuement vers Lu-
gan, pour descouurir & sçauoir des nouuelles. Lors
que les coureurs François feurent à demy mille pres
de Lugan, ils rencontrerent les dicts Suisses en ar-
mes, & bien ordonnez, avec leur butin, lesquels ne

faduancerent pour courir sus aux dicts François: 1501.
 mais auec eulx parlerent paisiblement, en disant
 qu'ils estoient tous bons François, & pour mon-
 strer de quoy, ils estoient tous signez de grandes
 croix blanches. Et disoient aussi qu'ils n'estoyent il-
 lec venus pour guerroyer le Roy: mais seulement
 pour demander le reste de leur payement, qui en-
 cores leur estoit deub du temps que le Roy Charles
 huiſiesme estoit allé au voyage de Naples, auec le-
 quel auoient esté sans auoir eu fin de payement. Et
 aussi que de la prise du Seigneur Ludouic, où ils
 estoient leur estoit encore deus des gaiges de reste.
 Plusieurs autres choses alleguerent & demanderent
 iceulx Suisses. Mais toutesfois de leur different ils fai-
 soient Iuges le Lieutenant du Roy, & les autres Ca-
 pitaines de l'armée de France. Et ce dict, les coureurs
 François retournerent arriere, & trouuerent aux
 champs l'armée pour aller assieger Lugan. Du dire
 & demander des dicts Suisses emboucherent iceulx
 coureurs le Seigneur de Chaumont, & de la faillie &
 retraincte d'iceulx, lesquels ce pendant marcherent
 iusques entre le pont de la Treze, & le bourg de
 Sonuic, à deux milles loing de Lugan, sur le chemin
 de Belinsone. Et là dedans vn long pré, au pied des
 montaignes, se meirent tous ensemble en bataille.
 Qui me demanderoit que faisoit lors le Seigneur
 Iean Iacques, lequel comme dessus est dict, auoit
 esté enuoyé auec grand effort au dict pont de la
 Treze, je dis que deux iours deuant par le mande-
 ment du Seigneur de Chaumont, qui de la retraincte

Hh ij

1501. des ennemis ne se doubtoit, s'estoit rendu au camp, pour à temps aller au siege, & celuy renforcer. Or apres le Seigneur de Chaumont sçachant les diëts Suisses eulx en aller, avec prisonniers, & pillage ravis par les pays du Roy, & aussi estant aduertý de la demande qu'ils faisoient, & de ce que nonobstant leurs excez se disoient tous bons François, premier que de plus aduancer l'affaire, le voulut mettre en conseil. Auquel feurent appelez le Comte de Dunois, le Seigneur Iean Iacques, Messire Louys de Hedouuille, le Seigneur de saint Vallier, Messire Gabriel de Môtfaucou, le bastard de la Clayette, & plusieurs autres. Lesquel tous à cheual & à briefues paroles debatirent la chose en plusieurs manieres, & diuers propos. Et dirent les vns que si quelque argent estoit deu aux diëts Suisses que demander le pouuoient. Les autres proposerent contre ce disans que la demande qu'ils faisoient n'estoit fondée en raison, ny n'estoit à recepuoir, & que au Roy n'estoit de payer les debtes incongnües de ses predecesseurs: & mesmement celles dont lors estoit question, veu que de ce n'en apparoissoit que la simple demande de ceulx qui auoient sans deffý & d'emblée couru les pays du Roy, & ouuert la guerre. Et que aussi ils se disoient François, & que de leur demande se vouloient selon leur dire rapporter à l'ordonnance du Lieutenant du Roy, & autres Capitaines del'armée de France; ce faisoient ils pour eschapper, & emporter leur butin. Ce qui eust esté au deshonneur & de saduantage des François. Et que

apres leur retraicte ils eussent peu dire que malgré 1501.
la puissance de France ils auoient pillé & couru la
Lombardie, & puis sans estre combatus, s'estoyent
retirez avec le peu de nôbre de gens que ils estoient,
à la veuë de l'armée de France. Dont au pays des Li-
gues eussent peu estre & seroient mal renommez
les François, si que vne autre fois de leger & sans
crainte se feussent iceulx ou autres Suisses mis en
auant pour aultant en faire, ou peult estre plus. Par-
quoy ce propos ouïy, le Seigneur Iean Iacques, Mes-
sire Louys de Hedouuille, le Seigneur de Saint
Vallier, & plusieurs autres feurent d'aduis que aux
dicts Suisses se debuoit donner le combat. Veu aussi
qu'ils estoient en pays assez raisonnable, & que là se
presentoient pour attendre le choc. Et que pour
mieulx leur donner on debuoit faire marcher l'ar-
tillerie, & les gens de pied d'un costé, les gens d'ar-
mes & les Archers de l'autre, pour les charger à deux
rangs, & les rompre.

CHAPITRE LXV.

*Comment Messire Gabriel de Montfaulcon
fut d'opinion, que le combat ne se debuoit
donner aux dicts Suisses, pour
plusieurs raisons.*

Hh iij

1501.



Es choses dessus alleguées; Messire Gabriel de Montfaulcon, Lieutenant de cent Gentils-hommes de la Maison du Roy, reprist le propos, en disant Messeigneurs, chascun de vous tous ensemble auez plusieurs bonnes & justes raisons alleguées, si selon nostre intention la chose pouuoit sortir son effect à nostre honneur, & aduantaige, & au dommaige & perte de nos ennemis. Ce que selon mon aduis ne se peut à l'heure presente seurement executer, ne facilement faire, pour plusieurs empeschemens. Vous voyez nos ennemis en place choisie, & à leur requeste en bataille, deliberez de defendre leur querelle à tous efforts, laquelle ils disent estre bonne, & juste, & de laquelle ils nous veulent faire juges & arbitres. Ce qui est quant à ce à eulx ouuré au plus pres de la raison. Ils sont de six à sept mille bons combatans, avec sept ou huiet cent Lombards bannis de leur pays, lesquels sous le malheur de necessité virgente se couuriront des escus de vertueux couraige, comme ceulx qui par raison doibuent plus tost chercher la mort honorable; que la vie ennuyeuse. Nous n'auons gens de pied en qui nous puissions auoir seure fiance. Si nous combatons, ores que nous ayons du mieulx, les Liges se pourront reuenger pour leurs gens, declarer contre le Roy, & à plus grande puissance descendre en Lombardie, qui pour ceste heure est mal garnie de soldats François, pour garder le pays, & ioustener grand fais de guerre. Si nous les assaillons,

& que Fortune, qui de giroüettes venteuses faict son appuy, nous veuille contrarier, à ce moyen pourra naistre rebellion en la Duché de Milan, qui ne demande sur nous que quelque point de malheureux hazard pour nous donner eschec. Ceulx aussi qui sont pour le Roy au Royaume de Naples en bonne & loüable reputation, pourroient pour nostre interit estre desdaignez & mis à mespris. Sur nos ennemis y a si peu d'acquest, que pour les vouloir deffaire, aduanturer tant de gens de bien, comme icy peuuent estre, seroit ce me semble commencer vne chose sans aduiser la fin. Et ainsi l'enuie du peu de gaing nous pourroit venir à effect de grand perte. Nous ne sommes certains à quelle fin pourra tourner la chose. Au pouuoir des hommes est d'entreprendre guerres, & batailles en commencer; mais au vouloir de Dieu est d'ordonner des victoires, & donner les triomphes. Ainsi pouuons nous assaillir nos ennemis, & le combat leur donner, mais à nostre congnoissance n'est desçauoir l'effect de l'aduanture future. Donc il nous est requis sur cetellement pourueoir que par deffault de bon conseil, & ordonnance de seure conduite, nostre entreprise ne soit empeschée, ne l'affaire du Roy retardé, ne l'honneur de nous amoindry. Et toutesfois si quelqu'un pense, que pour me vouloir exempter du danger de la guerre, ou crainte de me trouuer aux horions de partir, par remonstrances de diuerfes allegations je veuille la bataille differer, non fais. Mais aussi que chascun de nous veuille penser au mieulx de ceste

1501. besongne. Et pour plus seurement y ouurer, sur ce aduifer, que tout impreueu commencement de combat est hors de remede de ressource, & en arrest final de confuse perdition. Car à recommencer ne se fait. Quoy plus? Si ce n'est que tout magnanime ne doit les perils appeter, comme fol aduanturier, ny la rencontre d'iceux fuir, comme effeminé craintif. Pour cele dis-je, que s'il est ordonné qu'on doibue combattre nos ennemis, ce ne doit estre à leur entreprise, ne sur leur delibéré propos: mais à nostre heure deüe, & en place pour nous plus aduantageuse. Encores ne sont ils hors nos dangers, ny ne seront que premier ne les puissions rencontrer en lieu cōuenable, pour aisément les submarcher & mettre à raison. Nous enuoyérons nos pietons sur les montaignes pour leur couper chemin, & les arrester s'ils se mettent à la file, ou en desfarroy. Les gens de cheual leur marcheront en queüe, & sur les ailles, & à temps leur donnerons la charge. Et suis d'aduis qu'on enuoye quelqu'un des Capitaines de l'armée derechef deuers eulx, pour veoir leur maniere, & sçauoir qu'ils veulent dire; & quelque coureurs sur leur marche, pour les amuser iusques à ce que toute l'armée à leur desloger se puisse joindre à eulx. Et ainsi sans faillir, & à nostre seureté les pourrons endommaiger, & à nous soubmettre. A l'opposite de la conclusion de ce propos aucuns des autres Capitaines François repliquerent, & dirent que les laisser ainsi aller sans leur donner le combat seroit donner occasion à plusieurs de murmurer contre

tre le los de la valeur des François, & aux ennemis renforcement de couraige. Parquoy on leur debuoit sans differer courir sus, & liurer la bataille. D'autres raisons assez feurent illecques sur ce mises sus. Toutesfois nonobstant ce la chose feut pour l'heure différée, & selon l'oppinion de Messire Gabriel de Montfaucon en feut arresté, & transmis sur les montaignes les gens de pied, pour gaigner sur eulx le chemin, & leur deffendre le passaige. Aussi leur feut enuoyé le Seigneur de Lanques à tout six Archers, pour parler avec eulx, & veoir leur contenance, lequel tout droict s'en alla au lieu où ils estoient. Lesquels trouua tous en bataille & bien arrangez avec leur artillerie, dont ils n'auoient que six ou sept moyennes pieces. Lesquels estoient dedans vn long pré, & estroit, au pied d'une montaigne; laquelle ils auoient au dos. Et tantost que iceulx virent verseulx marcher le dict Seigneur de Lanques de peu de gens accompaigné, trois de leurs Capitaines, parlans François, sortirent de leur bataille loing d'un ject de pierre, ou enuiron, & feurent parler avec luy. Lequel leur demanda pourquoy ils estoient là venus courir la terre du Roy, & luy faire la guerre? Lesquels respondirent que pour courir les pays du Roy ne le guerroyer n'estoient illecques assemblez, mais pour demander del'argent qui leur estoit deu, pour auoir seruy le Roy Charles à la conqueste de Naples, & le Roy present à la prise du Seigneur Ludouic, & en ses guerres de Lombardie, sans en auoir eu fin de paye. Et que de ce vouloient

1501. faire deüiement apparoir, & monſtrer au Lieutenant du Roy, & Capitaines de l'armée de France, leſquels ils vouloient faire luges de leur different. Et en oultre diſoient qu'ils eſtoient tous bons François, & preſts de ſeruir le Roy en tous autres affaires pourueu toutesſois qu'ils euſſent ce qu'ils demandoient. Et ſur ce ſe meit au retour le Seigneur de Lanques, & feit vray rapport au Lieutenant du Roy de la demande & reſponſe d'iceulx Suiffes. Leſquels apres auoir eſté en bataille dedans le pré ſus diët l'eſpace de ſix heures, ou plus, & auoir fait parlement avec le Seigneur de Lanques, à la veüe de toute l'armée de France, ſe retirerent dedans vn villaige pres de là contre la montaigne, & là coucherent celle nuit. Par le rapport du Seigneur de Lanques Meſſire Charles d'Amboiſe, Lieutenant du Roy, penſa que les dits Suiffes ne demandoient que moyen pour gagner pays, & eulx retirer leurs bagues ſauues. Si tolt donc qu'ils feurent deſlogez du pré, où ils auoient tenu bataille, leur meit en ſuite le Cheualier de Louvain, avec ſoixante hommes d'armes, pour les cheualcher, & ennuyer par les chemins, iuſques à ce que toute l'armée les peult approcher pour les pouoir joindre. Ainſi feurent pourſuiuis iuſques pres du villaige où ils ſ'eſtoient retirez. Chaſcun exploicta ceſte nuit au mieulx que faire le ſceut. Bon guet & eſcoutes feurent faitſ ceſte nuit des deux partis. Le lendemain, qui feut le treizieſme iour du mois de Septembre, deux heures auant le iour iceulx Suiffes deſlogerent, & le plus

Septem-
bre.

1501.
tost qu'ils peurent pour gaigner aduantage de chemin sur les François qui de presles suiuoient, se hasterent, & tant que iambes pouuoient tirer marcherent auant. Le Cheualier de Louuain, avec ses gens d'armes les poursuiuit pas à pas à leur desloger: & tant de court, que dès leur partement, qui feut deux heures auant le iour leur fut tousiours sur marche, sans leur vouloir dōner la charge iusques à ce que la clairté apparust. Iceulx Suisses marcherēt à toute diligence, & supposé qu'ils feussent bien aduertis que les François les suiussent, & que apres eulx en ouïssent le bruit, toutesfois de ce ne s'effroyerent: mais avec tout leur butin tousiours gaignerent pays. Et tant que à l'Aube du iour feurent pres d'un bourg nommé les Chappelles, sur le chemin de Belinlone, à trois milles loing de Lugā. Le Cheualier de Louuain là les approcha, & commença à leur donner escarmouches. Ce qu'il les feit mettre en ordre, & arrester tout court. Les vns avec les autres essayèrent leurs glaiues iusques au degoust du sang de plusieurs. Et comme j'ay sceu par aucuns de ceulx qui là feurent presens, l'escarmouche fut moult sanglante & domageable pour les Suisses. Car tous ceulx qui au premier choc furent rencontrez, & les tenans desordre furent par les François mis à sac, sans que nul des François fust là occis: mais seulement feurent blesez à coups de picques quatre ou cinq de leurs cheuaux. Tres-bien feit le Cheualier de Louuain & ses gens leur debuoir de les arrester, & ennuyer. Car depuis l'esclaircissement du iour iusques au soleil

1501. leuant le teinsrent en arrest, & escarmoucherent. Et lors que le iour fut clair les Suisses doubans la venue de l'armée François qu'ils sçauoient proche, au meilleur ordre que faire peurent se meirent à marcher le chemin de Belinsone. Les coureurs François les chassèrent, en leur faisant le plus d'ennuy qu'ils pouuoient pour les amuser, & donner temps au demeurant de leur armée pour les atteindre, & rencontrer, & souuent les faisoient serrer & mettre en ordre. Et tant les approcherēt, que à l'issuë du dict villaige des Chappelles dedans vn destroict se meslerēt avec eulx, lesquels bien à point se defendirent, & occirent deux des Archers du Seigneur de Chaumont lesquels s'estoyent mis à pied pour entrer dedans vne place encombreuse, où estoient les dicts Suisses, & là feurent assommez les dicts Archers sans recousse, pour trop follement hasarder le fort de la guerre, dont l'un diceulx estoit nommé Bertrand, lequel au partir du logis auoit dict à ses compaignons que la nuit de deuant auoit songé que ce iour il debuoit estre tué. Et affin que si le cas de son malheureux songe aduenoit il peust estre congneu entre les morts, il auoit par le dedans de sa chausse mis vne jartiere sur la jambe. Ainsi vsoit le malheureux d'imagination, qui souuent ayde au cas. Que fut ce, ainsi en aduint que songé l'auoit. Ores ne sçais-je que dire de ce si ce n'est que tout songe n'est men songe. Pour rentrer doncques, lors que les dicts Suisses ainsi se retiroient eulx & leurs bagues, au renfort du Cheualier de Louvain veinrent

quatre vingts cheuaux legers, que conduisoient le Seigneur de Lanques, Ferry de Mailly, Baron de Conti, & vn nommé Adrian de Brimeu Seigneur de Humbercourt, lesquels auoit là enuoyez le Seigneur de Chaumont, Lieutenant du Roy, lequel marchoit apres avec toute l'armée. Et tant cheuaucherent iceulx coureurs que à l'issüe du bourg des Chappelles, demie heure ápres soleil leuant se joignirent avec le Cheualier de Louvain, & là derechef recommencerent l'escarmouche sur les dicts Suisses. Lesquels tousiours en eulx deffendant marchoiert le plain pas, & se retiroient. Par maintes fois feurent chargez, & plusieurs d'eulx blesez, & occis: mais tres-bien se defendirent, & tant que apres coups recharger, & escarmouches, sans ce que le surplus de l'armée de France les approchast iusques à joindre, ne que les gens de pied qui estoient sur les montaignes leur empeschassent le passaige, avec tout leur butin se retirerent à Belinsone. Et ce faiët, voyans les François que aultre chose ne leur pouuoient faire, tous ensemble se retirerent vers Milan: & de là feurent renuoyez à leurs garnisons. Le Cardinal d'Amboise, qui estoit encores à Come, sçaichant que les dicts Suisses s'estoient retirez voulut desloger: & si tost que l'heure luy sembla bonne de ce faire, se meit aux champs, & prit le chemin droiët pour tirer à Lumel, vne Comté de la Duché de Milan, que le Roy autresfois luy auoit donné, auquel lieu se reposa iusques à ce que pour les affaires du Roy luy conueint desloger.

CHAPITRE LXVI.

De la mort du Seigneur de Montpensier, & de plusieurs autres lesquels ce temps durant moururent de là les monts.



STANT par le pouuoir du Roy Naples conqueltée, son armée de mer mise au danger du vent, & les Suiſſes chasſez de Lombardie, reſte à dire que apres toutes ces choſes la mort qui à nul pardonne, a voulu coups ruer à toutes mains, ſans eſpargner homme de quelque eſtat. Et pour ſur ce commencer noſtre Elegie, diray que le Seigneur de Montpensier eſtant lors à l'entrée de ſes ans floriffans, au pourchas del'accroiffement de ſa valeur, & en propos de proſperer en vertus, apres auoir à la conquelte de Naples, au ſeruice du Roy tant à droit exploicté les armes, que de tiltres d'honneur auoit ſa renómée enrichie, acquis los immortal, & maintenu loüable Cheualerie, mourut dedàs la ville de Naples, côme dict eſt. Ne feult ce pas grand dommaige? I'en laifferay le iugement à ceulx qui l'intention de ſon vouloir, l'effect de ſes œuures, & le prix de ſa valeur ont cõgnu. Quoy que ce ſoit, de ſa mort feut le Roy grandement en douleur, & marry tres-ame-rement, & tant que apres la perte du corps voulut auoir ſouuenance de l'ame. En commemoration

de laquelle dedans la grande Eglise de saint Iean 1501.
de Lyon fait faire Obsequel lametable, & funeraille
feste. Le dedans del'Eglise & tout autour fait cein-
dre d'un drap de velours noir, semé des armes de
Bourbon, dont il estoit issu, & portoit le nom. De-
dans la grande nef del'Eglise estoient tant d'hom-
mes veltus de deuil, tant de torches & cierges ar-
dants, que à mon pouuoir ne fut de les pouuoir nom-
brer. Tous les Prestres, qui là se peurent trouuer, &
celebrer Messe, & par toutes les Eglises, & Chappel-
les de Lyon, leur payez & repeus. La grand Messe
fut celebrée au Maître Autel de la dicte Eglise par
vn Euesque Suffragant de Lyon, & chantée solem-
nellement par les Chantres de la Chappelle du Roy,
& tout le seruice tant piteusement fait, que à tous
les presens fut spectacle de mort lamentée, & perte
regretée.

En ce mesme temps dedans la Ville de Milan, fut
tué vn Gentil-homme François, nommé Hector
de Montenart, Gouverneur d'Ast pour le Roy, &
fut occis par vn nommé le Marquis de Ceue, du-
quel iceluy Montenart occupoit par force les terres,
& ne les vouloit rendre au dict Marquis, supposé
que rendre les deust, & que par ce Marquis main-
tesfois en eust esté prié & requis. Et entre autres vn
soir sur l'heure de vespres que le dict Marquis ren-
contra dedans vne des rues de Milan ce Montenart,
lequel alloit à son logis mal accompagné, dont mal
luy en aduint, comme vous orrez, en allant de la rue
au logis, le Marquis sus dict pria derechef le dict

1501. Montenart, qu'il luy pleust rendre le sien, & que le Roy ainsi l'entendoit, en luy disant qu'il luy tenoit grand tort, & que au moyen de ce que il detenoit ses terres, deux ou trois pauvres sœurs qu'il auoit demeuroient à marier, & en danger d'estre meschantes, & luy & ses freres desheritez en pauvreté, & desaduancement. A ces paroles peu l'arresta le dict Montenart, en disant que vne autre fois en parleroient plus à plain. Dont se teut le dict Marquis, tout espris de courroux, & comme celuy qui pour l'heure fut maistre de son motif, couurit l'intention de son couraige iusques à temps, & enuoya paisiblement ce dict Montenart iusques à son logis, & là fut nouuelles de boire. Auec eulx n'auoit que vn varlet, & vn paige, seruiteurs du dict Montenart; desquels le varlet fut transmis au vin, & le paige au fruiçt, & à lauer les verres. Ainsi demurerent tous deux ensemble. Et si tost que le Marquis veit son homme au despourueu, & sans autre cōpagnée, meit la main à vne courte dague qu'il auoit & dedans l'estomac luy donna trois coups tant mortels qu'il l'atteindit au cœur, dont tout mort cheut à terre, sans iamais parler vn tout seul mot. Et ce faict, le dict Marquis, sans attendre le vin venir, s'en alla par rües obliques iusques à son logis, où monta à cheual; & sans autre empeschement se retira hors la Ville, & gaigna les champs. Ainsi en mescheut à celuy qui sans tiltre iuste se voulut emparer du bien d'autrui, & au danger de son ennemy sa vie hasarder. Dont je dis que celuy qui forfaicteur se sent, sans appuy de seure garde,

garde, ne doit cercher haineuse compaignée, en- 1501.
uieuse hanter, ou douteuse approcher.

EN ce mesme temps de là les monts moururent plusieurs bons Capitaines François, & autres amis & seruiteurs du Roy, desquels fut Messire Iean Francisque de Saint Seuerin, Comte de Gayace, lequel fut somptueusement seruy, & à triomphe funereal ensepulturé en la ville de Naples. Maints bons seruices auoit faict au Roy, & de moult secouru son armée.

A VLBERT du Rouffet, Lieutenant de la compaignée du Duc de Valentinois, mourut pareillement à Naples, lequel fut par aucuns de ses haineux empoisonné à la table du dict Duc de Valentinois.

A V S S I mourut le Seigneur de Saint Prest, Capitaine de cinquante hommes d'armes. En somme plusieurs autres François moururent avec iceux au dict lieu de Naples, dont la perte feut moult d'oultreage pour le Roy, & la mort plainte de chascun.

CHAPITRE LXVII.

*Comment la Royne s'en retourna de
Lyon à Blois.*



E dix-huictiesme iour du mois de Sep- ^{Septem-}
tembre, la Royne partit de Lyon, pour bre.
s'en aller à Blois sur Loire, où estoit lors
Madame Claude sa fille. Ce mesme
iour le Roy s'en alla en Dauphiné chasser, & esba-

Kk

1501. tre , en attendant nouuelles de ses pays de delà les monts. Et delà transmeit la poste deuers le Cardinal d'Amboise, pour l'enuoyer en Ambassade deuers le Roy des Romains, ainsi que à son parlement de Lyon luy auoit dit, & baillé sur ce à entendre son vouloir.

CHAPITRE LXVIII.

Comment le Cardinal d'Amboise fut en Ambassade deuers Maximilian Roy des Romains.



Le Cardinal d'Amboise, apres auoir eu nouuelles du Roy, & entendu son vouloir, le vingt-cinquesme du mois de Septembre partit de Lumel en Lombardie, pour aller en Ambassade deuers le Roy des Romains, qui lors estoit dedans vne Ville nommée Trente, entre les Alemaignes & Venise, laquelle Ville estoit de la Seigneurie de Saint Marc. Auec le dict Cardinal d'Amboise feurent plusieurs grands Seigneurs de France, & de Lombardie, grand nombre d'Eueques, d'Abbez, & de Protonotaires, cent des Gentils-hommes de la Maison du Roy, & deux cent Archers de la garde pareillement, & tant d'autres, que de seize à dix-huict cent cheuaulx fut accompaigné. Ce qui fut pour luy chose bien solemnele, &

tres-honorable pour le Roy. Tant cheuaucha, que le troisieme iour du mois d'Octobre fut avec tout son train, pres de Trente. Au deuant de luy, & pour le recepuoir fut le Cardinal de Gurse, qui lors estoit avec le Roy des Romains. Plusieurs autres Princes, & grands Seigneurs d'Alemaigne luy furent lors enuoyez, pour le recueillir, lesquels le conuoyerent iusques dedans la Ville, où fut logé par fourriers, luy & tous ses gens, moult bien à point, & là festoyez tous, & traictez à souhaiet par les Seigneurs, & peuple de la Ville; & les gens du Roy des Romains. Lors que le dict Cardinal d'Amboise fut prest pour aller faire ce que de par le Roy luy estoit enchargé, prit avec luy des Euesques, & autres gens d'Eglise plus solempnels ce qu'il luy pleust, avec des Gentils-hommes du Roy, & des Archers de la garde des mieulx estimez, & s'en alla deuers le logis du Roy des Romains, & dedans entra; où par le Roy des Romains, & autres Princes, qui là estoient, dont il y auoit grand nombre, fut tres-honorablement receu. Et là feist son salut comme il debuoit, & sa harangue comme il sceut. Dont il s'en acquita en maniere que ce fut au plaisir de tous, & à son honneur. Ce faict, le Roy des Romains eut avec le dict Cardinal d'Amboise plusieurs douces paroles, & amiables raisons, & entre eulx deux eurent diuers propos, solatieux passetemps, & apres ce parlerent de leur affaire, & d'un & d'autre costé plusieurs choses meirent en termes, qui moult feroient longues à racompter. Toutesfois le Cardinal d'Amboise, qui là parloit

1501. pour le Roy, & par son vouloir, dit que pour l'accroissement du bien public & entretenemēt d'heureuse paix, le Roy avec le Roy des Romains vouloit & desiroit auoir amitié, alliance, & confederation, & que pour ceste cause l'auoit le Roy illec enuoyé. Et que aussi à luy ne tiendrait que eulx, leurs gens, & leurs pays ne feussent à tousiours-mais vnis, paisibles, & adjoints; dont eulx pourroient l'vn l'autre amiablement veoir, & visiter, leurs subiects viure en franchise, & seureté, leurs amis monter en heur, & prosperité, leurs ennemis tomber en exil, & aduersité, & leurs terres & Seigneurie accroistre & augmenter. Et avec ce si le Roy tenoit tort de aucune chose au Roy des Romains, que telle raison luy en feroit que pour content s'en deburoit tenir. Le Roy des Romains feit à ce responce, disant que aussi de sa part vouloit sur toutes choses auoir amour, accointance & bienueillance avec le Roy. Mais en ce faisant demandoit que le Seigneur Ludouic, & son frere, le Cardinal Ascaigne, que le Roy tenoit en France prisonniers, fussent deliurez & mis en liberté, & que sans leur deliurance, pour estre iceulx ses alliez, il ne feroit aucun accord paisible avec le Roy. Plusieurs autres demandes & raisons meit en auant le Roy des Romains, lesquelles ne luy furent toutes accordées: mais mises sur le bureau en conseil, & par le temps de quatre iours entiers continuellement d'vn & d'autre costé debatües. Vn nommé Maistre Raimond Perauld de la Nation de France, & Cardinal de Gurce, estoit lors avec le Roy des

Romains, comme j'ay dit, & de luy bien voulu: le- 1501.
quel meit les efforts de son pouuoir aux champs,
pour moyenner entre la demande de l'un & re-
sponse de l'autre. Tellement que apres toutes alle-
gations proposées entre les dicts Princes, fut faicte
conclusion paisible, & dit que le Cardinal Ascai-
gne seroit deliuré & mis hors de prison, & la que-
stion de la deliurance du Seigneur Ludouic mise en
suspens iusques à vne autre fois. Et ce faict, la paix
fut accordée, & par tout publiée, & le Cardinal
d'Amboise acheminé pour s'en retourner deuers le
Roy. Et au depart le Roy des Romains luy feit tel
honneur que luy mesmes le conduit iusques hors la
Ville. Et tantost qu'il fut arriué en France, feit au
Roy rapport de son exploict, parquoy fut mis le
Cardinal Ascaigne hors de prison, & deliuré, com-
me au Roy des Romains auoit esté promis. Et en ce
temps fut le dict Cardinal d'Amboise faict Legat
en France, à Auignon, & en tout le Dauphiné, où
feut receu par les Seigneurs de Parlement des dicts
pays.

NOUVELLES feurent lors apportées au Roy,
que Dom Frederic venoit en France, & qu'il ap-
prochoit le port de Marseille de Prouence, pour s'en
venir en Cour, dont feurent au deuant de luy en-
uoyez l'Archeuesque de Sens, le Seigneur de Saint
Vallier, le Seigneur du Bouchaige, le Bailly de Gi-
fors, & plusieurs autres grands personnaiges, pour
le recepuoir, & conduire deuers le Roy.

LE douziesme iour d'Octobre, deux beaux Peres Octobre.

Kk iij

1501. du Plessis de Tours, de l'Ordre des bons hommes, veinrent à Lyon deuers le Roy, & luy presenterent vne haire tissüe de poil de cheual, avec douze cierges de cire, queluy enuoyoit vn beau pere du dict lieu du Plessis lez Tours, nommé Francisque de Paula, lequel estoit moult sainct homme, & estoit là du temps du Roy Louys onzième, & viuoit d'vne tres-austere & penitentialie vie, pourquoy le Roy receut volontiers le present, & feit bien traicter les messaigers. La dictè haire bailla à Messire Iean de Poictiers, Seigneur de Clairieux, & reteint les cierges.

Sy vint la fin du mois d'Octobre, le Roy, apres auoir mis à ses affaires deüe prouision, partit de Lyon, & s'en alla à Blois, où lors estoit la Royne, & Madame Claude, sa fille. Et tantost que là fut arriué, par deuers luy vint le Roy Frederic, bien accompagné, auquel feit gracieux recueil & amiable reception. Et là ordonna de son estat, en luy baillant pour pension annuelle cinquante mille francs assignez vne partie en domaine, & l'autre sur ses deniers, & payez par les Tresoriers de ses finances.

CHAPITRE LXIX.

Comment vne grosse armée de François, & d'autres Chrestiens furent par mer contre les Turcs, en l'Isle de Metelin pres de Constantinople.



PORCE que plusieurs choses en
 mesme temps & en diuers lieux
 furent faictes ceste année par les
 François, & mesmement que au
 temps de la course & descente
 que les Suisses, dont j'ay cy dessus
 faict mention, firent en Lombardie, l'armée que
 le Roy auoit mise sur mer estoit au voyage de Gre-
 ce, & exploiçoit cōme pourrez ouïr, je n'ay voulu
 entremeller les choses, mais suiure propos consecu-
 riuement du cōmencement à la fin, sans faire inter-
 ruption de cōpte, & dire sur ce que le seizeiesme iour
 du mois d'Aoust, audit an mil cinq cent vn, apres
 que Messire Philippes de Rauestain, Lieutenant du
 Roy en l'armée de mer, eut baillé saufconduit au
 Roy Frederic pour s'en aller en France, comme j'ay
 dessus escript, & que son nauigaige fut prest, auoit
 donné vent aux voilles, & adressé en Sicile, pour
 passer le far de Messine, & abreger la voye, & nauig-
 ué deux iours en mer à vent contraire; toutesfois
 au tiers iour eut temps doux & calme. Luy & ses
 gens estoient lors sur mer à l'endroiect d'une mon-
 taigne nommée Strambouly, laquelle brusle nuit
 & iour, & est moult espouuentable à regarder. Tou-
 tesfois le dict Messire Philippes, Comte de Raue-
 stain voulant plus au vray sçauoir de celles merueil-
 les, feit arrester la galere où il estoit, & prit avec luy
 le Duc d'Albanie, vn sien Confesseur Cordelier,
 nommé frere Bernardin, vn nommé Pregent de
 Jaguo, valet de chambre du Roy, six autres Gentils-

 1501.
 Aoust.

1501. hommes, & quatre Archers: puis descendit par vne
 barque iusques au pied de la montaigne, & se meit
 avec ses gens à monter au mieulx qu'il peut, & ainsi
 chemina par l'espace de quatre heures, ou enuiron, &
 tant que ja auoit passé la moitié de la dicte monta-
 gne en tel endroict, queluy & les siens estoient de-
 dans la cendre iusques aux genouils, dont ne pou-
 uoient aduancer leur train, ne passer outre, pour
 l'empeschement des grands arbres; & grosses pier-
 res dont la dicte montaigne estoit toute semée: &
 aussi estoit ja la nuit prochaine. Pourquoy adui-
 ferent que le mieulx seroit de retourner, & descen-
 dre: Veu aussi que la voye où ils estoient, leur estoit
 incongnüe, & presque inaccessible. Et ainsi s'en
 retournerent par vn autre costé auquel auoit vn
 grand bois de haulte fustaye tout brüllé, & ars, en
 sorte que tous ceulx qui par là passerent en empor-
 terent l'enseigne du Charbonnier, comme apres
 aux visaignes, mains, & habillemens d'iceulx François
 apparut, qui à la descente de la dicte montaigne
 eurent sans cesser la pluye au dos. Et tantost qu'ils
 furent descendus, & embarquez là se leua vne nüée
 tant obscure, nonobstant que encores ne feust
 nuit, que à peine pouuoient ceulx qui estoient au-
 pres & touchant la dicte montaigne, veoir icelle, &
 avec la nüée surueint vne fortune tempestueuse sur
 la mer telle que contraincts furent de prendre port
 à Milazze en Sicile, pres de la dicte montaigne de
 Estrambouly de quarante milles, ou enuiron. Et là
 ancrerent pour prendre sejour, & attendre le bon
 vent,

vent, que au troisieme iour eurent, dont leuerent voilles, & singlerent en mer droict au far de Messine: lequel passerent aisément ce dict iour, qui fut entour la feste de saint Barthelemy, & aborderent à Rhege en Calabre pour prendre là rafraischissement. Et de là Messire Philippes de Rauestain transmeit vn Gentil-homme des siens, nommé Iean du Bois rond, deuers le Capitaine Gonfals Ferrande, Lieutenant general du Roy d'Espaigne en Pouille, & en Calabre, pour sçauoir de luy si l'armée que le Roy d'Espaigne auoit promise pour le secours de la Chrestienté contre les Turcs estoit prestee, & que il estoit heure de sur ce exploicter, comme auoit esté promis entre les Roys Chrestiens long temps deuant. Oyant celuy Gonfals Ferrande ce que luy mandoit le Seigneur de Rauestain, luy transmeit vn messager pour faire responce, & dire l'excuse du Roy d'Espaigne telle, que secours de gens ne pouuoit pour l'heure donner aux Chrestiens, ne mettre armée sur mer, pour l'empeschement de certaines guerres & conquestes qu'il auoit à faire pour lors, dont ne se failloit plus fort aduancer pour la promesse de son secours. Premier que dire plus, vn peu me fault esloigner le propos de ce compte, pour y approcher le reste de ce qui en fault, & y mettre ce qui peut seruir à l'excuse du defaillant, & à la preuue de verité. Et pour conjecturer le default du secours du Roy d'Espaigne contre les Turcs, & l'intention de son vouloir, est vray que pour faire la conqueste de Naples estoit entre le Roy & luy dict, & accordé

1501. que chascun d'eulx mettroit armée en auant, & que apres la conqueste faicte, que Naples, & Labruzze avec le tiltre du Royaume demeureroit au Roy, & que la Calabre, & la Pouille seroient au Roy d'Espaigne. Dótle Roy en auoit faict tel acquit, que par les efforts, sans autre ayde, tout le dict Royaume de Naples auoit conquesté & mis entre ses mains, sans que le Roy d'Espaigne y feist autre effort, si ce n'est que apres ce son armée meit en Calabre, & en Sicile pour les garder, & leuer les proffits. Et avec ce, apres la dicte conqueste, pour pacifier le tout, fut dict, que au Roy Frederic seroit donné par chascun des deux Princes cinquante mille francs par an, ce que feite le Roy, & continua tousiours. Mais le Roy d'Espaigne en tout ce ne feist loyal debuoir, ne deub acquit. Parquoy sur ce dire se peult que le Roy d'Espaigne doubtrant que à ce moyen les François luy voulussent courir sus, & quereller les pays que à faulses enseignes tenoit du Royaume de Naples, ou bien pour au despourueu trouuer les dicts François qui s'affoiblissoient de ce qu'ils enuoyoient en Grece, & à son aduantaige leur donner quelque venüe, & sur eulx faire surprise, ne voulut enuoyer secours, ne bailler renfort contre les infideles, ainsi qu'il auoit promis, & juré, comme dict est. De la quelle chose je cesse le recit, pour passer oultre, & suiure le propos de mon voyage de Grece. Or estoiet doncques lors les Chrestiens au port de Rhege en Calabre, attendans le secours d'Espaigne. L'armée pareillement de Portugal, qui là se debuoit rendre, ne

se trouua pour l'heure presté, pour faire le dict voyage. Toutesfois par le default de tout cene feut l'entreprise arrestée, mais les François, & Geneuois, qui en nombre estoient soixante voilles, apres auoir le-journé huit iours au dict port de Rhege, & faict, comme jay dit, se meirent à voguer, & tirerent ius-ques à la bouche du Golfe de Venise, cuidans par là passer. Mais vne tempeste se leua, & vne tour-mente si grande, qu'ils feurent contraincts de re-tourner moult loing en arriere du dict Golfe, & en danger de perir tous. Car par l'impetueux souffle-ment du vent qui lors se faisoit en mer, les nauires & galeres feurent dispersées, & esloignées plus de qua-tre milles loing l'une del'autre, & vne entre autres, nommée la Paluesine, Geneuoise, laquelle donna contre terre tel choc, quetout à sec demeura sur la greue: tellement qu'on cuidoit qu'elle feust par pie-ces, & esclats. Toutesfois elle eut si peu de dommai-ge, que le lendemain à force de gens elle fut saine & sauue mise en pleine mer, & toutes les autres rassem-blées. Et ce faict, le vent fut doux, & le temps accep-table: ce qui remeit le nauigaige en auant droict au dict Golfe de Venise: lequel passerent sans nul des-tour de fortune, & preinsrent port à Zante, dont il y a de Rhege six cent milles de mer, ou plus. Le iour de la feste saint Michel furent au dict port de Zante les François, & Geneuois, où demurerent à l'ancre par le temps de quatre iours, & là cuidoient trouuer l'armée de Venise, ainsi que deuant auoit par les François & Venitiens esté dict. Laquelle ar-

1501. mée ne se trouua au dict lieu, mais encores estoit à Corso, à trois cent milles loing en arriere de Zante, où par aucunes galeres de France, qui costoyans le dict Golfe de Venise s'estoyent rendües au port de Corso, furent les Venitiens aduertis que l'armée de France & de Genes estoit ja deuant au dict port de Zante, attendans nouuelles & secours de l'armée des Venitiens. Lesquels estans aduertis de ce transmeisrent vers Messire Philippes de Rauestain luy dire, & prier, que vers Corso feist retourner son nauigaige, pour aller prendre & piller vne grosse bourgade, nommée la Valone, estant pres de là en terre ferme d'Albanie, & subiecte aux Turcs; laquelle bourgade estoit moult riche, plaine de viures, & tres-propice & à main pour les Chrestiens. Sur laquelle chose voulut Messire Philippes de Rauestain premier que aduancer de plus tenir conseil; auquel furent appelez Iames, Infant de Nauarre, Jean Stuart, Duc d'Albanie, Iacques de Bourbon, Comte de Roussillon, Messire Jean de Porcon, Messire Iacques Guibé, Iacques de Coligny, Iacques Galiot, Erué Garland, Visadmiral de Bretagne, Eurad de Vescq, Dauid Destagien, vn nommé Pregent le Bidoux, Capitaine de quatre galeres, & plusieurs autres Capitaines, lesquels meirent en aduis le dict affaire, & par diuerfes allegations le debatirent. Et mesmement fut le faict plaidoyé longuement par le Capitaine Pregent, Gascon, & Dauid Destagien, Geneuois, lesquels auoient sur la mer veu maintes aduantures, & dirét iceulx en l'audien-

ce de tout le conseil que de retourner arriere trois cent millesloing ce seroit grand retardemēt de leur voyage, & que premier que l'armée feust allée à Corso, & reuenüe où elle estoit, les François & autres qui n'auoient accoustumé longue traicte sur mer s'affoibliroient & prendroient ennuyeux sejour, & les viures qui ja appetissoient de tant se pourroient amoindrir, que ce seroit iusques à trop grand default en pouuoir auoir. Et aussi que ce pendant les Turcs pourroient eulx renforcer par mer, & enuietuailler leurs places, & en oultre que l'hyuer estoit ja prochain, qui de trop pourroit ennuyer l'armée. Et aussi qu'il estoit nouuelles que le nauigaige de Rhodes estoit ja sur mer: ainsi que auoit rapporté à Messire Philippes de Rauestain vn des Cheualiers de Rhodes des marches d'Auuergne, qui venoit du dict lieu de Rhodes, & comme il disoit auoir veu apprestier le dict nauigaige, lequel au moyen du dict retardement se pourroit eslongner sur mer par fortune de vent, ou des escumeurs de Turquie auoir quelque dommaigeux affaire, dont feurent iceulx d'aduis de ne retourner, maistirer en auant. Et en oultre dit le dict Dauid Destagien que l'Isle de Metellin, laquelle n'estoit trop loing d'illec, & subgette au Turc, estoit moult riche, fertile, & prenable, & en place propice, pour y mettre le siege, & donner assaults, & cesçauoit pource que autres fois auoit esté soldat du Turc; & congnoissoit la terre de Turquie, & les pays confins, & que là auoit plusieurs fois esté. Plusieurs autres choses touchant

1501. ceste matiere d'un & d'autre costé furent dictes, & notées; toutesfois le retourner arriere fut à la conclusion interdict, & appointé que on iroit en auant. Et sur ce fut fait responce à l'Ambassade des Venitiens que la dicte armée ne retourneroit au dict Corso: mais s'en alloit en l'Isle de Metellin, & qu'elle les attendroit. Sur ce s'en retourna la dicte Ambassade deuers Corso, où estoient les Venitiens, & là iceulx auertit que l'armée de France tiroit vers Metellin. Dont partirent du dict port de Corso, & singlerent apres. Pendant le temps que les François feurent au port de Zante, le Seigneur de Rauestain, l'Infant de Foix, le Duc d'Albanie, avec plusieurs furent dedans la dicte ville, pour eulx rafraischir, & reposer. Et là trouuerent de tres-bons vins, & viandes delicieuses, & grand nombre de filles Grecques, où les dicts François passerent temps, & aucunes emmenerent avec eulx. Si furent dedans l'Isle à la chasse des lieures, dont ils en prirent plusieurs à force. Vn Sodomite fut là brulé, lequel estoit Lombard, & des matelots des Geneuois, & fut brulé par vn Turc, qui estoit prisonnier lors au Chasteau de Zante, par default d'autre bourreau. Aussi aduint là vne merueille telle que vn soldat Geneuois, nommé l'Espece, estant dedans le Brigantin de François de Grammont, au dict port de Zante, avec les autres, apres bien boire se meit à joier aux dez avec quelqu'un, & finalement perdit tout son argent, dont plusieurs fois maugrea Dieu, & les saints, & despita souuent la Vierge Marie, mere de

Dieu, en disant en despit de Dieu, & de la pute Marie, & inuoca souuent les Diables à son ayde. 1501.
 Quoy que ce soit, apres ce la nuit venüe s'endormit dedans ledict Brigantin, & ainsi qu'il commen-
 cea à ronfler sur les ondes de la mer le monstra vn horrible monstre, grand à merueilles, les yeux gros, & flamboyans comme torches ardantes: lequel approcha le Brigantin où dormoit celuy Espece. Là furent aucuns des matelos, & autres lesquels voyans approcher ceste bellüe, cuidans que ce fust quelque gros poisson preinsrent lances, & fers, & voulurent frapper dessus: mais malgré eulx aborda le vaisseau, & se mit dessous, & tant fort le fit couller que tout cuida aller à fonds, & tant que celuy Espece s'esueilla, & tout estonné, & comme hors du sens, commença à crier, & fuir par le nauire, tressuant d'angoisse, & tremblant de peur, & finalement deuant tous ceulx qui estoient au nauire, trespucha en la mer en la gueulle de cest horrible Dragon, ne oncques puis autres nouuelles n'en fut. C'est vn bel exemple & clair miroir pour ceulx qui de blasphemer Dieu & despiter sa benoïste mere sont coustumiers. Et qui de ce ne me voudra croire le demande à Messire Antoine de Conflans, patron du nauire, lequel estoit lors au dict port de Zante, comme il me l'a recité.

Le troisieme iour d'Octobre, à vne heure de nuit, le vent fut doux, & la mer tranquille, tant que l'armée des François, & de Gennes, qui estoit lors au port de Zante, firent ancrs s'arper, & voiles ten-

Octobre.

1501. dre, lesquelles par le moyen du vent firent courir
 nauires, & galeres par le canal de la mer, & fendre
 les ondes, pour approcher les metes de Turquie. Et
 tant nauiguerent ceste nuit, que au soleil leuant fu-
 rent deuât Modon, qui est vne Ville en la Morée, &
 en terre ferme, laquelle deux ans deuât ce auoit esté
 assiegée & prise des Turcs sur les Venitiens, lesquels
 la defendirent avec l'ayde d'aucuns François, & au-
 tres soldats qui dedans estoient tant vertueusement
 que à la defence d'icelle mouturent tous le glauiue au
 poing. Helas! avec celes desolées femmes, & petits
 enfans furent par les maudiets infideles tous de-
 stranchez, & mis à sang. De ce ne diray plus, doub-
 tant de trop m'escarter de mon compte, & aussi
 pource que ce propos ne doibt icy tenir lieu. Mais
 quoy que ce soit, la dicté Ville fut prise, destruite,
 & mise à sac, deuant laquelle estoit au iour susdict
 l'armée des François, & ceulx de Genes, & là an-
 crerent, & sejournerent trois iours. En celuy temps
 huit barques de Portugal, armées, & équipées
 suiuirent le dict nauigaige, iusques à vne Isle nom-
 mée la Cephalonie, dix milles pres de Zante, &
 voyans icelux Portugais l'armée Chrestienne esloi-
 gner, s'arrestèrent deuant la dicté Isle, laquelle assail-
 lèrent, & prirent sur les Turcs, & icelle soubsmirent
 en l'obeissance des Venitiens; & ce fait retourne-
 rent en leur pays. Le Seigneur de Rauestain du port
 de Modon transmeit vn brigantin avec messaigers
 deuers Frere Pierre d'Aubusson, Grand-Maistre de
 Rhodes, qui lors estoit au dict lieu de Rhodes, loing
 de

de cinq à six cent milles de mer du port de Modon: 1501.
 pour iceluy Grand-Maistre aduertir de la venüe de
 l'armée des Chrestiens, laquelle tendoit vers Metel-
 lin, & luy dire que temps estoit de se mettre en mer
 avec sa puissance, & tirer celle part au plus tost que
 possible seroit, & que luy, qui de par le Pape estoit
 esleu Chef & Gonfannonier de l'armée Chrestien-
 ne contre les Turcs debuoir à toute diligence à telle
 affaire s'esuertuer, & employer son pouuoir. Le
 Grand-Maistre de Rhodes oyant ces nouuelles,
 manda à Messire Philippes de Rauestain, qu'il se
 meist en auant, & que de sa part il estoit si prest que
 aussi tost seroit à Metellin que luy. Le Seigneur de
 Rauestain donc sçaichât ceste responce, feit mettre
 ses gens & son nauigaige en auant par la mer de
 Grece vers le cap Sainct Ange, lequel passerent sans
 arrester. Et eulx estans à cinquante milles outre, eu-
 rent la tempeste grande, & entour trois heures de
 nuit arriuerēt là trois galeres Venitiennes chassées
 des Turcs, lesquelles demanderent secours contre
 les dicts Turcs qui pres de là estoient. Le Seigneur de
 Rauestain leur bailla les quatre galeres d'un nom-
 mé Pregent de Bidoux, dedans lesquelles se meirent
 Iacques de Coligny, Seigneur de Chastillon, & Iac-
 ques Galiot, Seneschal d'Armaignac, avec grosse
 bande de leurs gens, & à voisle tendue suiuirent les
 Turcs, lesquels n'attendirent iusques à les pouuoir
 joindre, mais iceulx rechasserēt moult tost, & loing,
 toutesfois ils gagnerent à fuir. Et tant s'ellongne-
 rent iceulx coureurs de leur armée, que long temps

Mm

1501. furent en mer, sans en pouuoir sçauoir nouuelles. Mais à temps se trouuerent ensemble, comme je diray cy apres. Et pour entrer en propos à l'armée de France me fault reuenir, que par cy deuant j'ay laissée sur mer au danger de la tourmente, qui fut si grande, que toute la nuit que les coureurs donnerent la chasse aux Turcs, la dicté armée des Chrestiens fut par tempeste & oraige menée le long de la coste de Candie, & tellement que à l'heure du soleil leuant se trouua sur le port de la Sude; à quatre milles pres de la Cité de Canée en Candie, & là se rafraischirent & auictuallèrent leurs nauires. Quatre iours entiers attendirent le vent au dict port de la Sude, & au cinquiesme feirent voile, & appliquèrent vers Milo, en l'Archipelague, terre de Saint Marc, & là feurent à flot vn iour & vne nuit premier que d'entrer dedans le port de Milo. Et le lendemain, qui fut vn Dimanche, treiziesme iour du

Octobre. mois d'Octobre, sur l'heure de tierce entrèrent dedans le dict port. Là descendit le Seigneur de Rauestain, & plusieurs Seigneurs, & Capitaines, & autres avec luy, pour ouir Messe, qui fut chantée dedans vne petite Chappelle de nostre Dame, estant sur le bord de la mer. Tout ce iour illec reposerent, & le lendemain apres disner qu'ils voulurent partir pour aller outre au dict port de Milo, où ils estoient, arriuerent trente galeres de Venitiens, bien armées, & équipées à profit. Lesquelles à l'arriuée feirent la reuerence au Lieutenant du Roy, & à son armée, & puis entrèrent dedans le dict port, auquel se repo-

ferent tous ensemble quatre iours entiers. Et cependant se rafraischirent, & feirent bonne chere les vns avec les autres, & parlerent de leur affaire, & radouberent leurs nauires, & galeres. Apres toutes ces choses, le Ieudy, dix-septiesme d'Octobre, adresserent leur nauigaige vers l'Isle de Metellin, & tant voyagerent, que sur l'heure de Vespres eurent faict soixante milles, ou enuiron, & à chef de ce surueint vn tourbillon venteux, qui leua telle tempeste que le dict nauigaige retourna arriere iusques en l'Isle, & au port de la Sude, dont j'ay dict cy dessus. Ce qui plus de trois cent milles de mer eslongna la dictée armée des Chrestiens, lesquels en ce dict port flotterent toute la nuit en grande tourmente, tonnerres, tempestes & esclairs.

CHAPITRE LXX.

*Comment les François, Geneuois, & Venitiens
approcherent l'Isle de Metellin, & de la des-
cente qu'ils y feirent, avec les escarmouches,
sieges, & assauts qui là feurent faicts.*

DV port de la Sude partirent les Chrestiens si tost qu'ils eurent vent à gré, & singlerent vers l'Isle de Chio, terre des Geneuois, & approcherent de Metellin de quarante milles, ou enuiron.

Deuant la dictée Isle de Chio ils passerent sans arre-

M m ij

1501. ster, & tant voyagerent, que vn Mercredy, vingt-
 Octobre. troisieme iour du mois d Octobre, approcherent
 la dicte Isle de Metellin de tant que les tours & le
 chasteau de la ville peurent veoir clairement. Dont
 les Patrons des galeres, & autres mariniers, quiles
 Isles & pays de Grece congnoissoient, aduertirent le
 Seigneur de Rauestain que Metellin leur estoit en
 veüe, & que temps estoit de mettre peine de l'ap-
 procher, & faire descente. Et dirent que tout droi-
 ctement conduiroient le nauigaige au bord de la
 mer, où failloit prendre terre. Dont le dict Seigneur
 de Rauestain feit adresser les voilles celle part, &
 nauiguer le plus tost qu'au possible feust du vent.
 Et tant que sur les dix heures du matin arriuerent à
 vn mille de Metellin, prests de mettre pied à terre.
 Là feurent les Chrestiens en veüe de leurs ennemis,
 desireux de les trouuer, & enuieux de les combattre.
 Lesquels pareillement tantost qu'ils sçurent ceste
 venüe, au droict de la descente de la mer atiltrent
 l'artillerie sur les murailles, & dedans les tours de la
 dicte ville, d'où ils pouuoient aisément tirer iusques
 dedans la mer, & battre les nauires qui là vouldroient
 aborder. Car de l'un à l'autre n'y auoit qu'un bon
 ject d'arc. Pareillement ordonnerent gens à la gar-
 de de la dicte Ville, & meirent leur grosse puissance
 de coureurs, pour saillir & escarmoucher avec les
 Chrestiens, & leur deffendre l'entrée de l'Isle, quand
 temps viendroit. Et en somme si à point dresserent
 leur affaire, que bien monstrent estre curieux de
 la garde de leur dicte Ville. Et si tost qu'ils veirent

approcher les Chrestiens, sonnerent cors, & buccines, & coururent aux armes. Lors les vns se meirent à la garde de la Ville, & les autres sortirent aux barrières, pour icelles defendre. L'armée des Chrestiens estoit lors à vn mille pres de l'entrée de l'Isle de Metellin, presté à descendre, toutesfois pour aduiser au mieulx de l'affaire, & sur ce tenir conseil, là arrestèrent galeres, & nauires, où demurerent deux iours. Pendant lequel temps les galeres, qui entre le cap de Sainct Ange & la Sude suiuirent les Turcs, comme j'ay dict, se rendirent là. Et aussi fut donné ordre à la garde des dicts nauires, & descente du port, & enuoyé coureurs vers Constantinople. Tantost que les ancres feurent à fonds, quarante ou cinquante Venitiens se meirent dedans vn brigantin, & tirerent vers l'Isle de Metellin, à quartier de la dicte Ville, & feirent descente pour chercher de l'eau douce. Ils trouuerent vn villaige de Grecs à l'escart, & là ainsi que les vns tiroient de l'eau, les autres se meirent à piller le dict villaige, & apres qu'ils eurent pris ce qu'ils peurent, trouuerent la femme d'un Prestre Grec, (Les Prestres sont tous mariez en Grece,) & auoit la dicte femme deux gros boutons d'argent pendus aux oreilles. Iceulx Venitiens meirent là les mains, & tirerent les dicts boutons à toute force, & tant que icelle femme se preint à crier à l'ayde: toutesfois pour ce ne lascherent leur prise, mais voyans que à la secousse ne les pouuoient auoir, tirerent à vn cousteau, & pour auoir plus tost faict, luy coupperent les oreilles, avec les dicts boutons.

Mm iij

1501. Dont le dict Prestre Grec s'en alla plaindre à Messire Philippes de Rauestain, Lieutenant du Roy, lequel en feit faire enqueste, & ce fait, en aduertit le Capitaine general des Venitiens, qui feit punir iceulx malfaiçteurs, dont ceulx qui auoient pillé le dict villaige eurent l'estrapade de cordes, & celuy qui auoit couppé les oreilles à la dicté Grecque, fut pendu à l'antenne d'une galere. Apres ce vn Capitaine François nommé Pregent le Bidoux, fut par le dict Seigneur de Rauestain enuoyé visiter la Ville, & icelle aduiser, pour sçauoir la descente de l'Isle, & les lieux plus à main, pour mettre le siege deuant la dicté Ville. Lequel Pregent avec quatre galeres bien armées fut enuironner & aduiser la dicté place. Et en ce faisant les Turcs luy tirerent plusieurs coups d'artillerie, & luy à eulx. Et à grands coups de pierres, de fleches, & d'autre traiçt donnerent contre les galeres du dict Pregent, & dedans, sans que de sa part les laissast impunis; mais leur tiroit traiçt, & artillerie à toutes mains, tant que plusieurs d'eulx n'eurent cause d'y reuenir vne autre fois. Si visita le dict Pregent la dicté Ville de Metellin de tous costez. Et ce fait, se meit au retour deuers l'armée des Chrestiens, & feit son rapport de ce qu'il auoit veu, & congneu. Et le vingt-sixiesme iour d'Octobre, sur le poinçt de dix heures du matin, Messire Philippes de Rauestain, voyant qu'il failloit mettre pied à terre, & assaillir les Turcs, ordonna gens en suffisant nombre à la garde des nauires de chascune compagnie. Pour ce faire meit galeres & brigantins en

auant, pour courir & guetter la mer, & voulut qu'à 1501.
la descente feussent deux mille François, & mille
Venitiens, & Geneuois, avec dix-huict pieces d'ar-
tillerie grosses, & six moyennes. Avec ce comman-
da à chascun de se confesser, & mettre en bon estat,
ce que plusieurs feirent, lesquels eurent remission
plainiere de tous pechez, par la puissance de nostre
sainct Pere le Pape, baillée à vn Cordelier, nommé
frere Bernardin, Confesseur du dict de Rauestain,
qui là estoit. Et ce faict, Messire Philippes de Raue-
stain, Lieutenant du Roy, considerant que à tel af-
faire exhortation de proffit salutaire, & paroles de
vertueuse remonstrance renforcent de moult le
vouloir de ceulx qui par armes veulent approcher
de l'honneur, en la presence de tous les Chrestiens
qui là estoient dit ceste Oraison, ou semblable.

O R est le temps que pour multiplier le fruiet de
nos labours, accroistre le los de nostre valeur, &
aduancer la gloire de nostre renommée, nous tous
ensemble, comme champions de Iesus-Christ, de-
fenseurs de la foy Catholique, & gardes de la terre
Chrestienne, à cest affaire debuons le comble de
nostre sçauoir appliquer, la somme de nostre auoir
eslargir, & la vertu de nostre pouuoir employer,
Messeigneurs, freres, & amis. A tant sommes ores
venus, que en veüe d'œil nous est present ce que
longuement par le vouloir de nos cœurs auons de-
siré, cerché au trauail de nos corps, & rencontré par
diligence de poursuite. Ce sont les Payens mau-
dicts ennemis de nostre sainte foy, destructeurs

1501. de nos terres, & pays, sur lesquels courir nous con-
 uient par soing laborieux & vertueux effort. A nuls
 tant piteux vsaiges, & œuures si dignes de merite,
 que à la defence de nos freres, & soustien de nostre
 foy, à l'augmētation de la Chrestienté, & au seruice
 de nostre Seigneur Dieu pouuons exploicter les ar-
 mes. Dont la raison nous commande, pour cest
 œuvre parfaire, desployer nos bras, efforcer nos
 corps, & hasarder nos vies, pour iustement dessaisir
 les Payens de ce que faullement ont vsurpé & rauy
 sur la Chrestienté. Nous les voyons sur ceste Isle fer-
 tile, & place forte de Metellin, par le pouuoir de for-
 ce seigneurie, & plusieurs autres occuper, lesquelles
 jadis puis nagueres ont esté entre les mains des
 Chrestiens & à eulx sujettes. Faisons doncques que
 ce qui par droict nous appartient, qui Chrestiens
 sommes par la force de la payenne gent ne nous soit
 par nostre default tollu, & que pour ceste entreprise
 mettre à chef, crainte de mort temporelle ne nous
 desuoye du droict sentier de vie eternelle, & de l'im-
 mortel honneur que nous aurons si pour ceste que-
 relle defendre, demeurons vainqueurs, ou que mou-
 rir nous faille. Sus doncques Seigneurs, mettons la
 main aux armes, & tant à droict les exploictons à
 ceste premiere rencontre, que ce soit iusques au
 dommaige & esbahissement des infideles, au profit
 & plaisir de la Chrestienté, & à nostre honneur &
 aduantaige.

Ces paroles dictes, qui eut veu lors galeres, carra-
 ques, & nauires tout d'un front à voilles tendues ap-
 procher

procher l'entrée de l'Isle de Metellin, ouy sonner 1501.
trompettes, clairons, & grostabours de Suisses, tonner & tempester l'artillerie des nauires, & de la Ville, les Chrestiens à banniere desployée descendre des carraques, & nauires, & gagner terre, ouy bruit de gens d'armes sur la riuë de la mer, & les Turcs tirer traict & artillerie sur nos gens, & sortir de la Ville à grosses compaignées, à cheual, & à pied, on eut bien peu pëser & dire que là y auroit dure meëlée. Ce qui fut. Car à la descente des Chrestiens iceulx Turcs à grand nombre sortirent de la Ville à pied, & à cheual, iusques hors le bourg d'icelle, & là pres, & au dedans des barrieres se meirent en ordre pour attendre les Chrestiens, lesquels estoient ja descendus avec leur artillerie, & tous en bataille. Et ainsi tous ensemble & bien ordonnez approcherent les barrieres, où estoient les Turcs, & là commencerent l'escarmouche à tous efforts, laquelle fut bien assailie, & bien deffendüe. Car les Chrestiens y exploicterent leur force, & les Turcs leur pouuoir, & à coups de traict les vns contre les autres long temps se combattirent. Lors s'aduancerent les Gëtils-hommes François & autres, de tant que apres long vol de traict, & durs coups de main furent mis à l'essay iusques au desaduantaige des Turcs, qui par les assaults des Chrestiens furent outrez & perdirent place. Là estoient des premiers plusieurs Gentils-hommes François, grand nombre de Bretons, & grosse route d'autres, lesquels chasserent les Turcs battant & tuant iusques dedans les portes de leur dictë Ville;

Nn

1501. & chascun des Chrestiens feit merueilleux efforts, & loüables armes. Vng jeune Gentil-homme, nommé Gilbert des Serpens, Seigneur de Citain, de ceulx de la Maison du Duc Pierre de Bourbon, estoit à ceste chasse des Turcs, lesquels à fuir esloingnoient les Chrestiens, & approchoient leur fort: dont iceluy Citain s'aduancea detant, que de plus de demy ject de pierre esloingna ses compaignons, & sans regarder qui le suiuoit approcha les Turcs iusques à peu pres les pouuoir joindre: lesquels voyance Chrestien tout seul, hors la foule de ses gens, retournerent deux contre luy, le cimettere au poing, & tres-rudement l'assaillirent, & luy à eulx la demie picque à la main, dont si à droiçt les seruit, que leurs jacques embourrez perça en tels endroits, que à l'enseigne de leur sang furent congneus les exploicts de les armes. Somme là n'y eut Chrestien, qui sur les Turcs ne meist le glaiue en besongne. De ce plus ne diray, si n'est que ces Turcs, les vngs blesez, & les autres esbahis, se retirerent à leur perte & desaduantage. Les Chrestiens donnerent à iceulx là chasse, comme j'ay dit, & sur eulx gaingnerent les faulxbourgs, & le bouleuart de la Ville, sans faire perte que de trois hommes, desquels les deux furent tuez à coups d'artillerie à la descente des nauires, & l'autre nommé l'Enfant de Paris, portant l'enseigne d'un Capitaine de pietons, dict le bastard de la Roche, lequel fut à la dicte chasse enuironné des Turcs, & tellemēt persecuté, que non obstant le tranchant de son espée, que à tour de bras

pour la deffence de son corps meist sur les dicts infideles à l'espreuue, à la parfin sur son corps destranché, & sanglant rué par terre, & son ame transmise és cieulx. Pour venir au compte, tantost que les Turcs feurent retirez dedans leur Ville, & aux Chrestiens veirent leurs bouleuarts posseder, ils eurent quelque peu de frayeur, & doubte de leur affaire: toutesfois pour à ce pourueoir aduiserent sommairement de faire vne issüe par la mer, hors de la veüe de nos gens, & leur donner quelque nouuel empeschement. Ce qu'ils feirent: Car secretement & sans bruit, si tost que leurs bouleuarts feurent gaingnez, sortirent par derriere grand nombre d'iceulx, estans dedans barques & brigantins, & au desceu des nostres approcherent vn grip vis à vis du bouleuart, où nos gens estoient, & là dedans entrerent & affusterent trois pieces d'artillerie, & contre les bouleuarts, & sur ceulx qui autour & dedans estoient ruèrent tels coups, que pour l'ennuy & danger d'iceulx furent les dicts bouleuarts des Chrestiens desamparez, dont les Turcs de la Ville, au nombre de quarante feirent vne saillie sur nos gens, les vns à cheual tenans la targuette longue en l'une des mains, & en l'autre le cimeterre tranchant, vestus de longues robes troussées à la mode des Albanois, & la tocque de linge blanc entortillée en la teste, sur moyens cheuaulx, vistes comme le vent, aduantaigeusement montez, & les autres à pied, tenans au poing l'arc Turquois bandé, & fleches courtes, & gresles bien aigües, dont ils faisoient grande passée à mer-

1501. uelles. Ainsi sortirent sur nos gens, & commencerent vne legere escarmouche, en laquelle furent tuez trois Chrestiens tenans l'escart à la veüe de nostre armée, qui pour ce de rien ne se meust, doubtant plus grand effort d'ennemis sortir aux champs. Toutesfois se feut tout. Là estoient plusieurs Gentils-hommes jeunes, & adextres, à qui la veüe de ceste escarmouche par trop ennuyoit, pour ce que sans elle se faisoit, dont entre autres le Marquis de Bade pria le Seigneur de Rauestain Lieutenant du Roy, luy ou autres contre iceulx Turcs estre enuoyez, disant que dommaigeuse honte & casinconuenient estoit de les veoir si pres de l'armée Chrestienne respandre le sang regeneré, dont sans plus attendre se debuoient recueillir à la pointe du glaue. Messire Philippes de Rauestain pensant que assez d'heure se pourroient les Chrestiens avec les Turcs assembler differa. Le dict Marquis pour ce ne laissa que à chemin droict aux Turcs ne se meist l'espée au poing, & le suiurent par nombre huit Gentils-hommes, & quelques pietons, desquels furent Gilbert de Chasteauuert, Philippes de Viri, Sauoisien, Jean de Boucan, de ceulx du Seigneur de Rauestain, Pregent de Iagu, Varlet de Chambre du Roy, & d'autres iusques au dict nombre, lesquels furent escarmoucher avec les Turcs tant hardiment, & si à droict, que les infideles furent reboutez bartans iusques dedans les portes de la Ville, & aucuns d'iceulx tuez & assommez encontre les dictes portes. Et là vn nommé Pregent de Iagu, Breton,

avec vne demie picque donna à vn Turc qui à luy se combattoit à trauers du corps, tellement que ice-luy Turc mourut contre la porte de la Ville. Ceste retraicte faicte, Messire Philippes de Rauestain feit approcher ses gens & l'artillerie iusques dedans les fosses. Et là commencerent la batterie contre vne tourelle au bord de la mer, & moult forte. Aussi feit battre vnes fausses brayes touchans à la dicte tour, pource que de ce costé tiroient les Turcs à coups de trait & artillerie sur nos gens, & tellement que nul n'osoit passer deuant la dicte place, sans chercher mortel hazard, auquel se trouua vn Capitaine de nauires nommé le petit Porcon, estant avec le Seigneur de Rauestain, & en allant du nauires au logis du dict Comte de Rauestain, & atouchant de luy d'un coup d'artillerie fut attainct au trauers des reins, dont soudainement mourut en la place. La batterie fut continuée, tant que aucuns Capitaines de nostre armée furent d'aduis que c'estoit iusques à suffire, pour y debuoir donner vn assaut. Et mesmemēt Messire Iean de Porcon, Seigneur de Beaumont, Capitaine de la Charante, lequel dit que le plus tost assaillir ses ennemis estoit retarder l'aduis de leur deffence, & que qui plus attendroit là sans donner l'assaut, ce seroit bailler terme de pouuoir reparer & fortifier ce qui estoit abbatu & mis par terre, dont seroient les Chrestiens à recommencer. Et aussi que par ce premier assaut on pourroit congnoistre le vouloir & veoir la valeur des Venitiens, & Geneuois, & de tous ceulx qui là estoient, & avec

1501. ce tout à clair entendre la maniere de la deffence des Turcs, & sçauoir la fortification de leur Ville. Plusieurs autres propos sur ce teint le di& Porcon, & tant que beaucoup de jeunes Gentils-hommes, & autres Chrestiens recommanderent son dire: dont Messire Philippes de Rauestain, Lieutenant du Roy, ayant le poids de la charge de ceste besongne sur les bras, doubtant aussi que le trop hastier ne feust retardement de plus, dit au Seigneur de Beaumont, je sçay bien & congnois assez que de noble couraige & vertueux vouloir procede vostre propos, Capitaine, & que le long attendre d'enuahir nos aduersaires ne nous peult que ennuyer, & abreger nos viures, & donner temps à nos ennemis de eulx renforcer de gens, & fortifier leur place: pourquoy le plus chaudement les assaillir nous est requis: mais que ce soit à nostre aduantaige. Dont sur ce nous fault aduiser, & ne nous hastier de tant, que par le malheur d'un seul hazard nous perdions le jeu d'attente, qui tient du tout au droict donner de ce premier assault, qui ne se doit liurer sans sçauoir à qui mieulx auons à faire congnoistre les entrées, & veoir la fortification de la Ville. Autrement pourrons faillir à nostre entreprise, & estre à nostre deshonneur & dommaige tant lourdement reboutez, que pourrons faire telle perte que de ce reproche vituperable à iamais ne nous fauldra. Et si par aduanture nostre hastiueté improuueüe ou effrené desordre ce malheur nous procure; que feront nos ennemis, si on prendre cœur, & resiouissance, &

au contraire les nostres peur, & esbahissement dont 1501.
 nostre bonne reputation pour ce diminuera, nostre honnorable renom décroistra, nostre pouuoir redoubté s'affoiblira, & finalement tout nostre affaire pourra aller au contraire de nostre intention, & prendre fin au pis de nostre desaduantaige. Donc mon aduis est, que premier que plus en faire, debuons sçauoir de la force & estat de la Ville par espies. Et pource de ma part j'ay des eschelleurs que je mettray à l'aduanture, pour en aduiser l'erreur, & sçauoir la verité. Assez d'autres bons propos, saines opinions, & claires remonstrances feit Messire Philippes de Rauestain, pour debuoir estre creu, ce qui ne fut dont mal'en adueint. Qui fut ce? Si n'est que le Capitaine Messire Jean de Porcon ne voulut approuuer le susdict propos: mais se teint à son opinion, & tous ses motifs meist aux champs, & arresta sa pensée à vn vouloir de donner l'assault aux perils & dangers de luy & de tous ceulx qui à l'affaire se trouueroient. Le Seigneur de Rauestain meit en auant ses eschelleurs, lesquels approcherent la tour battüe, & là monterent le plus subtilement qu'ils peurent, & en maniere que du dessus de la dicte tour ils aduiserent la maniere de la garde des Turcs, & la fortification de leur Ville. Coups de traict & d'artillerie les buffeterent souuent & menu par ceulx de dedans la Ville. Toutesfois ils se defendirent sans autre dommaige en auoir, & leur rapport feirent de la forteresse des Turcs telle que ils dirent l'entrée tant difficile & malaisée, que mortel danger

1501. cercheroient ceulx qui par ce costé vouldroient à force entrer dedans : pource que les fossez estoient larges, & profonds, les faulses brayes droictes espoiffes, & mal battües, les murailles bien fortes & garnies d'artillerie, & de gens, lestours bien persées, & defensables; & en somme le tout aduantageux pour les ennemis. Dont le rapport d'iceulx ouï, le Seigneur de Rauestain ne fut d'aduis de là donner assaut, iusques à ce que d'un autre lez feust battüe la muraille, & trouuée plus aisée bresche, & passée plus aduantageuse. Toutesfois à ce ne se voulut consentir le dict Capitaine, Messire Jean Porcon : mais ja auoit suadé & gagné plusieurs jeunes Gêtils-hommes François, & autres, qui ne demandoient que execution de guerre, & mortelle picque contre les infideles. Desquels estoyent Iacques de Bourbon, Comte de Roussillon, René d'Anjou, Seigneur de Maizieres, Gilbert de Chasteauuert, Philibert de Damas, Aymon de Viuonne, Messire Tristan de Lauedan, Messire Jean de Tinteuille, le jeune Barrois, Gilbert des Serpens, Seigneur de Citain, Agremolles Blancquefort, Iacques Carbonnel, Seigneur de Cerance, & plusieurs, lesquels vn bien matin, & à l'entreprise du dict Capitaine Porcon, sur l'aube du iour approcherent la muraille, sans faire que bien peu de bruit, & à l'heure que l'assaut commencerent faisoit broüée tant obscure, que ceulx qui au bord des fossez estoient ne pouuoient clairement veoir sur les faulses brayes : lesquelles ils eschellerent, & monterent sus enuiron de vingt à vingt-cinq Gêtils-

Gentils-hommes sans plus, tous de bon vouloir, & 1501.
 bien deliberez. Au quartier fenestre estoit vne grosse tour fort battüe, estant à l'entrée de la mer, pour laquelle assaillir furent ordonnez Messire Tristan de Lauedan, Messire Iean de Tinteuille, & vn autre qui portoit leur enseigne avec six vingt autres hommes François. Tout le premier monta celuy Cheualier de Lauedan, & les autres apres; tous armez. Et est à sçauoir que tout ainsi que les autres Chrestiens monterent la muraille des faulces brayes, en mesme heure feut la tour eschellée. Les Turcs estoient au dedans de la dictte tour, les vns en vne voute, les autres sur les murailles, & les autres à la deffence des faulces brayes. Lesquels furent par les Chrestiens rudement assaillis, & combatus à outrance: mais ils se defendirent comme gens de cœur, & hommes bellicieux. Car ceulx qui estoient dedans la tour desous nos gens, à force de grands feux, & de fumée, coups de traiçt, & poux de lances ennuyerēt moult les nostres. Et si de malheur adueint que nos Canonniets mesmes qui pour l'obscurité de la broüée ne les congnoissoient, penserent que ce feussent Turcs, tirerent contre eulx, & plusieurs en assollerent. Ainsi auoient de leurs ennemis dure deffence, & de leurs amis dangereux assaults. Parquoy feurent contraincts de perdre place, & eulx retirer de celle tour. Mais ce ne fut pas sans long combat tenir aux Turcs, & que plusieurs d'iceulx ne feussent morts, & assollez. Car chascun des Chrestiens tout au plus droict que possible estoit leur donnoient coups, &

1501. entre autres, ainsi que j'ay sceu par ceulx qui pour l'auoir veu m'en ont aduertty, le Cheualier de Lauedan feit là tel exploict d'armes, que ce fut iusques à l'espouuementement & dommaige des Turcs; & tant que au trenchant de son espée en estoit telle enseigne attachée, que la veüe sanglante en descouuroit le cas mortel. Que diray-je plus? Si ce n'est que celuy Cheualier premier monta la tour, continuëlement l'assaillit, & dernier la desempara, & à la retraicte sousteint le faix des ennemis iusques à ce que tous ses compaignons feussent en bas, & malgré ses aduersaires se retira. Dont apres le vray dire de ceulx qui de ce bienfaict l'accusent, j'ay voulu par le mien escript de tiltre de loüanges sa memoire enrichir. Et ce pour à luy profiter, & donner exemple aux autres. A la fin de ce compte m'est à dire de ceulx qui sur les faulses brayes estoient, lesquels à toutes mains combatoient les Turcs, & là moult hardiment les assaillit le Capitaine Messire Jean de Porcon, comme celuy qui mieulx aimoit mourir en ceste besongne, que auoir deshonneur en son entreprise. Chascun Chrestien y mettoit son pouuoir à l'exploict, tellement que pour vn temps furent les Turcs mal menez: toutesfois tant de coups de traict, de pierre, & d'artillerie jetterent sur nos gens, que plusieurs feurent blesez. Et avec ce auoient les dictz Turcs de grands cercles plains de souffre & de poix tout autour, dedans lesquels mettoient le feu: puis les jetoient d'amont les murailles de la tour iusques sur nos gens, qui assailloient les faulses brayes, & où cela

tomboit brusloit tout. Encores auoient ils des sacs 1501.
de toiles, & de cuir, bien liez, plains de soulfre, &
de pouldre à canoni dedans lesquels estoit vn pot
estouppé, & plain de charbon viif, que pareillement
jettoient du hault des tours en bas, & à la cheute le
pot qui estoit dedans le sac se cassoit, dont le feu s'es-
pandoit par la dicte pouldre, & brusloit ceulx qui là
autour estoient. Et tel ennuy & dommaige feirent
aux Chrestiens, que besoing leur fut de eulx retirer.
Plusieurs furent là blessez; & mesmement le Cap-
taine Messire Iean de Porcon, lequel estoit sur vn
pan de mur rompu au bas d'une tour, dedans la-
quelle estoit grand nombre de Turcs, lesquels
jettoient pierres de faix, & lances de feu sur le dict
Porcon, & sur ceulx qui avec luy assailloient la mu-
raille, & d'une pierre assenerent le dict Porcon sur
son armet: tellement que à la coulée les cloux qui te-
noient la bauliere furent rompus; dont la dicte ba-
uliere cheut au pied de la muraille par au dedans de
la Ville, où y auoit grand force de Turcs qui defen-
doient la dicte muraille, laquelle n'estoit tant bres-
chée que du hault iusques au bas du costé de la Vil-
le n'eust la haulteur d'une picque. Et voyans iceulx
Turcs le dict Porcon desarmé le dessoubs du visai-
ge, l'un d'iceulx luy donna d'une picque sous la
gorge tel coup, que le fer luy sortit au trauers du vi-
saige: duquel coup il fut moult estonné, & dont il
mourut puis apres. Et ce faict, apres long assaut se
retirerent les Chrestiens. Les Turcs voyans la dicte
retraicte approcherent les faulces brayes, & là com-

1501. mencerent à charger nos gens, qui ja se retiroient toutesfois dessus les dictes faulx brayes demeurèrent des derniers trois Gentils-hommes, c'est à sçauoir Louys de Bourbon, Comte de Roussillon, Philibert de Damas, & vn autre nommé Gilbert de Chasteauuert; lesquels comme jeunes, hardis & cheualeux qu'ils estoient, sousteyrent le combat contre les Turcs moult longuement. Le Comte de Roussillon à cest affaire feit aux Chrestiens congnoistre la valeur de sa personne, & aux Turcs sentir le pouuoir de sa force. Car à tour de bras, la hache au poing, se teint ferme contre eulx, en les repoussant & chargeant à toutes heurtes. Pour accourir tant feit que de tous les Chrestiens qui estoient au siege fut loüé haultement, & tenu en bonne estime, & oultre le vouloir & malgré le pouuoir des Turcs, qui moult l'ennuyèrent, se retira, & gaigna seureté. Plusieurs Chrestiens furent là blessez, & occis; & tant que le dict assault fut cessé au desaduentaige de tous ceulx qui à ceste folle entreprise se trouuerent, & pour n'auoir voulu croire le Chef de l'armée, & à luy obey; Ce qui est contre les ceremonies de l'ordre militaire, & repugnant aux droicts de discipline de Cheualerie. Or reuenons au parfaire de la fin de nostre assault, qui fut tel que les Chrestiens, comme j'ay dit, firent retraicte: mais oultre leur vouloir. Car là n'y auoit nul de eulx qui pour mieulx en faire n'eust volontiers mis sa vie en plus grand hazard. Et bien le monstrent deux jeunes Gentils-hommes, dont j'ay parlé par cy deuât, lesquels derechef nom-

merai, A sçauoir Philebert de Damas, Seigneur de 1501.
Saint Amour, au Duché de Bourgogne, & Gilbert de Chasteauuert, les biensfaicts desquels je ne
veux mettre en silence: mais de leur vertu meritoire
faire digne commemoration, disant que si les autres
Chrestiens à leur perte se retirèrent, pour leur vie
sauuer, ceulx cy honnorablement demeurèrent
pour vertueusement mourir. Car apres toute la re-
traicte de leurs compaignons, eulx tous deux en-
semble, armez de toutes pieces, l'espée au poing, sur
vn pan de mur des faulces brayes demeurèrent, & là
feirent merueilles d'armes. Car Turc ne les appro-
choit de la longueur del'espée, que du tranchant ou
de la pointe d'icelle ne se sentist iusques à l'effusion
de son sang. Somme tel chapplis de Turcs feirent
autour d'eulx, que la place estoit toute ionchée de
morts: tellemēt que de sang furent leurs espées tou-
tes teintes, & enrougies, & eulx tant foulez & bat-
tus de coups de pierres, & de dards, que en tous en-
droicts estoient leurs harnois rompus & faulsez.
Mais pource ne perdirent contre leurs ennemis pied
de muraille, iusques à ce que tant de sang eussent
rendu, que tous leurs membres en furent debilitéz,
& que de toutes parts feussent enuironnez des Pa-
yens, & d'iceulx oultrément assaillis. Ce qu'ils feu-
rent à la parfin, & pressez de tant, que en eulx defend-
ant comme sangliers aux abois, furent pris par les
mains des Payens, & à la veüe des Chrestiens, qui
secourir ne les pouuoient, cruellement martyrisiez.
Ainsi moururent glorieusement les fideles cham-

1501. pions de Iesus-Christ, qui pour le guerdon meritoire de leur loyal seruice feit leurs corps possesseurs de cinq pieds de terre, & leurs ames heritieres de tout le Paradis. Les Turcs feurent moult joyeux d'auoir ainsi repoussé les Chrestiens, & de ce plus s'enhardirent. Toutesfois tant ne feurent asseurez, que la nuit ensuiuant ne meissent la main au rempart, & l'aduis à la garde de leur Ville, & que aux places plus prochaines d'eulx, tenans leur party n'enuoyassent secretement demander secours. Car bien se doubterent que les Chrestiens ne les laisseroient à tant. Ce qu'ils ne feirent. Car le lendemain au matin recommencerent la batterie de plus belle & plus grande que auparauant, laquelle dura huit iours entiers. Et pour hastier l'œuvre feurent faictes mines sous vn pan de muraille par les pionniers, & tellement esbranlée, que plus de vingt pas en longueur fut icelle muraille aterrée. Durant ceste batterie les Turcs ne feirent nulles faillies, mais contreminerent & remparerent le dedans de leur fort comme ils peurent. Les Chrestiens, qui lors estoient du guet, alloient souuent la nuit contre leurs murailles, & là aucuns d'iceulx, qui estoient Musiciens, dirent plusieurs bons motets, & douces chansons: ce que les Turcs escouterent volontiers: & laissoient tout œuvre pour ouir la douceur de l'harmonie, sans faire semblant de vouloir mal faire aux dictz Chantres par jets de pierres, ou coups de traiçts, ne leur chanterie empescher. Là dedans fut vn Breton Bretonnant, natif de Quimperley, lequel demanda si avec

l'armée Chrestienne auoit point quelque autre Breton, pour parler à luy, auquel fut dict que si auoit, & fut à luy presenté vn pour sçauoir qu'il vouloit dire. Lequel dict en son langage, que dedans la Ville de Metellin n'y auoit plus de viures, & que les Turcs ne pourroient plus gueres soustenir le siege. Et par luy feirent demander les Turcs aux Chrestiens pourquoy ils estoient là venus, & mesmemēt aux François, auxquels n'auoient rien forsaict ne donné cause d'auoir à eulx querelle de guerre. Dont leur fut faict sur ce responſe que pource que la terre qui aux Chrestiens appartient, detenoient & auoient vsurpée; pour la recouurer estoient là venus, & pour soustenir la foy de Iesus-Christ contre iceulx Payens. Lesquels derechef feirent dire par le dict Breton que ce n'estoit pas eulx qui auoient faict mouir Iesus-Christ, ains estoient les Iuifs, & que à eulx debuoiēt auoir la guerre. Plusieurs autres questions feurent entre eulx, que je laisse, & reuiens à la batterie de la Ville, laquelle dura tant que les Capitaines & Canonniers de nostre armée dirent que c'estoit assez pour debuoir donner entrée à tous ceulx qui vertueusement y voudroient leur pouuoir efforcer. Messire Philippes de Rauestain, Lieutenant du Roy, sur ce ordonna Iacques de Coligny, Seigneur de Chastillon, avec grand nombre de François à liurer d'vn costé celuy assault, & del'autre les Venitiens. Et au premier commencer le dict Messire Philippes de Rauestain feit là plusieurs Cheualiers, & enhorta chascun de bien faire, & que

1501. nul en cest affaire meist par deffault de cœur vertueux son honneur en arriere. Et ce faict, chascun approcha le bord des fossez qui estoient profonds, & larges, entre lesquels & les murailles de la Ville y auoit des faulces brayes de la haulteur du bord des fossez, ou vn peu plus, qui ne se pouuoient battre. Car à fleur de terre estoient. Dedans les murailles de la Ville y auoit bresche en plusieurs lieux; & mesmement toutes les defences & creneaux de ce costé estoient par terre. Pour suiure propos, l'assault fut sonné, & gens d'armes avec leurs eschelles prests de donner dedans. Al'entrée des fossez estoit lors vn Cordelier, nommé frere Bernardin, lequel estoit armé soubz son habit, & tenoit au poing vne demie picque, & la raspierre à son costé, qui donna la benediction à tous les Chrestiens presens, & leur dit, que pour l'exaltation de la foy de nostre Seigneur Iesus-Christ chascun debuoit mettre sa vie en aduanture; & luy mesme avec eulx se meit des premiers à descendre les fossez. Iacques de Coligny, Seigneur de Chastillon, & vn Breton nommé Messire Guillaume Cadore, ayant l'enseigne de Messire Iacques Guibé, furent les premiers descendus. Et si tost qu'ils eurent pied à terre preinrent chascun vne eschelle, & icelles porterent au pied des faulces brayes, & là les dresserent, & moult vigoureusement l'efforcèrent de les monter. Le Seigneur de Chastillon, sans attendre autre secours, meit les pieds dedans son eschelle, l'espée au poing, & commença à monter. Mais au droict de luy & sur le mur estoit vn Turc, lequel

lequel luy laſcha vne groſſe pierre de faix tant rudement, que ſur la teſte luy froiſſa ſon armet, ſi que pour la peſanteur d'icelle pierre le dict Sieur de Chaſtillon alla par terre tout froiſſé, & comme mort. Et toutesfois fut releué, & miſ hors de la preſſe. Les Venitiens à ceſt affaire ſe monſtrerent tels que choſe ne feirent à reprendre. Car de leur coſté aſſailirent la muraille à grand effort, & entra vn de leurs enſeignes iuſques dedans les murailles de la dicté Ville, qui fut à force de Turcs rechaſſé. A la deſcente des fofſez y auoit telle preſſe dedans les eſchelles, que pour la foule qui là eſtoit, ceux qui eſtoient à bas ne peurent auoir nulles d'icelles eſchelles pour monter où eſtoient les Turcs. Ce qui fut trop mal aduiſé aux Chreſtiens. Car premier que de deſcendre debuoiſent ordonner nombre d'eſchelles pour deualer, & autres pour monter, & tout à vne fois; afin que les ennemis n'euffent long loifir d'empêcher la deſcente, & de deſſendre le móter des Chreſtiens. Ce qu'ils eurent. Parquoy nul Chreſtien oſoit approcher les deux eſchelles dreſſées contre les faulſes brayes. Car à toute heure de deſſus les murailles, & d'une tour qui regardoit le long des fofſez, coups de pierres, de traiçt, & d'artillerie tiroient celle part, & au trauers de la preſſe, tellement que pluſieurs furent morts & affolez dedans les fofſez. Là fut tué vn Capitaine des pietons, nommé Antoine Guermét, de Prouence, le Lieutenant de Iacques Galiot, Senefchal d'Armaignac. Pareillemét le Lieutenant de Iacques de Coligny, Seigneur de Chaſtilló, eut d'v-

1501. ne grosse pierre sur la teste: dont puis apres mourut. Aussi Iean Stuart, Duc d'Albanie, eut là vn coup de traiçt d'un arc Turquois, duquel fut sa bauiere faulsee, avec la gorgerete toute à trauers, & luy atteint iusques au sang. Aussi fut là blessé le Marquis de Bade, qui des premiers estoit entré. Messire Iean Chaperon, qui fut là Cheualier, eut vn coup de traiçt au visaige au trauers du nez. Bertrand de Castelbayart fut encores là blessé en plusieurs lieux. Si fut Pregent de Iagu lequel eut deux coups de traiçt. Messire Guillaume Cadore, qui aux premieres eschelles estoit monté, son enseigne au poing, eut plusieurs coups de traiçt, de pierres, de lances, & de picques, & tant vigoureusement se defendit, que apres long combat de main, son enseigne toute froissée teint tousiours pied ferme. Là aussi estoit Messire Iacques Guibé, qui pour le danger des coups des Turcs ne reculoit vn seul pas. Grand nombre d'autres gens de bien estoient là: lesquels furent presque tous blesez de coups de traiçt, de pierres, ou d'artillerie. Car comme j'ay sceu par ceulx qui le veirent, le traiçt y alloit si menu, que les rais du soleil en estoient obscurcis. Pour venir à fin de propos, les Chrestiens furent si mal menez, que questiō fut de retraicte. Mais il y eut estrif entre eulx qui premier se mettoit au retour. Car tant auoit chascun son honneur pour recommandé, que mieulx vouloient illec demeurer au danger des coups de leurs ennemis, que honteusement chercher voye de seureté. Toutesfois au long aller ils se retirerent à leur perte, & desaduan-

raige. Et ce, pour n'auoir premier que commencer 1501.
 leur affaire pourueu à la fin d'iceluy. Dont je dis que
 en telles choses & toutes autres tendans à loüable ef-
 fect est requis ordonner du present, pourueoir au
 futur, & recorder le passé. Car celuy qui du present
 n'ordonne chemine les yeux clos. Qui oublie le pas-
 sé met le temps au perdu, & qui ne pense du futur,
 en toutes choses delchet au del pourueu. Doncques
 selon l'opinion de Senecque, Le Chef prudēt doit
 auoir deuant ses yeux & en son couraige sçauoir les
 biens & maux qui peuuent suruenir, pour soustenir
 l'un, & l'autre moderer. Or reuenons au compte, &
 disons que l'armée Chrestienne auoit ja demeuré
 dedans l'Isle de Metellin plus de vingt iours, sans
 pouuoir là faire chose plaisante ne profitable à la
 Chrestienté. Ce qui moult ennuyoit les Chrestiens.
 Et avec ce ja tant auoient soustenu d'ahan, tant
 pour la fascherie de l'hyuer, qui auoit ja cours, que
 pour le dommaige que auoient là encouru, tel que
 avec le dict ennuy de l'hyuer, qui moult leur con-
 trarioit, tant de gens de l'oüable estime estoient là
 morts, que trop grande souffreté en auoit le surplus.
 La plus part des soldats estoient ou blesez, ou ma-
 lades, les viures appetisiez, & amoindris, les poudres
 & pierres d'artillerie diminüées, & gastées, & du se-
 cours de frere Pierre d'Aubusson, Grand-Maistre
 de Rhodes, qui là se debuoit trouuer, comme j'ay
 dit, n'estoit nouuelles. Dont je ne veux pas dire que
 les bons Cheualiers de l'Ordre de Sainct Iean de
 Hierusalem ayent fuy la lice, ne quel Isle de Metel-

1501. lin, & plusieurs autres soyent par leur default vsurpées par les Turcs sur la Chrestienté. Car ainsi que depuis m'a esté dict par vn Cheualier de l'Ordre sus dict nommé frere Nicolas de Montmiral, qui lors estoit à Rhodes, le dict Grand-Maistre auoit appresté vingt-quatre nauires, & gales, armées de quatre cent Cheualiers, & de quatre mille autres soldats, avec artillerie, & viures, pour long temps, à secourir cest affaire. Mais leur secours veint trop tard, ou trop tost deslogea l'armée. Toutesfois si au dict siege de Metellin se feussent trouuez, comme auoyent promis, tres-bien eussent acquité leur promesse, & moult renforcé les Chrestiens, qui bon mestier en auoient, & tel, que Messire Philippes de Rauestain, Chef de leur armée, considerant les choses sus dictes avec les Capitaines Chrestiens qui là estoient, voulut sur ce tenir Conseil; lesquels furent tous d'aduis de debuoir retourner. Et sur ceste conclusion le dict Seigneur de Rauestain fit la nuit ensuiuant charger l'artillerie aux nauires. Et au plus matin, à la veüe des Turcs, meit ses gens en ordre, & à chemin, pour retourner aux dicts nauires. Les Turcs feirent lors vne faillie legere, & suiurent les Chrestiens: mais de la longueur d'un ject de pierre ne les approcherent. Ainsi s'en allerent les Chrestiens tout le pas iusques au bord de la mer, & monterent dedans leurs nauires, où ils demurerent tout ce iour.

CHAPITRE LXXI.

*Comment les Chrestiens firent derechef une
descente en l'Isle de Metellin à la
suaision des Venitiens.*

LE lendemain au matin, qui fut le penultiesme iour d'Octobre, le nauigaige des Chrestiens fut appresté, & en branle pour vouloir retourner au pays de seureté. Et ainsi que paroles feurent de mettre voilles au vent, huit galeres des Venitiens, qui estoient allées vers Constantinople, pour guetter les ennemis, & descouurir la mer, arriuerent deuant la dicte Isle de Metellin; lesquels firent leur rapport au dict Seigneur de Rauestain deuant les autres Capitaines, disans que de plus de deux cent milles loing les Payens n'approchoient, & que de ce ne failloit auoir doubte, ne des Turcs de Constantinople. Car aux enuiron n'estoit nouuelles de leur effort. Aussi auoient iceulx Venitiens pris dix Turcs sur mer, par lesquels ils auoient sceu que dedans Constantinople se faisoit bonne garde, & grandes fortifications pour doubte de la venue des Chrestiens, que les Turcs long temps deuant ce attendoient; & en outre affermoient les dicts Turcs prisonniers la Ville de Metellin estre prenable, & aisée à affamer. Car dedans n'y auoit

Pp iij

1501. point d'eäues, & que moult grande difete auoient les Turcs qui dedans estoient de tous aultres viures. Aussi dirent iceulx Venitiens, que en leurs galeres auoit force equippage & bonne prouision de viures, voire pour soustenir encores le siege moult long temps. Parquoy dirent que bon seroit derechef assieger la dicte place, & que sans faillir elle seroit prise à celle fois par famine, ou emportée d'assault. Car les Turcs, qui estoient dedans n'en pouuoient plus. Et sur ce promettoient les Venitiens de leur part faire merueilles, à la remonstrance & enhortement desquels l'armée des Chrestiens feit encores vne descente. Et là fut le dict Seigneur de Rauestain content que pour faire chose seruiable à la foy de Iesus-Christ, & à l'honneur de ses champions, tout allast en auant. Et aussi que cependant le secours de Rhodes pourroit venir. Et ainsi se meirent les Chrestiens à terre, & plus alegrement allerent en besogne que oncques mais. Les Turcs voyans ceste descente saillirent à l'escarmouche au nombre de deux cent hommes, ou plus: & comme deuant voulurent empescher le passaige. Mais plus rudement que aux aultres fois furent reboutez & chassez battans iusques dedans leurs portes, & plusieurs blesez, & occis. Et ce faict, fut derechef la dicte Ville assiegée, comme deuant, & battüe en plusieurs lieux. Bien monstrerēt les François, & autres Chrestiens, qui là estoient, que bonne enuie auoient de conquerir la dicte Isle de Metellin, & à bon droict. Car selon Strabon en la Geographie, l'Isle de Lesbos, qui est

Metellin, est entre les autres Isles de Grece digne de memoire. Et selon Pline en l'Histoire naturelle, elle a de circuit huit & vingt sept milliaires, qui se mōtent à quatre vingt lieües, ou plus. Dedans souloit auoir deux ports de mer, & neuf Cités: & n'y en a plus que vn, & vne Cité. Les bons vins en singularité croissent là, il y a plusieurs montaignes, & cinquante que riuieres, que ruisseaux. Saint Paul, Apostre, feit là deuant vn de ses trois naufrages, & dedans fut mors d'vne vipere, dont il guairit miraculeusement. Castor & Pollux à la poursuite d'Helene leur sœur perirent deuant la dicte Isle. Plusieurs de renom florissant y feurent nez, comme Teophanes grand Historien, & familier de Pompée: là furent pareillement nez Terpander, inuenteur de plusieurs accords de Musique, Arion le bon Harpeur, Pitaccus, l'vn des sept Saiges de Grece, & Sapho, le noble Poëte. La dicte Isle de Metellin est située en la mer del'Archipelague, dict anciennemēt la mer Aegée, distant de Constantinople à trois cent milliaires de Tenedos, à douze milliaires, du port de Sigée, qui est deuant Troye à cinquante milliaires. Je laisse cest incident, pour rentrer à mon propos, & dis que durant le siege dernier & seconde descente que firent lors les Chrestiens en la dicte Isle de Metellin, vn renfort de Turcs y surueint de six à sept cent hommes tocquez de blancs couurechefs, & iceulx nommez Iannisaires, lesquels arriuerent enuiron minuit, & tant à secret, que de leur venüe ne fut nouuelles que premier ne fussent descendus à terre,

1501. & approché le guet des Venitiens de tant, que sur le costé que iceulx Venitiens gardoient au delpourueu commencerent les Turcs l'alarme & chargerent si à poinct, que les dictz Venitiens leur donnerent passaige, & vers le quartier des François se retirerent tous à la flote côme esperdus. Ce qui moult espouuenta toute l'armée, pensant que plus de dix mille Turcs fussent là venus au secours de la Ville. Toutesfois si tost que de ce furent nouvelles entre les François, chascun d'eulx s'esmeut, & coururent aux armes. Messire Philippes de Rauestain, Chef des Chrestiens, voyant la maniere effroyée des Venitiens, & leur desordonnée retraicte, eut soudainement doubte des ennemis, comme non aduertie de leur nombre, & veul'heure de leur venüe, qui fut de nuict, comme j'ay dit. Mais tout ce mis à part, avec ceulx qui le plustost furent armez s'en alla où les Turcs passoient. A ce bruit se trouuerent plusieurs, desquels fut Jean Stuart, Duc d'Albanie, James, Infant de Foix, Jacques de Bourbon, Comte de Roussillon, René d'Anjou, Seigneur de Maizieres, Messire Jacques Guibé, Jacques Galiot, Aymon de Viuonne, François de la Largerie, Messire Jean Chapperon, Pregent de lagu, vn nommé Barrault, & grand foule d'autres, lesquels hastiement marcherent vers les Turcs, qui passoient à la file, & gaignoient la Ville. Toutesfois les François coupperent chemin à vne partie d'iceulx entre le port, & la Ville, & là chargerent les vns sur les autres bien à point. Les Chrestiens feirent merueilles d'affaillir les Turcs,

Turcs, & les chargerent tout à droict, dont aucuns
d'iceulx Turcs voyans le jeu mal party, pour eulx, se
cuidèrent retirer en la mer pour eulx sauuer, mais ils
furent suiuis par Messire Jacques Guibé, lequel se
meit apres iceulx iusques aux aisselles dedans l'eau,
& là à grands coups de halebarte en feit noyer plu-
sieurs. Et est à sçauoir que celuy bon Cheualier auoit
la veüe courte, parquoy ainsi qu'il m'a esté dict, rua
maints coups sur les ondes de la mer, pensant assener
ses ennemis, dont plusieurs furent là enseuelis. Les
autres, qui des Chrestiens furent enuironnez, à viue
force se defendirent, & à tout leurs cimenterres larges
& tranchants blessèrent & occirent prou de gens. Et
entre aultres vn Normand, qui fut atteint sur l'es-
paule de tel coup, que iusques au milieu de l'eschine
fut pourfendu. A ceste charge fut des premiers Jac-
ques Galiot, Seneschal d'Armaignac, & tant aduan-
cea, que en barbe eut vn grand Turc, tenant en
main vn cimenterre tranchant, auquel s'adressa le
dict Galiot, vn long estoc au poing, & là aux rais de
la lune qui lors estoit claire, se choisirent l'vn l'autre,
& à l'approcher mirent leurs glaiues en besongne,
tellement que aux premiers coups donner, chascun
cuidant assener son ennemy, & donner à droict,
bon pied & bon œil de ce danger les garantirent:
car chascun d'eulx obuierent à ce. Mais au faillir des
coups ils se ioignirent si rudement, que au rencon-
trer se heuiterent de teste, & de pieds, en sorte que le
Turc alla par terre, & le Seneschal d'Armaignac,
qui estoit jeune, & adroict, se trouua dessus le Turc,

Qq

1501. & à la cheute luy donna de l'estoictout au trauers du corps: tellement qu'oncques puis celuy Turc ne se releua. Le Duc d'Albanie pareillement se trouua main à main avec vn autre Turc, lequel vigoureu-
 sement vainquit, & occit. Somme chascun Chre-
 stien, quilà se trouua des premiers, transmeit son
 Turc en enfer. Les autres Turcs se defendirent tref-
 bien, & longuement: mais à la parfin furent si mal
 menez que sept vingt d'iceulx demurerent esten-
 dus en la place: le surplus des autres gaignerent la
 dicté Ville, quinze exceptez, lesquels furent pris, &
 semonds de prendre la foy Chrestienne, lesquels ne
 voulurent: mais dirent qu'ils aimoient mieulx mou-
 rir que de laisser leur foy Payenne, parquoy furent
 tous tuez, & leurs testes mises sur des lances, & en la
 veüe de ceulx de la Ville. Or aduisez que les Chre-
 stiens debueroient faire pour soustenir la sainte &
 approuuée foy de Iesus-Christ, quand ces pauvres
 Payens aueuglez, pour tenir la foy damnable, &
 aduoüer les traditions erronnées du faulx Mahomet,
 se voulurent soubmettre au tourment de cruelle
 mort. De ce je me tais, pour parler du siege de la
 Ville de Metellin, laquelle estoit sans cesser battüe
 d'artillerie, & moult ennuyée des Chrestiens, qui
 pour cest affaire meestre à fin employèrent tous
 leurs efforts. Et là n'y auoit nul de quelque estat qui
 ne meist les mains en besongne. Vn Cordelier
 estoit là, dont j'ay parlé par cy deuant, lequel disoit
 tous les iours la Messe deuant les Chrestiens, & leur
 preschoit souuent la parole diuine, & avec ce auoit

touſiours le harnois ſur le dos, comme vn des autres ſoldats, preſt d'exccuter la guerre, & à tout beſoing ſe trouuer aux coups donner. Et tellement le feit, que vn iour durant le ſiege, avec vn petit nombre de François ſe meit dedans vne barque, & ſ'en alla iuſques contre les murailles de la Ville, où eſtoit attaché vn grip des Turcs, chargé de figures, & de raifins, & malgré les Turcs, qui de la Ville luy tirerent coups de traiçt, & d'artillerie, à toutes mains par force entra dedans, & avec l'eſpée trancha les chaînes, & cordes, & emmena le dict vaiſſeau iuſques aux autres nauires des Chreſtiens, duquel refuſa des Geneuois ſept cent ducats. Mais le Seigneur de Raueſtain ne voulut qu'il fuſt vendu, ains le meit à ſon vſaige. Pour venir à chef de compte, les murailles de la Ville de Metellin furent tant rompües, & breſchées, que l'opinion fut commune entré les Chreſtiens que l'aſſault ſe debuoir donner. Dont la batterie fut ceſſée, & l'aſſault commandé d'un coſté de la breſche aux François, & de l'autre aux Venitiens. A tous leſquels dit le Seigneur de Raueſtain que à ceſte fois eſtoit heure, & beſoing de faire tel debuoir d'armes, que les Payens congneuſſent à leur perte la vertu des Chreſtiens, ou au default de ce encourir vn deſhonneur de perpetuel reproche. Parquoy mieulx valoit illec tous mourir à honneur, que au deſcry de toute la Chreſtienté, à leur honte retourner deſeſtimez des Payens. Ce dict, l'aſſault fut ſonné, & la muraille approchée. Les François plains de vouloir deliberé, ne faillirent à ſe trouuer où leur

1501. estoit ordonné, & à la foule se meirent aux bresches, & commencerent l'assault à rude pouuoir. Et est à sçauoir que c'estoit au mesme lieu où la muraille auoit esté assaillie les autres fois. Les Turcs se trouuerent à la defense du passaige, à grands flambeaux, & cercles ensouffrez, ardans, & plains de feu, & avec lances, dards, & traiçts, defendirent si à point leurs murailles, que les dictz François, apres long combat se retirerent blessez, & las. Les Venitiés, qui auoient promis sur leur honneur au Seigneur de Rauestain d'entrer des premiers, & faire les grands coups, n'approcherent la muraille d'un ject de pierre pres. Parquoy l'assault fut cessé, & dict par les Chefs de l'armée, que puis que autre chose ne se pouuoit faire, qu'on se mettroit au retour. Ce qui fut fait. L'artillerie fut mise dedans les nauires, & à la veüe des Turcs les Chrestiens tout bellement s'en allerent monter en mer, pour retourner chascun en son pays.

CHAPITRE LXXII.

+ *Du retour que firent les François de l'Isle de Metellin, & des tourmentes & naufrages qu'ils eurent sur mer.*



LE nauigaige des Chrestiens fut prest 1501.
pour prendre le retour ; dont les
aucuns furent joyeux de retourner
en leur contrée, les autres marris de
n'auoir autrement besongné au
dommaige des Payens, & les autres en deuil pour la
mort & perte de leurs amis, qui là estoient demeurez.
Tant de malades, & de blesez estoient, que là
grande plainte y auoit. Les vns faisoient promesses
& vœus à Dieu, & aux Saints, s'ils pouuoient es-
chapper de renoncer au monde, les autres d'aller
nuds pieds à Saint Iacques, & les autres à Rome, &
en Hierusalem. Quoy plus ? Si n'est que avec les en-
nuis susdicts l'hyuer estoit en vigueur, les vents en
force, & la tourmente en pouuoir. Ainsi s'en allerent
les Chrestiens au danger de la tempeste, & entre les
mains des Turcs demeura l'Isle de Metellin. Or ne
sçay-je à quoy teint que la chose n'alla en mieulx,
ou si Dieu, qui de toutes choses deüement dispose,
pour quelque iuste cause ou iugement secret ainsi
le permet ; ou si par la force de la place, avec le pou-
voir pour la garder, & le vouloir de la defendre, les
Turcs, qui de tout ce estoient garnis, en demeure-
rent à tant, ou bien si par le default du renfort des
Chrestiens qui là se debuoit esprouuer, l'œuvre de-
meura imparfaict au desaduantaige de toute la
Chrestienté. Sur ce n'en sçay que dire, si n'est que au
premier doubte se peult donner solution telle, que
le bon Seigneur Dieu, qui tousiours a eu l'œil à la
defence, & à l'ayde des champions de la sainte foy

Qq iij

1501. Catholique, & executé à la rigueur le fleau de son ire sur la gent qui nel'a congneu, & son nom confessé, eust à cest affaire secouru les Chrestiens, comme il eust peu, si de eulx mesmes ils se fussent aydez, comme ils pouuoient & debuioient. Secondement se peut prouuer que la defense des Turcs ne la fortresse de la Ville de Metellin n'estoit pour deuboir resister contre le nombre suffisant de Chrestiens, veules fortes places, Villes, & chasteaux par cy deuant pris d'assault & emportez de viue force, mesmement par les François en Lombardie & en Italie. Doncques le default susdict se doibt attribuer à ceux qui au besoing du dict affaire ont tourné le dos. Dont s'ils n'ont party au dommaige de la perte, pour le moins doibuent auoir entiere portion du tiltre de reproche, si au cousteau d'equité sont diuiser les partaiges. Et à tant de ce propos me deporté, si ce n'est que à ceste conclusion veulx adjouster que tout fidele Catholique ne doibt pour son singulier profit delaisser la commune vtilité de la Chrestienté. Pour reuenir à l'armée des Chrestiens, au vent auoit ja mises voilles pour approcher terre. Dont les Venitiens, avec le Capitaine Pregent le Bidoux preinrent vent vers leurs Isles, & pays de Grece. Les Geneuois singlerent leur quartier à part vers Milo. Et Messire Philippes de Rauestain, avec le nauigaige de France, preint le droict canal pour venir en Cicile. Et apres auoir faict deux iournées par mer, frere Pierre d'Aubusson, Grand-Maistre de Rhodes, transmeit vn de ses Cheualiers deuers le

dict Messire Philippes de Rauestain, pour luy dire, 1501.
que l'armée de Rhodes estoit prestte pour se mettre
au voyage de Metellin, & que si derechef vouloit re-
tourner en la dicte Isle de Metellin, que dedàs huit
iours apres se trouueroit la dicte armée de Rho-
des. Oyant le rapport de ce Cheualier le Seigneur
de Rauestain, avec les Capitaines consulta l'affaire,
si que à la conclusion chascun feut d'aduis de ne
debuoir retourner à Metellin: mais droict nauiguer
à terre seure. Disant que ja estoit l'armée departie, les
viures diminuez, l'artillerie desgarnie de poudres,
& de pierres, les nauires mal equippez, & moult
empirez, les soldats blesez, & malades, & grand
nombre d'iceulx morts, & enseuelis, l'hyuer venu,
les vents & tourmentes de saison, & plusieurs autres
empeschemens, & destours qui defendoient aux
Chrestiens de non retourner, & la guerre pour l'heure
recommencer aux infideles, mais debuoir prendre
la voye de leur retour droict à leur pays. Dont ainsi
le feirent, & adresserent vers l'Isle de Chio, laquelle
aborderent par vn vent, & là surgirent. Dedans se
meit le Seigneur de Rauestain avec plusieurs, & là
feit descendre les malades, pour prendre rafreischi-
sement. Six iours entiers y demurerent, pendant le-
quel temps mourut là Messire Iean de Porcon, Sei-
gneur de Beaumont, lequel auoit esté blessé au pre-
mier assault de Metellin, comme j'ay dit. Là mou-
rurent aussi Blancquefort, Arzelles, & plusieurs au-
tres, lesquels furent enterrez dedans l'Eglise des Cor-
deliers de Chio, & solemnelement seruis. Auquel

1501. lieu est pareillemēt ensepulturé feu Iacques Cœur, dedans le milieu du Chœur de la dicte Eglise. Toutes ces choses parfaites, les voïles feurent leuez & mis au vent, & adressez vers le Cap de Saint Ange, vis à vis de l'Isle de Citherée. Celuy Cap de Saint Ange est vn hault rocher en la mer de l'Archipelague, appellé anciennement le Promontoire de Mallée, tres-dangereux à circuir, pour ses destroiets. Et là pres est la dicte Isle de Citherée, terre de Saint Marc, en laquelle fut Heleine rauie par Paris de Troye. Et est icelle Isle vis à vis de la Morée, terre Grecque, laquelle Morée se souloit appeller Achaïe, & là estoit Lacedemone, & le Royaume de Menelaus, à present occupé des Turcs. Dedans la dicte Isle de Citherée souloit auoir plusieurs bons ports de mer, mais ores n'en y a pas vn qui vaille. Deux meschâtes Villes y a nommées, l'une Cerigo, & l'autre Saint Demetry. Et les habitans sont tous pauvres gens, pasteurs, durs, rudes, & agrestes, & mal sains. Le nauigaige des Chrestiens fut le iour de Sainte Catherine entre le Cap de Saint Ange, & l'Isle de Citherée, & là furent vne tourmente tant impetueuse, que tous les nauires & galeres cuiderent perir & enfoncer. Car par la force du vent, & du flot des vagues enflées de la mer, tous les vaisseaux furent espars & dispers les vns des autres. Et si loing que oncques puis tous ensemble ne se trouuerent, & là eurent moult à faire. Car la dicte tourmente dura le dict iour dés le midy iusques le lendemain au matin. Dont par le croulis des nauires plusieurs
malades

malades & bleffez moururent là dedans, & furent 1501.
jettez en mer. Ce fut chose bien piteuse. Car avec ce
deux nauires allerent à fonds, comme pourrez ouir.
Messire Philippes de Rauestain, avec les Gentils-
hommes François, qui là estoient, estoit dedans vn
nauire, nommé la Lommeline, & bien six cent
hommes, lesquels si tost que la tourmète les prit fei-
rent jetter tous leurs ancrs en mer, pour cuider arre-
ster le nauire: mais soudainement les cordes feurent
rompiës, & les masts brisez, & tous eulx tant laissez
que plus n'en pouuoient, dont aucuns d'eulx pour
supporter le trauail, se coucherent sur les couuertes
de leurs lits de camp, & laisserent leurs vies bransler
aux dangers de fortune, qui conduisit leur nauire
partourmente iusques deuant l'Isle de Citherée, &
là sur les deux heures de nuict, contre vn rocher eu-
rent tel choc, que le chasteau du deuant de leur dict
nauire fut party & acrauanté, & la carine froissée, &
rompië, dont tout à plain entra l'eau dedans, & là
furent noyez plus de deux cent hommes. Le Sei-
gneur de Rauestain & les Gentils-hommes Fran-
çois, qui estoient couchez sur le hault & aux costez
du nauire, se leuerent hastiuemēt apres le heurt, l'un
en chemise, l'autre deschaulx, & l'autre nud, & ainsi
aux rais de la lune, qui estoit claire, approcherent le
rocher, & là ainsi comme ils peurent se gripperent
contre iceluy, & tant feirent que ils sauuerent leur
vie, & eulx garentirent & gaingnerent terre. De six
cent hommes qui là estoient deux cent ou enuiron
eschapperent, les autres perirent. Tous ceulx qui se

Rr

1501. peurent sauuer s'assemblerent, & pour la nuit passer preinrent logis à plaine terre, desquels estoient le Seigneur de Raucellain, Iames Infant de Foix, le Duc d'Albanie, Messire Iean de Saincts, Iean de Moüy, Aymon de Viuonne, & grand nombre d'autres : lesquels estoient là en terre estrangere, sans amis, sans congnoissance, sans secours, sans argent, tous nuds, & en chemise, à la mercy de gent rude & peuple inhumain. Et en somme abandonnez à tous les heurts de peruerse fortune & avec l'ennuyeux passetemps de l'impetueux hyuer. Ainsi passerent illec toutes les heures de ceste froide nuitée, sans auoir sur eulx autre couuerture que le manteau des obscures nûes. Et ainsi tous ensemble comme pourceaux amoncelez dos contre dos pour eulx eschauffer l'un l'autre, furent là dedans vne logette descouuerte, iusques au matin. Helas ce fut chose bien desolable ! Mais la fin de ce malheureux compte me met au commencement d'un autre cas bien estrange, & trop dommageable, moult ennuyeux à racompter, & tres-piteux à ouïr. Car encores avec la desconuenüe du naufrage sus dict, pource ne fut l'ire de la mer rappaisée enuers les Chrestiens. Car en persistant à la persecution d'iceulx, vn autre nauire nommé la Pensée, alencontre d'un rocher, pres d'un ject de pierre du lieu où l'autre estoit enfondré fut ce mesme iour, sur l'heure du soleil leuant esclaté par tempeste, & mis à fonds, avec sept cent hommes Chrestiens, qui estoient dedans. Dont grand nombre de Gentils-hommes

Flamens, qui estoient allez au dict voyage, furent 1501.
là perdus, & noyez, avec tous les autres, deux seulement exceptez, que les ondes de la mer ne scay comment regorgerent & jetterent sur le grauier presque morts. Le Seigneur de Rauestain, & ceulx qui avec luy festoient sauuez, veirent les sus dictz perir deuant eulx, sans leur pouuoir donner autre secours que prier Dieu pour eulx, & estre compaciens en leur perte. Apres tous ces malheurs commencez, la fin en fut telle que avec le dommaige irreccourable des morts, ceulx qui eschapperent vifs en la maniere sus dicte, se meirent parmy l'Isle de Citherée, l'un çà l'autre là, pour chercher leur aduantage, qui fut telle que les habitans de la dicte Isle ne leur voulurent donner entrée dedans leurs Villes, ne bailler habillemens, ne viures, sinon tant à tard, que de malle faim & froidure cuiderēt là tous mourir. Si que plusieurs en furent griefuement malades : & mesmement Aymon de Viuonne, Seigneur de la Chastaigneraye en Poiëtu, lequel par la durté du froid, & disette de viures prit le mal de la mort, si feirent plusieurs autres. Ainsi furent traictez les François dedans l'Isle de Citherée, par l'espace de vingt & vng iours entiers, en querant leur pain, comme pauvres mendians. Et ce durant, vn Patron de galere Venitien, nommé Messer Paul Calbo, lequel par tourmente estoit illec abordé, leur surueint au besoing, lequel leur donna secours de cent hommes armez, à l'ayde desquels eurent prouision de viures, & fourniture de habillemens. Et apres se f'en

Rr ij

1501. alla le dict Calbo à Milo, où estoient les Geneuois, & là iceulx aduertit du meschef des François, dont iceulx Geneuois compaciens du mal d'iceulx François, leur transmeirent en Citherée trois galeres armées pour les recueillir. Dedans icelles se meit Messire Philippes de Rauestain, avec ses gens, & eulx embarquez tirerent vers le port de Corfou, auquel lieu sejournerent huit iours entiers. Les Venitiens sçaichans la defortune de nos gens, furent bien ioyeux: mais tant courroucez contre le dict Calbo, qui leur auoit donné secours, que pour les biens-faiçts que à iceulx auoit faiçt le voulurent faire pendre, en monstrant leur couraige noircy de vouloir ingratt. Veu que pour defendre leur querelle, & accroistre leur bien, estoient illec allez les François. Or apres chascun se meit en voye dedans la mer pour aller en son pays. Les Venitiens à tout leur nauire, & avec le Capitaine Pregent le Bidoux, ayant quatre galeres, passerent par force la mer de Grece, & descendirent dedans l'Isle de Sainte More, que tenoient les Turcs. Laquelle Isle est pres Modon de cent milles, ou enuiron, & icelle coururent, & pillerent, & assaillirent les places qui estoient dedans, & tellemēt feirent que à l'ayde du dict Pregent preindrent la dicte Isle, & deffeirent les Turcs, qui tenoient le pays. Dont iceulx Venitiens apres ce voulurent donner au dict Pregent vingt galeres de Venise, & grosse pension, lequel dit qu'il estoit au Roy, & que iamais tant que son seruice luy seroit à gré, n'auroit la foy à aultre Maistre. Ce qui ne pleut aux

dicts Venitiens. Et voyans que par promesses ne le pouuoient retirer, conceurent haine mortelle contre luy, disans en eulx mesmes que quelque iour le trouueroient au despourueu, & sur ce se departirent. Dont les dicts Venitiens singlerent vers Venise, & celuy Pregent adressa vers la coste de Cicile, puis deuers Calabre, & en Pouille. Les François tenoient lors le Royaume de Naples, le pays de Labruzzo, & partie de la Pouille, dont estoit question entre le Roy, & le Roy d'Espaigne. Et à ce moyen chascun des contendans se fortifioit de viures, & de soldats, & mesmement les Espaignols, qui par mer faisoient tirer gens d'armes & viures vers la Pouille, pour soustenir leur armée qui là estoit. Or costoyoit Pregent la dicté Pouille, avec ses quatre galeres; où souuentefois rencontra par mer le renfort d'Espaigne, & souuent le destroussa. Et vne fois entre autres que les Espaignols alloient à grand nauigaige auitailler leur armée, lesquels se rencontrèrent sur mer, & approcherent si pres les vngs des autres, que à grands coups d'artillerie se commencerent à donner: & tellement que plusieurs d'un & d'autre costé furent morts & blesez, & fut l'arbre d'une des galeres du Capitaine Pregent mis par terre d'un coup d'artillerie. Toutesfois soudainement fut rabillée la dicté galere, & recommencée la charge sur les Espaignols, tellement que vne de leurs naux fut mise à fonds, & donnée la chasse aux autres plus de dix milles en mer: à laquelle chasse feurent prises deux autres naux plaines de victuailles, & harnois. Et en

1501. faisant celuy exploict, ainsi que le dict Pregental-
 loit & venoit par sa galere, pour mettre en ordrefon
 cas, se meit au trauers du pied vn gros clou, de quoy
 perdit moult de sang, & de moult s'affoiblissoit:
 mais ce nonobstant l'en alla avec sa proye, & feit ses
 galeres adresser vers Otrante, terre de Saint Marc.
 Et là pour faire radoubier sa galere, & se faire penfer
 de sa playe, se meit à bord, & entra en la dicte Ville
 de Otrante. Le Capitaine Gonfales Ferrande, qui
 estoit en la Pouille, l'çaichant que iceluy Pregent ti-
 roit vers Otrante, enuoya par mer apresluy galeres,
 naux, & brigantins, pour le cuider là prendre. Mais
 ja auoit gaingné le port. Toutesfois ils le suiurent
 de si pres, & tant approcherent le port, que ce fut
 iusques à la veüe de ceulx de la Ville. Et voyant ice-
 luy Pregent tant approcher les Espaignols, deman-
 da au Gouverneur de la Ville, pourquoy on laissoit
 venir si pres les Espaignols, & si dedans le port & en
 la Ville d'Otrante luy & ses galeres estoient en bon-
 ne seureté: Lequel Gouverneur dit que en aussi
 bonne seureté estoit que dedans Marseille, & que si
 les dicts Espaignols approchoient la bouche du
 port qu'il les feroit mettre à fonds. Et tout celuy di-
 soit iceluy Venitien pour l'amuser, & faire prendre.
 Car il auoit intelligence avec les dicts Espaignols. Et
 ce disant, le nauigaige d'Espagne approcha de tant
 qu'il se meit dedans le port, cuidant illec prendre les
 dictes galeres, & tuer le Capitaine Pregent. Et ainsi
 le debuient faire, mesmement vn des Patrons de
 ses galeres, lequel debuoit auoir pour ce faire deux

cent ducats de Gonfales Ferrande, ainſi que depuis 1501.
fut deſcouuert, comme je diray. Or eſtoient les Eſ-
paignols dedans le dict port preſts à joindre. Et ce
voyant le Capitaine Pregent dit au dict Gouver-
neur, Seigneur, je vous prie que ſoubs voſtre ſauf-
conduit le Roy n'aye dommaige, ne moy deſ-
honneur, je veois bien que ces Eſpaignols à voſtre
fiance, ſont entrez dans le port, & que mes galeres
veulent prendre, pour ce vous plaiſe les tenir à ſeu-
reté, ou me donner loy de les defendre, ou autre-
ment ſi mal en aduient, le Roy, avec lequel eſtes
confederez vous en pourra accuſer de deſloyauté,
& à tout iamais reprocher. A quoy ne feit le dict
Gouverneur autre reſponſe, ſi n'eſt que au dict Pre-
gent defendit ſur ſa vie de ne tirer contre les dictſ
Eſpaignols. Et ſur ce voyant le dict Pregent telle tra-
hiſon, feit à coup mettre ſon artillerie à terre, & luy
meſme enfondra ſes galeres affin que les dictſ Eſ-
paignols ne ſ'en peuſſent ayder, & puis ſe retira en la
Ville avec ſes gens. Mais le dict Gouverneur Veni-
tien feit prendre & faiſir toute la dictē artillerie, &
toutes les bagues du dict Pregent, dont il y en auoit,
ſelon le dire des ſiens, pour plus de vingt mille frācs:
& entre autres tant de vaiſſelle d'argent, que
dedans ſa galere de proue en poupe en eſtoient
tous ſeruis. Et apres que iceulx Venitiens eurent ain-
ſi tout pris voulurent tuer iceluy Pregent. Mais par
douces paroles, qui à tel affaire ſont de ſaiſon, ſe ga-
rantit, & ſaillit de la Ville. Et avec l'ayde d'un Ca-
pitaine François, nommé Tacerant, Capitaine de

1501. Leche en Pouille, qui luy enuoya gens pour lerecuillir, se sauua. Apres celuy Pregent sceut quel vn des Patrons de ses galeres le vouloit tuer, & que ainssi l'auoit juré & promis aux Espaignols, desquels debuoit auoir deux cent ducats. Dont meit le dict Patron en question, & le feit gehenner, lequel recongneut & confessa la chose vraye, parquoy eut la teste tranchée, & fut esquartelé. Le Seigneur de Rauestain tira droict à Naples, & de là à Gennes, dont il estoit Gouverneur. Auquel lieu de Gennes, par luy mesme, & au rapport de plusieurs Gentilshommes, & autres dignes de foy, lesquels auoyent fait le dict voyage, j'ay sceu depuis toutes les choses que par escript j'ay cy dessus redigées.†

CHAPITRE LXXIII.

*Comment Philippes, Archiduc d'Autriche,
& Dame Ieanne de Castille, Archiduchesse, sa femme veindrent en France
deuers le Roy, & feurent de
là en Espagne.*



LE Roy, comme j'ay dict, estoit venu de Lyon à Blois, dés la fin du mois d'Octobre, & là estoit avec la Royne & Madame Claude de France; leur fille, où exploiçtoient leur saison en ioyeux passetemps, & diuers esbats. Et là fut le Roy à sejour les mois de
Nouembre,

Nouembre, Decembre, & Ianuier, & fait tenir ses 1501.
 Estats, & ordonna de ses choses. Pendant lequel
 temps, Philippes Archiduc d'Austriche partit de
 ses pays de Flandres, avec l'Archiduchesse, Dame
 Jeanne de Castille, sa femme, & grande suite de
 Princes, & Seigneurs, ses subjects, pour aller en Es-
 paigne, & arriua à Paris le vingtiesme iour de Nou- Nouem-
bre.
 bre; l'an sus dict. Où fut par les Seigneurs de Parle-
 ment & de toute la Ville tres-honorablement re-
 ceu, & somptueusement festoyé, comme le Roy,
 expressément leur auoit mandé. Et pour le traicter
 & accompagner auoit au deuant de luy enuoyé
 Louys Monseigneur de Luxembourg, Comte de
 Ligny, & solemnele compaignée d'autres grands
 Seigneurs de France, & Gentils-hommes de sa Mai-
 son. Et avec ce, pour luy donner diuers passetemps,
 luy enuoya de sa faulconnerie vol pour haulte vo-
 lerie, pour les champs, & pour riuere sacres, ger-
 faulx, & faulcons, avec chiens, leures, gants & son-
 nettes. Lesquelles choses luy furent au veoir desireu-
 ses, au presenter acceptables, à l'essay plaisantes, & à
 l'exploicter propices. Apres qu'il eut pris de sejour à
 Paris ce qu'il luy pleust, se meit à chemin pour tirer
 à Blois, où estoit le Roy, & là fut le sixiesme iour du
 mois de Decembre. A sa venüe luy enuoya le Roy Decembre.
 au deuant le Legat Cardinal d'Amboise, le Cardi-
 nal Ascaigne, Angilbert Monseigneur, Comte de
 Neuers, François d'Orleans, Comte de Dunois,
 Louys, Sire de la Trimouille, Messire Pierre de
 Rohan, Marechal de Gié, & grande route de ses
 sf

1501. Gentils-hommes, & Archers de la garde, & autres, lesquels le conduirent iusques dedans le chasteau de Blois. Auquel à l'entrée d'une salle basse estoit le Roy, avec luy la Royne, François d'Angoulesme, le Duc Pierre de Bourbon, Anne de France, Duchesse de Bourbon, la Princesse de Tarente, Antoine de Lorraine, Duc de Calabre, & plusieurs autres grâds Seigneurs, Dames, & Damoiselles de France. Et estoient autour du Roy ses Gentils-hommes, & Pensionnaires, à grand nombre, avec les Archers & Alemans de sa garde, tous en bel ordre, & bien accoustrez: ce qui faisoit moult à regarder en cest estat estoit le Roy attendant la venue de l'Archiduc. Lequel entra dedans la place du chasteau, avec haults sons de trompetes, clairons, tabourins, & huchets, qui estoient avec le Roy. Avec le dict Archiduc estoient des siens Madame Jeanne de Castille, fille du Roy Ferrand, Roy d'Espaigne, Archiduchesse, sa femme, le Digne de Besançon, Frederic, Comte Palatin, le Marquis de Bade, le Comte de Nassau, l'Euesque de Cambray, le Seigneur de Bergues, le Seigneur de Veran, le Seigneur d'Isbain, Claude de Pontarlieu, Seigneur de Flagi, Claude de Senlis, vn nommé Rodrigues, & d'autres grâds Seigneurs, & Dames sans nombre. Cent Gentils-hômes & cinquante Archers auoit de sa garde moult richement habillez & vestus. Et ainsi entra dedans le chasteau de Blois, où meit pied à terre, & avec l'Archiduchesse sa femme approcha la Salle, où estoient le Roy, & la Royne. Et à l'entrée d'icelle feirent au Roy & à

la Roynel leur reuerence, le genoüil iusques en terre, 1501.
& puis saluerent les autres Princes, & Princesses,
comme debuoiens. Ce faict, entrerent en la Salle:
où furent doucement accueillis, amiablement re-
ceus, & triomphalement traictez: & avec tout leur
estat logez dedans le dict chasteau. Et là sejourne-
rent l'espace de quinze iours: où cependant furent
faicts plusieurs combats, ioustes & Tournois. Là
estoit lors Antoine Marquis de Montferrat, jeune
enfant, qui à toutes courses auoit la lance baissée,
dont maintes en meit par esclats, & tant feit que par
ses premiers effects d'armes monstra que il tendoit à
loüable fin. Plusieurs autres ioyeux passetemps &
plaisans desdviets furent là faicts. A la fois le Roy
menoit l'Archiduc à la chasse des grosses bestes, à la
volerie, & au jeu de paulme: où souuentefois, ioüe-
rent tous deux ensemble. Et là luy feit tous festoye-
mens amiables, & priuez banquets, tels que eulx
deux plusieurs fois l'un deuant l'autre beurent à ta-
ble, & mangerent ensemble, & sans essay. Tant luy
feit le Roy familiere compaignée, que à toutes heu-
res estoient ensemble, & d'autres choses que de pa-
roles joyeuses ne tenoient propos. Et alors que le
dict Archiduc s'en voulut aller, le Roy le feit des-
frayer, luy, & tout son train. Et le feit conduire par
tous les pays de son Royaume de France où luy fail-
loit passer. Et luy donna puissance de donner gra-
ces, pardons, & remissions par toutes les Villes &
places de France, où voudroit aller. Et ainsi s'en par-
tit l'Archiduc, & tira droict en Espagne, le long du
Sf ij

CHAPITRE LXXIV.

*Du traicté & accomplissement du mariage
de Ladislaus Roy de Hongrie, & de
Madamoiselle de Foix, fille du
Seigneur de Candale.*



NE temps fut mis en auant ce
traicté de mariage du Roy Ladis-
laus, Roy de Hongrie, & de Ma-
damoiselle Anne de Foix, fille du
Seigneur de Candale. Et pour tou-
cher du faict, pour ce que iusques
à ores la chose n'est venue à ma congnoissance, icy
me fault retourner au temps passé, pour ensuiure le
propos du present, & dire, que le Roy auoit enuoyé
Messire Valeran de Saincts, son Cōseiller, & Cham-
belan, & Maistre Macé Toustain, Procureur en son
grand Conseil, pardeuers le Roy Ladislaus, Roy de
Hongrie, en Ambassade, pour auoir renforcement
d'amitié, & jurée confederation. Les dicts Ambas-
sadeurs estoient deuant ce partis, & eulx mis en
auant, pour accomplir leur voyage. Et tirerent
droict à Lyon, par le trauers du Dauphiné, & le
long de Sauoye, iusques en Ast, & de là à Gennes.
Le ne feray long compte du traictement que les Sei-

gneurs du pays de delà les monts leur feirent : mais 1501.
 diray seulement les lieux par où ils passèrent. Et pour
 commencer, de Gennes tirèrent par montaignes, &
 lieux malaisés, iusques au port de l'Espece, à Mode-
 ne, à Ferrare, à Padoüe, puis à Venise, où monte-
 rent en mer, & singlerent droict à vn port, nommé
 Parance, au port de Seigne, du Royaume de Hong-
 grie, à Zagrabia, premiere Ville de Hongrie du co-
 sté de deçà, à Albe Regale, où les Roys de Hongrie
 sont couronnez, & enterrez, & là est vne Chappelle
 tout tapissée, & tendüe des armes de France, fon-
 dée par vn Roy de Hongrie, nommé Louys, de la
 Maison de France : où tous les iours la Messe sole-
 nelle est dictée, & magnifiquement celebrée à grand
 nombre de Chantres, & finalement d'Albe Regale
 furent à Bude, où estoit le Roy de Hongrie. Le laisse
 le triomphal recueil & humain traictement faicts
 là aux dictz Ambassadeurs, & reuiens au parfaict de
 leur affaire, tel que tres-honorablement furent re-
 ceus, tout à point feirent leur messaige, & joyeuse-
 ment s'en retournerent, avec lettres autorisées d'a-
 miable vnion, & charge de traicter le mariage du
 dict Roy de Hongrie, & de Madamoiselle Germai-
 ne de Foix, niepce du Roy, & fille du Comte de
 Foix ; ou de Madamoiselle Anne de Foix, cousine
 germaine de la Royne, & fille du Seigneur de Can-
 dale, & fut enuoyé à cest affaire vn Messaiger par le
 Roy de Hongrie pour luy faire rapport veritable.
 Et estoit celuy Messaiger nommé Messire George
 de Versepel, du Royaume de Boheme, lequel eut

1501. du Roy la seureté de confederé appointment, la veüe des dictes Damoiselles, pourtraictures d'icelles prises sur le vif, & joyeuse depesche de tout son affaire. Ainsi s'en retourna le dict Versipel, & rapporta au Roy de Hongrie ce qu'il auoit faict : dont moult fut joyeux, tant pour l'amitié qu'il auoit avec le Roy, que pour la veüe de la pourtraicture des sus dictes Damoiselles. Lesquelles estoient ornées de beauté tant singuliere, que la renommée d'icelles voloit partous les climats du monde. Que fut ce, la veüe de ses yeux pour cest affaire fut souuentes fois & longuement embesognée. A la fois l'une luy duisoit, & puis l'arrestoit à l'autre. Et comme celuy qui de deux choses de tres-excellent pris auoit le choix, estoit en diuerses pensées, sans sçauoir à laquelle se debuoit attacher. Toutesfois à la parfin esleut Anne de Foix, fille de Candale. Et apres auoir sur cele bon vouloir du Roy, & le consentement de partie, transmeit en France le Comte Stephane, l'Euesque de Vesprinie, & Messire George Versipel, ses Ambassadeurs, lesquels arriuerent à Orleans, le
 Decembre. cinquiesme iour du mois de Decembre, en l'an mille cinq cent vn. Le Roy leur enuoya au deuant Angilbert Monseigneur Comte de Neuers, Messire Iean d'Albret, Seigneur d'Orual, & autre grande compaignée d'autres grands Seigneurs, qui bien à point les receurent, & menerent iusques à Blois, où le Roy estoit lors. Tres-bien furent venus deuers le Roy, & traictez à triomphe avec le deffray de toutes leurs mises. Pour traicter & conclure du dict ma-

riage avec les dictz Ambassades feurent ordonnez 1501. le Legat, Cardinal d'Amboise, Messire Guy de Rochefort, Chancelier de France, Messire Pierre de Rohan, Marechal de France, & Messire Valeran de Saincts. Tant fut l'œuvre mis auant, que les dictz Ambassades eurent ce qu'ils demanderent, & la conclusion faicte, le Comte Stephane, Procureur du Roy de Hongrie, espousa la dicte Anne de Foix, comme Procureur sus dict. Ce faict, de là en auant teint estat Royal, comme à Royne appartient de faire, & apres ce demeura là avec la Royne iusques à la my-May ensuiuant.

CHAPITRE LXXV.

*Comment le Roy fut à Paris pour ses affaires, & le Legat Cardinal d'Amboise feit
là son entrée comme Legat en France.
Et de la reformation des Estats.*

LE Roy ayant depesché ce que j'ay dict, & tenu ses Estats, pour faire plus, partit de Blois le tiers iour de Februrier, & tira droict à Paris: Februrier. où fut si bien venu, que les plus grands haultement le receurent, les moyens doucement l'honnorerent, & les petits humblement luy obeirent.

LE Cardinal d'Amboise, Legat en France feit

1501. lors entrée à Paris comme Legat, & là fut receu par la Cour de Parlement, & de tout le Clergé tant somptueusement, que ce fut chose moult solemnele.

Le Roy voulut là sejourner vne partie du mois de Feburier & tout le mois de Mars, pour y traicter de ses affaires, & icelles mettre en Conseil. Et aussi pour mettre ordonnée police au gouuernemēt politique, prouisiō d'equite en la iustice, & reigle de droicteure sur la reformation del'Eglise. Et pour commēcer, à la Cour de Parlement fut premierement la dicte reformation adressée, pour ce que en icelle à la Commission, & escripts des Enquestes, au partaige d'icelles, à la reception & distributiō des sacs, au plaidoyé des causes, à l'alongement des procez, au dire des Rapporteurs, & à la sentēce des Iuges, par dons, promesses, faueurs, & amis, & autres moyens exquis, se pouuoient faire de grāds abus, & tromperies. Aussi fut l'Eschiquier de Roüē interdict, pour les immortelles causes & procez infinis, qui là se tenoient attachez au croc, & iceluy transmüé en vne Chambre de Parlement tenüe au dict lieu de Roüen. Et apres fut la dicte reformation mise sur l'Ordre des Mendians, & sur les Religieux de Sainct Benois. Lesquels en leur vocation penitential, & reguliere profession, par l'octroy de licence de mal faire, ou impunité de vie desordonnée, pouuoient tomber en accoustumée dissolution, & continuelle irregularité. Toutesfois au moyen du remede que sur ce meit le Legat, Cardinal d'Amboise, l'adjutoire de iustice fut commun à tous, l'Estat de Religion remis
en

en voye de saincteté, & le bien de la chose public- 1501.
que entretenu en augmentation de mieulx.

CHAPITRE LXXVI.

*Comment les Iacopins de Paris furent
chassez de leur College, & les
Cordeliers reformez.*



AV COLLEGE des Iacopins à Paris estoient lors trois, ou quatre cent freres du dict Ordre, les vns estudians, & les autres seruans à l'Eglise: lesquels ne tenoient toutes les ceremonies de leur religion: mais en habits & conuersation sembloient estre dissolus. Parquoy le Cardinal d'Amboise Legat en France, & Commis du Saint Pere le Pape sur la dicte reformation, pour iceulx Iacopins reduire en deu estat, leur transmeit les Euesques d'Autun, & de Castellamar, tres-bien lettrez, & plusieurs autres gens d'Eglise, & Seigneurs seculiers, avec les lettres reformatoires du Pape, & censure d'icelles, lesquelles leur furent par les dicts Euesques presentées, & leues, & à eulx declarez les Statuts, vœus, silences, & ceremonies de leur Religion. Et fait commandement expresse par nostre Saint Pere le Pape, sur peine d'excommunication de viure dorelnauant selon la reigle & forme de leur Ordre. Et avec ce de non plus sortir hors de leur dict

Tt

1501. College, si n'est pour aller mendier leur vie, & vesture, ou pour servir aux affaires necessaires d'eulx & de leur Conuent. Et en somme toutes les choses en quoy par la reigle de leur Ordre estoient tenus & obligez, admonesterent iceulx Iacopins de tenir. Lesquels feirent sur ce responce qu'ils estoient Escolliers, & de diuers pays, & de plusieurs Colleges là enuoyez par leurs Gardiens & Maistres de l'Ordre, pour estudier & apprendre science, dont leur estoit requis pour ce faire sortir souuent de leur Conuent, & aller aux lectures des Docteurs par diuers Colleges, & soy trouuer aux disputes de la Sorbonne, & quelquefois sortir de la Ville, pour prendre vie recreatiue, & esueiller les esprits. Et aussi que tenir vie austere, & continuellement estudier, estoient ensemble choses incompatibles, & contraires, voire impossibles à soustenir. Et que autre reformation ne leur failloit pour l'heure, ne n'estoient deliberez d'en auoir, ne de viure aultrement qu'ils auoient appris & accoustumé. Plusieurs autres choses alleguerent, que je laisse. Et tout ce faict, les dicts Reformateurs s'en retournerent deuers le Legat, & de tout ce l'aduertirent. Dont oyant le rapport de la contradiction d'iceulx Iacopins, leur enuoya le lendemain faire derechef sommation cōme deuant avec la main armée seculiere, pour en cas de refus les mettre hors du dict College, & chasser de la Ville, comme rebelles au Roy, & desobeissans à l'Eglise. Lesquels Iacopins de nouveau refuserent la reformation, & contre les gens du Roy se voulurent fortifier dedans

leur dict College, & mettre en defence, avec plusieurs Escoliers de la Ville, qui là estoient venus à grand effort, & armez sous leurs robes longues. Toutesfois par subtils moyens furent iceulx Iacopins tirez hors, & chassés de la Ville de Paris. Mais tantost apres ce rentrent par vn autre costé, & avec plus de douze cent Escoliers en armes furent deuant leur College, voulans iceluy rompre, & entrer dedans. Et là feirent de grands excez, & battrerent leur Gardien, qui là setrouua. Grand murmure, & scandale fut pour cest affaire lors à Paris. Toutesfois autre chose n'en fut, mais vuiderent la Ville. Et ainsi s'en allerent les pauvres Iacopins vagabons, & dispers.

Vn Cordelier nommé Frere Oliuier Maillart, de l'Obseruance, estoit lors à Paris dedans le College des Cordeliers, pour iceulx reformer, lequel auoit avec luy cinquante autres Cordeliers de son Ordre, voulant iceulx colloquer & mettre dedans, pour reduire les autres à l'Obseruance. Or en adueint ce qui s'ensuit. Le Cardinal d'Amboise, Legat susdict, transmeit au dict College de Saint François les susdicts Euesques d'Autun & de Castellamar, pour persister en l'execution reformatoire, & remettre les Cordeliers en l'Estat de leur perfection. Lesquels sçaichans la venue des dicts Reformateurs, descendirent le Corps de nostre Seigneur, & le mirent sur le grand Autel. Et là tous ensemble dedans le chœur de leur Eglise & autour du dict Autel commencerent à chanter *Domine, non secundum peccata*

T t ij

1501. *nostra facias nobis.* Et ainsi que les diëts Euesques entrerent au chœur, les diëts Cordeliers disoient vn verset tout à genoiüls, où il y a *Adiuna nos Deus, salutaris noster.* Et ainsi furent là long temps à chanter Hymnes, Laudes, & Cantiques, & tant qu'il ennuya à ceulx qui vouloient parler à eulx. Dont leur feirent signe qu'ils cessassent, ce qu'ils ne feirent. Mais si tost qu'ils auoient acheué l'vn ils commençoient l'autre. Dont leur fut faict commandement de par le Roy de cesser, & faire silence. Lesquels pour ce ne se teurent, ne finirent leur chant, qui dura plus de quatre heures, & tant, que les diëts Euesques s'en retournerent deuers le Legat, auquel racompterent les choses sus diëtes. Parquoy pour mettre fin à la chose, Messire Iacques de Touteuille, Preuost de Paris, & Messire Iean de Poictiers, Seigneur de Clairieux, & Gouverneur de Paris, avec cent Archers de la garde du Roy, & les Sergens de la Ville, furent transmis au diëct College, avec ceulx qui auoient la charge de la diëcte reformation. Et fut diëct que si les diëts Cordeliers ne vouloient obeïr au mandement Papal, & au commandement du Roy, que ils feroient chassez, comme auoient esté les Iacopins. Et ainsi le iour ensuiuant, qui fut le vingt-deuxiesme iour de Mars, furent les sus diëts au College des Cordeliers, & pour de plus solemnisier la chose, l'Euesque d'Autun mena avec luy Maistre Pierre Bonnin, Procureur general du Roy au grand Conseil, pour assister, & demander raison. Et ainsi tous ensemble feurent au diëct College, où trouuerent les

Cordeliers dedans l'Eglise, comme à l'autre fois, & 1501.
là voulurent continuer leurs chants, comme auoient
ja fait. Dont leur fut fait commandement expres
de par le Roy de cesser, & imposer silence, lesquels
en fin donnerent audience aux gens du Roy, & l'ac-
coiserent. Ce fait, l'Euesque d'Autun leur feit
ostension & lecture des lettres & mandement du
Pape, & commandement de la puissance Aposto-
lique, & sur peine d'encourir les fulminations d'icel-
le, d'obeir à la dicte reformation à eulx transmise, &
de là en auant ne manier par eulx ne par personne
interposée or, ne argent, ne maison, ne lieu, ne cho-
se à eulx commune, ou particuliere approprier, &
de viure selon la maniere de la perfection de leur
estat, qui est l'acte de pauvreté volontaire, & l'v-
nion d'ardente charité. Et de tenir & obseruer tota-
lement la reigle de leur Ordre, & profession, selon
les traditions de leur pere Sainct François, & ainsi
que expressément par les Chapitres du droict Ca-
non leur est enjoinct, & commandé. Sur quoy fei-
rent iceulx Cordeliers responce que sans manier ar-
gent ne pourroient suiure les estudes, ny profiter en
l'auoir. Et sur ce alleguerent aucunes dispenses, &
priuileges Apostoliques. Toutesfois ce nonobstant
se voulurent soubmettre à la reformation d'aucuns
bons Religieux de leur Ordre, pourueu que de leur
affaire ne se mēlassent les Cordeliers de l'Obseruan-
ce, lesquels, comme ils disoient, estoient posterieurs
en leur Ordre, & differens au vœu de leur Bulle. Et
ainsi defendirent iceulx Cordeliers leur querelle, en

1501. monſtrant tiltres, reigles, autoritez, raiſons, & exemples, & feirent apporter en leur Chapitre les Decretales, & Clementines, diſpenſes, & priuileges, & tous les droicts dont ils ſe peurent ayder. Et fault dire que rien ne demeura en reſte. Car en la Congregation d'iceulx Cordeliers eſtoient pluſieurs grands Docteurs & Licentiez en tous droicts. Toutesfois en voyant l'Eueſque d'Autun, Commiſſaire ſur la dicte reformation le dire d'iceulx, & que ſur ce debatoient, appella Maistre Pierre Bonnin, Procureur du Roy, auquel dit que à la main ſeculiere requiſt que iceulx Cordeliers feuffent mis hors, & chaffeſſez comme rebelles & deſobeiſſans. Et voyans ces pauures Freres le pourchas de l'appreſt de leur extermination, & que par force on leur vouloit faire vuidier leur maiſon, les aulcuns d'eulx ſe preinrent à plorer & doulour tant piteuſement, que là n'y euſt homme à qui le cœur n'amolliſt de compaſſion. Les autres deſpouillerēt leurs habits, diſans que plus toſt renonceroient à leur Ordre, & viuroient en Apoſtaſie, que d'eſtre ſoubsmis aux Obſeruantins. Et les autres, comme mats & confus, ne ſceurent que dire, ſi n'eſt que ſils euſſent ſceu que à tant eſtroicte reigle euſſent eſté obligez ja n'euffent fait ceincture de corde nouëe. En ce faiſant là ſurueint vn Cordelier, nommé Frere Mathieu Bellon, Confefſeur, & Aulmoſnier d'Angilbert Monſieur Comte de Neuers, lequel en la preſence de tout le Conſiſtoire eut groſſes & rudes paroles avec Frere Oliuier Maillart, luy diſant que là n'eſtoit ſon

repare, & que bien tost en sortiroit à son deshonneur. Or adueint que ce nonobstant les dicts Cordeliers se voulurent humilier de plus, & eulx soubmettre au chastiment de la discipline de quelques autres de leur Ordre, que le Legat leur voudroit bailler. A quoy ne se voulurent arrester les Commissaires de la reformation: mais voulurent suader & contraindre le Procureur du Roy de requerir l'ayde seculiere, pour chasser iceulx Cordeliers. Dont pour ce ne se hasta le Procureur du Roy, voyant l'offre de raison que iceulx Cordeliers faisoient, & la maniere de la procedure & execution reformatoire, que contre iceulx voyoit faire: telle que on leur vouloit vser de discipline, sans misericorde. Ce qui est vn fleau de Iustice tant seuer, que si l'une sans l'autre est tenue maintes choses aneantir, & destruiet. Pour suiure propos, les Reformateurs pressoient le dict Procureur du Roy de faire mettre la main à ces pauvres Freres, lequel ne s'es-mouuoit de rien. Et voyant l'Euesque d'Autun que autre chose ne vouloit dire, luy demanda tout hault qu'il estoit là venu faire, & qu'il requeroit? Auquel feit response, en se riant, que sur ce autre chose ne scauroit que demander s'il ne requeroit Baptisme, & autre chose ne luy dit. Apres tout fut aduisé, veu que à la raison se rangeoient les dicts Cordeliers, que aucuns d'eulx iroient parler au Legat, & que de tout le different de la dicte reformation concludroit comme celuy qui de ce faire auoit pouuoir amplement authorisé. A chef de ce propos chascun se meit

1501. au retour, & furent pour cest affaire quatre Cordeliers Docteurs parler au Legat. Lequel ayant ouy leur dire ordonna six Cordeliers du College d'Amboise, six de Blois, six de Bourges, & six d'Autun, pour iceulx reformer, & gouverner, & aussi leur bailla Frere Jacques Dautry, du College de Blois, pour estre leur Gardien. En ceste maniere fut procédé en l'executiō reformatoire. Et ce faict, Frere Oliuier Maillart avec ses Cordeliers fut honteusement mis hors du dict College, & hué d'un chascun. Par tout la Ville de Paris estoit bruit de ceste chose: dōt les uns l'approuuoiet, les autres non. Tant alla le cas en auant, que iusques deuant le Roy en feut question telle, que entre le Legat, & le Comte de Neuers paroles injurieuses se meurent, mais le Roy rappaisa tout.

EN l'execution de reformation feut persēueré continuellement, si que apres que les dicts Mendians feurent reduicts en deu Estat, la Commission pour reformer les Religieux de l'Ordre de Saint Benoist feut baillée à deux Religieux de l'Ordre de Clugny, nommez Frere Iean Rolin, & Philippes Bourgoing. Lesquels adresserent premierement leur Commission aux Religieux de l'Abbaye de Saint Germain des prez hors & pres des murs de la Ville de Paris. Et eulx doubans que les Religieux de la dicte Abbaye de Saint Germain ne se voulussent soubmettre à reformation, & que par quelque effort ou defence se meissent en debuoir de repugner contre leur pouuoir preindrent grand nombre

bre de Sergens, & autres gens armez, & ainsi s'en allerent dedans le dict Monastere, & là sans monition ne citation faire aux diëts Religieux, meirent trois d'iceulx dehors le sus dict Monastere, & là feirent plusieurs excez, ainsi que il appert par la teneur d'une Attestation sur ce baillée. Desquelles choses les diëts Religieux appellerent en Cour de Rome deuant le Roy, & en la Cour de Parlement, & formerent leur seconde Appellation sur ce, en la maniere qui s'ensuit: Ce que de mot à mot j'ay translaté de Latin en François.

CHAPITRE LXXVII.

D'une seconde Appellation faicte en Cour de Rome par aucuns des Religieux de Sainct Germain des prez, pres Paris, contre Freyre Iean Rolin, & Philippes Bourgoing, Commissaires sur la reformation de l'Ordre de Sainct Benoit, contenant la dicte Appellation les mots qui s'ensuiuent.



E V L X qui veulent machiner quel que grand forfait, ont de coustume en tant qu'ils peuuent de couvrir la macule de leur vitieuse coulpe sous le tapis de sainte probité. A celle fin que lors que sous l'ombre de telle faulx faintise ils

1501. auront acquis le titre de saincteté, & la faueur du peuple, ils puissent plustost paruenir à leur intétion, & contre ceulx qui leur veulent resister exercer plus facilement leur cruauté. Desquelles choses grandement la chose publique peut estre interessée. Car supposé que toute maniere d'injustice & d'oppression soit dommaigeuse, & mortifere; toutesfois celle qui sous forme de religion & saincteté est perpetrée est bien plus mortelle & damnable; Veu que l'attainte de sa playe à peine se peut euter, & comme le venin mortifere premier elle occit que d'estre apperceüe. Sur ce dit Iesus-Christ en l'Euangile, Gardez vous de ceulx qui viennent à vous en vestemens de douces brebis. Car au dedans ce sont loups rauissans: Ceulx sont saincts Prophetes, & faulx Reformateurs, qui sous ombre de saincteté sont semblant de donner conseil salutaire à ceulx que par fallace traictent & oppriment inhumainement. Certes comme dit Diodorus, les fraudes simulées des Hypocrites deçoient plusieurs, & les diuertissent du droict chemin de vraye Iustice, contre lesquels à toute puissance est à obuier, à fin que si grand meschef plus ne sement, & que plus grief de iour en autre ne se face. Et encores que alencontre d'iceulx, & de tous autres qui grief ou extorsion voudroient faire à aucuns maints aydes de droict soyent ordonnez; si est-il clairement congneu que le singulier remede d'appellation & prouocation est sur ce iuridiquement trouué, par lequel les greuez & opprimez sont releuez & remis sus. A fin donc que les choses

qui soubz feintise de Iustice ou ombre de saincteté 1501.
 indeüement se pourroient faire , ou sont faictes,
 foyent amplement corrigées, & reformées en mieux,
 il est ainsi que nous Frere Iean Lomme, Chantre,
 Guillaume Guerry, Infirmier , & Pierre Gringer,
 Religieux profez du Monastere de Sainct Ger-
 main des Prez, de l'Ordre de Sainct Benoit, pres les
 murs de Paris, soubz la simulation de quelque nou-
 uelle equité, laquelle se nomme Reformatiō, estans
 greuez, & opprimez, voire reduicts iusques à l'ex-
 tresme misere à l'ayde de l'Appellation venons à re-
 fuge pour prouocquer & appeller de Freres Philip-
 pes Bourgoing, & Iean Rolin, Religieux du Mona-
 stere de Clugny. Lesquels au moyen de la dictē Re-
 formation nous ont persecutez de griefues extor-
 sions , d'insupportables charges , & d'excez non
 ouïs, & à toute heure se parforcent de ce faire, disons
 & proposons , & si mestier est nous nous offrons de
 prouuer les choses qui ensuiuent. Protestans que si
 avec douleur nous disons tous nos maux , toutesfois
 rien de vitupere, ny pour dire injure le proposons;
 mais pour ceste fois seulement esclarcir nostre
 droict. A ce moyen baillons ce qui s'ensuit. Et pre-
 mierement que nostre dict Monastere de Sainct
 Germain, duquel nous sommes Religieux, feut jadis
 somptueusement construit & amplement doté
 par les Roys de France, & aussi par le saint Siege
 Apostolique hautement décoré de libertez, priuile-
 ges, & exemptions; Et tellement que nul inferieur
 ordinaire de quelque grande autorité qu'il soit,

Vu ij

1501. nostre Abbé seulement excepté, ne peut contre nous, ou autres Religieux de nostre dict Monastere exercer aucune Iurisdiction, & en tant que Legat à *Latere* dedans le dict Monastere & sur les Religieux d'iceluy ne peut de droict acquerir puissance, ne vsfer d'autorité iudiciaire, si n'est que par le Sainct Siege Apostolique la chose luy feust par expres commise ou specialement commandée. Ainsi que de toutes ces choses il apparroist plus clair que lumiere par des priuileges tres-autentiques baillez par les Euesques souuerains. Et desia y a long temps & maintes années font que dedans le dict Monastere auons pris l'habit de Religion, & apres auoir supporté & approuué entre les mains de nostre Supérieur la charge de la dicte Religion, selon la Reigle de Sainct Benoist, auons obserué & gardé nostre Profession, & selon le possible de nostre fragilité loüablement vescu; Et tellement, que les aucuns de nous ont esté promeus aux Offices cloistriers, & pourueus d'iceulx, & encores de Benefices Ecclesiastiques, lesquels auons tellement administré que en ce faisant n'auons esté notez ou attaincts de reproche de deshonneur, ou de negligence. Attendu lesquelles choses, nul conscientieux nous pourroit iuger debuoir estre chassé de nostre Monastere, ny estre deboutez de nostre Conuent, & compaignée de nos Freres, ou spoliez de nos Benefices, & Offices, & iceulx assignez à autres Moines de diuers Ordres. Neantmoins depuis peu de iours en çale dict Frere Iean Rolin, homme estranger & totalement

inexpert de l'Obseruance reguliere, lequel jaçoit ce 1501.
 que en discipline Monachale ne peut estre exercité,
 pour ce que peu deuant estoit seculier, toutesfois se
 ose faire appeller Reformateur de l'Obseruance re-
 guliere. Et aussi Frere Philippes Bourgoing, hom-
 me noté de vice, ambitieux, & appetant superio-
 rité, lequel par simulation d'equerité, lors qu'il vaque
 à la reformation n'entend au faiet diuin: mais pour
 sa seule cause met les mains à l'œuvre, pour entrer
 en la dignité Abbatiale du dict Monastere. Et vou-
 lant iceulx nous preparer des rests, & embusches, vn
 certain iour avec grosse cohorte d'hommes armez,
 jaçoit ce que à eux nulse meist en effort de resister,
 approcherent le dict Monastere de Saint Ger-
 main, & en maniere hostile entrerent dedans avec
 grande impetuosité & clameur tumultuaire; & les
 dictz seculiers & hommes armez au cloistre & Egli-
 se & autres lieux du dict Monastere feirent entrer
 contre toute ordonnance de droit, & l'honnesteté
 de la Reigle Benedictine. Et là sans citation, ne mo-
 nition quelconque, ou Ordre de droit gardé, &
 obmise toute forme, laquelle les droicts communs
 & les Statuts de la Reigle commandent estre tenue
 en la correction des Religieux, nous sus dictz prests
 deliberez & offrans de tous points obeir à leur com-
 mandement, par force & miserablement chassent
 & mettent hors soubdainement de nostre dict Mo-
 nastere, & au lieu de nous mettent & introduisent
 en nostre Couuent autres Moines de l'Ordre de
 Clugny, & nous separent de la compaignée de nos

1501. Freres, & sans estre appelez ne ouïs nous despoüillent de nos Offices & Benefices, & iceulx indeüement & follement assignent aux diëts Religieux de Clugny. De tout ayde & secours nous destituent, & cruellement nous denient & defendent le retour à nostre Monastere, combien que tres-humblement & avec larmes ayent par nous esté priez de ne le faire point. Et finalement pauvres & nuds sans cause legitime nous enuoyent en exil, & mettent en voye d'Apostasie, en attribuant le vice de cruauté à tiltre de reformatiö. Et apres nous auoir ainsi dejettez, despoüillez & reduicts en extrefme pauureté, les diëts Rolin, & Bourgoing cherchent dans le diët Monastere, dedans lequel aux Infirmes du diët lieu trouuerent vn pauvre Religieux nommé Machi, griefuement malade. Lequel combien que plusieurs iours eust esté attainct de maladie, toutesfois esparance de santé estoit en luy, auquel par ordonnance de son Prelat & de l'Infirmier auoient esté baillez gardes, & ordonnez seruiteurs pour luy administrer ce que pour le salut de son ame & profit de sa santé luy estoit necessaire. Mais le diët Bourgoing tout à coup & sans pitié defend aux diëts ministres & varlets de ne plus entrer en la diët Infirmerie, & ne seruir au diët Religieux malade, supposé que les Medecins affirmassent que le diët Religieux malade sans l'ayde des diëts seruiteurs estoit en danger de mort. Toutesfois le diët Bourgoing respond que de ce ne luy chault, en disant l'ayme mieulx que ce mauuais homme Machi contraire à

ma reformation meure, que plus il viue. Dont ad- 1501.
 ueint au moyen de ce, & par le default des gardes &
 seruiteurs, & de l'administation des choses neces-
 saires, que ce pauvre Religieux mourut piteusement.
 O cruauté inhumaine en homme Religieux, & vice
 trop repugnant au tiltre de perfection reguliere, qui
 en lieu de charitable amour vse d'inimitié odieuse.
 Apres doncques ces dictes choses, iceulx Bourgoing
 & Rolin changent & alterent toutes les anciennes
 coustumes & ceremonies du dict Monastere, & di-
 minuent & amoindrissent de plus de moitié l'Of-
 fice Ecclesiastique accoustumé & ordonné par les
 fondateurs du dict lieu, & par frauduleuses suasions
 & douces paroles attirent à eux aucuns jeunes Reli-
 gieux du dict Monastere, afin qu'ils leur consentent
 & obeissent à leurs nouuelletez, ordonnent & ap-
 pointent dès ce iour que du tout soyons exclus &
 chassez, & que en l'eslection du futur Abbé n'ayons
 voix. A fin que si à nostre Prelat de vieillesse ja debi-
 lité aduient de mourir, ils puissent sans contradi-
 ction à eux acquerir le dict Monastere. Ce qu'ils
 esperent & attendent de tous points. Plusieurs au-
 tres choses incroyables, & non ouyes follement, ini-
 quement & cruellement presument & s'efforcent
 de faire contre nous, & nostre dict Monastere. Les-
 quelles choses estans au grief & dommage de nous,
 & de tous nos Freres, & au prejudice de nostre dict
 Monastere, (qui en ceste Cité de Paris est clair, &
 notoire,) il n'est nul qui clairement ne voye, & en-
 tende que contre les droicts de Iustice, terme d'e-

quité, & forme de discipline Reguliere, nous auons esté oultrément opprimez, endommaigez à la rigueur, & intolerablement greuez. Plusieurs autres causes plaintiues & droicts approuuez de leur Reigle alleguerent iceulx appellans contre les exorsions à eulx faiçtes, disans entre autres choses que tous les droicts proclament & disent que on ne doibt proceder contre aucun que premier ne soit appellé, & que en cause non ouye nul ne doibt estre condamné. Et que la raisó d'equite ne doibt souffrir ne aussi n'est ordonné par l'institution de la Reigle Monachale que en l'extresme correctió reguliere soit procedé que la monition ne soit precedente. En outre proposerét iceulx Religieux que seló les vrais Statuts de la Reigle de S. Benoist, en l'exercice de discipline & obleruance de correction expulsive à tenir & garder contre quelqu'un y a sept degrez. Le premier est secrete Monition. Le second Correction publique. Le tiers, simple ou moindre Excommunication. Le quatriesme, Affliction de Ieufne. Le cinquiesme Flagellation, s'il l'a meritée, & si soustenir la peut. Le sixiesme, Oraison, & priere à Dieu pour luy. Le septiesme, l'Expulsion du Monastere : pourueu que il soit atteinçt d'incorrigibilité, & en propos obstiné. Et aussi que sans grand scandal il ne se puisse receuoir en autre Monastere. Lesquels degrez si par ordre ne sont deüement gardez en correction reguliere, mais en ce aulcunement excedez, discipline reguliere ne se peut dire, mais miculx appeller vengeance, & tyrannie. Notoire chose est
que

que les dictz Bourgoing & Rolin n'ont aucunement gardé le dict ordre, veu que à l'expulsion ont commencé, ce qui est à eulx commencé à escorcher l'anguille par la queue. Dont est plus clair quelumiere que ce qu'ils ont fait ne merite nom de correction; mais de folie, & cruauté. Maintes autres raisons escriptes en droit declarerent iceulx Religieux; lesquels des dictz griefs, maulx, & extorsions, pour eux & tous leurs adherens appellerent au Sainct Siege Apostolique deuant le Sainct Pere Alexandre sixiesme, Chef de toute l'Eglise militante, & deuant le tres-Chrestien Roy Louys douziesme, fondateur du dict Monastere, & Protecteur de la liberte Ecclesiastique, & en sa supreme Cour de Parlement à Paris, en laquelle les rais de Iustice reuissent clairement. De ce propos ne veux plus ma Chronique eslargir, supposé que plusieurs autres bonnes choses soyent enarrées en la teneur du dict Appel. Quoy que ce soit, les dictz Religieux feirent leur dicté Appellation, & icelle releuerent en forme de droit, & plaidoyerent leur cas; tellement que ils feurent reintegrez en leurs Offices, & Benefices, & le dict Monastere deüement reformé.

D V R A N T le cours de ce temps, les Doyen & Chapitre de l'Eglise de nostre Dame de Paris, feirent vne autre Appellation contre l'imposition Decimale, par laquelle clairement declarerent comment par la determination & ordonnance de tout le general Conseil de l'Eglise, auquel toute la verité Catholique florit, la Decime

1501. doit estre imposée. Et defendirent iceulx Chanoines leur Appel, sans vouloir payer la dicte Decime, laquelle feut leuée & payée ailleurs par tout le Royaume de France.

LE Roy estoit lors Paris, à qui de iour en iour sur les affaires de son Royaume, & pour le bien de la chose publique mettoit diuerfes opinions en Conseil, & luy mesme tousiours present, pour conclure sur tous differens selon son vouloir, & l'aduis de ses Conseillers. Et ayant ainsi exploicté par long temps, eut propos deliberé de s'en aller au mois de May ensuiuant delà les monts, pour certains affaires, & choses necessaires, pour le mieux desquelles estoit sa presence requise. Et ainsi sejourna le Roy dedans la noble cité de Paris iusques apres la feste de Pasques.





AGE 17. *Le Sire de la Trimoüille.*)

C'EST Louys deuxiesme du nom Seigneur de la Trimoüille, Duquel sont venus les Ducs de Thoüars, & les Marquis de Royan, & de Noirmontier.

PAG. 18. *le Comte de Ligny.*)

IL se nommoit Louys de Luxembourg, & estoit fils de Louys de Luxembourg, Comte de Saint Paul, Connestable de France du Regne du Roy Louys XI. Les Empereurs Henry VI, Charles IV, & Sigismund, fils du dict Charles IV, estoient de ceste mesme Maison de Luxembourg.

PAG. 34. *Louys d'Ars.*)

VOYEZ ce que dict de luy l'Histoire du Roy Louys XII imprimée l'an 1615, & encores celle du Cheualier Bayard. Par lesquelles il se reconnoist que c'estoit vn des preux de son temps.

PAG. 53. *au Baillif de Dijon.*)

IL se nommoit Antoine de Bessy, & estoit Baron de Trichastel. Son frere Jean de Bessy, Baron de Beaumont, feut grand Gruyer de Bourgogne.

PAG. 151. *Mesire Charles d'Amboise, Seigneur de Chaumont.*)

IL a esté grand-Maistre, Marechal & Admiral de France, & estoit fils de Charles d'Amboise premier du nom Seigneur de Chaumont, Gouverneur & Lieutenant general de Champagne, & de Bourgogne, frere aîné du grand Cardinal d'Am-

X x ij

1501. boise, & de Hugues d'Amboise, Seigneur d'Aubijoux, Duquel sont issus les Comtes d'Aubijoux. P. 188, & 207. *Louys de Bourbon, Côte de Montpensier.*)

IL estoit frere aîné de Charles Duc de Bourbon, Connestable de France, qui mourut deuant Rome l'an 1527.

P A G. 237. *le Côte François d'Orleans, Comte de Dunois*)

C'ESTOIT François d'Orléans, second du nom Côte de Dunois, premier Duc de Longueville, Lequel estoit fils de François d'Orleans premier du nom Côte de Dunois, fils de Jean bastard d'Orleans, qui fut Lieutenant general du Roy Charles VII au recouurement des Duchez de Normãdie, & de Guyëne.

DE Louys d'Orleans premier du nom Duc de Longueville, frere puisné du dict François II, Comte de Dunois, sont descendus Claude, Louys II, François III, Leonor, Henry I, & Henry II, Ducs de Longueville, & François, Comte de Saint Paul, pere de Leonor, Duc de Fronfac.

P A G. 296. *Jacques de Coligny, Seigneur de Chastillon.*)

IL feut Preuost de Paris, Et eut pour pere Jean troisieme du nom Seigneur de Coligny, & d'Andelot, lequel estoit fils de Guillaume, Seigneur des mesmes lieux, & de Catherine de Saligny, fille de Lourdin de Saligny, Baron du mont Saint Jean en Bourgongne, & de Ieanne Braque, Dame de Chastillon sur Loin.

SON frere puisné Gaspar de Coligny, Marechal de France du Regne du Roy François I, feut pere de Gaspar de Coligny, Admiral de France, & de François de Coligny, Colónel de l'Infanterie Françoisë.



EXTRAICT de l'Histoire de
François Guichardin,
Liure V.

QUESTE cose si fecerol'anno mille 1501.
cinquecento:ma molto piu impor-
tanti s'ordinauano per l'anno mille
cinquecent' vno dal Re di Francia,
alle quali per essere piu spedito ha-
ueua sempre procurato di fare concordia col Re de
Romani,per la quale,oltre ad ottenere da lui l'inue-
stitura del Ducato di Milano, gli fuisse lecito assalta-
re il Regno di Napoli, vsando in questo il mezzo
dell' Arciduca suo figliuolo inclinato alla pace, per-
che il suoi popoli, per non interrompere il commer-
tio delle mercantie, maluolontieri guerreggi auano
co Francesi, & perche il Re che non haueua figliuo-
li maschi proponeua di dare Claudia sua figliuola
per moglie a Carlo figliuolo del' l'Arciduca, & per
dote, quando fussero d'eta habile a consumare il
matrimonio(perche l'vno & l'altro erano minori di
tre anni,) il Ducato di Milano:per la cui intercessio-
ne non si potendo cosi prestamente risolvere molte

Xx iij

1501. difficoltà, che interueniuano nella pratica della pace, ottenne nel principio dell' anno mille cinquecent' vno triegua per molti mesi da Massimiliano, dandogli per ottenerla certa quantita di danari, nella quale non fu fatta mentione alcuna del Re di Napoli, con tutto che Massimiliano hauêdo riceuuto da lui quaranta mila ducati, & obligatione di pagarli, accadendo il bisogno, quindici mila ducati ogni mese, gli hauesse promesso di non fare accordo alcuno senza includeruelo, & di rompere la guerra, se fusse necessario il fare diuersione nello Stato di Milano. Perciò rimanendo il Re di Francia sicuro per all hora de mouimenti di Germania, & sperando d'ottenere innanzi passasse molto tempo per mezzo del medesimo Arciduca l'investitura, & la pace, volto tutti i suoi pensieri all' impresa del Regno di Napoli; alla quale temendo non se gli opponessero i Re di Spagna, & dubitando, che a quei Re non si vnissero per timore della sua grandezza i Vinitiani, & forse il Pontefice, rinouò con loro le pratiche cominciate a tempo del Re Carlo della diuisione di quel Reame, al quale Ferdinando Re di Spagna pretendeua similmete hauere ragione, perche se bene Alfonso Re d'Aragona l'hauesse acquistato per ragioni separate dalla Corona d'Aragona, & però come di cosa propria n'hauesse disposto in Ferdinando figliuolo suo naturale, nondimeno in Giouanni suo fratello, che gli succedette nel Regno d'Aragona, & in Ferdinando figliuolo di Giouanni, era itata insino allhora querela tacita,

che hauendolo Alfonso conquistato con l'arme & 1501.
 co danari del Reame d'Aragona, apparteneua legittimamente a quella Corona: la quale querela haueua Ferdinando coperta con astutia, & pazienza Spagnuola, non solo non pretermettendo con Ferdinando Re di Napoli, & poi con gli altri, che succederono di lui gli vffici debiti tra parèti, ma etian-
 dio augumétadogli con vincolo di nuoua affinita, perche a Ferdinando di Napoli dette per moglie Giouanna sua sorella, & consentì poi che Giouanna figliuola di quella si maritasse a Ferdinando giouane; & nondimeno non haueua però conseguito, che la cupidita sua non fusse molto tempo prima stata nota a Re Napoletani. Concorrendo adunque in Ferdinando & nel Re di Francia la medesima inclinatione, l'vno per rimuouerfi gli ostacoli, & le difficoltà, l'altro per acquistare parte di quello che lungamente haueua desiderato, poi che a consegnire il tutto non apparìua alcuna occasione, si conuennero d'assaltare in vn tempo medesimo il Reame di Napoli, il quale tra loro si diuidesse in questo modo: che al Re di Francia toccasse la Citta di Napoli con tutta la terra di Lauoro, & la Prouincia dell' Abruzzi, & a Ferdinando le Prouincie di Puglia, & di Calauria, & che ciascuno si conquistasse da se stesso la sua parte, non essendo l'altro obligato ad ajutarlo, ma solamente a non impedirlo, Et sopra tutto conuennero che questa concordia si tenesse segretissima infino a tanto, che l'esercito, che il Re di Francia mandasse a quell'impresa, fusse ar-

riuato a Roma: al qual tempo gl' Imbasciadori d'ammendue allegando esser si fatta per beneficio della Christianita questa conuentione, & per assaltare gl' infideli, vnitamente ricercassero il Pontefice, che concedesse l' inuestitura secondo la diuisione conuenura tra loro, inuestendo Ferdinando sotto titolo di Duca di Puglia, & di Calauria, & il Re di Francia sotto titolo non piu di Sicilia, ma di Re di Hierusalem, & di Napoli.

Non è forse da pretermettere vna cosa grandissima, tanto piu rara, quanto è raro a tempi nostri l'amore de figliuoli verlo il padre, & questo è che essendo andato a Pozzuolo per vedere il sepolcro paterno, vno de figliuoli di Giliberto di Mompensieri, commosso da grauissimo dolore, poi che hebbe sparfe infinite lagrime, cadde morto in sul sepolcro medesimo.

SOPRAVVENNE finalmente speranza piu certa dal Re de Romani, & però il Cardinale andò a conuenirsi seco a Trento; doue trattarono molte cose concernenti a stabilire il matrimonio di Claudia figliuola del Re di Francia, & di Carlo primogenito dell' Arciduca, con la concessione all' vno & l'altro di loro della inuestitura del Ducato di Milano: trattossi similmente di muouer guerra a Venetiani, per ricuperare ciascuno quello, che pretendeva essergli occupato da loro, & di conuocare vn Concilio vniuersale per riordinare le cose della Chiesa, non solo come diceuano nelle membra, ma etiandio nel capo; & a questo simulaua di consentire

tire il Re de Romani per dare speranza di conseguire il Pontificato al Cardinale di Roano, il quale ardentemente n'aspiraua, hauendone il suo Re per l'interesse della grandezza propria non minore cupidita di lui. Acconsentiuaſi ancora per la parte del Re di Francia nella inclusione de gli adherenti & confederati ſuoi la clauſula, ſalue le ragioni dell' Imperio, per la quale ſi permetteua à Maſſimiliano il riconoſcerle etiaudio contra quelli, che fuſſero, o hora nominati dal Re, o prima accettati ſotto la ſua protezione: rimaneua ſolamente la difficulta principale nell' inueſtitura, perche Ceſare ricuſaua di concederla a figliuoli malchi, ſe alcuni ne naceſſero del Re: & vi era qualche difficulta ſopra la reſtitutione de fuoruiſciti del Ducato di Milano, la quale dimandata inſtantemente da Ceſare non era conſentita dal Re: perche erano molti & perſone di ſeguito, & di autorita, benche aſtretto da prieghi del medefimo non ricuſaſſe di liberare il Cardinale Afcanio, & deſſe ſperanza di fare il medefimo di Lodouico Sforza, aſſegnandogli prouiſione di venti mila ducati l'anno, co quali honeſtamente viuereſſe nel Regno di Francia: ſopra le quali difficulta non eſſendo interamente concordi, ma con ſperanza di introdurre qualche forma conueniente, & perciò prolungata di nuouo la triegua, ſe ne ritornò il Cardinale in Francia, preſupponendofi quaſi per certo che le coſe trattate haueſſero hauer preſto perfectione; la quale ſi augmentò, perche non molto poi l'Arciduca douendo andare in Iſpagna per riceuere

354 HISTOIRE DE LOVYS XII,
1501. da popoli nella persona sua & di Giouanna sua moglie, figliuola primogenita di quelli Re, il giuramento, come destinati alla successione, fatto con la moglie il cammino per terra, si conuenne a Bles col Re di Francia, doue riceuuto con grandissimo honore rimasono insieme concordi del matrimonio de figliuoli.



Fautes suruenües à l'impression.

- R** A G R 16. ligne 15. redirent lifez rendreint.
 Pag. 25. lig. 20. tuos lifez tous.
 Pag. 29. lig. 28. es lifez &.
 Pag. 32. lig. 2. befoin lifez au befoin.
 Pag. 37. lig. 17. estedus lifez estendus.
 Pag. 42. lig. 13. feurent lifez feurent.
 Pag. 52. lig. 27. batailles lifez bataille.
 Pag. 57. lig. 15. des lifez les.
 Pag. 60. lig. 20. Seigueurs lifez Seigneurs.
 Pag. 67. lig. 6. estoit lifez estoient.
 Pag. 104. lig. 25. faire lifez faire.
 Pag. 156. lig. 6. pour lifez par.
 Pag. 159. lig. 21. Donc lifez Dont.
 Pag. 160. lig. 16. aux lifez au.
 Pag. 162. lig. 14. tous lifez tout.
 Pag. 198. lig. 6. c'est lifez ce n'est.
 Pag. 206. lig. 9. Vesc lifez Vesc.
 Pag. 219. lig. 29. les lifez des.
 Pag. 226. lig. 20. apres surprise lifez fur.
 Pag. 227. lig. 12. apres gaignerent lifez à la.
 Pag. 228. lig. 10. ailleurs lifez alors & lig. 17. Vaire
 lifez Varais.
 Pag. 232. lig. 12. aucun lifez aucuns.
 Pag. 242. lig. 19. ainsi lifez aussi.
 Pag. 248. lig. 22. quelque lifez quelques.
 Pag. 259. lig. 12. enuoya lifez conuoya.

Zz ij

Pag. 266. lig. 10. Sicile lisez la Pouille.

Pag. 272. lig. 7. Turc lisez Turcs.

Pag. 284. lig. 6. se lisez ce.

Pag. 315. lig. 20. Poictu lisez Poictou.

Pag. 322. lig. 12. apres regarder meetez vn point &
lig. 22. d'Irbain lisez d'Istain.

Pag. 324. lig. 8. ce lisez le.

Pag. 345. lig. 28. apres Monastere lisez Ce.

